

SPEAKER : “Ka thu in ngaihthlak takzet a, ka thuthlung hi in pawm chuan khawvel hnam zawng zawng zingah hian ka tan ro thlan bik in ni ang. Khawvel pumpui hi ka ta a ni si a.

Exodus 19:5.

QUESTIONS

Starred Question No. 61 zawt turin Member zahawm tak Pu Lalchhandama Ralte i lo sawm ang.

PU LALCHHANDAMA RALTE : Pu Speaker, Starred question No.61-na Finance Minister chhan atan : (a) Kum 2003 – 2008 chhungin Sorkar Treasury khar a ni emg ? (b) Sorkar Treasury khar a ngaih thin hian engvanga khar nge a nih ? ka zawt e.

SPEAKER : A chhang turin Finance Department changtu Chief Minister zahawm tak, Pu Zoramthanga i lo sawm ang.

PU ZORAMTHANGA CHIEF MINISTER : Pu Speaker, kan Member zahawm tak Pu Lalchhandama zawhna kha a chhanna chu hetiang hi a ni e. (a) Kum 2003 – 2008 chhung hian Sorkar Treasury khar a ni lo. (b) Sorkar Treasury khar a ngaih thinna chu Sorkarin Reserve Bank of India-a account-ah sum hman tur a neih tawh loh mai bakah RBI atanga a puk theih Ways and Means Advance leh Overdraft-a a puk hnuah pawh sum a la neih loh cheu hian Sorkar Treasury khar a ngai thin a ni e.

PU LALCHHANDAMA RALTE : Pu Speaker, ka zawhbelh duh chu Sorkar Treasury khar a ngaih hian kharna order kha tunge siam ? RBI lam em ni a siamtu ? Tin, pahnihnaah chuan Treasury khar ngai khawpa sum dinhmun chhia tehna kha tunah khan a han sawi thuak thuak a, khatiang kha engchin hi nge ? Sorkarin sum a neih loh hulhual vang em ni ? tih kha ka zawhbelh e.

PU ZODINTLUANGA : Pu Speaker, zawhbelhna, kum 1984-1998 chhung khan Mizoram Treasury hi official takin holiday tiam lovin khar a ni reng em ? khar ni ta sela, a kharna order leh a number min hrilh thei em ? tih ka zawhbelh e.

**PU ZORAMTHANGA
CHIEF MINISTER** : Pu Speaker, kan Member zahawm tak Pu Lalchandama zawhna kha, kharna order hi tu siam nge tih a ni a. Kharna order hi a hranpaa siam pawh a ngai chuang lova, nitin hian RBI atangin kan State-a kan Finance

Department ti mai ila, khatah khan engzat nge pawisa kan neih ? Ways and Means Advance-ah engzat nge kan lak tawh ? Tin, Overdraft-in engzat nge kan lak tawh ? tih kha heti hian inhrilh reng a ni a. Tahchuan, a hmasa berin pawisa kha hetah neih loh a nih chuan special Ways and Means Advance an ti a, kha kha chu State Sorkar hian mangan thil thua pawisa kan neih loh a, kan zuk hman tur kha dah turin min ti a, chutah chuan vaibelchhe 16 vel tunah hian kan dah a, min tuk a ni a. Kan security anga kan dah kha kan hmang ta phawt a, special ways and means advance a ni a. A daih loh chuan Ways and Means Advance an tih a awm leh a, vaibelchhe 60 bawr vel hman puk theihin min ti a, chu chu kan hmang leh thei a. A daih loh leh chuan overdraft-in kan awm a, pawisa kha a puk theih ta a. Khamia kan hman kha chu phal chin an nei a, chumi chu kan pelh khan, tunah chuan lak theih a ni lova, limit a nih tawh avangin tunah chuan overdraft-a in pawisa puk theih chin tur pawh a zo tawh e, tih kha hriat tawn vek a ni a. A lak theih loh a ni tih RBI khan an rawn sawi mai a. Chu chu Automatic-a helaia kan Treasury ami pawisa a hman theih tak loh chin a ni.

A kharna order kha a hranpain siam a ngai lova, 'in Bank-ah hian pawisa hman tur in nei ta love' tih rawn inhrilhah chiah khan a lak theih loh. Chuti chu Treasury khan lo pechhuak tawh suh u, khar a ngai a ni e tih kha automatic-a hriat mai theih a ni. Chu chu keini chuan a tihzia viau e, kan la khar lova.

Tin, 1994-1998 chhungin khar a ni em tih kha heti mai hi chuan ka'n hre thei lova, a kumte a lo rei tawh a, record en loh chuan ka hre thei lo a ni.

PU ZODINTLUANGA : Pu Speaker, khar a nih leh nih loh kha kan Finance Minister zahawm tak khan a hre thei lova, a lawmawm ka ti khawp mai. Kan Member zahawm tak tak ten nimahte Treasury khar an sawi chamchi a, tuna kan Chief Minister-in khar a awm lo tih a rawn sawi kha a lawmawm ka ti a, ka rawn sawi leh a ni.

PU LALRINLIANA SAILO : Pu Speaker, zawhbelhna. A lunglen thlak hle mai a. Question hluite kan han ching a, Pu Sainghaka zawhnate ka'n hmu a, a lunglen thlak hlein ka hria. 2006 March, 22-a Member zahawmtak Pu Andrew-a zawhnaah khan Sorkar leiba tlingkhawm figure hnuhnung ber a zawt a, vaibelchhe 2313.19 a ni a, 2007 March 29 khan Pu R. Lalzirliana zawhnaah leiba chungchangah vaibelchhe 2634.77 a rawn ti a, a pung chho ta a. Tunah hian ka'n zawh duh zawk chu 2006-2007 financial year chhunga leiba rulh nana Sorkarin a hman zawng zawng tur hi engzatnge tiin a zawt a, tah hian a nuai zawngin nuai 33492.90 a ti a, hei hian a rul ta lo em ni, leiba hi a pung chho zel mai bawk si a. Hetiang hi House zahawm takah zawhna hi chhan a ni thin si a, engtizia nge ni tih ka'n zawt a.

Pahnihnaah chuan ruling MLA zahawm takte atanga ka hriat Kamal Mundra'an kan hnung khan financial year khatah Power department atangin cheng vaibelchhe 45 LOC a nei a, kha kha khawi Treasury-ah nge a pek, khawi Treasury atanga pek nge ni ? Nikhatah heta zawhna chhannaah hian cheng nuai 50 pek theih a ni a, kha kha engtia rei nge; nge ni, a ni kha special-in an ti a mi, Kamal Mundra, Power & Electricity Department vaibelchhe 4.5 man khawi Treasury-ah nge an pek tih kha ka zawt a ni.

SPEAKER : Sorkar Treasury chungchang a ni, mimal account lam kha chu a relevant tehchiam lovin ka hria. Pu Sailothanga Sailo.

PU SAILOTHANGA SAILO : Pu Speaker, ka lawm e. Ka zawh ve duh mai chu kan annual plan, kan plan leh non-plan zawng zawng belh khawm vek hnuah kan leibat tam zawkna kha crore engzatnge tih ka zawt duh a. Chumi awmzia chu kan annual plan zawng zawng aia kan leibat tamna kha vaibelchhe engzatnge tih ka zawt duh mai a ni.

SPEAKER : Kha pawh kha Treasury account leh liabilities account kha thil hrang daih a ni a, a relevant lutuk love. Pu Andrew Lalherliana.

PU ANDREW LALHERLIANA : Pu Speaker, ka lawm e. Kum 2003 atanga 2008 inkar hian Treasury-a pawisa nitin lakchhuah theih ang tur bituk a awm em ? Engzatte nge ni nikhat chhunga lakchhuah theih tih ka zawt e.

PU LALTHLENGLIANA : Pu Speaker, Mizoram mipuiten kan bengah hian thil hlui mah nisela, Treasury khar kha a ri zing hle a, tunhma term kalta khan wawi 36 vel lai khar ni te pawhin a hriat a, a chiang chuang lova, mahse, kan bengah hian a ri tam a ni. Chuvangin, an zawt ta rau rau a nih bawk chuan, tun Session chhung hian Member-te tunhmaa an lo khar tawh zat leh a chhan leh a vang nen min hriattir thei angem ? he House-a Member-te hi tih ka zawt e.

SPEAKER : Pu Nihara hi a bial a hla bawk a, i tih tir leh ang aw ! Pu Nihar Kanti Chakma.

PU NIHAR KANTI CHAKMA : Pu Speaker, ka lawm e. Ka hriatsual loh chuan Tlabungah sawn a hmain Treasury a function-a, thawktute pawh an awm a. Tunah sawn office pawh a awm tawh lova, enge ni a chhan min hrih thei em ? Leh engtingge Sub-Treasury a function theih ang tih ka zawt e.

PU ZORAMTHANGA CHIEF MINISTER : Pu Speaker, kan Member zahawm takte Pu Zodintluanga leh Pu Thlenga zawhna kha hlawm khatin rawn chhang ila. 1994 - 1998 inkar ami Treasury khar tih kha chu kan theih ang ang kan rawn la ang, tun Session chhung hian a list nen kan Member-te kan rawn pe dawn nia, heti mai hi chuan kan Sorkar loh lai a ni a, ka memory-ah a awm bik hauh lo mai a, kan tihsual a ni lova, kha kha kan rawn ti ang e.

Ti, Kamal Mundra-in khawi atangin nge 45 crore a lak tih pawh kha heti maia han hriat chi rual a ni lova, chhui fe chi a ni ang a. Kha pawh kha heti mai chuan ka sawi thei bik hauh lo mai, kha pawh kha, mimal pawisa lak a kha khawi ami nge ? engtik niah nge an lak tih kha Computer-te kan nih loh chuan han hriat mai chi a ni lova. Power & Electricity atang hian Bill la an tam em mai a, han hriat mai chi a ni lo.

Tin, kan Member ten kan duh hi Pu Sailothanga khan plan aia leibat tamna kha a hre duh a, kan plan zat chu crore 1000 a ni mai a, tin, kan leiba hi karawn sawi anga, kan Member zawng zawngin kan hriat turin kan han sem ang a. 1991-2008 inkara State zawng zawng leiba a list ka nei a, chu chu kanrawn pe vek ang che u. Hetia kan sawi theih maiah chuan hei State lian leh a te kanawm a, North East-a State hoah hian a leiba nei tlem panga zingah khan Mizoram pawh kan tel ve a. Khang kha chu Arunachal hian 3012 crore a nei a, Meghalaya-in 3206 a nei a, Mizoram hian 30611, Nagaland hian 30506 a nei a, Sikkim hian a tlem fal a, 1669 a ni a. North East chauh hi kan sawi zo law law ang e. Hei hi March 2008 ending anga kan han chhut a ni a. Tichuan, Tripura hi 5917 a ni a, Manipur hi 4548 a ni a, special category ho - Himachal Pradesh hi 19769 a ni a, Assam hi 21051 a ni a, Jammu & Kashmir hi special category a ni ve a, 22168 a ni a. Kha kha special category ami a ni a. Uttarkand hi 14988 chang kha special category ami an ni a. A dang ho, State dang ho hi chu kan sem dawn avangin sawi lo mai ila. Kum 1991-2008 thlenga kan leiba state zawng zawng list hi kanrawn dah chho ang a, idea kan neih theih nan.

Tin, keimahni state-in Treasury atanga nitina kan pawisa pekchhuah theih zat kha, kan pun chho ve zel a, Pu Andrew-a zawhna kha tuna kan dinhmun hi sawi mai ila, tuna kan dinhmuna kan pekchhuah theih zat chu Aizawl South-ah nitin 50 lakhs kan pekchhuak thei a, a limit-ah Aizawl North-ah nitin 50 lakhs, Lungleiah 25 lakhs, a dangah 15 lakhs. Hei hi tuna kan pekchhuah theih chin a ni a. Mahse, tunah hian han ennawn leh teh u, tunah hian kan pun thei leh tawh mai lo maw, kan dinhmun nen, kan ti a. Pun tumin tunah hian kan en leh mek e.

PU ANDREW LALHERLIANA : Pu Speaker, khawngaih takin ka zawt nawn leh lawk ang e. Tuntum Sorkar hian thiam takin Treasury-te khar lohna turin kan Budget pumpui hi draw hman lo tur khawpa tlemin draw theih tur limit an tuk thin a ni. Chuvang chuan, Treasury hi khar lovin an control a, a tha khawpin ka hria a, chu chu tunah hian kha policy kha la kal zel ngai kan ti em ? tih kha ka zawh belh a ni.

PU ZORAMTHANGA CHIEF MINISTER : Pu Speaker, la ngai tehreng mai, chuti lo chuan pawisa neih zawng zawng Bill lian hmasaa kan tih vek zel chuan hmun dangah pawh an tihdan pangngai a ni a. Limitless-a han tih ngawt theih a ni lova, mahse, khami financial management kha tih thiam a ngai a. A chhan chu, nikhatah khan 50 lakhs, nikhata tih theih loh pawn ni hnih/thum, karkhat tea pawhsei khan a tih theih mai a.

Tin, kan finance dinhmun a that takna chu ka sawi ang khan Treasury khar ngailo mai ni lovin kan Ways and Means Advance pawh hi hman ngailo deuh thawin kan awm a. Special Ways and Means Advance hi nikuma April - May inkara han hman tul zawk kan nei a, chu chu rang takin kan fill-up lehngal a. Chumi tihloh phei chu Special Ways and Means Advance pawh hman ngai miah lovin kan kal chho a.

PU LALRINLIANA SAILO : Pu Speaker, annin State dangte leiba kha min pek theih dawn tho tho chuan...

SPEAKER : Rawtna ka'n siam teh ang, kan House intawm theuh a ni a, zawhna leh chhanna hun pawh hi kalphung deuh kan neih kha mawle, kalphung deuhin i kal tlang ang u aw ?

PU ZORAMTHANGA CHIEF MINISTER : Pu Speaker, a chhangtu-in ka chhan zawh hmam zawhna dang an rawn zawh belh leh a, general discussion, inpawlh nuai nuai ang deuhin kan kal thin a, a chhan pawh ka la chhang zo hman lova. Mahse, kan Member-te zawhna a fiahna atan khan ka duh a nia. State dang Treasury-te khar leh khar loh zawng zawng te nen kha chuanin (midang an lo tawng a) nikhata an pekchhuah theih zat pawh an ni pawh danglam ve reng a ni a, an dah chho ve reng a, a danglam ve reng a. Chuvangin keiniaw pawh a danglam ve reng a, kha kha chu constant lo a ni a. Tin, Financial year tawp a K. Deposit-a dah vak vak ngai thin pawh kha ngailo ang tluk deuhthawin kan awm a, nuai 17 vel chauh tunah hian a ngai a, chu pawh chu anmahnin dah an duh zawk vanga kan tih mai a ni a. Keimahnin kan tihsak ni lovin. K. deposit pawh dah ngailo ang tur khawpin kan awm thei tawh a, a lawmawm khawpin kan hria.

Tin, Tlabung Treasury kha chu function turin kan han duh a, mahse, Treasury a function theihna turin kawng tinreng kan ti a, Bank nena kan tih kawpte a ngai a, hei hi chu tihhram dan kan en a, harsatna chi hrang hrang kan nei rei tawh nain Pu Nihara, kan Member zahawmtak zawhna kha keini pawhin theihtawpin hma kan han la zel e.

SPEAKER : Starred Question 62-na zawt turin Member zahawm tak Pu Andrew Lalherliana i lo sawm ang.

PU ANDREW LALHERLIANA : Pu Speaker, ka lawm e. Ka Starred Question No. 62-na hi kan Minister in-charge Health & Family Welfare changtu zahawm tak chhan atan ka zawt e. Mizoram College of Nursing dinna tura pawisa Central-in a sanction tawh bo aawm em ni ?

SPEAKER : A chhang turin Health & Family Welfare Minister zahawm tak Pu R. Tlanghmingthanga i lo sawm ang.

**PU R. TLANGHMINGTHANGA :
MINISTER** Pu Speaker, ka lawm e. Member zahawmtak Pu Andrew Lalherliana zawhna kha 'Bo aawm leh aawm loh hi chhui mek a ni' tiin ka han chhang a, khamiah khan a nihna tak chu College of Nursing tan hian pawisa dere pawh kan la hmu lo, tih a ni a. Mahse, a zawttu hian a mixe-up a nih ka rin avangin Nursing School upgradation-na tur cheng nuai 150 kan sanction kan hmuh kha a bo leh bo loh tunah hian chhui mek a ni a. Chumi atan chuan Enquiry Committee dinin tih a ni a, report-te an thehltut tawh a. Chumi chu chhui zel tlak niin kan hria a. Chuvang chuan chhui zel turin ACP lamah Vigilance lamahte kan endorse a, tin, chutih lai chuan Finance lamin Special Audit nei turin kan thlen tawh bawh a ni.

PU ANDREW LALHERLIANA : Pu Speaker, ka lawm e. Chhui mek a ni kha a lawmawm hle mai a, nikum kumtawp lampangah changchinbu lar tak Zozamah khan a lo chhuak a, chutah chuan Central Assistance for Development of Nursing Services Upgradation of School atanga nuai 150 Mizoram Sorkarin a hmuh kha a hmanna pawh engkim hman vek tawh a ni tih utilisation certificate pawh Central-a thawnthlak tawh a ni a. Amaherawhchu, hei hi private-a an investigate-in a building atana nuai 70 hi hman tawh ni si hi aawm lo tawp mai a. Building an la nei bawh si lova, khawiah nge a building ti a zawn si loh hi a utilisation certificate hi chu thawn thlak a ni tih chiang takin RTI atanga hmuh a ni. Tin, helaiah hian a chhunga a cheina tur office leh Computer-te leh furniture accessories vela pawisa hman kha nuai 40/50 vel hman aawm a, chumi a hmanna kha RTI record hmangin fel taka chhuichhuah a ni a, a copy pawh neih a ni. Tahchuan, a hmuna va check khan hetiang hian tawi te a bo dan han tihlan ka, duh deuh hlek a.

Helaiah hian entirnan, Xerox Machine-te kha heta 3 lei anga aawm kha Nursing College-a an va kal kha chuan pakhat chiah a lo aawm a.

Tin, Fax Machine Rs. 10,000/- chuang man 3 awm anga helaia bill awm si kha 2 a awm ta a, Laser Machine 5 awm tur kha 1 chauh a awm ta a. Tichuan, Digital Camera manto chi te kha 3 lei si kha 1 chauh a awm a, Video Camera hi 3 lei anga awm si kha 1 chauh a awm a ni. Tin, Book Case, Godrej Almirah lian ang chi hi 96 bill awma lei si kha a taka va en hian 20 chauh a lo awm a ni. Kha kha Rs. 5000/- chuang man a ni a, pakhat ringawt pawh. Tin, plastic chair te hi 390 leina bill awm si kha a hmuna va check chuan 120 chauh a awm a ni. Tin, Computer Table-te pawh a tih zat engmah a awm lova, tin, sawlaia awm miahlo Scanner 5 leia awm te Nursing College-ah a awm silo, tin, LCD an ti a, T.V. pakhat nuai khat leh a chanve awm ang chi te kha 3 lei anga awm si kha pakhatmah a awm lo a ni. Tin, Projector nuai chuang man te kha 3 lei anga awm si kha a hmunah pakhatmah a awm miah lo. Khawngaih takin chumi awmzia chu a pawisa hmanna hi fei takin RTI a zawhchhuah khan nuai 50 chuang vel awm si kha a ni a. A hmuna va enin a building a awm si lova, tin, chumai a ni lova, furniture zawng zawng lei anga awm si kha hmun thuma thena hmun khat pawh a awm si lova, a pawisa bothlau hi han chhutin a tlangpuiin nuai 90 chuang hi chu a bo hrim hrim a ni. Khami kha khawngaihtakin tunah chhui mek a nih chuanin engatinge hmun leh hmunah awlsam taka va kala va ziah a, hhui mai theih tur hi heti taka kan muan le? Khawngaih takin a chhuichhuah hi a hmanhmawh theih em? tih ka'n zawt e.

PU ZODINTLUANGA

:

Pu Speaker, a serious thei hle mai a, khatiang utilisation certificate pek tirtu kan Minister hi kan Chief Minister hianin action a la thei mai lawm ni? tih kha ka rawn zawt duh a. Tin, a pahnihaah chuan nikum tun ang hun maiah Budget Session-ah bawh he Department-ah hian khawl, a hming pawh kan lam thiam loh, sipel chawp pawha sawi hleih theih loh khawl kha, khatiang ang chi tam tak kha kan Saitual bialtu zahawm takin a bo thu a sawi tawh a. Kha pawh kha vawiinni thlengin a chanchin kan la hrelo a, hei kum 1 hnuah kha khawl bo kha an hmu tawh nge inquiry report-in a la kal ringawt tih kha min hrih turin ka rawn ngen duh a. Hetiang ang Department-a thleng fo, lian tham hi kan Minister hian mawh a phur ngam em? tih hi ka'n zawt tel bawh a ni.

PU LALRINLIANA SAILO

:

Pu Speaker, zawhbelhna, a relevant thovin ka hria a, Department khat. Hei, mipuiin kan mamawh em em inzaina hmanrua, nitina kan mamawh accident nikhua pawha kan mamawh, hemi saturating and dressings materials tih tender hi a chhang hniam zawk mizo fa, mizo tlangval Stevenson Peka aia chhang hniam zawk Indian Instrument Manufacturing Company-te hnenah cheng nuai 8 leh sing 4 chuanga chhang hniam zawkah pek a awm em? Tin, hei hian tunah hian buaina a awm deuh tih kan hriat

hnuin emergency-in a order-te an extend leh niin kan hria a, hei hi a dik em ? tih ka zawt a.

Tin, pawimawh em em mai, hemi Mamography Xray Film kan tih pawh hi Aizawl Photo House-in DPAB in an thlanthlap tawh Minister-in a tihbuai avanga he Manufacturing Company Ravi hnenah hianin pek leh a tum em ni ? Hetianga Mizo fate pe lo a, Tax pe lo, Mizoram chhunga tax chunglet lo an pe fo mai hi engtizia nge ni ? tih ka rawn zawt a ni.

SPEAKER : Chhang turin Minister sawm ila. Kan hman loh Mic kha off zel ching ila a tha ang e.

PU R. TLANGHMINGTHANGA : MINISTER Pu Speaker, zawhna neitu Pu Andrew Latherliana rawn sawi kha kan inquiry titute thil han hmuh dan tlangpui nen pawh a inzawl viau te pawhin ka hria a. Kan inquiry tituten a detail-in ka zuk hre lova, ka zuk hmu lova. Amaherawhchu, khami inquiry titute'n an hmuh danah khan hei chu kalpui zel chi a ni tia an rawtna avangin tunah Vigilance Department-ah a tul ang anga hma la turin kan ti a. Tin, chutihruual chuan, Special Audit ti turin kan Finance lamah ngenna kan siam tawh bawh a. Tin, a lawmawm ka tih chu information a neih kha nakinah Vigilance lampang pawhin nachang hria se, a hmanraw neih leh a material neih leh a information neih kha hman tangkaina chang hria se.

Tin, kan Member zahawm tak pawhin, khamiah khan lo welcome-in contribution neih ang angte pawh kha lo remtiin lo phal se ka duh hle a, keipawhin khalai Department anga information kan hmuhtirhah khan a mawhphurtu awm awm te kan kova, tahchuan, hemi item hrang hrang, chumi chu lei a ni a, Almirah, chutiang, khatiang chu. Tin, hei a receipt leh a order-te pawh rawn hmuh theih chu an nei nual a. Amaherawhchu, heng zawng zawng hi, a tu ate pawh kan ringhlel tihna ni lovin, hetiang anga question a lo awm takah chuan, a material hi khawih theihin, hmuh theihin a awm ngei anga, keipawhin a tak hi ka khawih vek duh a ni, ti khawpin tiang chuan kan ti a. Chuvang chuan, khami min han appreciate puia, khalai thil diklo awm theite kha.

PU R. LALZIRLIANA : Pu Speaker, khawngaih takin tuna chhan nghal tur atan, Session hmasa lama Damdawi In khawl bo ka sawi hote pawh kha, kan Minister zahawm tak hian enquiry committee a din nghal a, a lawmawm ka ti a. Amaherawhchu, rinawm awm taka lang,

a tak thleng tak tak lo hi a awmin ka hria a, khalai kha a tak awm silo, enquiry committe a ruat a te ngei pawh, kei min zawt awm lo tak an ni a, min zawh avangin ka hrilh a. Mahse, tumah hrem hi ala awm reng reng lo mai a. Khatiang lo deuh khan thil hi a tih theihin ka hria a, a ti thei tawh angem ? tih kha ka zawhbelh nghal e.

PU SAIKAPTHIANGA : Pu Speaker, khawngaih takin zawhna kha ala tawp lovin ka hria a, kan Minister chhan nghal atan - khatiang ang sum tam tham kha LOC kha thawn vek a nih chuan LOC petu hi a awm ngei ngei tur a ni a, a Department atang khar: khatiang chhui a nih mek lai khan tunah hian suspen a ni em tih kha hriat a chakawm khawp mai a.

PU R. TLANGHMINGTHANGA : MINISTER Pu Speaker, khang zawng zawng kha kan hre vek a, utilization petu te pawh an awm a ni tih kan hria a. Chuvang chuan, kan hmalakna hi kan tichhah tulh tulh ang.

Tin, enquiry titute pawhin an rawn report ang khan kha kha indication a awm avangin final thute chiang lehzuala kalpui turin Vigilance pawh kan sawm tawh a. Chutihlai chuan, Department-in kan tih theih chu special audit nei turin kan ti a, khalai pawh khan kha material kha a awm ngei a ni tihte pawh finfiah chhoh theih nghal kha kan duh dan a ni a.

Tin, suspen hi a tul chuan, a tul leh a tul loh a chu enquiry report-te pawhin a rawn indicate chho zel turah kan ngai anga. Tin, suspen mai aia nasa pawh a tul chuan Sorkarin kalpui zel a tum a. Tin, a thuhrimah kan Member-te a bikin opposition lama Member-te thahnemngaihna leh kha information Pu Zira'n a rawn pek atanga thil tha, khami item mai nilo pawh kha thil a hring tel a ni tih ka hrilh duh a. Khami item pakhat sawi bakah khan sawi tel loh thildang rawn awm ta nawlh, a awmlo a ni tih zuk question pawh a nachang kan hriat lem loh kha a awm ta nawlhate pawh a awm a. Kha kha a hlutna leh a tangkaina kan hmu chho zel a.

Tin, zawhna dangah tuna Pu Zira rawn zawh, remind-na kha zawhna dang a awm avangin tunah hi chuan a relevant lo a, chu chu chhang vek dawn ila a zawhna kha a hranpaa chhanna a awm dawn a. Kan zawhna chhanna hunah khan zawhbelhna a nih chuan Speaker-in a remtih chuan lo zawt belh ta mai ula a tha awm mang e, a zawhna hi ka'n chhang zel phawt ang.

PU H. LIANSILOVA : Pu Speaker, tawi te in khami in sawilai khan enquiry tih lai mek a nih chuan a LOC petu, kha officer kha tihdan phung pangngai chuan enquiry kha a tihkhawloh palh emaw a awm theih avangin suspend a ni ngai a, hrem pawh a la ni lova, kha kha han tih ve mai kha Sorkarin remchang a ti rih lo nge ni tihphung pangngai anga kal kha a tha lawm ni ?

PU R. TLANGHMINGTHANGA : MINISTER Pu Speaker, tihdanphung pangngai hi a tangkai chang a awm a, a tangkai loh zawk palh te pawh thil awm thei a ni a. Chuvang chuan a tihdan phung hria ten Sorkar an advice a.

PU H. ROHLUNA : Pu Speaker, a tangkai loh zawkna tur kha he House hi a hrih thei em ? Chutiang a nih chuan, suspend a tangkai loh zawkna tur kha engnge ni min hrih thei em he House hi.

PU R. TLANGHMINGTHANGA : MINISTER Pu Speaker, suspend leh suspend loh hi House-a rel tur pawh a ni lova, advice chu min pe thei a, helai House atanga suspend order pek mai theih chi pawh a ni lova. A tul in tih leh suggestion ka lo hriat kha tangkai, hmantlakte pawh a awm mahna. Amaherawhchu, helai suspend rawh tih avanga suspend a tha a nih chuan kan ti ang a, a tha zawk lo a nih chuan kan tihna chhan tur a awm lova. Engpawh nise, a tih theih dan zawng zawng leh a that dan tur ber hi kan ngaihtuah a, chutiang chuan kan kal a ni a. Chuvang chuan Pu Speaker, hei nichina Pu Zira zawhna atang khan thil experience ka nei a. Phailam atang pawhin kan Ministry atangin crore 10 lai kan pe che u a, in hmang lova, in hmang har min rawn ti a. Anmahni zawkin pre-condition Engineer-a ti tura min delay avangin hei hi kan la khawih thei lo zawk a ni a. Pre Engineer tih chu Cement ni lova steel structure-a Civil Hospital saw upgradation saw ti turin min rawn nawrlui tlat a. Kein in hei hi practicable lo kan ti a, chumi avang chuan min delay a, chulai kan inchannaah chuan hei material pawh i la lei hlei nem, material leina tur hetah hian 30% vel zel a awm si a, a ti a. Kan lei dawn lo, material lei hi chu a awl lutuk, kan experience-ah chuan Referral Hospital-ah khami atan material lei tur tih a awm a, khami portion khan an lo lei vek a, a building zawh loh avangin an luah thei lova, tunah hian a tuiek tihte leh dahna hmun mumal lo avangin thil engemaw pawh chingpen thei a ni a, khatiang avang khan material lo lei vak hi kan dahna hmun tur leh a function-na hmun tur

building kan zawh hma chuan kan lei dawn lo. Amaherawhchu, tunah a tul ang zela kan hman chawp tur kan material thalo te leh tin, a tha zawk leibelhna tur leh kan hman nghal tur chu thuhra a ni ka ti a. Chutiang chuan kan tang a. Experience kan lo neih tawh atangin material lei hi lehlamah chuan a nuam viau a niang, an lo ti leh mai thin a. Mahse, tuntumah hi chuan kan hmanchawp theih tur a kan dah leh kan utilised theih tur a nih loh chuan min lei hmasak tir lo mai rawh tiin Central-a hotute hnenah pawh kan sawi a ni a. Chuvang chuan, kan hotuten helaia in tih thin leh in beng leh mit in len ang bawh hian tuna kan kal chhovah hian min ngaihpaawimawh leh min tuipui zel turin Pu Speaker, ka'n sawm nghal duh bawh a ni e. Ka lawm e.

SPEAKER : Starred question No. 63-na zawt turin Pu H. Liansailova i lo sawm ang.

PU H. LIANSILOVA : Pu Speaker, ka zawhna Starred Question No. 63-na, Sports & Youth Services Department changtu Minister zahawm tak chhan atan (a) Mizoramah Youth Commission dinfel a ni tawh em ? (b) La dinfel a nih loh chuan engnge harsatna la awm ? (c) Dinfel a nih chuan eng anga hma la thei, hei hi term of reference tur leh eng anga din nge a nih ? tihte kha ka zawt e.

SPEAKER : A chhang turin Sports & Youth Services Department changtu Minister zahawm tak Pu Z.H. Ropuia i lo sawm ang.

**PU Z.H. ROPUIA
MINISTER** : Pu Speaker, M.L.A. zahawm tak Pu H. Liansailova zawhna Starred Question No. 63-na chhanna - (a) Mizoramah Youth Commission 2008 din fel a la ni lo tih a ni. (b) La dinfel a nih loh chuan engnge harsatna la awm tih hi, harsatna a awm hriat a ni rih lova, Youth Commission Bill hi Cabinet ngaihtuah tur leh pawmpui tura hmalak mek a ni. Cabinet-in a pawm chuan Assembly House-ah ngaihtuah tura buatsaih a ni ang tih kha ka chhanna a nih laiin Cabinet-in pawmpui a ni tawh a, Cabinet minute-te fel taka tihchhuah a nih veleh House-ah hian ngaihtuah tura rawn dahluh a ni ang.

PU H. ROHLUNA

: Pu Speaker, nimin lamah te, niminpiah lamah te khan i dinglama thuten Youth Commission din a nih tawh thute kha an sawi thin a. Hei hi tunah hian dinfel a nilo

tih a ni lawi baw si hi he House-ah hianin kan duhthawh luattukah hianin thudik tawklo hi kan sawi leh mai thin em ni tih ka zawhbelh duh a. Tichuan, tunah a bill pawh kan la hmulo a ni a. Chuvang chuan dinfel tawh anga sawi leh mai thin, a thalo hlein ka hria a. A buatsaih dan kawngah pawh kan Sorkarin thalaite mamawhna hria in he bill hi tha takin an buatsaih turah phei chuan ka'n beisei a. Chutih rual chuan tuna kan Session kal mekah hian he Bill hi putluh a ni angem tih ka zawhbelh duh a ni.

PU H. LIANSILOVA

: Pu Speaker, ka zawhbelh duh chu Youth Commission hi party hrang hrangin inthlan kan chuh lai khanin kan zuar theuhin ka hria a, tin, a hma pawhin kan lo sawi tawh a.

Hei Youth Commission hi kan Session apiang deuhthaw hian zawhna ka zawh loh pawhin ka sawichhuak ve ziah thin a. Kan Sorkar hian tuna kan ngaihtlak tak ang khan din tawh ang deuhthawa Chanchinbua chhuahte pawh kha a awm a, a pawimawh zia kan uar nalaiah han ngaihsak ta mai ila. Amaherawhchu, a tak taka kan kalpuinaah hi chuan kan hmanhmawh lo deuh em tih kha, harsatna awm baw silo, kan hmanhmawh lo lutuk deuh a ni lo maw tih kha ka zawhbelhna a ni a.

Tin, pahnihaah chuanin, hma la thei tura kan ruahmanna a pawh kha Cabinet-in a pawm hnuah pawh han inhrilhfiyah theih a nih loh kha, engtizia nge ni, a hmalak dan tur a te pawh kha. Kan Minister hian han sawichhuah a har deuh nge hriat ka duh a.

Tin, chutihrual chuan, tunhmaa kan sawihonaah khan India ramah National Youth Commission hi an din dawn a, chumi zui chuan kan ti dawn a ni e, han tih ang te kha a awm a. Keinin kan lo ngaihtuahnaah leh kan sawihonaah hian India ramah National Youth Commission a ding dawn a, din ve ang u ti lama sawi kan ni lova, kan rama kan thalaite hmakhua ngaihtuahna avanga hei hi ngaihtuah chhuak kan niin ka hria a. Chuvang chuan Sport leh hemi sport lam activity tan mai nilo hian hmannia ka tarlan tawh kha ka'n sawi nawn duh a, a idealistic approach-in kan thalaite hi tuna an problem, employment chungchangah te, tin, azirna sang zawk leh tunlai information technology atarah te, tin, khawvel thila an aspirations hrim hrim atanah pawh an mamawh zir chiang tur leh chumi chu engtia kalpui tur nge tih ngaihtuah thei tur Commission mumal tak hi kan ram hi chuan i din ang u, tih hi kan ngaihtuahna ni turah ka ngai a. Chutiang zawng chuan ngaihtuahna kan hmanh zui leh thei angem tih ka'n zawt duh pah a ni.

PU ANDREW LALHERLIANA : Pu Speaker, ka lawm e. Hei Youth Commission dinna tur hian thalai, zirlai vel atanga hemi pressure chak tak mai awm hian kan Sorkar pawh hi hma a lak tirin ka hria a. Hetiang pressure awm atanga hmalak duhna a nei hi a lawmawm em em a, khatah kha chuan lawmthu sawi tlak pawh a ni. Amaherawhchu, vawiinniah hian a Youth Commission han ngaihtuahnaah khan ka hming a lo tel ve takah chuan a terms of reference turte pawh hi kan la chiang lo deuh niin a lang si a, chutihrualin beiseinaah hna pe deuh puk puk tur leh youth problem han solve deuh zung zung tura kan ngaihna boruak hi a awm deuhhlekk si a, Youth Commission hi din tura tuna Cabinet-in a lo approach tawh a ni a, a terms of reference-te engkim fel taka tih a nih tawh bawk si chuan a hnathawh tur engnge ni tih kha ka lo zawt lawk duh deuh a, kan Minister zahawm tak hnenah hian eng hna nge a thawh dawn a, engtingge Job Avenue a hawn ang a, engtingge thalaite programme a source dan tur hi engnge ni, a blue print in neih ang ang hi House min hrilh thei em ?

SPEAKER : Kan hmanhmawh riau mai a, Bill kan hmu ang a, kan saw'ho ang a, kan la hre mai dawn chu ni awm tak a ni a, nghah tlan theih chu hun a hek lo deuhin ka ring a. Engpawh nise, Pu Lalchhandama Ralte i lo sawm leh phawt ang.

PU LALCHHANDAMA RALTE : Pu Speaker, Youth Commission hi party tin ten kan sawi ri hnem a, chanchinbuah te pawh kan hmu hnem a, chanchinbua kan lo hmuh danin Sorkar hi muangchang lutuk mai leh thalaite hmakhua pawh ngaihsak tawh lova inthlan dawn hnaiha party hruaitu thenkhat ten politics aiawt an tih ang deuha tih tum anga sawi hi a dik reng em ? India ramah hian lo din tawh an awm em ? Mizoram hi a hmasabera sawite hi a dik reng em ? Mizoram Sorkar hi kan lo hmasaberin thalaite hmakhua tur hi a ngaihtuah hmasaber reng em ? tih ka zawt e.

PU Z.H. ROPUIA MINISTER : Pu Speaker, Ngopa bialtu zahawm tak zawhbelhna te, Aizawl North - II bialtu zahawm tak zawhna te leh Tlungvel bialtu zahawm tak zawhna te kha, hei, din a nih leh nih loh chungchang hmannah an sawi ka hre lova, din tura budget-a nuai 48 lo lang kha lawmawm an tih thu an sawi a. Nau lo pian hmaa naupuakpuan te lo tah lawk ang deuh khan National Youth Commission an din dawn a, tih thu hi kan sawi

ka la hre lova, National Youth Commission khuan study group an din a, chumi report chu kan ngaichang tih kha kan sawi thin a ni tih kha ka chhanna nise.

Tin, terms of reference chungchang kha Bill kan rawn pulut dawn a, chutia vawilekhkata kan sawi pup pup te chuan, in la sawi chak ang, i khek rih mai ang u, hetia han sawi zawh sen chi a ni si lova, tih kha ka ngaihdam dilna leh ka rawtna nise.

Tin, in hmanhmawh loh deuh a ni lo maw? tih Aizawl North - II bialtu zahawm takin a rawn zawhna kha, hmanhmawh a har hle a. India ramah khawiah mah an din si lova, a zir tur commission chauh a kha an din a, chumi report chu an pe a, chu chu an exam mek a nih avangin hun rei tak kan ngaichang a, party tin manifesto a ni a, Delhi-ah te kalin tunah chuan office pawh an nei tawh lova, tumah an awm tawh lova. Chuvangin hmanhmawh hleih theih a ni lova, thil la awm ngailo din tur kan nih avangin India ram state khawiahmah din a awm kan hre lova, National level-ah pawh din a awm kan la hrelo, tih kha ka chhanna a ni e.

SPEAKER : Starred Question No. 64-na zawt turin Member zahawm tak Pu R. Lalzirliana ilo sawm ang.

PU R. LALZIRLIANA : Pu Speaker, Land Revenue & Settlement Department changtu Minister chhan atan - (a) Mizoram puma in lo ram chhiah chungchanga ram danin a beisei ang hian mipuite hian mahni self assessment tur chuan kan dan neih hi english a nih bakah a chipchiar/harsa lutuk a nilo maw? (b) A hmangtu mipuite hriatthiam tawh leh an tawng hman ngei Mizo tawnga buatsaih thar tumna a awm em?

SPEAKER : Chhang turin Land Revenue & Settlement Department changtu Minister zahawm tak Dr. R. Lalthangliana i sawm ang.

**DR. R. LALTHANGLIANA
MINISTER** : Pu Speaker, kan Member zahawm tak Pu R. Lalzirliana zawhna (a) chhanna chu - Chhiah khawinna a self assessment for (i) & (ii) hi mipuiten awlsam zawka an hman atan

revised a ni a, saptawng bakah mizo tawng pawhin dahfel a ni tawh e. (b) A form pawimawh zual tih loh, a dan pumpui chu mizo tawnga dah tumna a la awm rih lo.

PU R. LALZIRLIANA : Pu Speaker, Vairengte lam ka han kai daih ang a. Vairengte Sipai ram luah, hei hi Sipaiin lak an tum a, hei hi hun kalta daih tawh atang khan Sipaite nen inremsiamin Agreement-te an siam a. Mahse, hei hi Assessment fel tawh loh vang nge, waviin ni thlenga harsatna an la tawh tak hi thil, harsatna ramin a tawh loh tur eng engemaw han create zel te pawh hi a awl a. Helaiia awm kan duh tak tak chuan pek mai theih a ni lawm ni ? engnge harsatna awm tih hi, helaiiah hian siamfel dan a awm mai lawm ni ? An beidawng hle a, bialtu hi an hrilh nasa a, mahse. Speaker a ni a, tih theih a nei hranpa lova. Chuvangin an ni khu chuan milianin ram an nei ve lo hi a pawl hle mai. Mirethei hlir kan ni a, kan tuar ta a nih hi an ti deuh a. A rethei lam pawk deuh hian thil a tih ve theih tawh lawm ni ? A tihfel sak theih mai lawm ni ? tih ka han zawt a ni.

SPEAKER : Zawnha neitu zawnha chu a relevant tehchiam lova, mahse, a chhan theih chuan a interesting khawp ang a. Tunah Pu Liansailova ilo sawm ang.

PU H. LIANSILOVA : Pu Speaker, ka zawnha hi Land Revenue & Settlement dan a ni a, a relevant thoin ka ring a. Pakhatnaah The Mizoram Land Holding Act kha 2001-ah khan Assembly-in a passed tawh niin ka hria a. Chu chuan kan Mizoram Land Revenue Act zawng zawng kha a supercede ang tih kha a ni a. Tichuan, kha dan kha waviin ni thleng hian a Rule siam a la ni ta lova, kan Land Revenue Administration chungchangah hian a eng dan ber kha nge hman tur tih kha chiang lutuk lo, a hlui kha kalpui ala ni a. Land Ceiling Act-te, Land Holding Control-na tur leh Allotment chungchangte pawh hi dik tak chuan kan khawtlai mah mahin a lang a. Chuvang chuan The Mizoram Land Holding Act kha hman theih turin a Rules-te hi engatinge tun thleng thlenga la puahchah leh peih a nih loh ? Tin, pahnihnaah chuan, kha kha hmantlak loh leh tha tawh lova kan ngai a nih chuan hetiang kum chhung hian engtinge ni dan tha zawk emaw ngaihtuahna kan la hman loh emaw, kan lo hmang tawh em ? kan la hmang lo a nih chuan engtizia nge ni tih kha ka zawt duh e.

**DR. R. LALTHANGLIANA
MINISTER**

: Pu Speaker, a zawhna neitu Pu Zira zawhna han chhan pawh a tha viau a. Amaherawhchu, thil inkhahhnawih a tam mai a. Chuvang chuan hei a tawi zawngin kan'n sawi duh lawk chu, tunah hian kan

Tribal Act, Parliament pawhin a passed, mumal taka implement tura state hrang hranga rawn tihah hian committee pawimawh tak tak tunah hian kan din chho a. A nihna takah chuan Social Welfare Department hi a nodal Department tur kha a rawn ni daih mai a. Chumiah te pawh chuanin ngaihtuahna pawh kha helai chungchang Vairengte chungchang hi a la kal turah khan kan Honorable Chief Minister-te nen kan han sawi a, ngaihtuahna thil a kal chho mek a. Khami avang khan vawiin niah helai harsatna chin chian tur lai kha, helai Revenue lam atangin emaw, Forests lam atangin emaw han chhan a kha a harsain ka ring a. Chuvang chuan an harsatna hre rengin, tiang chuan ngaihtuahna Sorkarin a nei chho mek a ni tih kha ka chhanna ni mai sela a that ka ring a.

Tin, fiah zawk deuh hleka engemaw nakinah chhan theih hun a la awm pawhin ziate leh tawngkate pawhin la inchhan theih turah ngai ila Pu Speaker, a tha ang a, tih kha min lo hrethiam mai sela.

Tichuan, Pu Liansailova zawhna chungchang kha a pawimawh khawp mai a, kan ram hi engemaw tak taka kan ruahman a tha tawh khawp mai a, dan leh dun hi siam chak a harsa viau te pawh a ni mai thei a. Hei ka lakna a la rei vak lova kei pawhin, Revenue hi rinaiin a complicate angreng a, tihsual hlauhawm deuh a nih vena lai a awm a. Kan Revenue Minister hmasate pawh hi a chang chuan kan inbe zawk zawk a, engtinngge ni ang kan han ti a, ka la inzir ve deuh hlek a. Amaherawhchu, kan ngaihpawimawh hemi, tuna kan Member zahawm tak Pu Liansailova rawn sawi kha pawimawh ka ti khawp mai a. Mizoram Land Holding Act, khami implement chhoh zelna tur atana Rules siam a tulna ang chi pawh kha, ngaihtuahna kan nei chho turah han ngai ta ila, uluk takin. Tin, a tul dan azirin kan opposition MLA-te pawh hi kan rawn hreh miah dawn lo, heng thil kan tihnaah hian tih pawh min lo hriat sak sela. Tin, in advise, in thurawn pawh hi kan pawm hle dawn a ni a, pawm theih chin chinah chuan tih kha ka chhanna ni sela a tha ang a.

SPEAKER

: Zawhna pakhat i la leh zawk ang u. Zawhbelhna i duh chuan zawhna dang kan la lo ang a, zawt belh la.

PU LALRINLIANA SAILO

: Pu Speaker, compensate, Vairengte ami kha 193 atangin tunah hian 433 ah a chho a, kan group president hnenah pawh a ram chhungah pawh a thu chauhin kan rawn nei ang a, a pawisa chauh kan duh a, nang chuan a ram i nei leh dawn nia tihte a awm a. 193 atangin 433 chuangah tunah hian a chho a, khawngaih takin min lo ziah sak thei angem ?

SPEAKER : Chhanna hun a tawp tawh naa, tlem a pelh hret pawhin hrethiam mai ang aw.

**DR. R. LALTHANGLIANA
MINISTER** : Pu Speaker, nia, thil enfel tur tam tak hi a awm chho dawn hrim hrimin ka hria a, kan lo en ang, kharg kha chu, kan en theihna zawn zawngah chuan.

SPEAKER : Hun a tawp chiah a ni. List of Business-a kan kal hmain thil pahnih sawi ka duh a. Pakhat chu, kan Member zahawm tak Ratu bialtu Pu Lalduhoma a dam loh avangin kan zingah a lo la tel thei lo a ni.

Tin, zawhna chhanna chungchang thua kan Minister-te an Department theuhah fimkhurna thu hrih turin ka'n ngen duh a. Zawhna chhanna ziaka Assembly Secretariat-a lo lutah hian kan MLA zahawm tak hming a diklo a ziate, subject a dik lova ziate a awm nual thin a. Hei hian hun leh tha tam tak min khawhral tir a. Chuvangin zawhna chhanna an rawn theluh hian fimkhur turin kan Minister zahawm tak ten Department tina zawhna leh chhanna khawihute zawng zawng lo hrih nawn leh thei sela a lawmawm khawp ang.

LAYING OF PAPERS

Tunah chuan Laying of Papers a ni a. Pu Lalrinchhana, Minister zahawm tak paper pahnih "The Mizoram Grant-in-Aids to Village Council Rules, 2007" leh "The Mizoram Special Grant-in-Aid for Housing Rules, 2007" te House dawhkanah lay turin sawm ang.

**PU LALRINCHHANA
MINISTER** : Pu Speaker, i remtihain he House dawhkanah hian "The Mizoram Grants-in-aids to Village Councils Rules, 2007" leh "The Mizoram Special Grant-in-aid for Housing Rules, 2007" chu ka lay e.

SPEAKER : A copy-te sem ni sela. Presentation of Report hun kan hmang ang a. Subject Committee – I Chairman Pu K. Lalrinliana “The Fourth Report of Subject Committee – I, 2007 – 2008 (relating to various Mizoram Houses outside the State and Circuit House at Kolasib) House-ah present turin i lo sawm ang.

PRESENTATION OF REPORT

PU K. LALRINLIANA : Pu Speaker, i phalna leh House remtihain Fourth Report of Subject Committee – I relating to General Administration Department (GAD) hi he House zahawm takah hian ka present e.

SPEAKER : A lawmawm e. A copy sem ni sela. Committee hrang hrangte hian House pumpui aiawhin hna an thawk zel a. report hrang hrangte kan dawng thei zel hi a lawmawm takzet a ni.

Legislative Business kan la ang a. Minister zahawm tak Pu H. Rammawi “The Mizoram Organic Farming (Amendment) Bill, 2008” House-ah introduce han dil sela.

LEGISLATIVE BUSINESS

**PU H. RAMMAWI
MINISTER** : Pu Speaker, “The Mizoram Organic Farming (Amendment) Bill, 2008 hi he House zahawm takah hian introduce phalna ka rawn dil e.

SPEAKER : Kan remti em ? House-in rem a ti a, han introduce sela a tha ang e.

**PU H. RAMMAWI
MINISTER** : Pu Speaker, i remtihna leh House remtihain “The Mizoram Organic Farming (Amendment) Bill, 2008” hi he House zahawm takah hian ka introduce e.

SPEAKER : Awle, tikhan Minister zahawm takin a Bill, "The Mizoram Organic Farming (Amendment) Bill, 2008" a han introduce ta a, a copy kha han sem ni sela a tha ang a. Tichuan, demands for grants sawihona leh thutlukna siarona hun kan hmang ang a, hun danga kan tih ang thovin demand for grants atan hian ni 5 chhung hun kan pe a, vawiin niah hian Minister pathum te demand kan sawiho dawn a ni. Chuan, a mal te tea tilo hian kan tihdan thin pangngai khan a rualin kan lakhawm leh mai dawn em ni ang ? A tha kan ti maw ? Chuti a nih chuan tunah Pu Lalrinchhana, Minister zahawm tak a demand No. 19,34 leh 42 te hi House-ah rawn pulut turin i sawm ang.

PU LALRINCHHANA MINISTER : Pu Speaker, Mizoram Governor zahawm tak recommend-na ang leh i remtihhain ka demand No. 19,34,42 atan cheng vaibelchhe 63, nuai 54 sing 5 leh sang 5 hi kum 2008 leh 2009 a ka hnuai Department-te hman atan ka rawn move e. Demand No. 19, Local Administration department, vaibelchhe 20, nuai 53 sing 3 leh sang 5. Demand No. 34, Animal Husbandry and Veterinary, vaibelchhe 21, nuai 48, sing 6 leh sang 5. Demand No. 42, Transport, vaibelchhe 21, nuai 52, sing 5 leh sang 5, a vaviin cheng vaibelchhe 63, nuai 54 sing 5 leh sang 5, ka lawm e.

SPEAKER : Awle, tunah Pu H. Rammawi, Minister zahawm tak a demand No. 4, 12, 31 leh 32 te House-ah rawn pulut ve sela.

PU H. RAMMAWI MINISTER : On the recommendation of the Governor of Mizoram and with your permission Mr. Speaker Sir, I move the demand No. 4,12,31 and 32 for Rs. 95,15,95,000/- only for meeting expenses during 2008 - 1009 in respect of the following departments - Demand No. 4, Law and Judicial Department Rs. 6,73,45,000/-, Demand No. 12, Parliamentary Affairs - Rs. 26,05,000/-, Demand No. 31, Agriculture Department - Rs. 72,96,05,000/-, Demand No. 32, Horticulture Department - Rs. 15,20,40,000/-, Total - Rs. 95,15,95,000/-. Thank you Sir.

SPEAKER : Tunah Minister zahawm tak Pu K. Sangthuama a demand No. 17,30,37 leh 41 te House-ah rawn pulut sela a tha ang e.

PU K. SANGTHUAMA MINISTER : On the recommendation of the Governor of Mizoram and with your permission Sir, I move the demand No. 17,30.37 and 41 for Rs. 127,32,30,000/-only for meeting expenses during 2008-2009 in respect of the following departments - Demand No. 17, Food, Civil Supplies & Consumer Affairs - Rs. 103,54,65,000/-, Demand No. 30, Disaster Management & Rehabilitation - Rs. 7,71,60,000/-, Demand No. 37, Cooperation - Rs. 8,97,40,000/-, Demand No. 41, Sericulture - Rs. 7,08,65,000/-, a vaiin Rs. 127,32,30,000/-.

SPEAKER : Le, tikhan Minister ten an demand-te an han pharh ta a, kan sawiho ang a. A tawpah kan remtihpui leh pui loh na kan la ang a, kan buk dawn a ni. Demand sawiho hi a tlangpuiin kan rei thin a, vawiinte pawh rei leh deuhhlak turah inggai ila. Chuan, demand 3 lai mai kha a ni a. Engchen nge hun kan inpek ang ? Nidangah khan Minute 10 Group Leader-te, a aia tam deuh kan inpe thin a, kha kha a tawk leh mai em ? 23 velin kan sawi kha chuan a rei duh leh fu thin a, a nih minute 10 i ti leh mai ang aw. Tunge han sawi hmasa ang le ?

PU ANDREW LALHERLIANA : Pu Speaker, hei, kei hi kan Group-ah hian keimah chiah ka awm a, kha kha min favour thei lo maw, tlema tam deuh kha.

SPEAKER : Engtingge ni charge inpekna lehkha a awm em te kan han ti dawn em ni ? Ni e, a theih chin chinah kan lo hre dawn nia. Aw, Pu R. Lalzirliana.

PU R. LALZIRLIANA : Pu Speaker, ka lawm e. Demand No. 31-na leh 32-na lampang hi han hrutkual phawt ilangin. Hei, Maite han ti hmasa ber ila. Maite khua khi an taima hle mai a. Tampui kum pawh hian kuminah hian buh an ngah hle mai a, buh 100, 200 neite tiang khanin an awm a. Chuvang chuan anni hi duhsak tha ka ti a. Hei Mizoram hi Lalpa zawnchhuah ram kan ti a, mahse. Israel ramte mitin kan zu hmu ve a, a inang lo hle mai a. Keini kham bangbarek hnuaiah kan awm a, anni chu a hmun a nuam hle mai a. Maite khua khi Israel ram ang deuh a ni a. Kumina an lo

neihte khi a tha khawp mai a, khing lai khi project lian tham deuh hleka han siam sak thain ka hria a. Chuvangin Minor Irrigation lampangte hian la sela, mitaima khua na na na hi chu kan duhsaka kan tih hian Sorkar pawhin achievement kan nei ang a. keimahni khawdang pawhin entawntlak an ni tih hi kan hria a. Chuta tang chuan kan changkang zel dawnin ka hria a. Hei hi hela: House zahawm takah hian ka'n sawilang duh a ni a.

Kuminah hian thlai chi nikum lamah thlai chi semte pawh kan hmu a, ka zawhnaah te pawh a lo chhuak a, a tam nangiing mai a, thlai chi thamite pawh kan sem a ni a, amaherawhchu, Sazu seh kum a nih avangin a thar chu hmuh tur a awm hranpa lem lova. Engpawh nisela, kha thlai chi sem kha a chhiat a that lam ka sawi em em dawn lova. Kuminah erawh hi chuan kumdangah kan lo hlawhchham deuh a nih pawhin nikum lamah Sazuin an thlai chi tur thingtlanga an neih chhun chhun pawh kha a seh zawh sak hlawm avangin kumin erawh hi chu kan Sorkar hi kan pawk deuh thain ka hria a. Amaherawhchu, chutih lai chuan a hun takah sem thin ni sela. Tunah hian sem tan a hun tawh a ni. Amaherawhchu, Agriculture leh Horticulture lam han en hian engmah chutiang ang hmalakna leh chutianga sem thin ang chu DAO han zawt ila, a la awm miah lo mai a. Hei hi chu kan Sorkar hian hmanhmawh lehzuala an tih tur ang ang an tih hi a pawimawh hlein ka hria a, chu chu uar takin ka'n sawi hmasa duh a ni.

Tin, hei, cold storage hi sawi leh ka duh a. Vairengte ami hi matric tonne 3500 lai dah theihna tur a ni a. Hei, hmanni khan Congress lam atangin kan hotute, Action Committee-te an zuk kal a, a tawih nasa em em mai tih thu an rawn sawi a. Press Conference pawh an nei hial a ni a. Hei hi thutak a ni a, Sorkar lam atangin an han chhang a, 'khu khu a tha a ni' an ti. Engpawh nisela, a tha a nih chuan, khami kan hmanng dawn a nih chuan khata dah tur a lawh dante, a dah chi te, khang zawng zawng kha Sorkarin kan hriattir tur a ni. Hriattir a nih si loh lai leh khatianga anga an dah hnua a chhia rawn sawimawi leh ringawt kha chu miin awm an ti lova, a mawi pawh a mawi lova. Sorkar failure a ni hrim hrim tih hi kan hotute ka han hrihl duh a.

Chutiang a nih laia thalo tak mai a lo awm lai chuan he Department hian hetiang hian an ziak a. "The Department being happy with their work has awared Lalit Project Private Ltd. another project viz construction of 10,000 matric multipurpose cold storage at Champhai. Pahnihna, rectification and renovation of Serchhip cold storage" an ti a. "The product store were in good condition while taking out from the store" a ti a. Heng hi mit ngeia zuk hmutute tan a chhiat zia an hmu a, an hria a, khami an thiar a, an hal a, a chhiate kha a buaipui awm tawh nak a laiin kan Sorkar berin rawn sak vak mai a, tender pawh awm reng reng lova hetiang ang cold storage pahnih han pek belh leh ringawt mai hi chu a zialo hlein ka hria a, hei hi chu hna a la thawk tan lo a nih chuan tender-te pawh tender ve leh sela, midang tittha zualte pawh en awm tak a ni tih thu kha Pu Speaker, uar takin ka sawi duh a.

Tin, Agriculture leh Horticulture-ah tho khanin, hei Mamit lam hi nikum hmasa lamah te, nikumah te, a tã̄m lo pawh kha Serthlum a tã̄m zo vek a, hei hi an buaipui em em mai a. Natural calamity area-a puang turin kan Sorkar pawh hi an duh a ni. Amaherawhchu, a harsa deuh a ni ang, tã̄min arawn nang si a, anmahni chhawmdawlna hi Sorkarin ngaihtuah ngei sela, chu chu a pawimawhin ka hria a. Sawi tur tam tak a awm a, thil dang tam tak sawi tur avangin ka sawi thui hman lo ang a.

Pu Speaker, demand No. 19. Hei, BPL sum, Central atangin a vaiin nuai 1779 leh sing sarih leh sangthum tunah hian kan hmu tawh a ni a. Tunhna 2006 - 2007-ah hian nuai 345 kan hmu a, chu chu Aizawl khawpui bikah V/C 78 vel awm angah lo ngai ta ila, EPL sum an hmuh chu han insem ta sela, nuai 4,39,743 theuhin an chang thei a ni. Amaherawhchu, V/C len dan azirin hei hi a ni vek thei lo turah ngai ila. V/C te hian hei hi changlo hleah an inngai a, chuvangin hei hi chhui zui a ngai hlein ka hria a. Kumin 2007 - 2008-ah hian nuai 140 nei niawm taka hriat a ni a, chu chu V/C 78-in an insem chuan nuai 1,79,480 velin an chang thei a ni. Chutiang a nih lai chuan vawiinah hian an hmu thalo hle tih BPL Association lam atangin hriat a ni a. Hengte hi khawngaih taka min lo chhui zui sak a, BPL sum lehzel hi chu hmundanga pawhpen sak lovin, a Department ang pawh hian fimkhur zual bika hna an thawh hi a pawimawhin ka hria a ni.

Tiang chuanin tunah hian ka'n sawikai leh duh chu, V/C te hian Department tinah engnge ni an power tih hi ka zawt a. Power function leh khatiang dan ang taka engmah han sawi theih an neih loh an sawi deuh vek a ni. Hetiang hi kan tihchian deuh ngaiin ka hria a. Vawiinah pawh hian ka sawi duh hi mawlmang inti mai thei a. Amaherawhchu, ka ngaihtuahnaah chuan V/C ten vawiinah sa rate, sa hring market-ah an check a, an ñ̄uh angin rate an siam a, an duh duhin an ti a, hei hi V/C hi ka dem miah lo a, Sorkar hi khawiah nge a awm tak ka ti a ni. A nihna takah chuan khawpui market-ah chuan Trade and Commerce tih tur ni awm ang takin allocation-ah hi chuan a awm a ni. Amaherawhchu, a ti tute hi chu kan V/C te an ni tlat mai. Mipui hmangaihna avang te. khalai V/C-te khanin an duh duha sa rate an chhiar a diklo a ni an zu ti ta a. Hnathawktu an hmulo a ni, dan ang chuanin, market officer-in sa rate-te chu a tuk ang a, chutiang aia sanga hralh an awm chuan Rs. 1000/- thlenga chawitir theih a ni tihte pawh hi dan angah chuan a inziak vek a ni. Amaherawhchu, market officer kha Trade & Commerce-in a va dah a, tih an tum bawk si lova, vawiinah hian he ramah hian Law & Order khawiah nge ? Dan leh Thupek kengkawhtute an awmlo em ni kan tih thin hi he thilah pawh hian a dik em em a ni tih hi a lo langin ka hria a. Chuvangin kan V/C te thahnemngaihna hi an kuang lo an nawr a ni, miin an rawn tih duh niah chuan thiam loh an chang palh ang tih ka hlau a, chuvangin, Sorkar hi inrawlh rawh se, tiin ka rawn ngen a ni.

Tin, Demand 34-na kha, warning a rawn ri leh tawh na a, han kai leh lawk ila. Hei ni 22 January, 2008 ah khan Zokhawtharah hian Vety Doctor ten Vawkte an man sak a ni. A hming pawh heta hi ka ziak vek a.

mahse, ka la sawilo mai ang a, he thil hi Vety Department hotute hnenah pawh ka va hrilh tawh a, a chhan chu, ni 22 tlaiah hian he Vawkte 7 an man sak Hmingthanzauva, Keifang, ka bial ami ta a ni a. Ni 22.1.2008 tlaiah hian Vawkte hi a hralh leh vek a ni. Chu a Vawkte hralh man chu a neitu hi pe leh si lovin amah hian a tel ta mai a, hei hi a diklo em em a ni. Vety Directorate-ah ka va hrilh tawh a, min ngaipawimawh lo nge, ngaihpawimawh tlakah an ngailo tih ka hre lova. Amaherawhchu, vawiinah hian he Doctor hi mualpho taka he House zahawm taka sawi mai lovin, tun atanga thlakhat chhung hian Pu Speaker, an pe leh thei mai lawm ni ? Vawkte diklo a nih a, Burma atanga lokal a nih a, an kaphlum a nih chuan thudang a ni. Mahsela, hetiang hi dik ka ti theilo reng reng a ni. Ciuvang chuan khawngaih takin he Vawkte hralhna man hi pe leh turin ka ngen a ni. Tiang chuan sawi tur tam tak a awm a, Pu Speaker, ka sawi tur ber pawh kha ka hmanhmawh lutuk hian ka hmu zo lo mai thin a.

Supply Department lamah pawh hian sawi tur hi ka ngah khawp mai a, kha, a lo ri leh ta der mai a, Supply Department Minister chu a thaw dep dep lai kha a thaw ta lo dawr a nih hi, ka duhtawk mai ang e. Chhim lama ava zin kha a ni ber a, thil diklo tam tak ava khawih a, a Motor ken an chhe phawt a, chutah Pu Speaker, Pioneer Motor nen an insu leh a. Rs. 20,000/- chuang an chawitir a, khangte kha khawiah nge an siamtir han chhui zui zel pawh kha a chakawm hlein ka hria. Hemi Supply Bill kan tihdan kawng hi Pu Speaker, siamrem a ngaiin ka hria. Miharsa leh rethei zawk ten Supply Bill an hmu thei lova. Retailer Bill an hmu thei lova, nimahsela, milian zawk ten an leisak a, an leisak veleh khan LOC an inpe leh si a, khalai kha mirethei zawk pawhin Rs. 20,000/-/30,000/- hlohin khatiang khan an leitir a ni. Hei hi a pawl kati em em a ni. Tun hnuah chuan Minister leh a thuihhruaite ho hian sim thei tawh sela ka duh khawp mai. Ka lawm e.

SPEAKER : Kan va insum ve, a tawp lamah khan kan duham leh hlawm viau si ang a, Pu Saikapthianga.

PU SAIKAPTHIANGA : Pu Speaker, ka lawm e. Hei Department lian pui pui leh pawimawh deuh deuh vawiinah hun tawi teah kan sawi dawn a, kan sawi seng hauh lo ang a. Amaherawhchu, pawimawh zual ni a ka'n hriat tlem tlem ka han sawi zung zung ang a. Demand 31-na Agriculture-ah hian, hei Agriculture hi khawvel/India/Mizoramah Department pawimawh tak a ni a, rawt duh tlem ka nei a. A hmasa berin buh chi lei chungchang hi hmanhmawh leh fimkhur a ngai hle a. Lo hal hun kan thleng der tawh a, Buh chi hi kan sem dawn a nih chuan thapua kan

thawh loh chuan Sorkarin a sem dawn tih nghah leh anmahni tana lo tuh tur neilo tan chuan hun a liam zel dawn a. A bikin Western Belt-ah Tai ching area kan nei a, buh chi tha ngei a nih loh chuan tãt tanpuina tur leh chhawmdawlna tura ngaih hi tãt hruai a ni leh palh ang tih a hlauhawm a ni.

Tin, Agriculture leh Horticulture sawi kawp ilar. Thlai chi leh kuthnathawktu chi hrang hrang kan tanpui hi kan enzui tha tawk lova. A kum lehah a hlawk em, engnge an thara, an thlai phun leh tuh, tih atangin engnge tih khan en uluk a, tan lak a tul hle a ni.

Demand No. 32-na, Horticulture-ah hian, Mamit District pumpui hi Mautam hmãin Serthlum a tãt avangin nasa takin kan harsa a, kan sawi zing tawh a. Tunah phei chuan Mamit District pum Upa pawlin a Data te khawnin Sorkarah mumal takin an thehluut niin ka hria a. A tanpuina ang zawnga Sorkarin kan ngaihtuah sak hi a tul hlein ka hria. Chu chu kan thei ngang lo a nih pawhin Serthlum hi Mautam hma kum 10 velah a lo tãt ziah a, Mau a lo tãt leh tawh a, kumthar atang hi chuan heng Project hi lak tan leh theih a ni em/nilo em tihte mithiamten survey neih zung zung theih nise, chutiang a nih tawh chuan, kumthar atang hi chuan kan ser huan hmun ruak awm mai mai, zau tak tak neiah khuan Serthlum tiak emaw, chutiang ang chu Sorkar hian bul tan leh tawh a hunin ka hria. Chuta tan chuan Department leh Sorkar hian hmalak tan nise tih ka rawt duh a.

Demand 19-na, Local Administration Department. Kan V/C te kan enkawl dan leh vawiina kan hmandan hi diklo hle maiin ka hrie tawh a. Hunin a zir tawh pawh a ni ang a, V/C te hi thuneiha nei mang lo, milian kal buaipui tawk velah kan hmang tawh a. Chuvang chuan, tun aia thuam that a hun hle a ni. MCP party phei chuan V/C leh Ministry inkarah hian Administration in ti ilar, chutiang chu kan policy-ah khan fel takin kan telh a, chu chu a theih loh pawhin tun aia power sang zawk hi kan V/C te kan pek a, kan thuam that hi a hun hlein ka hria, chu chu ka'n sawi leh duh a.

Pu Speaker, tãt kum a ni bawk a, Food & Civil Supply chungchang hi sawi tur a tam hle mai a, keini Tripura leh Bangladesh ri ho hian harsatna chikhat kan nei a, sawi hrehawm viau mahse, sawi ngaiin ka hria a. Buhfai hi kan duhtawk kan hmuh loh mek lai hian keini tlangdung Tripura-ah khuan a lut nasa em em mai a, Retailer-te through loh hian kan Storekeeper-te an bialtu MLA chuan a sawisel deuh a ni in tih pawhin pawl pawh ka ti chuang lova. Buhfai harsat lai a ni a, hengah hian Sorkar leh Department anga enfiah deuh ngaiin ka hre ve a. Tin, kan Buhfai buk tlinglo lutuk hi Mizoram mipui, harsa zawk hian kan tuar nasa hle mai a. Hei hi chu siamthat deuh dan a awm lo emaw ni chu aw ka ti a. Keini MLA hoina kan ration, store-a lak takngial pawh hi a tling lo nasa em em mai a. MLA tena kan lak buhfai hi buk a tlin loh chuan Zokhaw kilkhawrah phei hi chuan a tlinglo nasa. Chuvang chuan, kan tãt hi a tizual nasa in ka hria, hei hi he House-ah pawh hian tunhma atangin sawi a hlawh nasa em em mai a. Chuvang chuan, hei hi kumin pawisa vang bawk, ei tam nasat kum bawk si ah hi chuan tun aia strict zawka enkawl a ngai hlein ka hria a.

Tin, a bik takin hmanniah ka sawi tawh a, khawthlang lamah tunah Teirei Lei a chhia a, an buaipui mek a, Kanhmun lam atangin kawng an lai a, ruah a sur hlek chuan Truck hi a kal theilo reng reng a ni. Chuvang chuan tun thal chungga a bik taka heng lamlian tlangdungte hi Sorkarin hma a lak nasat loh chuan buhfai phurh chungchangah kan harsa hle dawn a ni tih kha Sorkar thuncitute ka'n hrilh lawkin ka'n chah duh a. Tin, kan Buhfai leina tur pawisa lo lang hi nichinah kan han sawi khawm a, Buhfai leinaah hian harsatna a awmlo kan ti chung chung hian, harsatna a awm ang tih hi ka hlau khawp mai a. Chuvang chuan, Department engngemaw zatah pawisa a pun dan inang deuha kan han dah thliah thliah ai hian fur pui a tlak hma hian tuna Central atanga Buhfai kan hmuh aia tam hi hmuh dan Sorkarin ngaihtuah a, leina tur hi tun aia tam pawisa hi kan neih a tul mange aw ka ti a.

Tin, tām chungchangah hian kan enkawl danah hian la fel tawk lovin ka hria. Ka hriatsual loh chuan District tinah tām committee, emergency committee ang tein kan han siam a, an han report a, Mamit District-ah pheii chuan kartin report hi a lo kal ziah a ni, V/C kaltlangin. Mahse, he report hi a accurate lo teh mai a, Buhfai awm viau a report-ah te hian a awmlo fo thin a, tin, tam chhungkua an report-te pawh hi anihna takah chuan a hmuna kal lemlo a kan officer-ten an report a ni fo mai a. Tin, hmanni lawkah khan tam tanpuina ang deuh pawisa kan Kawrthah Civil SDO khuan a sem a, a sem dan te chu a mak khawp mai a, a hre hmasa sa khan an la mai, chhungkhat atangin engemaw zat ten an la a, puan mumal pawh awm lovin. Hengah hian tun ai hian MLA te hi inrawlh ve theihna tur venue hi siam sak kan ngaiin ka hria. District-ah tām endiktu committee kha din a ni a, waviin thleng hian hmalakna a la awmlo reng reng a. a insawi tam thei deuh kha an tam nasa ta mai em ni tih awl deuh mai a ni a. Chuvang chuan, kan tam dan leh tanpui kan ngaih dan pawh hi tun aia chianguang deuh leh fel zawka tan kan lak vat vat hi a tulin ka hria. Chu chu Pu Speaker, hun tawi teah hian pawimawh zual ka tih te han sawi chhuah ka duh a.

Tin, Disaster Management chungchangah hian vawikhat kan Minister zahawm takin committee-ah min rawn ko ve a, chutah chuan rawtna ka nei a, tunah hian ka rawt ang chiah chiah chuan buatsaih nilo mahse, enge maw hmalakna chu a awm niin ka hria. Hei a bik takin tui tla kan buaipui chungchangah te hian kan pheik beih nasa lutuk a, harsatna hi kan insiam belh nasa em em a, a Disaster Management atang chuan a awm thei lo a nih pawhin kan Police Battalion tinah hi chuan tui tla zawng thiam bik, senso tlem zawk, mipui pawh tibuai zau lo zawka team kan siam hi a hun tawhin ka hria, a pawisa lam chu sawikai lo ila. Chutiang chuan kan ram hian ruahmanna kan neih a hun ve tawhin ka hria, chu chu Police Force lam atang hian a awl berin ka ring a, chuta tang chuan District hrang hrangah kan Police Headquarter-te, a Battalion ang pawhin Battalion Headquarter-te pawh kan han nei tan a, heng hi chutiang anga hman tangkai theih chuan buatsaih ila, mipui kokhawma, inzirtir ringawt lo deuh hian kan ram hian kan that phah ang tihte ka beisei a, Pu Speaker, hun tawi teah chung pawimawh ka tih zualte chu ka rawn sawi ve a ni. Ka lawm e.

PU S. HIATO

: Pu Speaker, ka lawm e. Tukin Chanchinbu ka hmuhah khan kan Chief Secretary leh mipawimawh te tām chungchangah an committee a, chhuanchham kan awm love tih kha kan hmu a.

Demand 17-naah ka'n tan ang a. Chhuanchham tak tak chu kan awmlo mai thei a, mahse, buhfai nena chaw ei lo hi chu kan tam a ni tih ka sawi hmasa duh a. Pu Mani Shankar Ayar-ina Lawngtlai bial Hruitezawl a va tlawh khan fairelbel a hawng a, buhfai pakhatmah a awm lova, a sirah chuan Mai, Bahra leh Bal a awm a, zawngsa rep a awm bawk a, chu chu an chhum a, an ei a, chhuan chu an chham lo, mahse, buhfai a tel lo a ni. Chutiang chu tam tak kan awm a ni tih hi ka sawi duh a. Chuvangin nimina ka sawi ang khan a pawimawh ka tih ber ta chu kan Supply Minister hi a chungah lawmthu sawi tur ka nei a, tu huatthu suhah a mah anga Department ngaihsak hi chu kan awm lo a ni. Mahse, amah ringawt chuan a power a limit si a, Buhfai a ngah tawk si lova. Department-in a daih tawk bawk si lova, chuvangin ka suggestion ang khan kan Chief Minister pawh hian vawikhat tal hi chu Helicopter-in Mizoram khaw harsa zualah hian min tlawh sak teh se. A hmun takah hian min asses sak selangin he tam hi kan do chhuak ang tih ka ring a, ka sawichhuak duh a ni.

Tin, mahni bial lam a ni a, a sawi loh theih loh a. Saiha District chhungah hian distribution centre pathum kan nei a, Saiha hian Saiha leh a chheh vel khua engemaw zat a chawm a, quintal 76000 hi kan requirement Sorkarin min allot a ni a. tunah hian 76000 atangin 73660 chauh list a ni. Tunah tak hian Saiha Godown atanga thawnchhuah turah khan ni 15.3.2008 a report kan hmuh danah chuan quintal 600 chiah Saiha Godown-ah a awm a, thawnchhuah tur a awmlo a ni tih ka sawi duh a. Kawlchaw hian khawthlang lam zawng zawng a chawm a, Tongkolong, Phura Lungpuk thlengin a chawm a, Chu chuan quintal 22000 an mamawh lain tun thlenga phur tawh chu quintal 3940.88 chauh a ni. An harsa em em a, Kawlchawah tak hian tunah hian quintal 370 chiah a awm bawk a ni. Thawnchhuah tur indaih ngaihna a awm lova, chutiang bawkin Tuipangah quintal 22000 kan mamawhnaah hian tunah hian an thawn tawh chu quintal 2651 thawn a ni a, Tuipangah hian quintal 450 chauh a awm bawk a ni. Chu chu kan dinhmun anih avangin ei tur hi kan harsa tih kan sawi hi min pawm sak mai ula. Suggestion siam a ngai ta a, Supply Minister pawh thahnem a ngai a, FCI Godown kan neih hian helam atanga control that a nih loh vangin harsatna min siam a, Lunglei FCI Godown-ah chuan Buhfai awm si khan thawn pheih a ni lova, Contractor appoint a ni lova, carrying contract bill-te a awm thei ta lo a ni. Chuvangin FCI hi Saiha thleng direct-in min tihsak mai sela, tunah chuan Lawngtlaiah an un-load-a, an load leh a, Saihaah a chho a, carrying contract bill pawh a tih tam phah a ni.

Pahnihnaah chuan, tam a nih avangin contractor-te hi leiba bill pending a tam lutuk a, Retailer-te pawh an ni a, pek chawp loha khul thei lo an nih avangin ka bialah chuan hei hi chu tunah hian 200 lakhs

vel leiba bill a awm a, priority-ah min tihfel sak rawh se tih ka ngen a, min tiam tawh na a, a taka buhfai min chhek sak leh chuan kan thi lovang tih kan sawi thei lo a ni. Nasa taka tan min lak sak hi ka ngen duh a ni.

Tin, Agriculture-ah sawi ta ilangin, midangin an sawi tawh ang khanin kumin hi buh chi tur leh thlai chi tur reng reng neilo vek kan ni a. Sorkarin order a siam a, 15th March hmain lo lal tur a ti a, hal zawk vek a ni a. Tunah hian thlai chi thlak a hun leh ta mai si a, thlak tur an nei si lova, Saiha D.C. chuan advertisement a siam a, buh tin khat Rs. 200/- a hralh tur nei chuan lo hralh teh u a ti a. Mahse, hralh tur pakhatmah an nei lova, kuminah hian Lo an vat vek si a, a vur kum tih a ni bawk a, buh chi engtingge min tihsak ang, buh chi tha mi, min han tihsak nghal a ngai dawn a ni. Buh chi bakah thlai chi thlak tur zawng zawng a pawimawh a, kan Agriculture Department-in an hria a, a hun takah min tihsak sela tih ka duh a.

Tin, kuminah Alu 33,000 Kgs. lei a ni a, chu chu kan Agriculture Minister hian thahnem a ngai viau nain, sawiselah pawh min lo ngailo selangin. A bial ringawtah Alu chi a thawn tam lutuk a, keini Saiha leh Tuipangahte kan ngheina a rei a ni. Tuntumah pawh ka biala Niawhtlangah quintal 100 min han pe a, Pu Thawla bialah hian Zawngling leh Siatlaiah 150 qtls. a pe a, a biala LADC-ah hian quintal 1300 a thawn leh a, ka sawi duh chu, Tuisumpuiah te. Theiva-ah te, Chhualungah te, Siahta-ah te, Lo vat ula, Alu chi kan sem/pe ang che u a ti a, hei hi a tihngaihna a awmlo, lo an vat a, a th'awn dawn, engtingge ? min tihsak ang, a hranpa hian min ngaihtuah kan phut a, Finance Minister pawh hian a tul chuan belh leh se hemi atan hian ka duh a ni. Emergency tak tak a ni tih hi ka sawi duh a ni.

Tin, Transport-ah hian kan buai ber chu Insurance kha a ni a, Insurance hi kan vaiin kan sawi thin a, a tiam pawh min tiam thin a, improvement awmlo hi a mak pawh ka ti a. Insurance hi Sorkar anga sumdawng a ni mai a, sumdawngte chuan District Headquarter lianah te chuan kalin an verification-te, periodical-te pawn va tih theih mai awm tak hi a ni a, kan Transport Minister hian a sawi thin nain a ngaihsak tawk lo emaw ni chu aw ! ka ti a. Tam tak Motor insurance loh avangin Saiha te, Lunglei te, khaw hrang hrang pawh Aizawl lut ngam lo hi an tam tawh a ni. Motor nena lokal turin Motor a lo hlui tawh bawk si a, hei hi kan sawi thin a, min ngaihven sak se tih hi ka duh a ni.

Tin, Vety-ah Mizo hi Sa ei lova awm thei lo kan ni a, kumin kan vanduai a, Bird Flu avangin Vawk lak khap a ni a, Vawk sa man te pawh kan buai kan buai ta a ni a. Hemi a nih s. chuan Vety hian Vawk chi tha chu Burma atanga lak kan phal si lo a nih chuan min sem mai awm hi a ni a. Rural Development-te pawh ni ta se, Vawk/Ran invulh tam siak chuan economic bakah kan ei tur hi a phuhruk dawn a. Hei hi ngun deuha exam sak ka duh a. Pu Zira sawi ang khan Vawk sa rep man leh a hring manah Dawrpui V/C te an buai em em ta ringawt te, V/C dangah chuan an lo free deuh dan te en hian a zahthlak deuh lo maw ? Taimak deuh a ngai lo maw ? tihte ka'n sawi duh a.

Tin, LAD-ah hian Rural kumin chu a cover ve dawn tih kha zawhna chhanna kan hmu a, Pu Thaliana leh Pu Thlenga zawhna atang khan. Hei hi a lawmawm viau dawnin ka ring a. Engchen nge LAD hian Rural min cover ang ? tih hi min rawn chhang thei nghal se tih ka duh e. Ka lawm e Pu Speaker.

PU K. VANLALAUVA

: Pu Speaker, ka lawm e. Minister zahawm tak pathumte demand kan sawi dawn a ni a, kan sawi loh kha ngaihpawimawh loh vang a ni lova, min ngaihsak pawh thain ka hria a, kan sawi seng dawn si lova.

A hmasa bera han tarlan ka duh chu Demand No. 34-na, A.H. & Vety hi a ni a. Ka sawi duh lai chu anni hi Department lian nilo mahsela, hma an la chak a. In han sak mai te hi an awlsam a, mahse, a luahtu lam hi an nei thin lova. An luahtu theih dawn loh hi chuan sa lo law law se tih hi ngaihdan ka nei deuh a. Keini thingtlang lam tan chuan vawikhat pawh kan Minister zahawm takin 'hei i bial chhungah in sak kan ti a, amaherawhchu, ran pawh an nei mang si lova. Hei hi chu hnuhkir leh mai tha kan ti deuh a, tlema ran enkawlna hnaivai deuhah kan ti deuh a' a ti a. 'E, ngawi teh, ka pu, ngaihtuah chiang hmasa a in tih a nih ka ring a, sawn leh lam hi chu kan mipui ten an hre vek tawh si a, sawn leh lo zawngin tihdan i ngaihtuah ang u khai, in rawn umzui ang a, tichuan, a tha mai ang a, tiin kan ngen a che' ka ti a. Min sawn sak ta lova. Mahse, a tha angreng khawp a. Tu te emaw kan luahtu tir hlauh mai a, mimal kha, a tha riau mai a, kha kha an tih theih rau rau chuan tih zel tur pawh chu ka ti angreng bawk lawi a. Amaherawhchu, a Department khan an hnathawhah khan fail-ah an inngaih ka hlau ve thung a. Chuvangin Department fel tak leh puitling tak an nihnaah khan an tih turah chiang lehzual selangin tih ka duhin ka ngen a. An demand pawisa tam lutuk lo pawh hi tangkai taka an hman ka duhin ka ngen a. Tin, hmannah general discussion-ah ka sawi tawh a, Ran chungchang thuah khan, a theih ang anga hma an lak leh dan chu kan zirtir an ngaiin ka ring lo.

Tin, Demand No. 4-na, Law & Judicial Department hi han sawi leh ka duh a. Pu Speaker, Executive leh Judiciary dah hrang tura thu awm tawh, thui deuh kalpui tawh, inthen angreng thenlo ang renga kan awm lai hi engnge kan mutan lai tih hi ngaihtuahnaah a awm reng a. Treasury Bench tan pawh hian thil sawi thiam har deuh mai a awm a. Bial neite kan lo ni theuh a, keimahni bial atangin thubuai hlabuai nei te kan lo awm a, kan ip tlat tawh mai a ni. Tu hnen berah nge kan sawipui ang a, kan sawipui ngam angem ? tih hi a ni tawh a. Diktak phei chuan tuman kan tingam tawh lo a ni ringawt mai a. Chuvangin, anih ang tur hianin kal ta ila, engnge a mutan leh kan harsana, kha kha kan zavaia tangtlanga tih chi te a nih chuanin kha kha Pu Speaker, ngaihpawimawh awmin ka hria a. Keini bialte phei chu engemawa inman tih vel a tam em em a, tah chuan, telephone pawh kan kuai ngam tawh mang lo a nih laiah khanin engtianga kalpui tur

nge tih kha kan Minister zahawm takin rem rawn ruat selangin min hrihfhiah selangin tha hlein ka hria.

Tin, Demand 31 leh 32 hi han sawi zawm ka duh a. Sawhthing chungchang thu kan sawi a, Aiengin a zawm dawn a, helaiah hianin House-a kan ngaihthlak ka duh leh, kan mipuite kan zirtir fo atana ka duh chu Sawhthing a ni emaw Aieng a ni emaw, hralh rilru kan pu a, hralh kan tum a nih chuanin a leitute lei tlakin i tifa ang u, tih hi inzirtir ang u. Entirnan. An hralhna hmun turah an han bun a, a leituten an rin ang rengin lei a lo tam em em mai si a. "Lei hi kan lei tel dawn lo, Sawhthing a ni kan lei dawn ni" an tih ni a thleng tlat mai a ni. Chuvangin, a leitute lam kan bei vak vak a, a man chungchang thua ringawt kan kal a, a hralhtute lam hi inzirtir ve kan ngai a ni lawm ni ? tih hi ka sawilang duh a ni. Chuvangin, kan ram mipuite Kristian 100% a inchhal ngam ramah hianin hei hralh chi chu Cement nena chawhpawlh chi Balu te hi hralh chi a ni. Balu a nih loh rau rau chuan Sawhthing hralh tur, chu chu inzirtir fak mai ilangin a fel mai ang. Chuti lova, a leitu lam kan mawhchhiat, khati reng reng khanin an thenfai chungin Motor a lo tlar rei a. Amaherawhchu, a thatna riau awma chu khulai velah kan hotupa bial, Speaker bial tena inhlawhna an lo nei tih erawh kha chu a tha viau a ni mai thei. Mahse, kha kha a that dan kha a secondary deuh hlek a ni. Chuvangin, he zirtirna hi he Department pahnih pawh hian mipuite hmangin, NGO hmangin emaw, a remchang chang hmanga inzirtir tum thain ka hriat thu tawi tein ka tarlang duh a.

Tin, anni Department hnuaiah hianin Red-Oil Palm ching tam tak an awm tawh thu chungkua pawhin zawhna leh chhanna kan hmu tawh a. Zawh belhnaah pawh kan zawh loh, tuntuma han tarlan ka duh chu, Red-Oil Palm chingtuten nikum leh kumina harsatna an tawh chu Bui leh Sazui nasa takin Red-Oil Palm hi a tichhia a ni tih hi concerned Department pawhin an hre tawhin ka ring a. Engtia bawhzui tur nge ? Diktak chuan, nikuma phun tawhte chuanin dung a chen vek tawh a ni, kum 4-naah a rah dawn si. Sazu leh Zubui-in an eihlum ta leuh a ni a, khami kha engtianga fill-up leh tur nge tihah a chingtute an rilru a hah viauin ka ring a. Hetah hian Department leh Godrej Agmavat ten an hmalakna turah hian a chi an neih tam dan pawh an rilruah in exam hle se thain ka ring a. Mamit DEO bial ami te phei chuan nasa lehzuza nikum lam aia a chi an mamawh tam zia han tarlan tel ka duh a ni.

Tin, Grep leh Sapthei zamna chungchang thua hian mipuite lamah Grep hmun ka nei a, Sapthei hmun ka nei a, tih in report, a zamna an han pek a, a zam tur nei mumal leh si lo te pawh hi kan awm mek niin a lang. Hetah tak hian keini Member-te hi kan tanruah a thain ka hria a. A zamna mamawh ve avanga kan dil a nih chuan zam tur a kha kan nei tam tur a ni. A zam tur nei uk si lova a zamna tur duh lawi si kha, a hmabak kha a chhe viau a ni. A dawttu chu back-load a ni mai. Back-loan tura pek a ni lo, a zamna tur a ni tih hi sawi tulin ka hria. Chuvangin, a zam ngei tur kha kan ching tur a ni a, tin, a neitute ngei hi Department pawh hian an hrechiang tur a ni. A ching si, zamna tur neilo an awm turah ka ngai lo. Chuti lo chuan Sorkar Department hnathawh a fail ang tih ka ring.

Heng zawng zawngte zu ngaihtuahin report an dawn kha spot verification ngun takin an neih hma loh chuanin thawng ngawt suh se tihte pawh hi ka ngaihtuahnaah a awm. Chuti lo chuanin back-load-a awm leh hlau takin, a awm tawh e tihna ni chiah lovin. Chuvangin back-load a awm lohna turin hmalam pana kal zel theihna turin a ching tak taktu, a zamna mamawh tute kan pek chuan a hlawhtling ang. Nakumah tanpui a ngai tawh lovang tih kha a pawimawh a ni. Khalai thu kha Pu Speaker, tawitein ka larlang duh a ni.

A tawpna tak tak atan chuan Demand No. 30-na, Disaster Management & Rehabilitation hi han sawi leh ka duh a. Mimawl zawk tan phei chuan Silpouline Department kan ti tawh mai a. Silpouline Department a nih ang ngei hianin MLA te hi chu min duat sela. A chhan chu. bial nei theuh kan ni a, tah hian i veilam ami bialte kha Ruah leh Thli hian a dim chuang der si lova, helamah pawh, kan zavaia kan lawm tlan theihna tur leh a chhia chhiain dawng tam mai sela, a tha chuan awl mai tur. Chuvangin Disaster Management & Rehabilitation hi a chak thei ang bera kalpui hi ka duhpui thu tawi te ka sawi a ni e, ka lawm e.

PU ZODINTLUANGA : Pu Speaker, ka lawm e. Vawiinah kan Minister zahawm tak takte pathum demand kan sawi dawn a ni a. Demand 19-na, L.A.D., Pu Speaker, hei tam kum a ni a, kan harsa a, a Sorkar ang pawn, a tlawmngai pawl ang pawn, Kohhran ang pawn kan buai a. Engtingge kan mipuite harsa lovin an awm ang, engtingge buhfai kan pek ang tiin kan buai a.

Chutih lai chuan Pu Speaker, a bikin Lunglei District a ni angem aw ka hre lova, vanneihthlak takin L.A.D. ah hian inhlawhna tender a lo chhuak a, hetah hian V/C ten hna tur an siam a, DLAO ah te an thehlut a, an siam thin a ni a. Tuntum ami hi chu Pu Speaker, a pawl ka tih chu V/C te thawh tir lovin mimal hnenah tender koin hna an pe a, a mimal pawh chu mimal anga ti lovin, a unit angin he work order hi an sem a ni. Hei hi a pawl ka ti a, hleih neihna Sorkar kan tih thin, helaia kan lo au kan lo au thin, Kohhrante tlawmngai pawl te pawhin vawiinah tang hovin mipuite a zau zawkin engtingge tanpuina kan pek ang tia kan buaipui lain, chumi piah lamah a Sorkar ang pawn BAFFACOS angin an ti a, mipui a nawlpui inhlawhnate kan sem lai a ni a. Hetih laia L.A.D. ina party mal inhlawhna tur a siam hi a pawl ka ti tak zet zet a, party induhsakna hun a ni tawh lo, vawiinah hian Pu Speaker, V/C angah te va pe selangin heng hna chu a harsa zual mipui ten inhlawh sela chuan a lawmawm tur a ni a. Hei pawisa hi keimahni State sorkar atanga rawn kal a ni lehngal a, a pawl ka ti tak tak a. Hengte avang hian a niang vawiinah BAFFCOS kan tihte hi a hlawhtling lo tia mipui kan phun kan phun nachhan hi.

Helai House chhhung ngeiah BAFFACOS a hlawhtlin ziate kan sawi thin a. Amaherawhchu, BAFFACOS an hmamnate han

chhuilet hian kuthnathawktute lo neitute hi a thleng lo a ni tih hi a ni. Vawiiinah chuan BAFFACOS hmannaate he House chhungah ngei zawhnate kan zawt a, department hrang hrangin min chhannaah chuan, ba rullna tur tihte, hmannaiah kan sawi tawh a, Rope-way in ti a maw ni, mau tawlh chhuahna tur a tak tak awm silo siam nante, helai khawpui chhung ngeiah pawh kan Supply Directorate-a Lift hmanna tur atante BAFFACOS hi kan hmang a ni a.

Chumi piahlahmah chuan a mimal anga tanpuina an sem pawh hi a party mal lutuk a, Vety Department-ah ti ila, Ar vulh tanpuina ti ila, party bik, khatiang ang Sorkarin an pek a nih avangin Pu Speaker, BAFFACOS hi Mizoram mipuite hi chuan a hlawhchham kan tihna chhan kha a ni a. A Sorkar ang chuan a hlawhtling pawh an lo ti thei mai thei a. MNF party worker-te tan chuan a hlawhtling em a, an dawng tha em a ni. Chuvang chuan he BAFFACOS hlawhtling lo kan tih pawh hi Lo neitu tan chuan a hlawhtling lo chiang a ni Pu Speaker, tih kha ka rawn sawi tel duh a.

Tin, Demand No. 17-na, Food & Civil Supply hi kan sawi nasa tawh a, a pawimawh bawh a. Kan Minister zahawm takin niminte, nimpiniah lamahte buhfai kan harsatna chhante min rawn hrilhfiah a, a lawmawm ka ti a. Vawiiinah hian buhfai hi kan rama lo thleng, a bik takin thingtlanga rawn thleng te hi chu Pu Speaker, Retailer-te khaw hrang hrang ami in an rawn lak hi chuan a zo lehngal zel a ni mai si a. Chuvang chuan, kan Minister zahawm tak hi ngen ka duh chu, vawiiinah helai tlangdung kawng tha chin hi chu eng ang pawhin ruahsurin leimin pawh nisela, zankhat thil thua a tlang leh thin a ni. Kan bial angte, a chengker deuh vawikhat ruahsur a motor kal theih lohna hmunah hian Supply Godown-ah a leng tawh lo a nih pawhin khuain Community Hall-te kan nei a, temporary supply centre an ti a, kum dangah te pawh an hmang thin a, khatiangah khan min dah sak thei sela. A bikin Kawnpui, Darngawn, Dengsur kan tihah te sawn a bikin Community Hall-ah te pawh buhfai te min lo chhek lawk loh chuan Pu Speaker, thal a nih lai pawhin kan mangang a ni a. Vawikhat ruah a lo sur hunah chuan kan tan a harsa dawn a, chung avang chuan tun thal chhung hian khatiang ang khaw kilkhawr deuh supply godown awm lohna hmunah pawh Community Hall-ah te buhfai chhek khawl hi kan Minister hian a hna hmasaah min neih sak thei sela a lawmawm hlein ka ring.

Tin, BPL chungchang hi sawikai leh lawk ka duh a. Kum dangah chuan buh te kan thar ve a, kan BPL member te pawhin Pu Speaker, kan buh thar nen BPL supply nen hian kan inpeizawn chho thei a ni. Mahse, vawiiinah chuan nikum atangin buh thar leh mahni thar chhuah ei tur kan nei tawh si lova, thla khata Kg. 35 ringawt hi chu kan kham lo a ni. Chhungkaw lian deuh tan phei chuan, thla khata Kg. 35 hi kham a harsa em em a. A dik tak chuan he House-ah keimah ngei pawhin ka sawi zing a, kan bukna a lo diklo nen, tin, kan Retailer ten bukna dik hmang lovin tina suakin khatianga tih kha vawiiinni thlengin tihtawp theih a la ni si lova. Chung avang chuan kan mipuite BPL tena buhfai an dawn kim loh kan titawp thei si lova, hemi BPL baka quota pangngai an lak theihna tur atana min ngaihtuah sak turin he kan tam chhung hi chu kan Minister hi ka ngen duh bawh a ni.

Tin, demand 31-na, Agriculture Department hi Pu Speaker, tawi te sawi leh ka duh a. Kan hre tawh a, sawi a tam a, kan ram kan hnam siamthatna tur atan sum seng tam ber pawl an nih ka ring a. Thlai chi lei nan te, thil chi tam tak a lo a luakchhuak, a tak awm silo, leitu Department an ni a. Heng pawh hi kan Officer tha tak tak te pawh transfer phah nan an hmang a ni lawm ni tih ang Department kha a ni a.

Vawiin niah tam kan hmabak mek a, engtingge ei leh bar kan inngaihtuah ang tih laiin kan Department, Agriculture Department hi Pu Speaker, he project hi a va hun lo em, a va mawi lo em tih hi ka rawn sawi tel duh a ni. Farmer Information System lei an tumna hi Optimus Consultancy Service hnenah he work order hi Pu Speaker, an theh lut tawh a ni. Chutah chuanin vaibelchhe 59-a project a ni tlat. Information Technology-a helaia kan Mizo thiam kan tih ang chi te kan rawn ve a, hetiang em em a nih hi an ring thei tlat lo Pu Speaker. Hemi a project report atan ngawta pawisa an dah te hi crore 2 zuk tling a, Pu Speaker, crore 2 hian he subject hi chu a pumpuia project hi ka ti thei ang ti pawl pawh an awm a ni. A total cost, a net working an tih, hemi a khawl an tihna hi chu crore 25 tih te, a computer leina tur ang ringawt pawh crore 10 tih te a ni Pu Speaker, a detail hian sawi dawn ilang chuan a tam lutuk, heng angte hi kan Minister hian min en that sak sela, hetiang lutuk, a lo a luakchhuaka thil awm lo lutuk Department-in hetiang supply order an pe te hi a cancell leh theih em ? hei aia tlem hian. A system supply, Farmer Information System-te hi chu a tha a ni. Mahse, hetiang lutuka project uchuak an han hmang hi chu a mawi loin kan ram kan hnam tan vawiinah tam kan tawrh lai mek pawha hetiang an lo ti duh hi chu a pawl ka ti a. Tukin zing lamah khatiang ang Department-in thil a kalpui fellote kan sawi a, chung ang ruala hetiang ang a lo awm hi a pawl ka ti takzet a.

Tin, hei, Horticulture, Demand 32-naan hian nikum lamah te pawh Pu Speaker, kan rama Serthlum a tam avanga kan tawrh ziate kan sawi tawh a, helai ngeiah pawh resolution-te kan move a ni a. Hengah hian kan Sorkarin hma a lakna leh khatiang ang an siamna ang hi Pu Speaker, vawiin hian kan Minister hian kha Mautam chhunge tanpuinate engzatnge an pek tawh, Serthlum a tam avanga Central Sorkara tanpuina kan dil, he House-in resolution kan passed-te khangah khan khulai Serthlum tam tuarte hnenah hian engnge ni tanpuina kan pek tawh te hi min rawn hrilh thei sela, a thain ka hria a.

Hei, Anthurium te kan ti a, a lawmawm em em Pu Speaker, Anthurium Festival te kan ti a, phai lam atangin Model nalh tak takte kan chahchhuak a, kan lampui a. Amaherawhchu, kan Anthurium hi Pu Speaker, vawiini angah hi chuan a mipui, a nawlpui, kuthnathawktuten an chhawr phakah hian a awm tlat lo mai a, vawiina Anthurium, kan Governor Speech-ah pawh a kuang, nuai tam tak an hralh chhuahte kha a lawmawm rualin heng titute hi Pu Speaker, kan ramah pawh a awm thei pawl, miharsa lo ten an tih theih a ni tlat mai a, a project a that rual hian, heng angte hi kuthnathawktu harsa zawk tena an ban phak ve tura siam theih ni sela tih kha ka sawi a ni e, ka lawm e.

PU R. KHAWPUITHANGA : Pu Speaker, Demand 17-na, Food and Civil Supply and Consumer Affairs hi han sawi hmasak ka duh viau laiin khami nena inzawm, a hmasa zawk tur mah maha ka hriatte Agriculture-ah hian Demand 31-naah hian han lut ta phawt ila.

Pu Speaker, ka ngaihpawimawh em em mai chu, hei tampui kan han tawng thei a, keini MNF te rhei hi chu 1958 - 1959 vel bawrah pawh khan kan hnampa ka ti mai a, kei chuan, min lo haw lo ula. Pu Denga ho khan namen lovin an lo buaipui tawh a. Chuvangin he party lo chhuahna bul pawh kha a ni a. Engvang nge kan tih chuan tam nen hian kan inzawm emaw tih mai tur hian Pathian hian min ring nge ni, tampui enkawl tur hian MNF hi a ring em ni. Khami tumah pawh khan Assam ho khan, dik tak chuan Mizote hi min rapbet lutuk a, Civil Supply pawh kha thlawhna a thlak tur khan kan hotu hmasate khan mipui duhdan anga namen lova an nawr avanga thlak chauh an ni. Tuntumah pawh hian kan Chief Minister zahawm tak kaihhruaina hnuaiyah Pathianin hemi tawng tur hian min han ruat leh hi kawng lehlamah chuan a hahthlak hle naa, min ring ve hle a ni chek ang chu.

Agriculture leh Horticulture inkawpah hian pawimawh em ema ka hriat chu, Agriculture bikah land development hi a ni. Hei hi a pawimawh hlein ka hria. Tunah hian Champhaiah te Serchhipah te, Saiha lamah te pawh hmalak a ni a, tunah hian nasa taka thawh tawh a ni. MIP pawh hi hemi atan a pawimawh em em a ni, thawh zelna atan 20 crores dah a ni hi a la tawk lo hle in ka ngai a, 60 crores te hi awm thei sela land development bakah thildang dangah te pawh hman theih a nih avang hian kan Leilet te tunhmaa Bawng hmanga bial te reuh te te kan leh thin kha tunlai khawvelah chuan a hmantlak tawh lova, fur leh thalah te pawh thlasik thlai te pawh kan neih theihna turin khawl hmanga kan Leilet te hi kan siam loh chuan a puitling zo tak tak lo a ni. Khawl hmanga land development kan Sorkarin a han thawk ta hi tha hlein ka hria a ni. Tuna an siam tawh hi 2351 hectares a ni a, a sum sen hi a tam fu a, amaherawhchu, khawl hmang a nih avangin a tam lo thei lo a ni. Khawl hman theihna Leilet zawl tha zawk kan siam hma poh leh kan intodelh mai dawn a ni.

Phaisen ruam Cachar depa Leilet ram zau tak te khu land development hian han kalpui ila chuan Buh mai nilo thlai dante pawh kan intodelh theihna turin tharchhuah a ni thei dawn a. Thildang zawng aiin land development-ah tan la ila kan tifuh ngei ang tih ka ring tlat a ni. Pu Speaker, i veilama miten engemaw lai kan short coming an han sawi te pawh kha a tha a, kan in enna tur a nih avangin. Amaherawhchu, kan insawiselna thenkhat thlai chi supply te pawh hi department hian ti lo sela khawia thlai chi nge maw farmer-te hian an lei ang le ? Department-in hemi lama an kalpui dan te pawh hi a tha hle a ni. Amaherawhchu, a pawimawh ber chu land development lam kan uar nasat poh leh kan ram chu kan intodelh hma dawn niin ka ngai a ni.

Tin, chu lovah chuan Water Resource Development lampang hi, tui dahthatna lam hi a pawimawh em em mai a.

Nikum lamah kan hotute duhsaknain Isarel ramah kan zu kal ve a, chuta kan hmuh, an chhuan em em chu, Galillee dil atanga tui pump chhuah, tlanglian sang lai bawr velah pawh tui kha hman theihin a awm vek a. An ram khu a rem si a, zawl deuh dup a ni vek mai a. Khanglai zawng zawngah khan Galillee/Jordan tui an pump chhuah te chu an hmang tangkai ta a. Thlai tinreng an ching thei ta a ni, thlaler ramroah pawh. Keini aiin thalah pawh tui an hmu tha zawk a ni, keini chuan monsoon kan nei tha a, thla 6 chhunga ruahtui kan neih hi a dah khawlina kan siam chhuah thiam a, kan khawl theih hma poh leh Agriculture-ah kan hlawhtling hma dawnah ka ngai a.

Tunlai hian Chiteluia Serthlum chi kuina Nursery an siam leh enkawl tlawhin Israel mithiamte an lo kal fo a. kan ram an hmu a, a tha turte pawh ngaihdan an nei ang. Israel ramra an tih ang, kan zu kalnaa water technology min entir ang khan tui hman tangkai dan kan thiam a tul hle. Keini pawhin minor irrigation kan nei a, hengte hi ala lar lo hle a, kan hman thiam loh vang a ni thei bawk ang a. Dripping system tihte sprinkler hmanga thlai chawmte hi kan la hmang tangkai tak tak lova, chu chu aw h avangin tan kan lak a ngai hle. Kan ram a tha a, engah nge kan tih theih loh bik ang le ? Chuvang chuan, fur chhunga kan tui neih te hi dahkhawmna tha siam tam ila. Agriculture leh Horticulture-a Fund kan neihte pawh hi hmang tangkai ta ila a sawt hlein ka ring a ni.

Khalamah khan sawi teuh tur a tam mai a, a dangah kai hmian Agriculture-ah hian thil pakhat han sawi leh ka duh a. Serthlum bik hi. Israel mithiamte hmangin Chitelui kamah khuan Serthlum chi 12000 kui mek a ni a. Khu khu kan hlawhtlin ngei pawh a rinawm a. Budding tih a ni a, a bul lam khu chu ser nge a nih kan hriatpui lova, an trade secret pawh a ni ang a. Mahse, a zawmna kha kan Serthlum duh zawng, Mandarin, tuna kan ei ang hi ni sela a thlum tui si a, Israel ramah chuan Serthlum chi hrang 20 dawn lai an nei a. khutiang chi hrang hrangte pawh tih ve hrim hrim pawh a la tha. Serthlumah hian kan hlawhtlin poh leh Agriculture/Horticulture-ah chuan kan hlawhtling dawn tihna a ni ang. India ramah kan awm a, mihring tluk leh dingawn chuang kan awm a, Serthlum neilo deuh vek an ni. Hralhna a lungngaih thlak lova, chuvangin hei hi hlawhtling turin Sorkarin hma la zel se tha ka ti a, chu chu ka han sawi duh a ni.

Tin, Food & Civil Supply Department-ah LPG Bottling Plant, Mualkhanga kan han neih khu a lawmawm hle a. Nitin bur 1200 an pechhuak thei dawn a, hei hi kan Chief Minister zahawm takin 2006-ah khan a hawng a, tunah hmalak chhoh mek zel a ni, a ropui tak tak a ni. Mahse, tuna Gas supply a lo kalna hi a hla a, furah harsatna kan tawh fo thin hi a bo hlan a nghahhlehawm hle. Bottling Plant khu kan tihpuitlin chuan khulai atang khuan kan intodelhna a hnai hle dawn a ni. Amaherawhchu, ka sawi duh pakhat chu Gas Agency hi tam zawk nei ila, tichuan, mipuite kan harsatna hi ziaawmin ka ring a. A la tlem deuh niin ka hria a. Aizawl hmar lamah te, chhim lamah te, Khawhtlang lamah te pawh veng tinah hian hla deuha lakna tur awm lo hian tih ni tawh se, ngaihtuah mek a ni maithei a. Hei hi tihpuitlin ngei ni se tih hi ka sawi ve duh a ni.

Tin, Buhfai lamah chuan, kan hriat angin hei kan Minister, nichina Saiha bialtuin a rawn fak kha a lawmawm ka ti a. Khatiang anga rilru put kha a tha hle a. Khatiang kha a lo ni zawk a ni tih kha ka hmuchhuak a waviin niah chuan, an inthup rei mange aw ka ti a ni. Kan Minister zahawm tak mai a fak duhte kha. Hmanni lawk khan Buhfai a awm lo an tih kha a tukah an thawn vat avang khan khatiang khan kan sawi chhuak ta a ni kha a lawmawm tho tho. Engpawh nisela, a ni hianin theihtawp chhuahin a bei a, tichuan a tul chuan "ka thih chilh mai ang", a ti ngat a ni committee-naah pawh. Chutiang chu a ni a, hetiang khawpa Minister taima kan nei hi a fakawm hlein ka hria a ni.

Tichuan, Vety lamah hian han lut ta ila. Nimahsela a tawp a hun dawn tawh si a ka sawi tam tawh lo mai ang a. Vety-ah hian Sa te leh hetiang ang kan ei tur chi reng reng hnianghnara min petu an nih avang hian an fakawm hlein ka hria a, tunhma te ngaihtuahin. Ran talhna tur In lah chu sawlaih Bung Bungalow lamah hawn mai theih turin an bei mup mup tawh mai bawk a. Chuvang chuan sawi tur hi a tam lutuk a, development-ah hi chuan, development-ah na na na hi chuan tun Sorkarah hian sawi sen loh a awm a. lawmawm ka ti a, ropui ka ti a ni. Chuvang chu ni maw, India Today-ah te tehna hrang hrangah 1-na, 2-na tih deuh yek kan han ni chho te pawh hi tihawm reng pawh hi niin ka hria.

Chuvangin heng Demand-te hi pass ngei ang u tiin ka han insawm a ni e. Ka lawm e.

SPEAKER

: Pu H. Lalsangzuala, khiti lamah khian a thu a, a pharna a rei tawh a nia, i lo sawm ang. Minute khat velin pelh a ngai mai thei ngai lo mai thei bawk a, pelh a tul pawhin pel zawk se a tha mai ang chu maw.

PU H. LALSANGZUALA

: Pu Speaker, ka lawm e. Awle, hei department 3 pawimawh tak tak maiah hian han sawi ve ka duh a. Ka sawi hmasak ber tur chu LAD. Hei keini rural area, thingtlangah chuan pawimawhna tam em em lo mahsela, development angah, amaherawhchu, administration V/C te, khaw khat nu leh pa, roreltu awmnate kan ni a. Chung angah chuan Mautam tam tur nen rorelna kawng engkimah khawtlang nu leh pa nihna angin mipuite inngahna ber an ni a. Chutah chuan sawi ka duh chu, kan Minister zahawm tak pawhin min lo hriat sak sela, kei ka bialah chuan V/C 3 thiah an ni tawh ringawt mai a, engvanga thiah nge tihte hi ka ngaihtuah ta mai mai thin a. Thiahna kalphung hi dan ang a nih chuan dan angin action kan lo la lo thei si lova tih kha a ni ringawt mai a, a ho hi ka ti thei ang reng hle mai a. Under Secretary-ah te hianin kan lo bawh khalh ve tak naa

a tawpah chuan an paih leh nge nge thin a, show cause notice siamna tura kan tih pawhin order an siam atanga pakhatah chauhte an hmu thin a. I rawn ngaipawimawh lo an la ti zui zel bawk si a. Hei hi politics chhiava niin ka hria. Politics development ni lovin, heng angah hian kan LAD Minister zahawm takin min hriat sak se ka duh chu, ka bialah pawh pakhat chu thiah a ni leh tawh a, pakhat thiah tum leh mek a ni a, chu chu party worker-te an tam vang ni berin ka hria. Chu chu thil tha lo tak a ni a. Mipui ten an duh taka an lo thlan tawh te, khawtlang tan hna an thawk a, 100% chuan an felfai lo maithei, mipui zahna thinlung pawh an neiin ka hria. Mahse, an thil tih lo felfai lo tlem te pawh a awm ang. Aizawl atangin official-te an kal a, an thla lawmman atang ringawt chuan Ar leina pawh an nei bik lo, sanction atanga engemaw an lo eiral ve zeuh angte an eiru tih ang te, reserve an pe tih ang te, dawta inhekna mai maite, thu tling lo a ni a. Chungah chuan tunah pawh V/C neilo in khaw tam tak an awm a, a bialtute hi dik tak chuan Treasury Bench-a thute kan nih si loh chuan kan bial ngeiah pawh kan te em em a, kan tour programme te pawh hi an lo hup bo in an lo paih bo duh khawp. Chutiang khawpa tihduhdah chu kan ni si a, mahni bial ngeiah pawh. Chuvangin an V/C te tal hi chu tam manganna kawngah hian MLA te nen kan thawh ho theihna tur atan awm reng se kan duh tehlu nen. Tiang chuan thil pawh tak tak, harsatnain min hmuak nen, kan bialah hian a awm avangin V/C thiah chungchang hi kan LAD Minister hi min hriat sak turin ka duh a.

Tin, ama demand-ah tho hianin Vety-ah hian Mautam tam dona BAFACOS atanga khaw pakhatah Vawk vulhna Rs. 30,000/- pek ringawt maia Mautam tam han cho te kha in 200/300 khaw tan a thlamuan thlak loh em em a. Hengah hian engtin nge tihdan te hi a awm lawm ni? Vety department hian Bawng, hnute tui tam ang chi te pui 2 tal te loan-a peka chung atanga anmahni sum leh pai hmuhna mai pawh ni lo, khawtlang tan thil pawimawh em em, bawnghnute powder mai ni lo, a bawnghnute hring, a khua intodelh theih a ni a. Hengte hi bawng lian, hnute tui tam chi te hi tihdan a awm em aw tih ka sawi tel duh bawk a. Loan-in bawng lian chi pui 2 tal emaw khaw khata mi rintlake hi a constituency angte pawhin han ti sela, tiang chuan kuthnathawktuten Bank Loan an rawn beisei a, Rural Bank-ah te kan han tihpui thin a, thil tih a harsa em em a. Sorkar hmalakna atan hian a pawimawh hlein ka ring a, ka sawilang tel duh bawk a.

Pakhat leha chuan Food & Civil Supplies chungchangah hian sawi ka duh chu, Khawlian - Phuaibuang tlangdung, hmanni khan ka kal chhuak vek a, an dinhmunte ka han hrechiang viau a. Mahse, helai House-ah ngei pawh ka sawi tawh angin kan Minister a kal dawn an ti a, Mahindra Pick-up pathum/pali velin an thiar tlak tlak a, tih te ka sawi tawh a. Chutah chuan hei tunhnai lawkah chuan hei 1000 qtls. vel chu khaw hnihah an awm a ni. Mahse, ngah tawkah an inggai mai te pawh kha a pawh ka ti a, tunah hian fur chhung han thleng chho tur chuan 5000 qtls. chuang ve ve an neih a ngai a, a bik takin Phuaibuang leh Khawlian angah Daido te, North East Tlangnuam te, tin, khilai Manipur ramri hrula kan Mizo ngei mai si, kan hnam te, kan hnampui ten an rawn tawm lo thei si lova, chung angah chuan buhfai hi a tam tawh har em em a, buhfai godown turte, a sakna tur Sorkarin a pek belh leh thei tawh si lova, School ruak te lo ngaihven ula tiin V/C kutah te an han hriattir a, theihtawpin an tang thin a ni a.

Amaherawhchu, 1000 qtls. tih ringawt te khi chu khaw thumin an han rin chuan, khaw thum/khaw li in, rei a daih si lova, tunah pawh Good Friday kan hnaih a ni leh tawh a, ruah zanhnih khat a sur chuan Tuivai tui a lian leh mai dawn a, an inkalpawhna kawng khi temporary-a lei dawh mai mai te a ni a, chung angah te chuan tampui mitthi kum, Mautam kum lo ni nen, buh thar an nei bawk si lo, chungah chuan engtingge kan awm leh ang aw, khi khi rilru hi a thlaphang thin a, chu chu kan Minister zahawm tak hriatah pawh ka sawi duh leh a ni a.

Tin, kan Sorkar hian hetiang anga khilai kan bial chauh pawh nilo, kan MLA zahawm tak, Pu Zodintluanga'n Buarpui lampang pawh kha a rawn sawi tawh a, ni hnih/khat leka JCB ten an clear mai theih a ni. Amaherawhchu, bial thenkhat erawh hi chu kar khat pawha clear hleih theih loh, karhnih dawn lai te pawha chutiang anga awm thei chu kan ni a. Chuvang chuan buhfai te hi fur tak tak, fur pui kan thlen hma pawn, ruah nihnih./thum lek a rawn tlak pawn buai thei, Godown-ah buhfai 1000 qtls., 800 qtls. tih bawr te chu tihtham a lo ni lova, a dik takin tunah pawh a stock te pawh hi helai office angah chuan kan han zawt a, DCSO ah te pawh, 1000 qtls. a awm an tih hian Store Keeper-a a tak tak lo awm chu 400/500 qtls. te a ni fo a ni. A tak awm leh a stock position a hi a inmil ngailo hrim hrim. Chuvang chuan heng te pawh hi a tak tak hianin kan department hian a ngaihtuah thiam a ngai ka ti a. Tunah hian Bahra laih hmabak hianin khaw tam tak hi kan awm a ni si a, tunah pawh Buhfai Qtls. 1000 awm ringawt hi chu thlamuanna tham a ni lo, reilo teah a ral leh mai.

Engpawh ni sela, ka sawi leh duh chu Buhfai hi qtls. 4000/5000 pawh lo awm sela, a khulna tur kan mipui ten an neilo a ni. Khulna tur an nei si lova, a pawisa an kawl si lova. Amaherawhchu, hei tun lawkah kan Sorkarin a tilawmawm ka ti hle a, a baa lak theihna Retailer atangin nge ni an tih dawn, Supply Godown atanga a baa an lei turah order kha a rawn chhuak a ni. hmanni lawkah. Mahse, hemi an ei puk dan tur a hi ration card kan tih ang chi khan an siam dawn nge, tunah Retailer khanin allotment khul chhuahna turin thingtlang khua angah chuan sum an lo nei lova, a bain Supply Inspector-ten an pek si loh chuan engti kawng mahin an ti thei dawn chuang si lova, chung te pawh chu felfaia kan Sorkar hian hmalak sakna a nei tawh em ? Engtingge an ei puk dawn tih a hi a ngaihtuah chian a ngai hlein ka hria a. Retailer-ten a baa Supply Inspector-a buhfai an lak chhuah theih si loh chuan Retailer-te chuan mahni tualchhungah pawisa a puk kual chawp a, Supply Inspector-te hnena Godown atanga an lak chhuah tawh mai a ngai dawn bawk si a. Chung chu thil theih loh a lo nih phei chuan engtingge an awm ang ? tihte kha ka lo mangang deuh a. Chu chu ka sawi leh duh bawk a.

A chhan chu tunah hianin ei pukna an nei a nih ngawt loh chuan 10,000 qtls. pawh Godown-ah hian lo dah fur mahsela, kan Sorkar hian engin nge an ei ang ? a khulna tur sum leh pai kan zo khua mipui ten an harsa tawh si a. Tunah an tam a ni tawh si ah hian engtin chuan nge an ei puk ang ? an ei pukna turah chuanin Retailer-te hnenah engtingge Supply Inspector-te Godown vengtu leh lo awptute chungah engtingge order a pe dawn em ni ? tih kha ka zawt duh bawk a ni.

Tichuan, pakhat hi ka sawi leh lawk ang a. Agriculture. Hei tunah hian Sorkar tam tak kan lo nei tawh a, kan Agriculture hmasawna kawngah hian ka rual awt em em mai a. Tunah hianin engtingge officer hrang hrangte awp tirin leh helaia BDO hmunah te leh hmun hrang hrangahte pawh kan dah a ni a. Amaherawhchu, an ni ina recommend-na an rawn siamte, pipe, kan leilet tihpuitlinna atana recommend an rawn sawite pawh hi a tlang ta lo em ni ? tin, chu bakah bialtu tena a pawimawh em em a kan hriatchian te hi recommend kan han tihte pawh hi engahmah hian a tlang bawk si lova. Tunah hianin bial dangte pawh hi an nih ka ring ve. Thingtlang atanga Zo khua pa lokal tam tak ten Aizawlah Silpouline a nih loh leh pipe hum hawn tira, hum hawn tur ringawt dapte pawh hi an lo awm ve bawk a. Amaherawhchu, tam tak erawh hi chu a tak ram an awm a ni. An tui kawng tihpuitlin theih loh avang leh Leilet tui kham lo, Leileta buh kham ngei ngei thar tur tena an thar loh hi a tam avangin tunah hian pipe chungchangah hian pipe leina subsidy han ti ila, a man lo to leh si a, zokhaw pa in a nei leh si lova. (Speaker : A thui lutuk dawn e, i hun i hmang zova, chawhma hun i hmang zo vek tawh bawk a nia) Nia, a tawp berah chuan, kamkhat chiah. Pipe chungchangah Leilet an tihphuisui theihna tur atan hian kan Department hian pipe hi a thlawna peka Leilet te, a Officer awptute hnenah thil tak tak leh a MLA tena kan lo hriatchiana te hi engtingge min pek ve theih dan hi a awm tawh lawm ni ? tih kha ka sawi duh a ni. Awle, Pu Speaker, ka lawm e.

SPEAKER : Le, chawhma hun kan hmang zova, kan chawhrih ang a. Chawhnu dar 2:00 ah kan thukhawm leh dawn nia.

Sitting adjourned at 1:00 P.M.

2:00 P.M.

DEPUTY SPEAKER : Le, rorel kan chhonzawm leh ang a. Tunge bul han tan dawn le ? Aw, Pu Sailothanga hi a phar hmasa deuh zawkin ka hria a, sawm phawt mai ang aw.

PU SAILOTHANGA SAILO : Pu Speaker, ka lawm e. Demand 34-na, Vety-ah ka tan ang a.

Pu Deputy Speaker, Hortoki khuaah ran natna len vanga vawk thi report-na thu leh Sorkar tanpui dilna thu Hortoki vawk vulhtute aiawha Pu Rothanga report hi ni 23.9.2007 hian Vety Director-ah ka thehluk sak a. He report-ah hian vawk 97 a thi tih a ni a, a la bang zawng hi vawknote nena chhiarin 60 vel anga ngaih a ni. Vawk thi hi pawisaa chantirin nuai 2, sing 6 leh sang 3 leh 80 ang vela ngaih a ni a.

Pu Deputy Speaker, he report-na thu hi wawiin ni thlengin action lak la nilo hi kan Vety Minister zahawm takin min lo hriatpuia, he tanpuina kan rawn dil hi a rang thei ang bera min pe tura action min laksak turin ka han ngen hmasa duh bawk a.

Tin, ran vulhtute tan ranchaw atam thei ang ber leh a tlawm thei ang bera pechhuak turin kan Vety Minister ka chah leh duh bawk a. Tichuan, Pu Deputy Speaker, Agriculture leh Horticulture hi ka han sawi kawp ang a. Agriculture Demand 31-na leh Horticulture Demand 32-na hi ka sawi kawp dawn ang a.

Demand 32-na MNF Sorkar tirh khan Zoram dung leh vanga Mizoram intodelhnan Pu Deputy Speaker, Sapthei, Grape khur laih, Thingfanghma, organic farming, Sawhthing, foreign mau, red oil palm, anthurium, jatropha leh hmunphiah te leh thildangte an vawrh darh chiam a, thil chi hrang hrang an sawimawi a. A engamah hi hlawhtling a awm lova, tunah hian Aieng chin an sawimawi leh a, kan duh lo chung chung min chin luih tir a, hei pawh hi hlawhchham leh saah kan ngai a, an hmalakna hian ber Mizoram Intodelhna Project (MIP) pawh hi kum 10 chhung an Sorkar tawhnaah hian an pawisa hman tam ngaihtuahin a hlawhtlinna erawh hmuh tur a vang hle a.

Tichuan, Pu Deputy Speaker, Agriculture leh Horticulture-ah hian land development-ah Sorkar nasa takin a fail tih hi ka sawi duh a. Tin, MIP scheme-ah thil tam tak an khung a, Minister-in engkim a control fai vek a, hei hi an hlawhchhamna bul niin ka hria a. Heng avang hian lo neiha eizawngtute leh huana eizawngtute tan nasa takin harsatna an tawh phah a ni a.

Tichuan, kumkhata kan buhfai mamawh zat hi approximate-in nuai 19.20 qtls. a nih lain kan thawhchhuah hi qtls. 73,000 leh tlem vel emaw a lo ni leh a. Tichuan, kan mamawh belh chu nuai 12.2 qtls. vel a ni. Hemi achieve tur hian Land Development 98526 hectares land development hi kan la ngai dawn niin a lang a. Tichuan, Horticulture bakah hian ka bialte khu Horticulture leh Agriculture-ah hian tan kan la nasa hle a. Kan Sorkarin thirzai tam tak min rawn pe a ni a, kan lawm em em a, chuvangin Kawnpui bial tan khuan thirzai tam tak min rawn pek belh leh turin kan Minister zahawm tak ka'n ngen leh bawk a.

Demand 17-na, Kawnpui SDO (Civil) hi fak ka duh a, he House-ah hian, nimin pawh khan buhfai 80 bags Lungmuatah te, N. Chaltlang, Bukpui, Thingthelhah leh N. Hlimenah an va sem a. He Kawnpui

SDO(Civil) hi a hming chu Pu Lalchungnunga (Pu Lala), nimin khan tam tanpui nan buhfai 80 bags a lo sem hi entawn tlak kan ti hle a. Tin, ama chairman-na hnuaiah khulaiiah khuan thawhlawm a khawn khawm a, nuai hnih chuang zet a hmu tawh a, mitlawmngaite zarah. Tichuan, Kawnpui, a khawpui ber khulai bial neitu ka ni a, tichuan, kan SDO (Civil) Chairman-na hnuaiah Committee-te dinin Kawnpui chhunga mipawimawhte leh V/C te kokhawmin tiang khan rem a lo ruat a, he Kawnpui SDO Pu Lalchungnunga hi entawn tlak hlein ka hria a, he House-ah hian fak a phu ka ti a. Chuvangin a hminga MLA ka nihna zawng zawng hi ani khuan min hliahkhuh vek a, ka tih tur ai zawng zawng hi min tihsak a, he House leh ka bial hmingin lawmthu ka sawi duh bawka ni.

Tichuan, Pu Speaker, Supply Department kan hmuh angin chhungkaw 68,000 lai hi BPL buhfai an la dawng a, hengte pawh hi tihlem dan ngaihtuah se ka duh a.

Tin, Public Distribution System hi kan Retailer-te tang tur leh kumin hi chu kum danglam a nih avangin, tam kumte a nih avangin Sorkarin hman deuha committee-a ka sawi ang khan nasa takin kan Retailer-te hi khuahkhirh se, thil an tihdik loh chuan action a rang thei ang bera la turin ka ngen bawka ni.

Demand 30-na, Disaster and Rehabilitation bikah hian nikum 2007 khan Kawnpui bial chhungah pawh ruah leh thildang avangin chhiat kan tawka a, helaia tanpuina Sorkarin a pek hi a tlem tham ka ti em em a. Tin, Mautam sazuin kan buh leh bal a seh chhiatte Sorkarah kan report a, tichuan, pawisa a lo thleng a, Kawnpui bialah khuan Rs. 700/- in an semruat ringawt mai a. Hei hi a dik tawka lo hlein ka hria a. Tin, an buh leh bal sazuin a seh chhiat ve ngei report-te pawh kha chang lo tam tak an la awm a, hengte pawh hi Sorkarin report nawn leh tur a ti nge ni, ngaihtuahna lo hmang leh turin ka han ngen leh duh bawka a.

Tichuan, Pu Deputy Speaker, Demand No. 4-na Law & Judicial-ah hian ka'n kai leh daih duh a. Separation of Judiciary hi awmze nei leh hnathawk theia siam vat nise tiin ka ngen duh a. Tin, a bik takin Motor Accident Claim & Tribunal-ah hian kum 2006 khan, a bika ka ngen duh chu Thingdawlah L.T. Kapa Motor, 407 TATA, Motor hi ata ni bawkin, amah hi Driver a ni bawka a, accident-in a thi ta a, chu chu a nupui Malsawmtluangi hian Motor Accident Claims & Tribunal-ah kalin zangnadawmna a han dil a, wawin ni thlengin engmah result leh action lak a la nilo hi a rang thei ang bera kan Law Minister zahawm tak hian action min laksak turin ka ngen duh bawka a.

Tichuan, Transport-ah Demand No. 42-na, Pu Deputy Speaker, tlem tein rawtna ka han siam duh chu khaw kar kawnga tlan tur hian Bus lian aiin Bus te hi a tha zawka fein ka hria a, Maxi Cab-te. Hei hian earning pawh tha zawka nei turah ka ngai a. Tin, chu lovah chuan, MST Bus leh thildang, condemnation leh auction inkar hi a thui lutuk a, hemi chhung hian Motor

parts leh thil tam tak hi a lo bo thlau thei thin a hriat a nih avangin he auction hi a rang thei ang berin karkhat emaw karhnih chung emawa tihral dan hi Sorkarin zawng se, tih hi ka han ngen duh baw k a. Tin, Taxi, Maxi Cab, Bus leh public service kan tih ho zawng zawng pawh hi bithliah chin neia an permit leh registration pawh hi siam a tha lawm ni, tih pawh kha ka han rawt duh baw k a.

Tichuan, a tawp ber atan chuan Agriculture leh Horticulture bikah hian tuna kan han sawi tak sapthei leh thildang zawng zawng he Sorkarin a sorkar tirha Zoram dung leh vanga intodelhna tura a hman, vawiin nia engmahlo ni ta hi, pawisa tam tak sen ni si hi, kan ram tan leh kuthnathawktute tan theihtawp chhuaha heng zawng zawng hi ennawn leh ni sela. Tin, Land Development-ah hian tun kumthar atang chuan nasa lehzuala tan la turin leh kan Minister. hemi changtu pawh hi a thil tih tawhte lo ennawn leh turin ka chahin ka ngen duh baw k a ni e. Ka lawm e.

PU D. THANGLIANA : Pu Deputy Speaker, ka lawm e. Kan Minister 3 demand sawiho tur kan ni a. bial demand kan sawiho ni berin ka hria. Mahni bial demand kha kan ngaipawimawh zawkin ka hria. Ka sawi hmasak ber duh chu, A H & Vety ah khan, an ni hi rana kan intodelh nana hma nasa taka la an ni a, Bawngnhute liter 5000 lai dah that theihna tur District tinah an han nei hi mi tam takin kan hriat lem loh thil pawimawh tak mai, nitina Bawngnhute tharlama kan ei theihna tura ruahmanna an lo siam, hetiang an lo tihlawhtling hi a lawmawm hlein ka hria. Ran chaw siamna pawh hi kan MLA hote pawh hian zuk en hi a thain ka hria. Khuti khawpa Ramrikawna Vety-ina kan ran chaw chi hrang hrang siamna tur khawl ropui tak an buatsaih a, Mau tlawm zawka lei theih tura an ruahman lo ni ta khu kan hmasawna ropui tak niin ka hria. Chumai a ni lova, kuthnathawktuten an tharchhuah Vaimimte man taka an hralh theihna hmun a lo ni baw k a, Kan Vety Department-ina ran chaw siamna hmun khu kuthnathawktute thlai thar hralhna tangkai tak a ni tel baw k a ni.

Tin, Vety Department hian BAFFACOS-a an sum pekte kha chhungkaw 1227 lai hnenah Mau a lo tam a, ei leh bar kan neih dawn loh avanga an intodelh theihna tur atan ran chi hrang hrang vulh theihna turin ruahmanna an lo siam a. Bawngnhute tam chite pawh kha duh angin an pe tam theilo chungin, hmun hrang hrangah an pe a, a lawmawm hlein ka hria. Kan Sorkar hruaitute pawhin Vety Department hmalakna min lo enpui sak zel kha a pawimawh hlein ka hria.

Demand 42-naah hian hei, District tinah hian Motor Registration-ah leh Driving Licence chungchangah Computerise-in an han ti theite hi a tha khawpin ka hria. Hei hi hmasawna pawimawh tak a ni. Chubakah, Transport Department hi Revenue nei tura ngaih a nih laiin leibain an kal fo mai a.

Mahse, tunkum kal lai mekahte, kum kaltaah te khan leiba nei lova kal theia hmasawna an nei chho ringawt pawh hi a lawmawm hlein ka hria. Chutihruala kan Transport Minister-in min lo hriatsak ka duh chu, keini bial hi Burma Border hnaia awm kan ni a, kalna tur Sumo-te la nei tam lo kan ni a. Chuvangin State Transport Bus hi mumal deuh hleka min kal tir sak ve turin ka ngen nghal a.

Tin, Demand No. 31-na, Agriculture-ah hian kuthnathawktute nena inhnaih Department a ni bawk a, a tan pawh an tang a, kan Sorkar hian kuthnathawktute a ngaipawimawh a, leilet nawr zawl sak, land development tihte hi a tha em em mai a. Kan bialah pawh khian kuminah kum danga phur 80 an thar thinnaah khan kuminah kakzawn, chhipzawn tihte an han thar thei a, hei hi a tangkai a, ei leh bara kan intodelhna tur atan pawimawh tak a niin ka hria. Amaherawhchu, a thawh danah hian mumal deuh hleka enpui chu an ngai mang e. An duh lai lai a contractor ten ngeni, khawilai lai emaw avaia zo nghal zel lova thawh an lo nei thin a, helai erawh hi chu kan hotute hianin enpui deuh sela a tha khawpin ka ring a. Tin, Agriculture hnuaiyah hian irrigation, hei tunah chuan Depatment thar an ni ta a, hei hi a pawimawh khawp mai a. Nichinah kan MLA zahawm tak takte khan an sawi tawh a, Israel ram kan zuk kalnaah khan an tui deh vel dan kan hmuhin rual awna a na hle a. Thlaia intodelh kan tumna kawngah hian tui kan mamawh em em mai a. Chung tui kan mamawh min phuhruk sakna tur atana Department hrang anga MI Project Department a lo awm te hi thil lawmawm tak a ni a. Kan bialte, he tlangram tui harsatna hmun kan ni a, theihtawp chhuaha hma min laksak kha kan duh a. Heng hi Mizoram tan a tangkai em em a ni tih kha waviinniah hian kan hriat atan a pawimawhin ka hria.

Tin, Horticulture chungchanga Horticulture hovin an hmalakna Israel hote nena intiam rualin Serthlum tam lo tura ngaih. Chiteah khuan 12000 lai mai ruahmanna an siam a, hengte pawh hi tun aia chak zawk deuh leh company dang tha tho te nen Serthlum, nichina kan MLA zahawm takten an sawi tawh a, khawthlang lamah Serthlum a tam nasa tawh a, harsatna tam takin a tlakbuak mek a, a neitute pawh an mangang hle ni tein kan hria a, kang ho thlakna atan khan company pakhatin kumkhata 12000 chauh an tih theih chuan Mizoram mipuiina kan intodelh theihna tur atana pawimawh tak Serthlumah hian Israel company dangte pawh kha a tihbelh theih dan a awm lawm ni tih kha min lo ngaihtuah sak se a pawimawh awm mange tih kha ka sawi tel duh a.

Tin, Food & Civil Supplies chungchangah khan Mautam tam kum a ni bawk a, buhfai kan harsa tlang a, a bik taka ka sawi duh chu, kan bialah tunah tak hi chuan buhfai kudam lian 3 kan nei a, chungah chuan buhfai a awm angreng hrih a. Amaherawhchu, kan kawngte khi ruah an sur a, motor lian kal theih lohna, motor lian full-load-a kal theihna turin metal a la ni lova, metal a nih loh avang khian kawng te khi a nal thin a. Chumi anih avang chuan kan Minister zahawm tak hian fur ruahtui a tlak hma hian keini ho ang thingtlang kilkhawr deuh, kawngpui tha la nei chiah lo, tha tur mek hovah hi chuan min ngaih pawimawh sakin min dah tam sak sela a pawimawh hle turah ka ngai a. Chutiang tur chuan ka ngen duh a, BAFFCOS atangin kudam te min sak sakin a tha

em em mai a, kudam khat tlat khian buhfaite hi min dah sak thei sela tih ka ngen duh a.

Tin, Demand 41-na, Sericulture hi a pawimawh hlein ka hria a. Kuthnathawktuten awlsam taka buh kher ching lova, ei kan hmuhna turah harsatna awm lo a ni a. Budget-ah hian 7,08,65,000 awrh chauh an han dah mai hi a pawl khawpin ka hria a. R.E. lamah te a tihtam theih chuan kan intodelhna tur atana pawimawh tak a niin ka hria a, a hralhna awm sa ah hian hma kan lak theihna turin kan Minister pawhin Serchhip District-ah te hma min han laksak mek nain duhthu a la sam lo deuh a, hma min lak belh sak turin ka ngen duh a. Tin, Sapthei/Grape chungchangah te pawh hian Kawnpui bialtu zahawm tak kha an bial lamah hian Sapthei hi a awm ve lo a nih ka ring a, kan bial lamah khianrawn kal chho ta sela, Sapthei avanga chungkaw tam tak harsa lova an awmte khi a ropui hlein ka hria a, a zamna tur thirzai hi sorkar hian tam zawk peir ngun taka enin a zam ngei tur neite hnenah pe zel sela, chu chu kuthnathawktute tan intodelhna kawng pawimawh a ni ngei ang. Heng Sorkarin ruahmanna a siamte hi Mizoram mipuite tan thil lawmawm tak a nih avangin tuna kan Minister zahawm tak tak pathumte demand hi pass-pui turin Member-te ka ngen a ni e. Ka lawm e.

PU H. ROHLUNA

:

Pu Deputy Speaker, ka lawm e. Vawiina kan demand sawiho tur hi sawiho mek ti tawh zawk ila, vaibelchhe 286 chuang Minister pathum chanpual kan sawiho a ni

a. Hei Mautam tam kan thlen lai a nih avangin helaia a khawih deuh Department-te an lo ni bawka, a pawimawh hle a.

Han sawi hmasak ka duh chu Agriculture leh Horticulture lamah hian han lut ve ta ila. Aizawl South-II bialtu khan an party leh Mautam inkaihnawih dante kha a sawi a, khalam kha chu sawi ve ta lo mai ila a thain ka ring a.

Hei lo neia eizawng hi nikum September thlaa zawhna chhannaah khan chungkaw 89496 vel niin Agriculture Minister chhanna kha a awm a. Tichuan, khang zingah khanin Aieng ching tura pek hi chungkaw 39366 bawr vel an ni a, a chanve deuhthaw hi Aieng ching tura pek an ni. Hengah pawh hian hei Mautam nasa takin kan tuar a a hlawhtling ta lo em ni? Kan Aieng chinte hi, heti tak maia kan harsa ta hi tih ngaihtuahnaah a awm theiin ka hria a. Hei, MIP an ti a, kum 2002 atangin tan a ni a. Vawiin ni thlengin intodelh chungkua hi engzatnge awm ta tih kan Minister hian a chhang thei chiah lo niin ka hria a. Helaia MIP chungchang zawhnaah pawh khan. Chutiang chu a nih avangin kuthnathawktute intodelh loh vang a ni a, vawiina kan tam nachhan hi. Kumtin hian 2000 lakhs chuang MIP ah hian hmanral a ni ziah a, hei, tunkum kal mekah phei chuan 2070 lakhs vel Revise Estimate nen phei chuan a ni a. Chutiang chu kan pawisa hman dan a ni a. Zoram mipuite hi heng kum 2002-2003 atang

khan he MIP hi a nihna ang takin a target hi thleng ta sela, kuthnathawktu a bik takin lo nei mite hnenah hian thleng nise, vawiin nia hetu tak maia kan tam hi a ziaawm ngei ngeiin ka ring tlat a ni. Chuvangin, a target hi a thelh niin ka hria a, a policy-te, a programme-te an han tidanglam leh thin a, chuvangin harsatna hi kuthnathawktute hian an tawh hi a ziaawm chuang lo niin ka hria a. A nihna ang tak hian he MIP hi kan hlawhtling lo tih hi kan Sorkar pawh hian pawm ngam sela, ka duh khawp mai a. Tiang chuan kuthnathawktute tana ruahmanna hi kuthnathawktute hnen thleng lovin, a thil tithei deute hnenah hian he pawisa hi a riral ta mai mai em ni? tih hi ngaihtuahna thui tak a awm theiin ka hria a ni. Chuvangin, kuthnathawktute mangangin kawng an zawh ta a, vawiin nia Zoram mipuite ngaihdanah phei chuan MIP kan tih hi 'mithil titheite intodelhna programme'ah an ngai ta a ni. Chutiang chu a nih avangin, kan programme hman dan hi uluk lehzuala kan kalpui loh chuan tun kan budget pass mai tur 2008 - 2009 a 2000 lakhs kan dah pawh hi ho tein a ral leh mai ang tih hi Pu Deputy Speaker, ka hlau khawp a ni. Thui tak sawi pawh a chakawm a, mahse, kan sawi hman lo turah ngai ila.

Tiang chuan, hei MIP atangin Sapthei te chin tir a ni a, an hlawhchham zia chu Hliappui leh Pawlrang angahte chuan a bik takin Pawlrangah chuan lo pawh vat lovin an chin tir a, nikum 2006 atangin vawiin ni thlengin a zamna an la dawng lo nia. MIP atanga pek tur ni si kha, zamna tur an neih loh avangin leiah te a zam kual vel mai mai a. Vawiinah chuan lo an vat lova, he Sapthei chinah hian an lo innghat a, Sorkar an lo ring laklawh tawh si a. Chuvangin, mipuiin harsatna an tawh a ni tih hi kan Minister zahawm tak pawh hian min hriat sak sela. Hei hi nikum 2007 September Session-ah pawh zawhna ka pe tawh a, nikum chung ngeia a zamna pek tur angin min chhang a, mahse, vawiin thleng hian pek an la ni lova, hei hi harsatna an tawh a ni tih hi min hriat sak sela ka duh a.

Hei Mautam tamah hian eizawna thildangte hi ti turin kan Sorkarin mipuite an fuih a, buh ringawta innghat lo turin an ti a, Sapthei te an han ti ve bawh a, mahse, puihna a awm leh si loh chuan an tam mai loh nakah, vawiin niah hian tih hi ka sawi lo thei lo a ni. Leithaah organic te kan han sawi uar viau a, organic state nihte, khawilai laiah emaw chuan organic farming-te hi kan puang pawh a ni mai thei e. Mahse, vawiinah hian Saptheite hi ram chung mai nilo, ram pawnah pawh thawnchhuah tur tih kan sawi chamchi a, mahse, chemical fertilizer vawiinah hian kan la pe fo a nia, chung ang te chu kan Sorkar kal dan a ni a. A bik takin Pawlrangah te pawh trip engemaw zat hi an pe a ni. Chutiang chu a nih avangin mipui, kan kuthnathawktute hi bum tlak an ni tawh lo, hetiang zawnga bum bum tlak an ni tawh lo tih hi kan Sorkar hian hria se ka duh khawp mai.

Tam do nan Sorkarin BAFFACOS an han ti a, BAFFACOS an han tih chu a bik takin Agriculture hi lo neitute concern a nih avangin a pawimawh a, chumi a pawimawhna ang chuan eng angin nge Sorkar a inbuatsaih tih 2005 September Session-a zawhna chhannaah chuan Mau par a lo awm

chhoh dan leh Sazu pun dante uluk taka survey reng a ni tihte, buh tichhetu ber Sazu suatna turin poison tul angte lo neitute hnenah a thlawna sem tan tawh a ni tihte. Sazu a lo puang a nih pawhin Sazuin a tihchhiat ve loh thlai, sum chang thei, Alu, Purun, Vaimim te ching uar tura lo neitute fuih tihte, heng ang zawng zawng hi Sazu hian a duh em em a ni tihte hi kan Sorkar hian a hre na nge? tihte hi ngaihtuahnaah a awm a ni. Sazu a puan chuan Vaimimte hi an chaw tui ber a ni. Alu te pawh hi an ei ve tho, thildang a awm loh chuan tihte hi kan hriat a thain ka hria a, kan inpuahchah dan hrim hrim pawh hi kan tifuh lo a ni tih hi vawiin niah hian pawm ilang chuan a thain ka hria a.

Nikum Budget Session-ah khan Grape chingtuten harsatna an tawh thu ka sawi tawh a, chhungkua 69 in Rs. 780/- theuh an thawhkhawm a, National Horticulture Board (NHB) tanpuinaah loan an lak duh thu kha ka sawi tawh a, chung chu vawiin ni thlengin kan Minister-in House-a min tiam ang khan tihlawhtlin ala nilo hi a pawl ka ti a. Chu chu thui takin ka sawi lo ang a, a niin a hrethiam vekin ka ring.

Tunah hian Winery hi din turin Hnahlan leh Champhaiahte Sorkar a inpuahchah a, hengah pawh hian National Horticulture Board (NHB) atanga tanpuina te, Bank atanga tanpuinate an lo tihsak a, Department-in an lo tih ang tho hian hetah pawh hian harsatna an tawh leh mai hi a rinawm a ni. Self Help Group-te indinin, chuta tang chuan Rs. 150,000/- theuh puk turin Sorkarin tunah an han ti leh mek niin ka hria a, chutiang chu a nih avangin a buaithlak khawp mai a. Bank-ah hengte hi han la leh ta sela, a hma ami Rs. 780/- te pawh loan hmuh pawh awm mang lova hetia a riral ang tho hian harsatna an tawh leh ang tih ka hlau khawp mai. Hengte pawh hi uluk zawka ngaihtuah a ngaiin ka hria.

Pu Deputy Speaker, Alu chi hi quintal nuai 3 chuang hi 2007--2008 ah pawh hian supply a ni a. Hengte pawh hi vawiin niah hian kan Ruling Party Unit te hian an ta emaw an ti tlat mai a ni. Hliappuiah te chuan February ni 11-ah trip khat a thleng a, quintal 100, chungte chu V/C ten rualkhai takin a hmun vat turte hnenah sem an han tum a. Amaherawhchu, unit hian anmahni ta emaw tiin anmahni party mi leh sa inpek an tum a. Tiang chuan an sem ta a. Kan V/C te an lo inrawlh dawn phei chuan MNF Headquarters-a Secretary pakhatin Police man tirah a vau nia mawle. Hengte hi a mak ka ti, kan Sorkar hian kuthnathawktute a enkawl danah hian vawiin nia Mautam tam kan tuar hi tuar lo rual kan ni lo a ni tih hi pawm ngam sela ka duh khawp mai Pu Deputy Speaker. Chuvang chuan, kan rama kuthnathawktute hi bum tlak pawh an ni tawh lo, a nihna ang takin ram kaihuai ila, a nihna ang takin kuthnathawktute hnenah hian an chanvo hi thleng rawh se tih hi ka sawi duh a ni. Ka lawm e.

DEPUTY SPEAKER : A chiang khawp mai, Pu Suama hi a pharna a rei tawh deuhhlekk a, ka ko ve leh ang e.

PU LIANSUAMA

: Pu Deputy Speaker, ka lawm e. Demand No. 4-na, Law & Judicial, Parliamentary Affairs-ah hian High Court chungchang hi Pu Deputy Speaker, kan Sorkar hian kan

hlanchhiahna a rei tawh khawpin ka hria a. Kum 1936-a India Sorkar leh MNF unaute Inremna thuthlunga tel a ni nghe nghe a. High Court thar kan la neih hma, hmun hla takah kan dah rei tawh khawp mai. Mi ram state-te kan thlir chuan khawpui lun lai tak luahtu an ni a, state structure-ah hian Legislature, Executive leh Judiciary-te hi a pawimawh kan ti thin a. Delhi khawpui kan en chuan, supreme Court leh Delhi High Court chu Parliament nen inhlal lo teah an awm a ni. Chuvang chuan an chanvo tur hi an la chang lo. Hei hian sawhkhawh tha lo tak mai a nei a, Court-a Sorkar khin a nih reng rengin kan tla deuh fovin ka hria. Chuvang chuan, kan Law Minister hian tha tharin High Court hi an awmna tur, an phu tawkah hian rem ve vat tura tan a lak hi pawimawh hlein ka hria a. Chu chu ka sawi hmasa duh a ni.

Kan Governor In tura ruahman saw tumahin an luah duh lo mai dawn emaw tih mai tur a ni a. Entirnan, Governor hi inthlak dawn ta sela, a lo thlen hlimah hei hi Raj Bhavan a ni e, tiin hruailut ta ngawt ila chu an luah mial mahna. Sawngte saw High Court atan hian a itawm khawp mai a. Kan pek theih mai a van tha em ! tih ka sawilang a ni.

Pahnihnaah chuan, Demand No. 42-na, Transport chungchang thu hi a sawinaawm ber niin ka hria a. Aizawl khawpui tawt ta lutuk hi a mangan thlak a ni. A chang chuan Raj Bhavan chhim lam gate leh a piah lam hret atanga Assembly House thleng tur pawh hian darkar chanve thang chang te a awm ta a ni. Chuvang chuan dan khauh tha deuh hlek kan siam hi a hun khawp mai.

He term tir lamah khan Private Member Bill ka thehlut a, thu dangah. Tun tum kan Session dawn pawh hian ka inbuatsaih deuh a, mahse, ka puitlin ta lova. Mizoram hian a bikin khawpuia Traffic Road Control Regulation hi kan neih a hun tawh khawp mai a. Police pawh hi an hah hle mai a. Chuvang chuan, Traffic Control Regulation kan ti dawn nge ? Aizawl khawpui kawng hi tlangram khawpui dangte nena khaikhinin a te hran lo. Sikkim khawpui Gangtokte khu an kawngpui a te khawp mai. Tin, Himachal khawpui Shimla te pawh khu an kawngpui a te tho. Amaherawhchu, an regulation a tha a, chuvang chuan harsa lo takin Motor leh kea kal thinten an hmang tangkai a ni. Vawiin nia kan harsatna tawh lian ber pakhat hi chu kan Motor tam ta hi chu thukhat, kawngsira kan park nasa lutuk leh building material leh thil hrang hrang kan inzuar nasa lutukte, Two-Wheeler leh Motor Workshop leh Industry tenau kan din nasa lutukte hian mi a dip ta hle mai a. Tunhmaa awm kha tunah hi chuan a awm ta lo hle a ni.

Pu Deputy Speaker, ka sawi tel hram duh chu. Chanmari West kawipui kan tih maiah sawn hmanni lawk khanin kawng hi P.W.D. in an siam tha hlah mai a, a lawmawm kan ti a. Kan han kal a,

karkhat/karhnih vel kan han kal dawn chauh a, PHE in a maka maka nasain an han lai chhe leh ta hlah mai a, Police duty, Traffic duty ngaih ngai lohnaah khan duty-te a lo ngai ta a. Chuvangin, co-ordination hi a thalo a ni. Kan kawngpui hrulah hian chhun zan zawmin motor kan park nasa em em a, chu chuanin kan khawpui hi a titawt zo a ni. Regulation khauh tak nei ila, vawk in pawh kan sa zel a, mahni compound-a motor in sak tur tihrap mai hi a hunin ka hria a. Chuta tan chuanin, Budget-ah pawisa dahin loan pawhin kawng hrula in neituten an motor in an sakna turin kan pe ang a, an mortgage nghal ang a, tah chuanin kan khawlai hi kan thian thawl thei ang tih a rinawm a ni.

Aizawl khawpui hi kan sawn lawkin a rinawm loh a, kawng kan ngaihtuah deuh chu a pawimawh a ni. Khatlaah chung ang tithawl deuh tur chuan kawng chungah leilawn sei deuh, mi ram khawpuite angin din kan han tum a. A tualchhung ami ten an lo remti lo a, tichuan, kan pamtul leh ta a ni. Hei hi a pawimawh hle mai a, motor-a han chuan chang pawh hian kan hmanhmawh deuh a, kein kan lo va kal mai ang e, tih khawpuih kan chan ta hi a pawl khawp mai. Chuvang chuan, hei hi kan Transport Minister-in han ngaihsak lehzuah deuh se tih ngen pahin kan harsatna kan tarlang ve hrim hrim a ni.

Mizoram pumah hian Mautam hma daihin Serthlum nasa takin a tam a, keini khawthlang bialtu ho tan pheih chuan a luhai thlak khawp mai. Kum 2005 September favang Session-ah khan Serthlum Tam chungchang thu hi Assembly-ah Resolution a lut tawh a ni. Member thenkhat ten thahnemngai taka an sawilan tawh kha. Kum khat Buh Tam pawh heti tak hianin kan buaipuiin chhawhchhi Tam leh thliin an nuai te pawh hian compensation kan pe thin a, kan Serthlum Tam vanga chungkua harsa te hi ngaihsak an hlawh lo hle mai a. Chuvang chuan, Tlungvel bial a ni emaw, Sateek bial a ni emaw hmuntinah a tam a, kan Sorkarin tan a han lak pawhin tam tawh miau chu a ngaihna tak a awm tawh si lova. Chuvang chuan Relief & Rehabilitation Department pawh hian kuminah hian tan min han lakpui deuh chuan a lawmawm khawp ang. Chuvang chuan, Tlawng thlanglam kan harsatna hi he House-ah hian ka han sawichhuak ve a ni.

Chutihruah chuan Pu Deputy Speaker, hei lo hal a hun a, kan hal mek a, thlai leh buh chin a hun ta a, Agriculture Department Budget hi kan han thlir vang vang a, Buh chi leina tur provision a lang miah lo hi pawl kan ti khawp mai a. Amaherawhchu, kan Chief Minister khan MIP hi kawngtinrengah a hman theih e, a tih avang khan a zamawm lo turah ngai ta ila.

MIP hi chitinrengah a hman theih lah tak a, nikumah Aieng quintal nuaikhat leh sangli leh zathum sawmsarih panga a chi lei nan hman a ni tawh a, tichuan, he MIP pawisa vek hian Aieng thar mek a hi lei ta mai ila tam kan van dawm nasa dawn em tih ka rilruah a lo lang a. Chu chu ka'n tarlang leh zawk a ni.

Tichuan, Sawhthing chungchang te, Aieng chungchang te thildang tam tak hi kan mipui ten thildang production a tharchhuah hi

chu an thei mai a, market hi a pawimawh khawp a. Chuvang chuan MIFCO hi Industries hnuai a awm hlah mai a, policy thlak thleng a, Horticulture Department-in a enkawl hi a hun tawh hle mai a. sapthei chinna tur zawng zawng Horticulture-in a buaipui a, a chinna atana thil tangkai, thirzai pawh nichin khan kan ngaithla tawh a, a hralh hun a lo thleng a, an kutah a awm leh ta lo hlah mai hi siamrem ngai tawh a ni a. Tunhma atanga tam tawh thil hi siamthat ngai lai a awm ve fo mai a. Chutiang chiah chuan MAMCO te pawh hi Agriculture hian enkawl tawh zawk mai selangin a tha awm mange aw! tih ka'n tarlang duh a ni e.

Agriculture Department Budget Head-ah hian Agriculture Marketing a awm tho bawh a, tiang chuan a in lalawn fel deuh ang tih hi rawtna ni pahfawmin thil ngaimawh awm deuh te ka'n tarlang ve a ni.

Tin, kumin kan hman mekah hian Minor Irrigation, Agriculture Department hnuai peng pakhat mai ni thin kha, tunah chuan Department pangngaiin a lo piang ta a. Hei hi ala tawh lo em em a, an hmingte pawh hi siamrema Irrigation and Flood Control Department ni selangin, Agriculture thlafem a an awm lo hi a tihzia khawp mai a. Tichuanin, Engineering Department-a puan ni selangin an Accounting System-te pawh hi siam danglam a nih hi a pawimawh a. Agriculture-ah leh Horticulture-a kan hlawhtlin theihna tur atan chuan, irrigation tel lo chuan hna a thawh thui theih loh a ni. Chuvang chuan, helai hi ka ngaipawimawh em em a ni.

Pu Deputy Speaker, a tawpna ber atana kamnih khat leka ka sawi leh duh hram chu, Sericulture Department hi a ni a. Sericulture Department hi duh ang tawkin kan House hian kan tuipui lo emaw ni chu aw? kan Ministry-te pawh hian kan tuipui lo emaw ni chu aw tih Session hmasaah khan ka sawi tawh a, hei hi kan kuthnathawktute inngahna thlatina cheng sing tel kuthnathawktuten an lo thawh chhuah theihna tur Department a ni a, an phu ang tawh hian enkawl ila chuan economics-ah kan kuthnathawktute reiloteah an intodelhna tur chi ngei ngei niin ka hria a. Chuvang chuan, 1984 - 1985 khan Minister mawhphurtu ka'n nih ve laiin department hranah siamin nuai 80 chauha tan a ni. A lo lian ve tawh hle naa, duhtawh a la nilo hle mai a, hei hian ngaihpawimawh hlawn zual se tih ka MLA puite sawi zelnaah pawh. A hmaa kan ngaihthlak tawhah pawh in la tiri lo riau mai a, ka'n campaign deuh a ni. Sericulture hi kan ram tan kan hnukpui pakhat tur a ni. A tlangpui thuin kan budget hi a tha thawkhat a.

Good Friday kar a ni a, lungngaih hapta tihte pawn kan sawi thin a. Mak ka tih deuh mai ka sawi duh chu tam kuma BAFACOS head-a pawisa a awmlo hlah hi erawh chu mak ka ti a. A lungngaihthlak ka ti.

PU LALRINLIANA SAILO : Pu Deputy Speaker, demand 42-na, Transport-ah hian a hun ve tawhin ka ring a. CAG report-ah hian Epitom an rawn ziaakah hian smoke EMISSION test tih hi an rawn sawi a. Hemi conduct loh avanga vaibelchhe 3 leh nuai 29 lai mai hloh angin a rawn hmu a. Hei hi khawpui tawt tawhah tih ve a hun tawh lawm ni ? Engangin nge hma kan lak tawh tih hi ka zawt duh a, lak nilo ta se a pawimawh ve tawh khawp mai. A chhan chu Traffic jam thu kan ngaithla zo tawh a. Traffic jam karah motor khu thalo tak tak nen kan inbawh hian a hrisel lova, Pollution Control Board-te an awm tawh nen, hei hi a pawimawh hlein ka hria, Mizoram tan hian tih ve a hun tawh lawm ni ka ti a.

Tin, Motor insurance hi Session apiangin kan sawi a, hei hi transport kan ti tawh a, Chief Minister hian engatinge a tih loh aw tih hi ka sawi duh a. Hmanah ka sawi tawh a, hei hi chu Finance liau liau a ni.

Tin, 34-na, Vety-ah ka kal leh duh a. Tunlaiin vawksa van thu kan ngaithla a, kan hria a. Kawlkuh Piggery Village-te kan tlawh a, kan hmu a, a fail a ni. Kawlkuh-II kan ti a, a fail a ni a, sawi thui ka tum chuang lova. A tihngaihna a awm ngang lo a ni. State dang atanga kan lak luh a ngai hrim hrim mai a. Chuvangin Champhai atanga lokal thla kan dang ringawt mai hi a dik tak chuan kan Minister tak aimah hian kan Chief Minister zahawm tak hi niin thudawna kan nei a. Khimi vawk lo laluttu thin hi mahni party a nih loh avanga thikthu lo tihchhiat ang niin kan hria a, a pawu khawp mai a. Tunah hian vawk thianghlim a nih chuan khawilai ami pawh hi lak ni mai se tih ka sawi duh a.

Tin, demand No. 31 & 32-ah hian hmannah kan sawi tawh a. Alu chi hi kan Minister zahawm takte hian an lei tawh a, Alu chi thalo an lei a ni. Hei hi a thalo khawp mai. Mizoramah hian kumin pawh hian Champhai District-ah vawihnih ka kal tawh a, Lunglei District, hetah Tlabung thlengin, Buarpu tlangdung, Serchhip District-ah te Kolasib District-ah pawh vawili lai ka zu kal a, ka hrechiangin ka hria a, ka mitin ka hmu a. Nikum lama Alu chi thalo sem a kha a tiat thei lova, a pawu ngawtin ka hria. Kan Minister zahawm tak bialah ngei pawh a tiak thei lo a ni a, a chiang khawp mai. Alu chhia pawh Silpouline-in an khuh luk tih pawh kan hmu a, chutiang chu a ni. Min dim teh a ti a, dim te tein ka'n sawi ang e.

Amaherawhchu, chutih rualin Pu Deputy Speaker, kuminah pawh kan zu kal a, Vaivakawnah khan, Alu chi thalo an la supply fo mai a. Keimahni mimawl ni mah jila kan hriat ve dan leh a farmer-ten min hrih danin Alu chi tha chu a sawng tur a ni a, a sawng an sem naah chuan a tha a, a sawng lo kha an supply nghek mai a, kumin pawh hian nuai sawmruk pakua leh singthum man lai an lei leh a ni. Chutiang chuan kan pawisa hi kan hmang a, a pawu ngawtin ka hria a.

Tin, Hi-tech Green House tih hi Champhai leh hmun dang dangah siam a ni a. Anih phung ang taka siam nise a tha ngawt ang. Sq. metre 1-ah Rs. 325/-a lei a, a tlangpuiin Sq metre 5000 tur a ni a, pawisa tam tak kalna si. tin, Sq. metre 50000 hi an siam zo meuh em kan hmu a, kan hrechiang a ni, pawisa hi a nilo a kal hi a tam hle mai a, eng ang pawhin ti ila, chutiang chuanin Deep Irrigation Installing ang pawh hi Khawhaiah te Lungdarah te an ti a. Tiang chuanin kan hmu a ni a. A pawisa sen hu aiin a hman tangkai tur leh Farmers-te hian an hman tangkaipui em aw tih hi ka sawi duh a ni.

Tin, Organic Farming atan incentive pekna turin Tapan-a hmingin Silchar base, Tapanan khanin Organic Manure te kha an lei teuh mai a, kan support-naah chuan Alu chi a chhia an sem avang khan Alu chi a lo tiah a, han dahthatna tur khanin tih a ni a. Tunah hian Alu chi an sem avanga a tiah theih loh avangin a awm hnur mai niin ka hria a. Chutiang chu a ni a, pawisa hi a niloa hman hi a pawl tak meuh meuhin ka hria a.

Tin, thil pakhat MIP-ah te pawh pawisa kan dah a, vaibelchhe 20 lai, a hmanna lampang hi a pawimawh khawp mai. Sawi pawh a hrehawm a, nikum khan Champhai MIP pawisa kha MNF Block khan an insem tawp mai a ni. Cheng nuai 296 kha 15% kha MNF party khan an hauh tawp mai a, 3% kha a department khan an hauh bawk a. Tichuan, a hmingin hna an thawk chho a, an pawisa party-in an lak kha a thawktu ten an ngam si lova, ni 29.8.2007 hian DAO office-ah Champhai atangin nuai sawmpasarih leh sing sarh kha MNF Block President North & South in an lachhuak tawp mai a ni. A lachhuaktute pawh Pu Khawluaia leh Pu S. Vanlalzuala te an ni a, ni 29.8.2007 khan an insem ta a ni. Pawisa hi enganga tam pawh dah ila, a hmanna a dik loh chuan Pu Deputy Speaker, a diklo hrim hrim hian ka hre thin a. Chuvang chuan hun lo kal turah kan pawisa awm ang ang hi fimkhur taka kan hman ava tha em tih ka sawi duh a ni.

Tin, Demand No. 17-naah, a ni hi nichinah kan sawi tawh a, a taima tawpin ka hria, kan Minister zahawm tak Pu Sangthuama hi, a viak a tha a, a tha lam leh a chhe lamah pawh a vir vak pawh hi a tha khawpin ka hria, a bak chu ka sawi lo ang a, a taima a.

Tin, ka bialah a department leh ama hnenah pawh ka'n sawi teh ang. Nikum chungin Buhfai tha takin min dah sak a, ka lawm hle a ni. Khawhai bial hmingin lawmthu ka hrilh duh a, chutihualin thil pakhat sawi ka duh kher chu, hei Court thua te kan hmu a, an hming chu ka sawi diat diat lo ang a, zawhnaah te pawh khan a awm a, Court case nei lai engatinge he department-ah hian Supply Inspector emaw Store Keeper ten emaw cheng nuai 20/30 eirukna case a tam em em mai hi a tihreh dan a awm lawm ni, kumtina awm chho a ni a. Hei hi chu administration tha taka enkawl ni sela chuan a tih theih ka ring a, chungte chu ka sawi tel duh a.

Tin, demand 37 leh 40 hi (ka tawng a laklawh ania Pu Deputy Speaker). Sericulture hi kan Member zahawm tak Pu Suama

khan a sawi a, hei Khawhaiah te, Sialhawkah te, Biate, khinglai tlangdungah khian an ching nasa a, a scope a that tehlul nen hian hei hi kan ngaihthah deuh niin a lang a. Chuvang chuan an chinna leh an project luh tawhna kha umzui se a that ka ring a. Tunah pawh khian hmalak tawh laklawh chhonzawm chakawm tak tak a awm a, scope tha hle si kha a uiawm ka ti.

Tin, Silpouline hi ka sawi tel duh a. MLA hnenah Khawbung bialtu zahawm takin pe se a tih kha a tha ka ti, keini aia chiang an awm lo, a mamawh dik takte hnenah kan pe a ni. Tin, vote a catching lo reng reng. Inthlan lai khan Rs. 250/- in pakhat hi ka lei chho ve a, hmeithai harsate an lo awm palh takin ka ti a, ka keng chho ve a, a rawn thleng chho tak tak mai chu, a trip-in E khai! khum hnuaiah kan tlawh lut kan tlawh lut ringawt mai a ni. Mahse, vote a catch lo reng reng, engmah a ni lo hei hian, miin engmah an ngai lo. Amaherawhchu, vawiin niah hian vote lampang nilo in MLA tena mahni bial chhunga a mamawh leh harsa te dik tak kan pek hi a tha hlein ka hria a, chu chu ka dawih duh a ni. Pu Deputy Speaker, ka lawm e.

PU K. LALRINLIANA : Pu Deputy Speaker, ka lawm e. Hei vawiin niah kan Minister zahawm tak takte demand kan sawiho a ni a, department pawimawh tak takte an ni a, kan ram intodelhna atana thil pawimawh leh tunlai tam laia department pawimawh tak takte an tel a, a pawimawh hlein ka hria.

Demand No. 19-na, LAD-ah hian ka sawi hmasak duh chu, an ni department hi Village Council 739 enkawl lai an nei a, heti chung hian tunhma kum 1987, 1988, 1989 chho vela Village Council lawmmante ngaihtuah chuan tunah hian hmasawn tak kan ni tawh a, Sorkarin tan a la a, Village Council lawmman tihpun a lo ni chhoin, VCP in Rs. 600/-, Vice President-in Rs. 500/-, Member tinin Rs. 300/-, Secretary-in Rs. 400/-, Tlangauin Rs. 250/- lawmman an lo la ve tawh a, a la beitham viau nain tunhma ngaihtuah chuan tlemin a kang/ziaawm chho ve zel a, tun aia la kang chho zel tur pawhin buatsaih theih nise chuan a tha hlein ka hria.

Tin, Housing Loan hi tunhma khan LIG(Low Income Group) ah singthum an pe thin a, singnga ah tihpun a ni a, MIG(Middle Income Group) hi singnga ni thin kha singriatah tihpun a lo ni ta bawk a, a lawmawm hle a ni. In sa thei lo ten In an lo sak theih phah vena a ni a, a lawmawm takzetin ka hria.

Tin, District tinah DLAO Office sak turin hma an la chho a, keini Kolasib District-ah pawh Office tharte kan nei a, mipuiin kan hmang tangkai hle a ni.

Tin, Park-te, recreation centre te, hmun hrang hrangah an siam sa a, sak lai mek te pawh an nei a. Aizawlah pawh Lawibualah, Lungleiah te an siam a, Kolasib District-ah pawh District Park-te an siam a. Tin, Lengpuih te pawh ruahmanna a kal mek a, hengte hi mihringin kan nunphunga kan mamawh em em a ni a, hei aia nasa a tanlak a, siam belh te pawh hi a tul hlein ka hria a.

Tin, demand No 34, AH & Vety hi ka sawi leh duh a. 1998 atanga tun hun thleng hian Animal Health Centre tihte Dispensary te leh ran hriselna tur atana asset chi hrang hrang 204 lai mai an sa tawh ni te pawhin kan hria a, an hmalakna a ropui ka ti khawp mai.

Tin, N. Vanlaiphai bialtu zahawm takin a sawi ang khan Animal Feed Plant 50 matric tone capacity Ramrikawnah kan neih khu kuthnathawktute tan pawh Vaimim leh Bekang tharte hralhna remchang tak a ni a, kuthnathawktute, mipuiin kan chhawr hie a ni. Hemi atang hian ran chaw quintal 1.33,114 lai mai siam chhuah tawhin ramdang atanga ranchaw lak ngai lovin keimahni thar atanga kan siam thei hi a lawmawm hlein ka hria.

Tin, Bawnghnute sawngbawlina hmun Aizawl, Lunglei, Kolasib-ah te peihfel a ni tawh a, Champhaiah tunah hian buatsaih leh mek a ni a. Bawnghnute sawngbawlina hi a manhla hlein ka hria, Bawnghnute hrisel, natna hrik pailo mipui ten kan lo in phah a, Kolasibah pawh khuan kan tangkaipui hle a ni. Ran vulhtu an lo pung a, Bawng vulhtu an pung a, eizawmnaa hman an tam phah a, Kolasib khawpui chhunga kan eikhawp aia tam tunah khuan kan tharin an sawngbawl thei a, Silcharah liter engemaw zat kan hralh thin a ni. Silchar lamin an rawn la thin a, hengte hi sorkar hmalakna ropui tak niin ka hria.

Tin, ran (animal) damlo, an natna zawn chhuahna (Animal Disease Investigation Laboratory) District tinah kan neite hi tha hlein ka hria a, kan ran vulh hrisel leh hrisel loh en nante leh kan ran talh, ei tur a hrisel tawk em tih en nante pawh thil tangkai tak a ni awm e. Aizawl, Lunglei, Champhai, Saiha, Kolasib leh Lawngtlaiah te kan nei a, a lawmawm hlein ka hria. Ran leh mihring pawh kan hrisel phah ngei ang.

Tin, hengbakah hian Artui awpkeuna District tinah dah a ni ta a, Ar vulh mite tana thil lawmawm tak, phai lam atanga an lak thin kha tam tak a phuhruk a ni. A ropui hlein ka hria, Arah pawh kan intodelh phah hle a ni.

Tin, BAFFACOS atang khan ran vulhtute mi 1227 lai Vety atang hian tanpui an ni a, BAFFACOS hi a lo tha a ni.

Tin, Demand No. 42, Transport hi, sum an lak luh hi 1998 atanga January tunkum inkar hian nuai 5412 chuang lai mai sum an lalut a, Sorkarah an thawh tha hlein ka hria a, a lawmawm takzet a ni. Tin, DTO

office-te changtlung takin Computer hmangin Driving Licence, Motor document engkim computerised vek a ni ta a, kan awlsam phahin hmasawna kan neih phahna nasa tak niin ka hria, a chhuanawm hle a ni.

Tin, Silchara Station Superintendent Office hi Kolasib a sawn chhoh tura ruahman kha engtinge a kal tak zel tih kha, kan Minister zahawm tak kha ka zawt ve duh a. Hei hi tih ngei thain ka hria a. Silcharah khuan a hmangin Station ringawt kan nei nangin kan hmang tangkai tak tak lo, Mizoram atanga Control ran a tha a ni, engtikah nge Kolasib-ah sawn a nih ang tih kha ka han zawt duh a ni.

Tin, demand No. 4, Law & Judicial-ah hian District Court building hi, hei, Saiha, Lunglei leh Aizawlah te kan zo tawh a, Kolasibah pawh kan sa mek a. Tun atanga hun reiloteah chuan hawn kan inbeisei a. Hei hi engtiknge kan hawn theih dawn tih hi kan Minister zahawm tak ka zawt nghal duh bawk a. New Capital Complex-ah khuan Family Court a hrana siam tumna awm hi tha ka ti a, hengte hi kan hmasawna tangkai tak tur a ni.

Tin, demand No. 31, Agriculture-ah khan Oil Palm hi hei kan ching nasa a, kan ching nual tawhin an la ching belh zel bawk a. Company pathum laiah Memorandum of Under Standing (MOU) te kan sign puiin hma kan la a, Kolasib District-ah pawh hma kan la nasa hle a. Oil Palm Factory din hi hmanhmawh thlak in ka hria a. Bairabi-ah te hmalak tumin kalpui a niin ka hria a, factory neihna tur atan hmalak dan, hmalak chin kan Minister zahawm tak ka zawt tel duh a.

Tin, Crop Insurance, National Agriculture Insurance Scheme atangin tih tum mek a ni an ti a. Hei hi company leh Sorkarin hmalak tumna kan nei em tih kha ka zawt tel duh a. Tanah engnge kan dinmun? Hei hi Farmers leh Sorkarin 50/50 in kan in share tawh a, insure tur nite in ka lo hria a, chu chu a dik em? ka zawt tel nghal ni se. Tin, Farmers record mumal tak siam tumna/ruahmanna awm niin ka hria a, a lawmawm hlein ka hria. Growers Card, Soil Health Card siam tum niin ka hria a, farmers-te hian main trade kan thlan thiam a, kan kalpui a ngai tawh a. Entirnan, Sangha vulhtuten Sanghaah in concentrate se a bak chu an ti a nih pawhin tanpuina ang chi kha thildang atangin la tawh lo se, Sangha atang chauhin tanpuina la se. Thlasik thlai chingtuten thlasik thlaiah, Oil Palm chingin Oil Palm, a karah thildang a lo chin pawhin ching tel tho se, tanpuina Sorkara awm ang chiah, an trade thlanah chauh tanpuina pek ni ta se, a thenin a chikima tanpuina an lak hian farmers thenkhat chanvo an la hek tel thin a, an trade ang khan farmers-te hi Card siam sak ni ta se, kan that phah awm mange ka ti a ni, eng farmers nge an nih chian sak hi a tul a ni.

Tin, Certified Seed Production Programme. thlai chi tha, keimahniina kan thar chhuah a tam tawh hi a ngai a. Hmun dang atanga lakluh ai khan henglaia kan thar chhuah ve hi a tul takmeuh tawh a, he programme hi tunah hian kalpui mek a ni tih ka hria a, a lawmawm hlein ka hria, kan intodelhna zel tur a ni.

Tin, Water Shed Development Programme chungchangah hian CSS atanga kan hmuh NWDPRRA leh WDPSCA te hi kan nei a, hmalakna hi a tangkai hlein ka hria a. Kolasib District-ah pawh kan kalpui hi kan hmang tangkai em em a, hei hi a bik takin Shifting Cultivation Control-na tur atan leh lo ram nghet kan neih theihna tur atana hmalakna tur a nihna ang a hman tangkai zel a, uluk zawka kalpui a tha hle a ni. Green House-te hi awlsam zawk leh tlawm zawka sak ve dan zawn ni ta se, a ruhrel hi thing leh Maute pawha sak theih a ni a. Nikum khan 8th China International Vegetable Sell-tech fare-ah kan zuk kal a, Weifang City bul lawkah khuanin khami fare kha an buatsaih a, chumi bula thingtlang khuaah chuan vegetable village an siam a, chungte chu min entir a, chhungkaw member pathum bak an awm thianga lova, (fa pakhat chauh neih an phal) chung chuan Green House pahnih, metres 100-a sei metres 7-a lian an enkawl zo em em mai a. Chutianga chuan hmun leh hmunah awmhmun nghet neiin, an inbulah Green House an nei vek a, an hlawk em em niin an lo sawi a, a hlawh pawh a ziaawm hle a ni. An per capita income pawh forty thousand yen (china pawisa) ni thin kha tunah chuan 70 thousand yen atanga one lakh yarn vel ang a ni tawh an lo ti a. Green House pahnih lek an enkawl pawh khan an changkan phahin an hmalakna a ropui a, chu chu keinih pawh hian ram zawl kan ngah si lova, hetiang hian kalpui theih ni ta se kan that phah angem tih kha ka rilruah a awm a. Chu chu ka'n sawi tel duh a. Tlangram lo neih pawh kan bansan theih phah ka ring, hlawk zawka lo neih a ngai tawh a ni.

Tin, hei MIP ah hian hmalakna kan lo ngah hle mai a, MIP sum hi kan lo hmang tangkai hle a. Cold Storage Navigate hawn a ni a, khungte khu nichinah kan Member zahawm tak takten khutah khuan Hatkora an dah a, an titawih an ti a, mahse, a dah tur item kha a ni miah lo ania, awmzia a nei tur a ni. Dah tur bik item pawh siam vek a ni, duh duh dah ngawt chi pawh a ni lo a ni. Hatkora kha dah tur a ni lova, a dah tur bik kha ruahman a ni a, chutianga chuan Cold Storage-ah pawh hian sum tam tak MIP in a seng a ni. Champhaiah pawh sak mek a ni a, kan la hmang tangkai zel dawn a ni, MIP sum hi Zoram mipui hian kan hmang tangkai hle a ni.

Red Oil Palm chingtute tan MIP sum tam tak kan hmang a, tin, Saptheiah te, Aiengah te, Patchouli-ah te, Jatropha-ah te, Sawhthing hralhnaah te pawh hian MIP hian hma a la a, Hatkora Godown, Hortoki-a sak te, Papaya pack house-te, Balhla, Lakhuihthei chin pun nan te kan hmang nasa in potential area connectivity land development, water resources development atan te, chutianga chuan Sericulture hmasawna tur thlengin MIP sum hi kan hmang tangkai a ni. Pu Chairman, tiang chuan kan hmang tangkai tak zet zet a, a lawmawm hle a ni.

Tin, Minor Irrigation Project-ah hian project 104 lai zawh a ni tawh a, beneficiaries 1600 chuanguin an chhawr tangkai a, Leileta tui pekna te, tui kawngte ruahman felfai tak siam a ni hi a lawmawm a. Project dang pawh engemaw zat buatsaih leh tum mek niin ka hria a, a lawmawm hle a ni.

Food & Civil Supply-ah te pawh sawi tur a tam mai. DCSO Office pawh hi Kolasib-ah kan nei tep tawh a, hawn tum mek a ni. Gas, K. Oil, Chini, Buhfai supply hi tute emaw Sorkar lai ngaihtuah chuan kan dawng tha a ni. Tunah pawh hian Central Sorkarin Buhfaia kan quota a rawn titem chung pawhin theihtawpin kan Sorkarin hma a la a, nghei em em lovin kan awm chho a. Fur atan Buhfai an inchhek khawm mek a, quintal nuai 2 lai a man pek tawh a ni tih kan hria a, a lawmawm a, Rel Wagon-te pawh hi Teak hralhtuten kan mamawh em em lai hian Buhfai phurh nan a pawimawh avangin kan Supply Minister-in Buhfai a ngaihpawimawh avangin Teak pawh kan phur hlei thei lo a ni a, kan Sorkar hmalakna leh Pathian zarah chhuanchham em chuan kan awm lovang chu maw. Food, Civil Supplies & Consumer Affairs changtu hmalakna hi a ropui takzet zet a ni, hmun kilkhawr ber thlengin Buhfai an chhekkhawh mek a ni a, mangangin kan awmlu turah ngai ila. Sawi tur a tam si, hun a tlem si, Pu Speaker, ka lawm e.

PU ANDREW LALHERLIANA :

Pu Chairman, ka lawm e. Sawi tawh angin kan Legislature party-a a awmchhun ka nih avangin hun min pek belh ka dil nghal a ni.

Demand No. 34-na, Animal Husbandry & Veterinary Department-ah hian lut nghal mai ila. Tuntum Budget Speech-ah khan kawng tam takah lawmawm a awm rualin vanduaithlak tih pakhat a awm a. Kan Chief Minister-in priority sector a tihah hian a pawimawh tak Vety Department hi a dah lo tlat mai a ni. Kan hre vek anga, Agriculture leh A.H. & Vety inzawm zia chu kan hria ang a. Primitive hunlai atang tawhin heng thil pahnihte hi chu, rawn chho zelah inzawm tlat, mihringin kan eizawn nana kan tih, bul kan tanna a ni tlat a ni. Chuvang chuanin a pawimawh ve danah hian Agriculture tluka pawimawh a ni tih kha ka sawi duh a.

Tah chuanin tam tak sawi hman a ni lova, he Vety Department hi department zawng zawngah chuanin an hmalak dan hi Mizoram pumpuiah hian an tihpalh nge ni an tifuh hlein ka hria a. A chhan chu, Animal Feed Plant an din hi a ni. Kum 2001-2002 ah khan commission tawh a ni nghe nghe a ni. Nichin lawkah khanin ka zuk zawt a, engtingge ni in capacity, in thawh dan tia ka zawh khan nikhatah matric tonne 10 chu kan her a, a buai ve hle a ti. Amaherawhchu, a capacity hi nitin matric tonne 50(qtls 500) tihna a ni a, hei hi a nih ang takin thawk ta se, society emaw, corporation emaw "run" tu siam ta se, Revolving Fund tam tawk nen, a capacity pangngai ang hian kal ta se, kumkhatah hian Animal Feed Plant hian quintal nuai chuang an siam chhuak thei a ni. Amaherawhchu, hmun ngaa thena hmun khat tling lovin khang hunlai atang khan an la run reng mai a. Chuvang chuanin kan sum siamna tur pawimawh ber mai hi vawinah hian kan khawh kan la dah "idle" hi a pawh em em mai hian ka hria a, kan harsatna lai chu Mizoramah hian kan Finance Minister pawh khan a sawi kha, Plan Fund kan nei tawh lova, kan neih tawh loh nachhan chu kan State "own resource" a tlem vang a ni a, kan "balance current revenue" nitina kan pawisa transaction

“minus” crore 149 lai a nih avang khan Plan Fund hi min pe hnem thei lo a ni. A nihna takah chuan kan han chhuanlam a, engvangin nge Arunachal Pradesh ten an hmuh tam zawk ? engatinge Sikkim kan zatve lek ten keimahni tluk an hmuh an tih te pawh khan, helamah chhuanlam kan sawi a, China border an awm vang a ni, kan ti ngawt a, kha kha an hmuh nachhan kha keimahni hian kan thiam ta em em a, engvangin nge an hmuh zat kan hmuh loh tih zawkah khan a ni, keini chu kan buai ni. Kan hmuh loh nachhan hi financial management-ah kan chhia a ni. Chuvang chuanin, Plan Fund hmu tam thei kan ni reng reng lova, productive asset kan nei a, income generating unit-te kan siam a, chumi atanga pawisa kan thawhchhuah a, kan State own resource hi a pun chhoh hian pawisa pawh kan hmu tam dawn a ni tih a Chiang em em a ni. Chumi tur chuan department hrang hrang zingah hian A.H. & Vety hian chutianga income generating asset siam thei tur animal feed plan an nei, kan hmang tangkai lova, vawinah hian one “fifth of its capacity” ah hian kan thawh tir tawk mai hi a pawl em em in ka hria a. Chuvang chuan, animal feed kan mamawh hnem zia chu anmahni siam loh hi dawr hmuntinah a awm a ni. Hei hi kan siam ve thei a ni. Phai lam atanga lokal tam tak animal feed hi an zuar a ni.

Amaherawhchu, keimahni produce-na tur khawl bun fel vek, engkimah functional ni bawk si hi, kan activate tlat lova, kan activate loh avang chuan phai lam atangin animal feed a lo lut ta chur chur mai a ni. Chumi chu awlsam taka keimahnin kan lo produce ve hian income kan siam bakah hian Mizoramah hian nasa takin a tlawm zawk pawhin kan ti thein ka ring. Hemi atan hian contract farming-te ti turin thingtlangahte nen contract nei ta se department hian, tichuan, animal feed tura a pawimawh ang chi tur Maize te leh Sayabean te leh thildang kha thingtlang chin tir ta ang selangin, rate hre saa chingin leisak ta se, chuta an leisak atang chuan animal feed hi siam chhuak selangin, department atanga pawisa lo lut avangin Mizoramah hian kan resource pawh a sang dawn a ni. Chumi atang chuan kan Plan Fund thleng a effect thei dawn a ni tih hi a Chiang a. Chuvang chuan enkawl a ngai deuh e, animal feed plant hi a nihna tur ang takin a capacity-in nitin 500 qtls. chuang a siam theih ang chi hi siam thei turin kan Sorkar hian activate se a tha hlein ka hria. Sawi tur tam mahse, hmun dangah ka kai zung zung ang a.

A dang leh ka sawi duh chu, Horticulture-ah hian han kal zawk ila. Hei lehkha kan hmu a, mic a chhiat avang khan 5 minutes vel ka waste a, khawngaih takin min ngaithiam la kha kha chu. Horticulture-ah hian thil pawl em em kan Member dangte pawn an sawi hi Serthlum tam chungchang thu hi Chiang takin Upa pawl te pawhin an lo take-up a. Chumi an take-up-naah chuanin khawthlang lampang Mamitah ringawt pawh hianin Serthlum khu a thih hnem zia chu, khaw 34-ah chhungkaw 1828 in an tuar a. Serthlum kung nuai 6 chuang a thi a, ka bialah ngei Kawlkulhah khian a kung, a sang tel tak tak a thi a ni. Chu chu he Tam lo thlen avanga thil thleng a nih hi Chiang takin a hria ten an prove a. Tam dawn apiangin Serthlum hi a tam hmasa ziah a ni. Chuvangin, hei hi natural calamities a nihna tur pawhin helai House-ah ngei pawh hian kan passed a, kan Resolution-ah khan “heng avanga tuartute tan tanpuina awm thei ang ang pe thei turin Central Sorkarah thlen nise” kan ti a. Chumi kan tih kumtawp atang chiah

chuan BAFFACOS hi kan hmu ta a ni. BAFFACOS hi Tam tuarte tana hman tur leh an lo inbuatsaihna tur ni si hi engatinge Serthlum tam te hian an chan ve tak miah loh ? hei hi a pawl hlein ka hria. Chuvang chuanin, Serthlum tam te hi- he Tam avanga lo thleng a nih avang hian a tamna apiangah Sorkar hian hma la se ka duh a ni.

Tin, a dang leh ka'n sawi duh chu, Agriculture Department-ah hian ka'n sawi leh ang a. Nichinah pawh an lo sawi tawh tho a. He Optimous Consultancy Firm-ah hian tender koh miah loha Agriculture Department-ina contract vaibelchhe 59 man without call of tender a pe hi Dan kalh a ni tih hi a chiang em em a. Hei hi Mizorama IT firm zawng zawng chhang ve theite hian na an ti a ni. Tin, a pek danah hian kan Chief Minister Secretariat hi a involve a ni tih chiang em em mai chu, Office note-ah hian tiang hian a inziak a ni. 'The Principal Secretary, Agriculture Department vide her clarification dt. 5.2.2008 stated that the consultancy Firm had been indicated to the Minister, Agriculture by the Chief Minister's Office. Hence, the question of normal procedure for issuing work order for preparation of DPR did not arise'. Tender normal procedure koh kha, a question hi a rise tawh lo a, a chhan chu, Chief Minister-in he firm hi a indicate tawh avangin a titawp mai a ni. Chuvang chuanin hei hi tunah hian cancell a ni e, tih kha an sawi a, cancell a nih chuan a lawmawm hlein ka ring a, he Session hun chhung chauha cancell a nih erawh chuan a pawl viau ang. Hetiang hi chu a pawl lutuk, chuvangin hetiang hi chu khawngaih takin, nichina Health Minister zahawm takin a sawi ang khan Inquiry Committee din ila, tichuan, chhui chhuak ila, a mawhphurtu hi hrem ngei ngei tlak a ni. Chuvangin hetiang IT Firm a bik takin he Agriculture Farmer Information System din tura hetiang contract an appoint hi a pawl a ni. Chuvangin, hei hi chiang taka cancell bakah dik lo taka titute hi khawngaih takin action lak ni rawh se.

A tawp ber atan Sawhthing chungchang thu hi ka sawi duh lawk. Tuntumah hian Sawhthing lak kha EIRI te leh MAMCO te pawhin chanchinbua a lan ang khan an titawp ta a. An harsatna ber chu a hmunin a dawl zo lova, EIRI pawhin a la seng lo a, nikhatah trip 10 vel an lak theih lain trip 50 a lo thleng a, chutah chuan an buai em em a, khuta an dah khawmnaah a lo chhia a, kil hrang hrangah a lo pelhe a, chumi avang chuan tunah khuan manganthlak khawpin Sawhthing hralhtute an buai a ni. Chuvang chuan, an harsatna ber chu Market Intervention Scheme atana pawisa a awm lo hi a ni. Revolving fund tam tawk awm ta se, EIRI pawh hi Sorkar hian a vaibelchhe tel pe ta se, lei zung zung se chu an buai lo tur a ni a. Mahselang, hei hi an tih loh avangin tunah hian Sawhthing hralhna chu a buai zo leh ta vek a ni. Helaiah hi chuan Sorkar hian mawh a phurin ka hre tlat kei chu.

SPEAKER

: A tawh thei tav/h mai em ? Minute thum kan belh tawh che a ni.

PU ANDREW LALHERLIANA : Minute belh tur ka nih kha. minute hnih chiah khawngaih takin. Chutah chuanin a pawimawh ta chu kan lo sawi fo thin "thlai thar leina tur Sorkarin budget-ah dah rawh se" kan ti thin hi, Sorkar hian dah se, vawiinah hian a buai miah tur a ni lo. Mahse, thlai thar kan lei theih loh avangin market intervention atan kan hmang thei lova, zuk interven ila, a rate a chhiat dawn veleh Sorkar hian lei thei se a tha mai tur.

SPEAKER : Awle, duh tawk ang aw. Minute thum zet kha kan pek belh che a nia. Pu Lalchhandama Ralte.

PU LALCHHANDAMA RALTE : Pu Chairman, vawiina kan Minister pathumte department chan 11 sawina atan minute 10 min pe a, department khatah minute khai pawh a tling lo a, churang chuan theih ang angin ka han tikual chho, chuk lawr mai ang a.

Local Administration, Demand 19-na kha han luhchilh ka duh a. Hei kan LAD te hmalakna, khawpui chhungah pawh hmuh theihin a langsar hle a. Checker tile mawi tak takin an phahin step tam tak an siam a, tin, mihring kea kalna tur an siam nasa a, an achievement ropui ka ti a. Tin, LAD te hi kan hriat angin kan Village Committee, Democracy-a kan institution grassroot level-a awm enkawltu an ni a. Hetah hian a bik takin kan LAD te hianin dan leh hrai an neih hmang hian kan V/C te hi hei aia an zahawmna turin an thuneihna te tin, anmahni lawmman chungchangahte pawh uluk zawka kan V/C humhalh theihna turin Dan leh Hrai an neihte kengkawh tha se ka duhpui hle mai.

Tunlaih kan NGO thenkhatte leh khaw tam taka kan V/C te hi in parallel lek lekin an awm tan deuh tawh a ni a. Heng huangah hianin deparatment, V/C lampang changtu kan LAD te pawh hianin an tih uluk a tulin ka hria a. Tin, LAD hi thingtlang lamah an rawn let leh dawn tan chho mek a ni a, thingtlang lam hian development kan mamawh em avangin LAD tender kan tih ang chite hi tam zawk, uar zawkin thingtlangah min pe ve se tih kha ka han sawi duh a.

Tin, demand 34-na, AH & Vety Department-ah hian ka'n sawi kai leh ang a. A bik takin kan thenawm ramte (foreign) leh state dangte an buaina Bird Flu chungchanga harsatna, khawvelin a buaipui lain kan ramah a bik takin Mizoramah kan department-te hmalakna avangin Bird Flu-ah hian harsatna kan nei lo niin, vawiin thlengin kan hria a. Hei hi a thawktu Department leh staff zawnzawngte chungah pawh lawmawm hlein ka hria a.

Tin, Department hi kawng chi hrang hrangin infrastructure lamah pawh an tang hle a, hmun tinah building-te sa tharin, staff-te a theih ang anga khawsak nawmna tur leh equipment thate pawh an pe mek niin ka hria a, heng kawngah hian lawmawm ka ti a. Chutihruah erawh chuan, hna nasa taka an thawh lain Vety Department-ina a ken lian ber pakhat, ran lama kan intodelhna tura kan mamawhah hian tan kan lak zual a tul hlein a hriat a. Vawkah a ni emaw. Arah a ni emaw, Bawngah a ni emaw thenawm ramte tel lova kan intodelh thei lo fo mai hi a aia nasa zawka tan laka, helam kawnga ran vulh lama tuite dawmkanna kawngah. dawmchhuahna kawngah sum leh pai pawh uar zawka kan pek a tul niin ka hria a.

BAFFACOS scheme hnuai atang khan mi sang tel tak meuh meuhthe tanpuina kan pe a, kan tanpuina dawngtu ten duhthusamin helaiah hian an la hlawhtling kim thei lovin, keimahni min la chawm zo lo deuh a, tan lak a tul hlein ka hre bawk a.

Tin, Demand 42-na, Transport Department bik hi han sawi leh ka duh a. District tinah DTO Office hawn thar a lo ni ta hi a lawmawm hlein ka hria a. Tin, Transport Department hi hun hmasa lamah khanin eiraltu department kan ti thin a, 'he department hi thiah/tihbo ni mai rawh se' tih rawtna pawh a awm thin kha. "Tin, motor service mipuite tana man man zawka service hi tihtawp mai nise, corporation ang pawhin kal mai se kan tih thinte kha" Arsi eng hnuaiah meuh chuan management a fel aniang, earning nei department-ah engkimah a han tang ta mai hi a lawmawm hlein ka hria a. Hemi kawnga thawktu Minister leh staff-te chungah pawh a lawmawm ka ti a. Chutihruah chuan, helaiah khawpui laili takah Transport Department Directorate Office building hetia luah ngam mang loha a ding rup mai leh rauh sana a awm mek hi, hetia awm tir ngawt mai hi, engtik niah nge a tluk ang, tih a ni ringawt mai a. Department-in hei hi a senghawi hma a tulin ka hria a. Staff-te pawh awm tir kan phal tawh loh chuan hei hi tihral hma a thain ka hria a.

Tin, hei kan ramah motor a pung chak em em mai a, sum leh pai kan neih chhun chhuna lirthei lei pawp pawp chi hnam kan ni a, chung kawngah chuan department lamin helaiah hian ngaihtuahna thar kan neih a tulin ka hria a. Motor man tlawm, Car man tlawm chite hi lo chhuak leh phei sela chuan kan han lei leh fur ang a, kan khawpui kal dan tur hi thlir lawk a ngai hlein ka hria a. Nichina Phuldungsei bialtuin a sawi tawh ang khan kawngsira motor park leh workshop siam awm mek leh run mekte hi, motor tam tak kawngsirah a ding thep thup a, hengte pawh hi anni hi an thuneihna huang chung a nih chiah loh pawhin engemawchen an involve-na a nih avangin en uluk se, zan lama motor kawngpui sira park(dah) leh ringawt thin pawh hi kuminah chuan Mautam tam kum a nia, tax lak loh kumah kan ti a nih pawhin kumthar lokal lehzet turah chuan zana kawngpui sira motor park hrim hrimah pawh hian tax lak tawh hi a thain ka hria a. Chu chuan, tax kan lak tam chuan ram tan a that piahlamah motor garrage siam kawngah pawh kan intihhmuh theih a rinawmin ka hria a. Chu chu ka'n belh duh bawk a.

Tin, Demand No. 41-naah hian, Sericulture Department hi tlema han sawi ka duh chu, he Department hi kan ngaihsak lehzual a tul hlein ka hria a. An ni department atanga an product reng reng hralh theih loh pawh awmlo, market chiang sa, tin, India ram mipui ringawt pawh maktaduui tam tak kan ni a. Thawmhnaw ha duh vek, Silk puan mamawh vek kan nih avangin helaiah hian hlawhtlinna thil awm thei mek a ni a. Nikumah pawh khan BAFACOS sum an dawnte leh thil dang dang hmangin Theihmu kung nuai 120 zet pawh an lo phun hman a. Tin, Pangang chi pawh tam tak nuai 2.80 vel an pechhuak thei a ni a. Cocoon pawh Kg. 4.10,000 vel nikumah pawh an tharchhuak hman a ni. Hetiang chi hi a hralhna engmah buai awmlo a nih avangin mipuite tana awlsam zawka sum an lakluh theihna a nih avangin he department pawh hi sum pek tama, zau zawka hma a lak theina tura kan ngaihpawimawh a tul hlein ka hria a. R.E. lamah nichina, Pu Chairman, i sawilaia i sawi ang khan ka ngaihpawimawh thu ka'n sawi belh duh a.

Tin, demand No. 30-na, Disaster Management & Rehabilitation chungchangah hian, he department hi department lian tak ni lem lo mahsela, tunah chuan department lar ber pakhat, mi zawng zawngin kan sawirik leh kan pan tam ta hle mai. A chhan pawh kan sik leh sa a mumal lo chho tan ta a, kan ram leilung dinhmun a chiang lova, fur ruahtui an tam tak tak chuan DM & R hi a lar em em mai a ni. MLA zawng zawngin kan mamawh, kan biala miten an rawn thlen hi kan kal tir tawh a ni a, Man power-ah pawh hian an indaih lo hle ka ring a. District level-ah an set-up hmuh tur a awm vak lo. Deputy Commissioner Office hi an ring tel mai ni te pawhin a hriat a. Heng huangah pawh hian an ni pawh hi kan ennawn deuh hlek leh kan ram kal zel tur han enin kan sik leh sate lo chhe zelah hian an ni hianin mawhphurhna tam zawk an nei dawn zelin a hriat a. Lirnging lian zawk awm tur area kan ni an la ti lehngal a, heng huangah te pawh hian chhiat rupna a lo thlen pawha mipuite chia i lo tura zirtirna uar lehzuala an kalpui te pawh a tulin ka hria. Chu chu ka han sawi duh bawk a.

Tin, demand No. 37-naah khan Cooperation-ah khanin hei hi ngaihven tul niin ka hria a. Mi chaklo zawk, mahni kea ding theilo turte inhlawm khawmna society enkawltu an ni a. Weaker section-te nunphung pangngaia an nunna tur kawng a nih avangin an ni hi enkawl uluk an tul hle a. Tunah ngei pawh State level society 10 zet an neihte pawh tunhmaa anmahni pawh inchawm nung zo mang hlei lo Sorkarina recharge coupon a pek reng ngai thin kha tunah chuanin State level Society 10 te pawh hi Transport Department ka sawi ang khan a enkawltute an chian tak vang nge ni Department earning (surplus) nei hli mai society 10 te pawh mahni intodelhin nuai bi tam tak maia sum turn over nei theia an awm tak mai hi a lawmawm hlein ka hria a ni.

Demand 17-na, Food, Civil Supplies & Consumer Affairs Department-ah tlem ka'n sawi duh chu. Mautam tam avanga harsatna kan neihah te Member ten kan sawi hnem ta a, buhfai mamawh chungchangte (Pu Chairman minute hnih/khat chu nichinah pawh khan i pek kha maw, ka'n hmang tam ve hret mai ang nge. I veilam amite kha i duhsak lutuk in ka hria)

Buhfai chungchang thuah hian harsatna kan neih kawngah kan Minister, a bik takin fak phuin ka hria a. Mut mawh hnar mawha neia heng a harsatna sutkianna atan te, nikuma ruahtui tam lutuk avanga kan buai lai pawha nasa taka hma an lak avang ten lawmawm ka ti a. Kan insawichhiat leh kan sawi nasat ang em em in tam pawh hian min khawih buai lutuk lo viau hrih a, Sorkar hmalakna avangin nimin lama Chief Secretary hmalakna a Deputy Commissioner zawng zawng District tin kalkhawm ten tam avanga ei tur neilo lutuk engmah awmlo a, tam chu kan tam e, amaherawhchu, chhuanchham kan awm love tia thuchhuah awm thei hial kha a ropuiin ka hria. Hetah hian keimahni Legislator hote pawh ram hruaitu, mipui zirtirtu kan nih mek lai hianin tam chungchangah a ni emaw, mipui hnenah thil thlawn sem emaw, pek emaw kan han sawi a, bial hmangaih kan intih lai hian kan mipui moral hi kan tiplansual ang tih ka hlau khawp mai, tun hunah pawh hian. Tam chanchin kan sawi/report dante uchuak lutukin thil a kal em aw a tih theih a. Enfel a, rin ang lo ni leh lote pawh a awm a ni. Amaherawhchu, hengah hian i veilama thute ngei pawh hian Sorkar hi hei ai hian cooperate tha se, buhfaiah kan quota nikuma mi aiin tun hunah hian quintal 68100 vel thin 24460-a tlahniam duaiah pawh hian he House-a au nuai nuai lovin i vei lam amite pawh khulama pu nei tha an nih chuan mipuite min hmangaih tak zet a nih chuan khulamah Mizo mipuiten buhfai kan mamawh a ni tia sawi a hnekin rulin ka mei rap se, chuk ila ti niawm takin kan tam denchhena an pute hnena au aiin helaia buhfai quintal 50000 vel zet kan pe chung pawha kan tih chhohnaah hian lawmthu kan inhrilh tulin ka hria.

A tawpna, demand No. 31, 32-ah hian kuthnathawktu taimate hnenah hian an thawhchhuah phu leh nitin incentive kan pek uar zawk a tulin ka hria.

Tin, Aieng chin, nikumah nasa takin MIP atangte leh kawng chi dangin kan chin tirin a hlawk viau dawn niin a lang a. Ka bialah pawh an thar tam hmel viau a. Sawhthing aiin a hlawk hmel em em lehngal. Aieng thartu hralh tur neite hi pawisa kan neih ang anga leisak ngei a, Sorkar thuawia Aieng chingte hi tihbeidawn loh hi kan tih tur a ni.

Minor Irrigation Department thar kan neih hi a lawmawm ka ti. Engineering Department an nih anga mumal zawka enkawl a tulin ka hria. Pu Chairman, ka lawm e.

PU LALHMINGTHANGA : Pu Chairman, ka lawm e. Ka sawi duh hi Demand 17-na Food & Civil Supplies Department a ni a. Tam kum a ni a, sawi uar lutuk ti khan kan han in charge ta! naa, uar tawk a awm lova. Tunah hian tam hi political issue a ni a, social issue a ni a, daily issue a ni hrim hrim a. Kan Chief Secretary leh Deputy Commissioner kalkhawm ten chhuanchham ten buhfai eipuk dan tur an rel kha a procedure kha a workable lo awm ka ti a.

Chhuanchham han identify-tu tur kha Tam committee village level-a siam khan an identify phawt dawn a nia. Chumite chuan DCSO an han hriattir ang a, Store Keeper a hriattir ve leh ang a, khamite chhuanchhamin an buhfai lakna tur kha Retailer hnenah Card-in an la ang tih a ni a. Khatiang lengthy procedure kha tun angah chhuanchham tawh si tan khan zawm a harin ka ring a. A tawi zawnga Supply Inspector-te hnen atanga direct godown atanga lak kha indentified an nih loh chuan tihdan kha siam a tha awm ka ti a.

A dawt lehah chuan, chhuanchhamte tan chauha buhfai eipuk tih hi tun ang tam kumah chuan a tawk lo em em dawn a. A chhan chu, kuthnathawktu, Zoram siamtu 70% te khan hna an thawh a ngai a, tam kum a nia, an thlawhhma/huanah an thawh a ngai a ni. Khami thawk tur khan pahnihah an inthen darh thei lova, chuvang chuan hna an thawh laia ei an neih theihna tur khan ei puk hi siam sak an ngai a ni. Chulai chu Chief Secretary hoa an relah khan a tel tlat lo mai a, chhuanchham tan chauh a tih kha a tawk tlat lo mai a, hei hi sorkarin ennawn leh thei sela, kuthnathawktuten tha takin an thawk thei ang a. Tin, pi/pu atanga an lo sawi tawh, kuminah hian thlawhhma/huan hmuingil tura beisei a ni a, kha kha Pathian remruat a nih pawh a rinawm a. Chuvang chuanin tha taka an thawh khan tam vur kum hi tha takin kan hmang chho thei dawnin a lang a ni.

Tin, tam tuartute hianin purchasing power hi an nei lo tlat mai. Chuvang chuan, an purchasing power siam kan tumna kha hemi Rural Employment Quarantee Programme te chu a rawn kal ve hrim hrim kha vanneihthlak ni mai sela. Member tam tak ten an sawi tawh ang khan, a tam lo state, Gujarat, West Bengal-ah pawh hei chu an thawk vek a ni a. Heng hi chu tam tana va rin nghal mai lova, purchasing power, naupang lehkhabu leina tur atan leh thildang hrang hranga an neih theihna tur atan Sorkar hian khati zawng khan voh selangin, hemi piah lamah hian BAFFACOS sum atang a nih loh pawhin Emergency Fund siamin purchasing power an neih theihna tur atan tam zawk an inhlawh chhuah theihna tur siam a tulin ka hria a. Chu chu ka'n sawilang leh duh a ni.

A dawt lehah chuan, demand No. 41-na, Sericulture chungchang thu, hei kumtin ka au chhuahpui ve ziah thin a, Director puitlingte an siam ta a, a lawmawm a. Sericulture hi kan ram tan a pawimawh hle a, hei hi kan vulh len a, kan tihthan chhoh zel a, awareness campaign-te kan siam chhoh zel chuan sustainable economy kan neih theihna tur atan Pathian remruat sa, kan ram climatic condition leh Mizo mentality-te han ngaihtuah hian a ni thei a. Kumina an Fund provision kan han en khan nikum lam aain san chuanna an nei hauh lo mai a, kha kha ennawn sak leh an tul hle a ni. Nikum lamah khan nuai nga pawhchhuah sak an ni a, khami avang khan kha nuai nga kha kuminah pawhchhuah leh a ni kher lo ange tia kan rin sak nghal a, nuai ngain a sang alawm kan tite a nih nghal loh chuanin a ngai chiah chiah a Department pawimawh tak mai leh mipui tam takin an chhawr mek lai fund position tha loa dah hi a fel lo, chu chu kan Sorkar hian khawngaih taka lo enfiah leh turin ka ngen a.

Tin, Agriculture, Demand No. 31-naah hian Member zahawm tak tak Buarpui bialtute, Khawzawl bialtu ten an rawn sawi ang khan hemi Farmer information system siamna tur atana crore 59 lai mai dah hi a tullo hle a ni. Tunah hian kan Agriculturist tam ber hi shifting cultivation-a awm an ni a. Hemi information system tha tak mai hi tun dinhmunah hian chuan, chuti taka mamawh thil a la ni lova. Chutiang ang thil to pui nilo khan an mamawh ang thil, thlai chin hun emaw, sik leh sa inlumleh dan ang chi ho kha chu a siam theih em em tho a. 59 crores sensona tur atana thil tih hi thil tul a ni lova, kha pawisa kha a awm rau rau a, thil thar pakhat tihsak zawk ilangin a tha awm mange, ka ti a. Chu chu minor irrigation lamah hian khami pawisa kha hman ni ta selangin. Cancelled te a nih tawh pheh chuan khami project kha minor irrigation kan neih that hian kan leilet a hlawhtling ang a, kan thlai chin tam tak hi a hlawhtling dawn ta a ni. Land Development kan siamthat theih vat loh pawhin hemi a ram leilung ang anga tui pek theih a, hma kan lak that chuan kan thlai leh buhbalin hlawkna ropui tak a rawn siam ang a, chu chuan kan ram hmel a tidanglam dawn a, tam zawk minor irrigation-ah khan dah nise.

Tin, hei hi department puitlingah dah tan tirh chhoh a ni a, Member-ten an sawi ang khan Engineering Department puitlingah siam ngei ngei chi a ni a. Sum pawh an mamawh tam dawn a. Hemi kan uar hian kan Land Development tuna kan tih tawh sa zawng zawng pawh hi productive-ah kan siam ang a, Bulldozer-tea kan mam sak leh a, hnathawh awlsam tura kan siam pawh hi irrigation tha a kan chawm zui leh thei a nih loh chuan a productive dawn reng reng lo a. Chuvang chuan, Minor Irrigation hi nasa lehzualin promote tum ilang a tha ang tih ka sawi duh a.

Tin, a dang lehah chuan, hei Silpouline hi Disaster Management leh Rehabilitation Department hi a pechhuak hnem ber an ni a. A hmanna hi a tam em em a, disaster ringawta hman tur anga kan siam hi a fel tawh lova. A bik takin kuthnathawktu kumtin lo neih sawn leh sawn lote tan pawh hian thlai leh buh lo tharte, kawng tinrengah hmanna tur a tam em em a, kan tangkaipui em em a ni. Chuvang chuan, Agriculture Department hnuaihte leh Horticulture Department hnuaiha te hian Disaster Management leh Rehabilitation tena an pekchhuah ang zawnga a mamawhtuten an hnathawhna a an thawh that theihna tur leh an huan leh lote tha zawka enkawlina hmanrua atana an hman theihna turin Silpouline sem hi tihthar ni ta selangin, tichuan, tangkai zawkin kan hmangin a rinawm a. Hei hmun tam takah kan hmu a, tui an mamawh hunah tui dahkhawm nan Mau an han sat a, vawkte zem angin an kual a, tahchuan Silpouline kha an benglut a, tui tam tak a tul hunah chuan Lo neituten an dah khawl thei ta a. Tin, Buh an seng hunah an buh lakkhawma kha harsa taka hrui emaw siam kher lovin, Silpouline an han phah khan tah khan an han dahkhawm thei mai a. Ruah a lo sur dawn a, thil tul a lo awmin a khuh hulna atan thlamte emaw sa kher lovin changel hnahte leh thil dang la kher lovin a chungah hmangin an siam leh thei a. Chuvangin a all-round em em a ni. Hemi hi kuthnathawktute chungkua leh a mamawh tute hnenah neih theiha kan siam tam chuan nasa takin an tangkaipui dawn a, khati zawng khan kalpui ta ila a thain ka ring a, chu chu ka sawi tel duh a ni.

Tin, Transport demand No. 42-naah hian Motor Insurance chungchang thu hi helai House-ah hian kan sawi zeuh zeuh tawh a, kan Sorkar hian insurance hi awlsam zawka tih theihna turin company ho hi compelation an neih theih nan tam zawk lakluh dan a ngaihtuah mai loh chuan tun thlengin improvement hi a la awm vak lova. Insurance kan phuta mahse, kan insurance anga accident emaw an tawh khan, insurance company atanga hmuh tur kha hmuh leh hman a ni lo a, a muang si a, a thlawna pawisa tam tak motor neituten an senna a ni a, helai hi chu kan Sorkar hian uluk zawkin en let se tih ka'n sawilang leh duh a.

Tin, demand No. 34-na, Animal Husbandry-ah hian ran kan intodelh lo em em mai hi a buaithlak khawp mai a, tunah hian information nimpiniah lam maia kan dawn chu Lunglei, kan bial lamah sawn Bawngsa a vang em em mai a, a chhan chu, Burma nena Bawng tawlh tawn thinte pawisa inthleng tawna kha a buai a, Burma ram lamah. Chuvangin Bawng rawn tawlh tu ten an rawn tawlh lut thei lova, chu chu a harsat phah a ni e an ti a. Chutiang ang chuan pawn lam atanga lakluh Bawngsahte kher kher chuan kan la ring nasa em em mai a, Vawksa leh Arsaah chuan Vety Department-te hian tan an la a, tlemin kan ziaawm tawh a, mahse, Bawngsa hi Special Emphasis uar zawka, helaia local production kan neih theihna tur atan a hnute lam aiin a meat-ah hian kal dan a awm lawm ni ? Entir nan, Khasi ramah chuan anmahni Hill Cattle kher an promote ta a, a sa lah a tuihna a. Tin, intodelh a awl bawk a, a chhan chu, an endurance a tha a, anmahni self-sufficient an nih tlat avangin Hill Cattle hi, khati zawng te hian a ngaihtuah theih lawm ni ? tihte kha ka sawi duh a ni e. Pu Speaker, hun min pe tlem angreng hle mai, a hmaa kan thiante khan an nei sei angreng hle mai, pakhat chauh ka'n sawi leh ang a. Anih minute 1 chauh.

Tuna kan Agriculture product-a kan buaina ber hi market linkage leh production han tipung tura bank facilities kan kuthnathawktuten an neih loh vang hi a ni ta a. Chuvang chuan, a bulk-a kan tharchuah theih tawh crop ho hi chu identified sela Sorkar hian, tha zawka an chin theihna atan bank facilities pein a piah lamah market linkage hi tha zawkin revolving fund-te khata tana siam sak khan kalpui ni thei se, tichuan, kan ramah hian sustainable economy kan neih theihna kawng step pakhat a nih theih a rinawm bawk a. Chu chu Demand No. 31-naah khan ka'n sawilang leh duh a ni e. ka lawm e.

PU NIHAR KANTI CHAKMA : Pu Speaker, ka lawm e. Pu Speaker, wherever I rise to speak sometime I get confuse on which language to speak whether in Mizo or in English or in Chakma also. So, Pu Speaker, there may be some mistakes in the pronunciation. I hope honourable member will bear wih me. Today we will be discussing the demands of the three important Ministers. First of all I would like to speak about the Demand No. 30, i.e. Disaster Management and Rehabilitation Department. Pu Speaker, this department has

been growing importance day by day due to occurrence of natural calamities. Therefore, the ministry even the Government has to give importance to this Department. If we see the Budgetary elevation, it seems it is too small, we must increase also Budgetary allocation. For the information of this House, Pu Speaker, I would like to draw the attention of this House about my constituency. The year 2007 is the most unfortunate year for the people of whole Mizoram, specially my constituency. We have to face lot of difficulties due to natural calamities like flood, all the crops have been damaged, due to Mautam, the rice cultivation has completely failed. And thirdly, let me speak disaster due to landmade calamities due to fencing. All the fertile land has been destroyed till now, no compensation has been made. Pu Speaker, in regard to the Demand No. 17 here, I would like to say about Mautam Tam. This Mautam famine, I don't want to politicalise the issue. As a representative of the people it is our duty to express the problem face by our people. The condition at present is very serious, there is everywhere scarcity of food and people are dying and are digging wild potatoes for food. It is a proof that they need to be given special attention and care as food is our daily necessity. Everywhere there is scarcity of food. Last time we heard from the honourable Minister's reply that there is a nil to stock of food and nil at Tlabung supply godown and Tuichang Godown. Very soon rainy season will start. What will be happening to the people? they will surely die so prevention measures should be taken. We have seen how the fund under BAFFACOS are spent. Roads are constructed and godowns repaired but in my constituency such as Mulsuri, the godown is closed. I request the Minister to clarify as to why this godown is closed by the Government.

In regard to the Demand No. 37, Tlabung is a great town, it is growing day by day and vehicle are also increasing day by day. So, i request to establish atleast POL outlet at Tlabung, because that is stand with to Tlabung nearest Petrol Pump is at Lunglei. It is nearly about 100 Km. Pu Speaker, I will not take much time.

In the Agriculture demand, my area is having a potential for development of Agriculture but till now nothing has been done to develop agriculture in my area, it is very pathetic to know the whole sub-division is maintained by one SDO, one C.O. (Circle Officer) and one Chowkider, there is no clerical staff. In this way all the area is wasted in my area. If Government does not give importance, how can we become self sufficient in food.

Demand No. 19, that is Local Administration Department. Pu Speaker, I would like to thank Minister-in-charge for well looking after Relief & Rehabilitation Department. I thank him here in the House for what he had given for my constituency. Thank you.

PU LALTHLENGLIANA : Pu Speaker, ka lawm e. Tuna ka sawi duh hi MLA zawng zawng leh Zoram mipuite tana pawimawh a ni a.

SPEAKER : Khawngaih takin ka'n tibuai lawk ang che. Khi dar 4 alo ni dawn reng mai a. Kan tihdan thinah dar 4 pel tur chuan House phalna kha a ngai a, chuan, tunah hian Pu Thlenga hian sawi zo ta sela, dar 4 kan pel ang a, tin kan la rei deuh hmel bawk a, chumi zawh chuan kan chawl phawt ang nge ? A sawi duh ten kan sawi phawt ang a, kan chawl ang le ? Engnge kan ngaih dan ? Aw, sawmpariatna a ni a, Pu Thlenga hi, tam tak chu kan awm tawh lo mai thei a, pali emaw panga emaw kan la awm ka ring. Pu Thlenga sawi zawh hian kan chawl ang maw ? Awle, a bul atangin tan la, Minute 10 i nei e.

PU LALTHLENGLIANA : Pu Speaker, ka lawm e. Ka sawi zawha chawl mai tur kan ni a, tlem a zawng hunte pawh min pek ka duh a. Hei kan zavaia tana pawimawh ka sawi duh a. A department changtu leh kan House Leader ngei pawh hian min lo chhinchhiah sak sela ka duh a.

Hei, Local Administration Department Demand 19-na hi, kan rilruah hian LAD hi a bet tlat a. Amaherawhchu, vawiin niah hian V/C hlawh leh V/C enkawl bak hi hna an nei ta miah lo a ni. Kaldan phung thar ni awma ka thlir pawhin tihdanglam a ni chuang lova. Vawiin niah hian he department hi lungtileng department mai a lo chang zo ta a, a pawl khawp mai a. Urban lamah LAD in an tender tih thin LAD step te, side-drain te, thil dang dang khang ang kha a tawp lamah a inhnawkkhawm a, Urban Development a lo awm leh bawk si a. A lehlampanga inthumrawn tlut tluta a kal laia LAD hmalakna thingtlangah rural area-ah a kal ta lo reng reng hi tihdanglam theih ni sela, an kal dan pangngai khan LAD hi rawn kal leh thei hram hram sela ka duh tak meuh meuh a ni.

Demand 30 & 32-ah hian han lut ta ila, a inkawp remchangin ka hria a. Tlawng thlang zawng zawngah khuan Serthlum nasa takin a tam a ni. Hei hi Zoram mipui hriat a ni, hmundangah pawh a tam nasa a, kan hria a. Tunah khuan nichina an sawi tawh ang khan cheng nuai ram tak Serthlum kung a tam a, chutih lai chuan Serthlum tam te tanpuina hi an la siam lo a ni a. A dik takin thlai dang tihchhiatahte kumin ngeiah pawh engemaw zat tanpuina pek an nih laiin Serthlum tam te hi ngaihsak an hlawh lo deuhin ka hria a. Heng Serthlum chingtute hian kum 7/8 teh meuh mai kawlanichhuak chhiarin hna an

thawk a, kum 8 hnuah te lo rah ve zauh zauh tawh a. Chutiang chuan thangkhat lian tehmeuh an buaipui hnuah a cheng nuai 3/4 lei tam tak an awm a ni. A bik takin ka bial Mamitah te pheh chuan Serthlum khu an cinchhuahpui nasa em em a, vawi lehkhata a han rawp ta thut mai han hmuh hian a lungchhiat thlak a. Tin, veivah pawh hian a ro uar han hmuh khuan hrehawm an ti em em a ni. Hetiang thil lo thleng hi Natural calamity-ah pawh dah theih a ni a. Chuvangin kan Sorkar chak tak hian mutmawh hnarmawha neih ve pawh a tulin ka hria a. Khung Tripura-ah khuan thla kal taah khuallianin ka zuk kal a, Tripura-a Serthlum chingte pawh a tam ve nasa a. Amaherawhchu, Tripura Sorkarte an tang bawk a, a thlakna tur nasa takin an buaipui a, tunah hian Serthlum nei tawh lo ho, a tam chhe tawhte khan kuhva kung nuai thum te an nei tawh a ni. Chutiang khawp chuan an hmalakna a nasa khawp mai a. Chungte han ngaihtuah chuan vawiin nia Serthlum tam ta te, a neitute dinhmun han thlir hian a lungchhiat thlak ngawih ngawih a ni a. Thlai dangte entirnan, thlai lo pawh in leh lo kan han sa a, thingtlangah Assam Type building thlahnih khat lek chhungin an sa zo mai, a lo kangral a, Deputy Commissioner atangin Rs. 4000/5000 te tanpuina an hmu thei a ni. Tin, thlai dang te pawh tanpuina kumina Sazu tihchhiat te pawh kan pe a nih chuan anni pek hi a awm em em a, kum khatah damlo 15 natna inang thap an awm a, an na vak mai a. an chiau vawng vawng a, pakhat kha nachhawka pe ve duh lo sela chung ang deuh chu niin ka hria a. Chuvangin, Serthlum tam hi engtinge kan tanpui theih ang. Central lamah pawh kan House Leader zahawm tak hian nasa takin min nawr sak thei sela a lawmawm hlein ka ring a ni.

Tin, hetiang taka Sorkar thil tithei leh chak tak hian hengte hi min ngaihtuah sak theih ka ring a. Kan bial mipui MUP lam hotute zawng zawngin an buaipui a, Darlung tlangdung atangin khawthlang tawp thlengin Serthlum tam zat hi dik takin chhut rawh u an ti a, an chhut chhuak vek tawh a, a buin an nei a ni. Tin, kan khawpui kawng tawt lutuk hi kan sawi hin a. Heng hi a ni reng a, a tawt tulh tulh dawn a, kumtin, thlatina motor pun tam zia te kan ngaihtuah hi chuan Aizawl khawpui hi awm ngaihna a awm dawn tawh lo. Eng ang pawhin ngaihtuahna siam thin mah ila, tu Sorkar pawh lo piang sela, khawpui nuamah kan siam dawn lo tih hi a chiang reng a ni. Kan nu ho Bazara thu mai maite pawh kar kal ta khan Bangkok ka han lehleng anga an ti mai mai tawh a ni. Khawvel hi a hnai tawh a, mi ram khawvel changkang zawkte kan it a ni. Chuvangin, New Aizawl hi Lengpuiah te khuan din thei ila, Plateau tlang chung zawl a ni a, khulai khu. Buichali kam lei ram atangin Dialdawk tlang thlengin lehlamah Serzawl ram thlengin, Dialdawk kam lehlam leh Lengte leh Nghalchawmte nen chuan Km 36, 40 bawr vel bial a ni dawn a. Chu chu ring road-in han kual sela, khatah khan cross road-te chu motor tlep ruka an tlan ve theina tur kawngte pawh hi ngaihtuah ve tawh ila. Vawiin niah hian thil puitling tak tak kan ngaihtuah chhuah hi a pawimawh hlein ka hria a ni. Chumi a nih loh chuan engang pawhin Aizawl khawpui hi ngaihtuah thin mah ila, kan siam var tak tak dawn lo. Khatla atanga Treasury Square thleng pawh hi kawngpui zau zawk angin ti dawn ila, a compensation kha khawpui thar dinna khawp deuhthaw a ni ang, a buaithlak lutuk tawh. Chuvangin khawpui thar Zoram hian kan mamawh takmeuh meuh a ni. Khilai Lengpuiah te khuan dah ta ila, Plateau a ni a, a bul lawkah Tlawng a luang a, khawl

pakhatin chak em emin mihring leng hlir pipe 3 pawh intlar sela, a pipe chhuak zo a ni. Tui chhe paihna nise drainage system tha taka siam a nih chuan khampangah a fim sain tuichhia kha a inkhawh chhuak zur zur dawn a. Thlawhna tum hmun a ni bawk a, chumi rualin ramdang atanga lo kalte kan VVIP te pawh Lengpuih Airfield bul maiah Taitesena Five Star Hotel-ah te an tlan lut ve sung sung mai dawn a ni. Khatiang rilru kha pu ila, tun atang hian ruahmanna nei thei ila, he khawpui hi chu commercial centre a ni reng dawn. Aizawla awm pawhin khutah in hmun an nei ang a, a neilo pawhin an nei ang a, an thawl lutuk dawn tlat a ni. Chuvangin kawngpui Pathianin ram rem min pek hi cheina chang hria ila, Zoram nuam kan siam ang tih hi ka beisei tlat a ni. Pu Speaker, ka lawm e.

SPEAKER : Kan support vak mai dawn che emaw ni le. dar li a lo ri ta a, kan chawl rih ang a, darkar chanve a tawk thei mai dawn lawm ni ? dar 4:30 ah kan thukhawm leh dawn nia.

4:30 P.M.

SPEAKER : Kan rorel kan chhonzawm ang a. Tunge han sawi ang, Pu Vanlalthaliana.

PU H. VANLALTHALIANA : Pu Speaker, vawiinah kan Minister zahawm tak tak pathumte demand kan sawiho dawn a ni a. Kan Sorkar hian a ngaipawimawhin ka hria a, department inlaichin tak tak vek niin ka hria a, sawi pawh a remchang a, chaw chungchangah te chhiatna chungchangah te vawiina kan tawh mek Mautam tam harsatna chungchangte nena inlaichin thei vek tur department a ni hlawm a. Chaw kan neih theihna tura hmalakna hrang hranga hma la theitu department-te an ni a, a lawmawm hlein ka hria a.

A hmasa bera ka sawi duh chu Sericulture hi a ni a. Mizo mipuiten eizawna kawnga kan dawnsawn leh kan hriatthiam pawl taka ka ngaih, wawiin ni thlenga a nih tur anga kal lo emaw ni chu aw tih ka rilruah a awm a. Kumkhat chhunga puitling thei, thlatin income siamchhuak thei eizawna ngelnghet leh tha tak mai ni bawk si hi wawiinah hian a nih tur angin a kal lo a ni tih ngaihtuahna min pe a. Chutihruah chuan Sorkarin a ngaipawimawh nia ka hriatna chu, Director puitling nei ngailo a han siam chho hian Administration-ah chak taka hma a lak chhoh chuan a piaha target hi chu awmze neiin hma a lak chhoh theih ka ring a. Hemi chungchanga Sorkar hmalakna hi lawmawm hlein ka hria a.

Sericulture-ah hian a market buai lo a hmanraw mamawh tlem bawk si, lehkha thiam pawh ngailo awlsam tea kan tharchhuah theih leh eizawna ngelnghet tam hunah pawl kumkhata puitling thei mai a nih avang hian Sorkarin tuna a dinhmun piallama chawikanga thingtlanga kuthnathawka eizawngtu zawng zawngtein an tui a, hma an lak theihna tura tan an lak tulin ka hria a. Thlatin income siam thei sorkar hnathawk anga thlatin hlawh lak theihna tur ang khawpa income neih theihna a nih avangin tun ai hian he department hi ngaihpawimawha enkawl nise a tha hlein ka hria a, kan bial lamah special scheme, chhimtuipui kan tih thin Lawngtlai leh Saiha District-ah nasa takin hma an la a. Amaherawhchu, fund-te mamawh huna release a nih theih loh avangin harsatna eng engemaw kan tawk a, hengte pawh hi department leh kan Minister hian a theih chuan wind-up-naah min han hrilhfiyah se ka duh hle mai.

A dawt leha ka sawi duh chu, demand No. 30-na, Disaster Management hi a ni a. 2005 Budget Session kha niin ka hria a, Opposition zahawm tak Pu Lal Thanhawla khanin Mizote hi khawvelah Silpouline hmang tangkai ber kan nih ka ring a ti a. Lunglei 'S' bialtu zahawm tak khan nichin lawk khan a sawilang bawk a, kei pawh he ngaihdan hi ka tawm a. Silpouline hi kan hmang tangkaiin Lo neitu zawng zawngin kan mamawh a, chhiatna thil zawng zawngah kan mamawh a. Tun aia awmze neia Sorkarin a hman theih dan hi ruahman dan awm sela a that ka ring a. Hmarcha dahkhawl nan, thei rah lawh khawl nan, thlam bang, thlam chungah, lei min leh kawng tinrengah kan hmang a. Lehlamah chuan a duh apiang pek a rem loh laiin kan mamawh ang deuha ngaihtuah dan awm se a that ka ring. Sorkarin ngaihtuahna hmang thui thei se.

Kum dang zawng aiin kan vannei a, 2007 a ruahtui khati khawpa tla nasa chungin chhiatna kan tawk lutuk lova, a enkawltu Minister taimak leh inpekna avangin chhiatna hmuna kal zar zarin hmalak a ni a, mualphona kan tawk lova, lawmawm ka ti hle.

Tin, Cooperation demand no. 37. Tunhmaa Lo neia inlawm thin, thawk ho thiam tak mai kha tunhnai kum 30 bawr vel cooperation, thawhhona, a huhoa sumdawn tawna hmalaknaah hian kan tlachhe ta riau a. Sorkarin hei hi a ngaihsak lo deuh ta niin ka hria a, nge, keimahni kan zir lo hrim hrim tih ngaihtuahna ka nei a. Awmze neia eizawna ngelnghet kan neih theihna turin India Sorkar atang pawha sum kan lakluh theihna tura thil remchang

lutuk a ni a. Sorkarin ngaihtuahna a sen a, mipuih pawh inzirtirna tha kan inpek chuan kan sum eizawna a awmze nei tur a nih ka ring.

Tin, Food & Civil Supply and Consumers Affairs Department hi nikum Mautam tam avangin buh kan thar lo thak a ni a, khawimaw laiah thar awm bawh mahse, mipui eitur tam tak, mipuiten kan rinpui ber chaw kan nei ta lo hian, Sorkarin ngaihtuahna a sen tulin ka hria. Hemi kawnga sorkar hmalakna quota pangngai Govt. of India min pek bak quintal 50.000 thlatina to a lei thin hian kan mamawh zualpui a phuhru theiah ka ngai a. Buhfai awm reng chung a leina kan neih loh avanga harsatna kan tawh kawng hrang hrangah Emergency Famine Committee-te indinin, tam zual enkawltu tur identify tu tur en a, ruahmanna neia hma a la chho hi tha ka ti a. Helai pawimawh ka hriat chu, District level ten an tihfuh loh chuan engang pawhin Sorkarin ruahmanna nei mahsela a khawlo thei a ni. Chuvangin District level-ah tan an lak a, a khawchhung village level-te nena coordination fel tak nena tan an lak theihna tura Sorkarin information/notification a pek zin loh chuan chinchang hriat loh avang leh tum lo deuha thil kalah kan mualpho a hlauhawm a, hetah hian Sorkar tang se ka duh hle. Sorkar a inbuatsaih tha a, kawng tinrengin an chhekkhawl a, rinaiin a tuartu thingtlang mi tam tak hian kan harsatna a hmun tak leh a mawhphurtu dik takah kan thlen loh palh a hlauhawmin ka hria a, helai hi ennawn theih nise a that hle ka ring.

A dawt leha ka'n sawi duh chu Demand No. 34-na, Animal Husbandry & Veterinary hi a ni a. Hei Mizoramah kan vannei viauin ka hria, District zawng zawng, District Headquarters zawng zawngah District AH & Vety Office hawn a lo ni ta a, a lawmawm hlein ka hria a.

Tin, chubakah, hei ka bial ngeiah, Lawngtlaiah, Mampui Vety Farm-ah Ar awpkeuna khawlte hawn a lo ni ta a, a lawmawmin ka hria a. Lawngtlaiah te, Saihaah te Ar, Broiler-te kan vulh ve duh a, kan khawi ve duh a. Aizawlah kan han kal a, Aizawl Night Bus-ah kan han order a, a thi duh em em a, khawvawh lai pheih chuanin Arnotein a lo tlin lova, Ar note deuh chu a thi teuh thin a ni. Chutiang atan chuan District zawng zawngah Ar awpkeuna hmun ruahman a lo ni leh a, a enkawlina tura hmalak a ni hi lawmawm ka ti. Vawkah leh Arah hi chuan kan ziaawm viauin ka hria a. Hei hi Sorkar hmalakna that vang niin ka hria a, lawmawm ka ti tak tak a. Ka sawi tel duh chu tah hian, Vawk kahraina kha Aizawl, Kolasib, Champhai, Serchhipah tih theih a niin ka hria a. A piahlam Lunglei, Saiha, Lawngtlai, Mamit te pawh a la tih lohna District zawng zawngah hian Vawk kahrai pawh hi Sorkarin tan la sela, Sorkar kumtharah chuan tih theih hman nise a lawmawm hle ka ring. Mipui tan phurrit a chhawk ngei ang a, kan eizawna kawngah pawh nasa takin min pui theih ka ring a ni. Chu chu ka'n tarlang tel leh duh a ni.

Transport Department hi tuna Vety Department ka sawi ang tho khan District zawng zawngah DTO Office dah a lo ni a, hmanni lawkah keini pheih chu hawn kan ni a, thil ho angreng taka ka ngaih thin mahse mipui rilrua awm thin chu MZ-07 hi Lawngtlaian kan code atan kan duh, i

nawr tur a ni tih hi party ang pawhin NGO ang pawhin min ti a. Director-te duhsaknain MZ-07 code kan chang a, kan lawm hle a ni tih hi hotute min hriatpui turin ka'n tarlang tel duh hrim hrim a. Kan hma lawkah Mamit ho pawh khan an duh a, an nawr ve, an sawi ve a ni tih pawh ka hria. Chutianga Department duhsakna kan dawng hi thil hote mah nise lawmawm ka ti a ni.

Tin, Transport Department hian hmalakna kawng hrang hrang a neih bakah Motor registration bakah tax chungchangah kum dang zawng aia thain hma a sawn a, hei hi lawmawm ka ti a. Tuna Aizawl - Lunglei kawngpui angte hi chu a tihdan dang deuh chu awm sela, feeder road-ah zawk hian day service hi kal ta sela, a bakah chuan private Sumo-te, private bus-te hi kal tam tir ni sela, kan eizawna hian awmzia a nei zawk ang tih ka ring.

A dawt lehah chuan, Demand No. 4-na, Law & Judicial Department hi a ni a. Mizoramah hian vanneihthlak takin Mizoram Compulsory Marriage Registration Rules duan chhuah a lo ni ta hi kan zavaia tan thil lawmawm leh tha niin ka hria. Inneihnaa ka kalnaah a form-te an lo sem chhuak a, tuna kan inneihna hi court-ah a rintlak tawh a ni, Court-a ding tlak khawpin Sorkarin hma a la a ni tih inneite chhungkua atangin an rawn tarlang a. Nikum lawka dan pass tihpuitlin a lo ni ta kha pawl hrang hrang leh NGO hrang hrangin hma kan lak honaah a hlawhtlingin Sorkarin mipui harsatna leh mamawh a ngaihtuah a, kan social life atana pawimawh turte, nupa inthenna chungchanga harsatna hrang hrangte pawh a chinfel ka ring a. Hei hi a ropuini ka hria.

A dawt lehah chuan, Demand No. 31-na, Agriculture hi a ni a. Lo neia eizawng vek e ti lo hian Agriculture Department kan hmantangkai dan hi a pan deuhin ka hria. Mithiam tak tak, Mizo ngei kan nei tawh a. Chutihlai chuan, Department-te nena indawr tlanna kan lo neihna leh kan lo huam neihna chungchanga tangkai zawka inchhawr theih dan kan la thiam lovin ka hria a, District-a Agriculture Office awm lohnaah DAO awmlohnaah dah kim a ni ta a, hei hian District level atanga administration atanga fel taka nrel chhova, kan lo nih dan tha zawk leh, thlai thar hlawk zawka kan thar theihna tura hma a lak theih ka ring a, lawmawm ka ti em em a ni.

A dawt leha ka sawi duh chu Horticulture a ni a. Demand 32-na hi a ni a. A hmingin MLA ka nih ve hnu 2004 kumtir atanga wawiinni thleng ka chhut hian Aizawl, Serchhip, Lunglei inkar tlangdungah hian thlai kan thar tam ngawtin ka hria a, thei lampang chi te, Balhla lampang chi te, hei hi Department achievement Sorkar hmalakna a ni lo thei lovin ka hria a. Hetianga Sorkarina hma a lak chhohva tan a lak chuan thlai leh thei lampangah pawh awlsam taka kan intodelh theih thuai ka ring a, Sorkarin hei aia nasa zawka tan a lak thain ka hria a, ka'n tarlang tel duh a ni e.

Chuvangin, heng kan Minister zahawm tak tak pathumte demand hi lungrual taka vote tha ka ti a, ka rawn tarlang a ni, ka lawm e, Pu Speaker.

PU A.B. CHAKMA

: Pu Speaker, ka lawm e. Demand No. 17.
Supply chungchangah sawi hmasak ka duh
a. Tam kum a ni a, kan harsa tih pawh kan
hre vek a, vawiinni thlenga kan Supply

Minister hmalakna te hi a fakawm a, leh a taimakna te kan en hian thil a ti zung zung, nikum atanga a tihte hi ka hria a, a lawmawm a. Amaherawhchu, ka bial lampang ka ngaihtuahin ka rilruah chuan ngaihtuahna thui tak ka nei thin a, chung chu, nikinah furte a lo ni ang a, ruahtui a tlak phawt chuanin khumi Damdep piah lam Parva area-ah khuan motor a thleng thei dawn lova. Amah Minister hnenah kan ngenna angin tunah khuan Damdep kudamah buhfai an dah tan tawh a, Parva Godown kha a la ruak a. Tin, Vaseitlang Godown a la ruak bawk a, tunah pawh hian Parva area ami ten Vathuampui Godown atangin buhfai head load angin an la thin a. Kea kal a ngaih avang khan kal nan nikhat a ngai a, a tukah haw leh nan ni khat a ngai bawk a, an harsa ve a. Mitin kal thei lote pawh an awm a. A changin Store Keeper a awm lo tiin buhfai, ration quota an la thei lova, a changin buhfai stock awmlo an ti leh bawk thin a. Chuvangin, an harsa em em a ni. Tunah pawh Parva area-ah khua engngemaw zat chu buhfai an harsa, a then chu bahrata an lai a, nimirpiah lawkah pawh Longpuighat atangin phone-in min rawn bia a, hei hi chu kan hotute hnenah min lo hrilh sak mai dawn nia tiin, min lo hrilh a. Chuvang chuan, fur a lo nih chuan Chawngte hmunah pawh motor lian chu a thleng dawn lo tih kha chu a chiang mai a, tunah motor kal theih hun laiin kan Minister zahawm tak chuan Parva Godown-ah buhfai min rawn dah thei se tih ka ngen duh a. A chhan chu Fur a lo ni ang a, an tan chuan chawnghei tih loh chu tih tur an nei lo tih kha chu hriat sa a ni mai a. Chuvang chuan, staff indaih lo pawh nisela, buhfai ber awm tawh chuan duh leh hmundanga awm staff-te chuan karkhatah vawikhat kalin ration quota kha an pe thei dawn a ni.

Tin, Gas chungchangah sawi ka duh chu, Gas agency kan nei lova, amaherawhchu, Gas agency pahnih Zomawii Gas Agency leh LP Gas Agency ten extension Sorkarin min lo tihsak a, chung erawh chu kan lawm em em a. amaherawhchu, tunah motor kal that lai pawh hian Gas lak tur hian thlakhat advance emawin kan dah a ngai a, chu pawh chu kan chang lo thin a. Heng Gas harsatna pawh hi kan Minister chuan kawngte min lo dapsak theih chuan a lawmawm khawp ang. Tin, nichina kan sawi tawh Parva area phei chuan tunah buhfaiah Kg. ah Rs. 35 pawn lei tur a awm lova, (black-in) ration quota kan dawn loh phei chuanin black market-ah lei tur a awm bawk silo, an mangang khawp a ni tih kha kan Minister-in min lo hriatpui se ka duh a ni.

Tin, Demand No. 34-na, Vety Department changchangah ka fak rual rualin hei kum 1990 - 2008 thleng Department Office leh quarters 204 lai an sakte leh NLCPX sum hmangin ranchaw siamna hmunpui 50 metric tonne capacity Animal Feed Plant Ramrikawnah an neihte fakawm ka ti a.

Tin, Bawngnute sawngbawlina plant 5000 ltrs. Capacity siam theihna khawlte Kolasib leh Lungleia an bunte hi a lawmawm ka ti a. Amaherawhchu, hemi Departmentah hian tha tih loh pakhat ka neih chu, Chawngteah

hian Veterinary Sub-Division kan nei a, kum engemaw kalta atangin quarter luah duhtu hi an awm lova, office pawh mumalin an kal lova, kan quarter-te hi Vety complex kan neihah khan mimalin an luah thin a. Department remtihain, tunah chuan kum engemaw zat kal tawh atangin tuman an luah duh loh leh office pawh mumala an kal loh avangin District Council Sorkarin he Vety Complex hmun hi mimalah a siam tawh a, nikum hmasa khan. Tunah chuan mimal ram a ni tawh a. Vety Complex a awm lova, Minister hnenah zawhna ka siamin hei chu District Council thuneihna a nih avangin a ngaihna a awm lo a, hetah Lai District-a Chawngte-P ah hian kan sawn mai loh chuan, tiin min rawn hrilh a. Hei erawh hi chu keima ngaihah chuan thil fello ka ti a, a theih hram chuan District Council Sorkar nen inbia a, a ngaia dah leh theih a ni lawm ni tiin kan Minister zahawm tak hi ka ngen bawk a ni.

Tin, hemi rual rualin Agriculture pawh hetiang bawk a ni leh a, a hmian Sub-Divisional Agriculture Officer kan nei ve a, District Council Headquarters leh Civil Sub-Divisional Headquarters lo nihain kan lo nei ve a, chung pawh chu a hmunte kha mimalah an pe a, tunah SDAO pawh kan neilo a ni. Agriculture Inspector emaw. Horticulture Demonstrator vel an awm a, amaherawhchu, office pawh neiloin khatiangkhan an awm a, kan Agriculture Minister zahawm tak hian hei hi a tul anga min lo bawhzui sak leh action min lo laksak sela ka lawm hle ang.

Tin, Transport chungchangah hian Lawngtlai te. District Headquarters-ah hian Motor Vehicle Registration Office kan nei ve te hi ka lawm a. MST Bus 44 leh Tanker 2 an leite hi a lawmawm a. Amaherawhchu, thil pakhat Minister zahawm tak hnena sawi duh ka neih chu. Chawngte hi Sumo service a awm naa, mirethei deuh awmna a nih avangin Sumo chuan man tam takah hian harsatna an nei a, Bus chu engemaw chang chuan a kal ve naa, a regular lo em em a. Chuvang chuan, a theih hram chuan motor kal theih chhung chuan regular taka bus service hi ni thei sela ka duh a, kan Minister zahawm takin kha kha min lo bawhzui sak ka duh a ni.

Tin, thil pakhat sawi duh ka neih chu, hei Sericulture Department hian kan bialah hian engemaw chen hma a la a, hemi Mulberry Plantation hmunte an nei a, building-te pawh Borapansury-ah te Kamalanagar-ah te an sa a, a lawmawm a. Plantation pawh a thenin tunah an siam a, cocoon-te pawh engemaw zat an siam tan tawh a, hei hi continue zel turin kan Minister-in hma la se ka duh a ni. Pu Speaker, ka lawm e.

PU H. LIANSILOVA

: Pu Speaker, vawiin ka chak vak lova, ka sawilo mai dawn emaw ka ti a, mahse, hun a awm takah chuan kan ding ve leh mai ang a.

A hmasabera ka sawi duh chu Pu K. Sangthuama, kan Minister zahawm tak demand, Food & Civil Supply Department-ah khan tlemte han sawi ka duh chu, kan ngaihthlak tak leh kan hriat tak ang khan Mautam tam chungchangah khan tlema ziaawm leh thlaphan awmlo deuh lai chu han sawi tur awm mahse, Ruling lam pawh nise, helam opposition lam atang pawhin Bahra laite, chhuanchhamte kan awm a ni tih chu pha lo tlang ila a thain ka ring a. Tin, kutdawha Aizawla lo lut chungchang kan han sawite kha Sorkar pui roelnaa hneitheih tu emaw chanchin han sawi vakte pawh kha kan dinhmun vuak nghehna atan chuan a tul kher kher lo mange ka'n ti a. Tichuan, tuna kan han ngaihthlak tawh zawng zawng leh kan tun dinhmun atang hian helaja kan thutna hmun leh kan chhungkaw khawsakna hmun atang pawhin tam tuarte leh retheite dinhmun hi kan hmuh dan leh kan hriat dan hi a inanglo deuh a ni tih hi chu kan hrethiam tlang theihin ka ring a. Chutah chuan a pawimawh erawh chu kan han sawi zawng zawng atanga lo lang ta chu Mautam tam hi tunah hi chuan kum danga kan hriat ngai loh Bahra laite kan hre ta a. chhuanchhamte kan awm dawn a ni. Chuvang chuan theihpatawp chhuaha Sorkar hian tan a lak a ngai a, kan Chief Minister zahawm takin a thusavinaah Mautam avanga harsa lutuk tumah an awm kan phal lo a tih kha tawngkam ma nilo, a tak taka a department enkawltu leh sorkar hian a hlenchhuah a pawimawh dawn a ni. Puar kumah pawh thingtlang khuaah tam rethei an awm ziah a. mahse, kuminah hian Mautam a lo nih takah chuan khang harsate pawh khan Mautam avanga Sorkar chetna zar hi zo sela, ngaihsak loh bik leh heng hi chu an harsa hrim hrim a nia tih ang zawng kha chu awm lo sela. Harsa zawng zawng tumah riltama awm lo tura Sorkarin tan a lak a ngaiin a lang. Chumi tur chuan kan Food & Civil Supply Minister pawh a viak a tha a, tan la nasa lehzual tur leh buhfai chungchangah pawh theihtawp chhuaha a stock thuah pawh tun kan ngaihthlakah pawh Aizawl knaw chhungah pawh hlauhthawn awm lo mahse, thingtlang chu tunah hian an thlaphang a ni a. Heta sawimawi emaw inthlamuan emaw ai chuan a takin kal ila.

Tin, Pu Sangthuama demand-ah Sericulture-ah khan nikumah Governor's Address-ah pawh chhungkaw 5000 lain eizawn nan an hmang tih a ni a. Kuminah 10000 vel tih a ni a, hmasawna a tha viau a. Ka hmaah khan Pu Suama te, Pu Hminga te khan an sawi han support ka duh chu, Sericulture hi a potential hi a tha a, environment ngaihtuah pawhin a tha a. Tun aia lian deuh hleka programme major level deuh tak tak, kan mite eizawna tha siamna atanah pawh hmang tura kan lak a tul mange aw, department-te chu tihlen ni se tih kan sawi tawh angin tih a ni na a, a la tawh lovin ka hria a. Compact area neiin Assam-ah pawh 5000/6000 eizawna an siam sak a, chutiang rilru pu chuanin hma la ilangin, eizawnaah ngelnghehna kan insiam sak mai bakah Industry-ah hmasawna lian tak a awm dawn a, chu chu ka'n sawilang duh a.

Local Administration Department-ah hian thil ka la ngaihpawimawh reng chu tihian kan eizawnnate a dang a, khawi khawiah emaw kawngpui thate a awm a, Village Establishment zel tur hi a din dan tur, a control-na leh a enkawl dan tur hi kan pass thuai loh chuan. Hei tunah chuan Tuirial atanga Thingsulthliah kawngah te pawh khua ti tih, khua ni mang silo a awm a. Chuvang chuan heng control-na tur hian dan kan neih thuai hi a tha lawm ni ka ti a.

Tin, pahnihnaah chuan Village Census Register hi V/C te leh NGO te pawh tangrualin tha taka kan vawn hi a thain ka hria. An vawn awm tur tawk leh ram development thil atan leh Law & Order thilah pawh tangkai tawk tur statistics leh department dangte ir-coordination siam theihin a lang a, kan tlai mah mah emawni ka ti, hei hi chu a pawimawh ka ti a, ka'n sawi duh hram a. Tin, kan Village Council-te dinhmun enthat leh an facility emaw, an thuneihna emaw hengte hi kan dan dinglai hi chuan mi khuap zo tawh lo a. Tin, tunhnaiah V/C tam tak thiat an nih nachhan hi a LAD hnuai a an hna vang ni lovin, R.D hna an thawh avang te, khatianga suspend-te leh thiatte kha a awm thluah mai a ni. Chuvang chuan hengah hian an dinhmun hi tihchian a, engang chen nge mawh an phurh dawn, engang chen nge action lak theih a nih dan tur tihte pawh hi kan sawi a pawimawhin ka hria. Chuvang chuan heng hi ka ngaih pawimawh, kan V/C te dinhmun chungchangah a ni a.

Tin, Vety & Animal Husbandry hi kan ramah a potential hi a tha em em a ni. Hnimhnah hring ran chawmna tur kan nei a, tin, vaimim leh bekang ran chaw siamna tur ram kan nei tha a, chuvang chuan helaiah hian tan kan lak leh deuh leh Department-ah pawh coordination tha deuh Agriculture te, Horticulture te nen awm se a tha awm hlein ka hria. Hei hi tunah pawh kan intodelh loh dan hriat reng a ni a, tan lakna leh tun aia lian deuh zawka kan kalna tur niah ka ngai a.

Tin, Pu H. Rammawia, kan Minister zahawm tak demand-ah hian Law & Judicial demand 14-naah hian Judiciary, executive atanga lak hnan thua hian hma chu kan la zel naa, hun kan duh rei lutuk deuh hi chu hmanhmawh a tha mange. Tunah Civil Court lamah chuan kan tihrang tawh kan ti naa, kan duh ber hi chu executive atang hianin criminal court hi criminal justice hi separation awm se, hei hi judiciary separation tih pawhin a kawh tak tak leh kan ram mamawh chu a ni, kha kha min lo chhinchhiah sak selangin.

Tin, Agriculture leh Horticulture hi sawi kawp mai ila. Kan ram mipui 70% deuhthaw eizawn theihna leh vawiinni thlenga kan inngahna a nih avangin ngaihthah theih a ni lova, sum leh pai pawh hi tam tawk kan dah chu a ngaiin ka hria. Amaherawhchu, tuna kan lo kalpui tawhah hian kan inenawn that ngaia ka hriat chu, a programme chi hrang hrang leh programme thar hianin ngaihtuahna kan hmang nasa a, kan kuthnathawktute harsa te, harsatna lai tak hi enchian a tul angin kan enpui lo deuhin ka hria. Entirnan, thingtlanga kuthnathawktute hi tunah chuan hmanna ka sawi ang khan mirethei kan tih ang hi an ni vek tawh. A chhan chu tuthlawh an nei a, chemtum an nei a, hreipui an nei a, chu chu an eizawna hmanrua a ni mai a. Chumi hmang chuan tunlaia eizawna ngelnghet leh commercial scale-a eizawng tur chuan tihngaihna a awm lo, sum faia puih a ngai a, tin, anmahni enkawl na vil that pawh a ngai a, attention pek that a ngai a ni.

Tuna kan tihdanah hi chuan a programme leh a sanction-ah hianin kan kal viau a, a human aspect lai a kha kan thleng lo deuh

niin ka hria, hei hi a induhthawh awm niin ka hria a. Tah chuanin, Agriculture-ah pawh sawi tur chu a la awm nual ang a, kan Minister zahawm tak pawh ka'n ngen duhna chu, a programme thar leh thil thar tha hmuhchhuah a pawimawh tluk aia pawimawh zawk chu kan kuthnathawktute hi intodelh tur tak tak hian enge an tlakchham a, enge an harsatna, tin, tuna kan programme kan lo kalpui zawlah hianin engvang nge min hlawhchhampui thin tih a thawktu tak takte an nih avangin hei hi ngaih pawimawh hle a that ka ring a. Tunah hian kan programme hi han review leh deuh hlek ila, kan development-a kan investment cost hi a per unit hian a sang lutuk lam deuh hlek vek a ni a, chu chuanin a thlen a chu a thawktute kan va target-a te aiin a middle men-a lo thawktute hian an hlawkpui a, an in leh lote pawh a tha chak a, motor thar pawh a tam phahin ka hria.

Tin, thlai chi leiah pawh hian a thlai chi lei tur mamawh zat kan chhut danah hian kan tharchhuah leh tur ang zat aia tam mah kan lei thin zawk em tihte pawh hi kan ngaihtuah thin pawimawhin ka hria a.

Tin, a tawpna atan Horticulture-ah pawh hian kan hmalakna langsar tak chu Anthurium tihte a ni a, mahse, heng hi nichina ka sawi tuthlawh/chemtum/hreipui nena eizawngte chawikanna tur a ni hauh lo mai a, kan sum senna tam tak leh kan programme-ah pawh kan focus ber hi a ni lehngal a, kan en that ngaiin ka hria. Henga mi kan tuamhlawm a te hi a neinung nung, contractor leh officer lian ho chhungkua leh an family zinga mite a lo ni a, tin, Green House kan tih pawh hi chutiang tho a ni a, henglaite pawh hi kuthnathawktu, rethei zawkte tangkaipui tura lo thlir that deuh a tulin ka hria. Ka lawm e.

PU F. LALTHANZUALA : Pu Speaker, ka hmaa Aizawl North-II MLA zahawm tak thusawi kha ka pawm khawp mai tih ka sawi hmasa duh a.

Demand 19-na, Local Administration chungchang thuah thil pakhat chauh sawi ka tum a. Housing Loan tihpun a ni hi a lawmawm ka ti takzet a. Hei hi Zorama in din ve theilote tana thil pawimawh tak a ni a. Pawisa a lo tlawm tawlh tawlh a, thil a lei theih, a purchasing power a lo tlahniam a, a zat, a amount an pung hi kan Sorkar thil tih lawmawm tak niin ka hria a. Mahse, tahnian thil pawimawh tak a awm a, pawisa an hmuh ang hian in sak nan an hmang chiah em ? tih enzui a ngai a ni. Pawisa lakluh hi engemaw tia hman mai theih a ni a. Khatianga pawisa an hmuhna purpose anga an hman loh a, Sorkar lam pawh kan ngawih mai mai a, kan endik leh loh chuan a ruk tea pawisa hi duhna hmun hmuna hman theih a ni e, tih zirtir ang tluk lek a nih theih a. Hei hian rinawm lohnate kawng hrang hrangin a keng a ni.

Tunah hian kan ram dinhmun hi rinawmna lamah hian kan tlahniam telh telh emaw tih turin ka hmu a. Kan School naupang tam takte pawhin kan scholarship, Post Matric scholarship lak an duh dawn a. Form

an fill-up hunah an nu leh pate in come an ziak dan atangte hian corruption kawng kan zawh nghal ringawt a. IAY list kan han siam chhuak a, IAY-te chu mipa ni nilovin. hmeichhe lam pawl deuh, hmeithaite khatiang ang ho deuhthe chanpual deuh a ni a. Kha kha patung pangngaiin kan duh ve si a, mipa hming kha hmeichhiahte kan let a, khami a list kha village council tinreng atangin a lokal a, dawt bu hi hmingah na na na chuan dawt bu a ni ringawt mai a, khatiang khan kan kal chho ta a. Hetiang pawisa an lo dawnte a nihna dik taka hman kan insist tlat khan rinawmna kan zirtir tihna a ni a, chu chu a pawimawh hlein ka hria a ni.

Tin, ka han sawi leh duh chu, BAFFACOS tih hi a ri zing hle a. Kuthnathawktute a thleng lo tih ang dawn dawnte pawhin kan sawi thin a. Mahse, kawng tha tak tak an laih kha a hmangtute chu mirethei hote kan ni ve tho a. Damdawi In lama damlo enkawlina tha tak tak an lo lei pawh kha a hmangtu chu miretheite kan lo ni ve tho a. Khatiang ang khanin thil tam tak hi hman a ni a. BAFFACOS pawh hi tam dona a ni a, a tam hun a lo thlen hmaa kan tana thil tangkai tur lo tih lawk nana pawisa a nih ang khan tha taka hman a ni ve hrim hrim a ni.

Tin, demand No. 31-na, Minister zahawm tak Pu H. Rammawi chhanah khanin Minor Irrigation chungchang thu hi han sawi leh ka duh a. Hemi department hi department puitlinga siam a ni ta hi kan Sorkar hian a tidik hlein ka hria a. Tui tello a thlai chin kan sawi uar em em. Agriculture lamah te pawh, Horticulture lam pawh nise, khawi pawh nise, tui tam tak a awm loh chuan a puitling tha thei lo a ni. "Where there is water there is life" tih a ni a. Tui awmnaah chuan nunna hi a lo awm mai zel, khawlaiah pawh tuihawk rei tak a lo tlin chuanin nungcha a lo awm ve mai thin. Nunna hnar hi a ni takmeuh meuh a, hemi atana tan la tura hetiang department tak tak ang an han ti ta hi a lawmawm takmeuh meuh a.

Kan ramah Horticulture lamte, Agriculture lamte, thlai chin lamte hi kan Zo nu leh Zo pa te dinchhuahna tur a ni han tih hian a dik pawh a dik a ni. Mahse, tun thlenga kan failed thinna chhan chu tui tam tawk loh vang hi a ni. Chuvangin he department pangngai a lo awm ta pawh hi heti mai ni lova hotute pawhin an ngaihtuah zel a ngai a. Chief Minister budget speech-ah pawh khan an mamawh ang pawisa pawh pek a ni ang a ti a. Kan ram ruahtui hi a tam tawk viau a, furah tam tak a tla a, a luangral teuh a, hengte hi irrigation-te chu nichiah lo mahsela, an ni emaw, tu emaw tal hian hengte hi a store-na tha tak tak mai siam a, huan neitute hnenah cement concrete-a tanky lian pui puite han siam a, thal chhung zawnga thlai enkawlina tur an neihte kha kan hlawhtlinna hmanrua tur a ni a. Tin, hla deuh amite pawh tui han lak a, han tih chuan kan thlai tam tak hi a puitling thei dawn a ni. Israel rama kal hote pawn an han sawi a, a tawpah chuan tui an pek that kha a pawimawh ber zel a, thildang zawng zawng han cheibawlinate awm teuh mahsela, tui tha tawk a awm loh chuan thlai nung ve na na na kha chu a puitling tha thei lo. Chuvangin tui tha tawk neihna kawngah hian nasa taka hma kan lak hi kan ram. kan thil tharchhuah kawnga kan hmasawmna tur pawimawh tak a ni tih kha ka'n sawi duh a.

Tin, demand No. 17-na, Food & Civil Supplies hi kan Minister hi a fakawm hlein ka hria a, an thawk tak tak hmuh hi chuan a inthawk hlum mai ang tihte pawh hi a hlauhawm hlein ka hria a. A vei nasa a, a ngaihtuah nasa bawk a. Mahse, mimal tan chuan thil tih theih a ni lova, tanruah a ngai hle a. Kawng tlangdung, hmun awlsam deuhah chuanin thil huphurhawm hi a awmin keipawh ka hmu hauh lo a ni. Mahse, khawimaw lai kilah erawh chuan harsa tak takte an lo awm thei dawn a ni tih kha a hriat a. Chuvangin indaih deuh hleka thil tih pawh hi a ngaih a rinawm a. Amaherawhchu, Minister hi vak lutuk lova a officer-te pawh hi an vah ve zung zungte pawh a ngai ang a, khatianga hmalak hi a ngai a. Tun ai hian hrehawm tak chuan kan awm lovang chu maw tiin han inthlamuan mah ila rilru te teah chuan kawng harsatna te leh a chhan tam tak avangin khawimaw laiah hian harsa tak tak an lo awm ang tih chu thil chiang tak a ni a. Thil reng reng hi tunah chuan politic hi a kai lo thei lova, engemaw hlek a lo awm pawh hian politic hi a lo kai leh thin a. Hmannia ka bial ami Cherhlun ami lo teithla ringawt pawh kha an tei ringawt pawh kha kawng khat a ni a, kawng hnihnaah chuan political advantage hman tumna te pawh kha a tel zung zung emaw tih theih tur khan a awm a. An YMA President chuan thinur deuh mai hian in rawn phone a, thil dik tak a nih loh dante kha a rawn sawi a, khatianga khan engvang emaw hian thil chu kan sawi zung zung a, kan ti zung zung a, T.V-ah leh Chanchinbuahte kan puangzar zung zung mai a, chuvang chuanin chutianga khatianga chuan an awm a ni han tih pawh hi fiahna tak tak a awm loh chuan awi maite pawh hi a harsa mah mah a ni. Amaherawhchu, hetia han ngaih mai hian fur a lo thlen tak tak a, khawimawlaiah kawngte a chah a, harsatnate a lo awm chuan hmun harsa zual deuhahte chuan chaw nghei emaw chhum tur neilo emaw an awm ang tih chu hlauhawm tak a ni reng mai. Chuvang chuan tan a la zel ang tih hi ka ring sa a. Amaherawhchu, tanruah, tunah hian keini ho zawng zawng pawhin he hun ritsak tak mai lo thleng hi kan hmachhawn tlan kha a pawimawh a.

Tin, insawirelna awm tak hi thil a awm a. Insawirelna awm ni lem lo incident engemaw chhete a lo awm a, khami kha han tihlen a, han tihkual vel a, politic ball lian puia chantir tum rengna ritrite hi neilo ila a tha khawpin ka hria a. Chutianga a nih loh chuan keimahni leh keimahni hi kan tidanglamin kan tichhe zo dawnin ka hria a. T.V-ah te kan hmu a, thuziak chanchinbuahte kan hmu a, hengte pawh hi mihring rilru a tha zawnga hruai thei an nih laiin a thalo zawng pawha hruai ve vak thei an nihna te awm zel kha a ni a. Chuvang chuan, a dik em? a tha em? tia ngaihtuahna kan hman reng hi a tha a ni. Pu Speaker, ka lawm e.

SPEAKER

: Tikhan, kan sawi zo khat deuh tawh a ni awm e. Tunah chuan kan Minister-te an demand kan sawi hote han wind-up a, pass dil turin kan sawm ang a. Tunah Pu Lalrinchana, Minister i lo sawm ang.

**PU LALRINCHHANA
MINISTER**

: Pu Speaker, vawiiinah hei demand sawina hun kan hmang a, tichuan, thahnemngai takin demand sawituten thusawina hun an hmangin mi 22 in vawiiin demand sawina hunah hian hun an hmang a. Chung zingah chuan a tam berin keima demand pawh minrawn sawipui a, lawmawm ka ti a. Tin, khang an demand sawiah khan kan theih ang chin chinin kan lo record vek a, chuvang chuan bawhzui ngai ang ang chu bawhzui tur pawhin kan lo inbuatsaih ang a. Inrawn sawi zingah khan tlem azawng anrawn tarlan han sawi hmasak zawk ka duh a. A indawt angin LAD lo sawi hmasa ta ila.

LAD hi tun hmian Urban Development nena kalkawp a nih avangin sum leh paiah pawh Urban Development sum nen hmalak a nih avangin LAD hian hma development-ah pawh a nei nasain hnuhma pawh a ngah khawp mai a. Amaherawhchu, nikum atang khan Urban Development hi a hrangin dahin a lo awm ta a, tunhma LAD in a vaia a huama kha tunah chuan Urban Development nen a hrangin a lo awm ta a. Chuvang chuanin, tunah hian Urban Development Directorate Administery-in vaibelchhe nuai singkhat sangthum, zanga sawmhnih leh sing ruk leh sang nga budget a hraninan nei tawh a. Chuvang chuan, LAD-ina budget a neih a chu cheng nuai sanghnih 53 leh sing 3 leh sang 5 chauh a lo ni ta a. Tichuan, Urban Development-ah urban Development Department-in Urban thil kha a lo kengkawh leh ta a, Rural area-ah Rural Development-in rural development area chu a keng bawh a. Chuvang chuan, LAD hian development-ah chuan hma alakna tur hi a tlem sawt tawh khawp mai a. Chuvang chuan, zangkhai pawh lehlamah chuan a zangkhai angreng viau a. Vawiiinah pawh Member zahawm tak Pu Zira, Saitual MLA-in BPL chungchang a rawn sawite pawh kha LAD huamchhung ami a ni lova, urban development lam kut a lo ni ta daih a. Chuvang chuan, vawiiinniah khatiang thilah khan ngaihtuah zui tur leh hrilhfiyah zui tur pawh chu Urban Development lampang atanga tih chi niin a lang a.

Tin, Pu Saikapthianga, Kawrthah MLA zahawm takin V/C power sang zawk pek tih a rawn sawite, tin, Pu Liansailova'n V/C establishment leh control dante leh V/C dinhmun siam that tihte leh midang dangin V/C chungchang anrawn sawi thil kha erawh chu keimahni la kengkawh zel tur a ni a. Chuvang chuan, khami chungchang atan khan V/C election rules mai ni lovin V/C dan kha siam that tura buatsaih a ni a. Chu thil chu, Secretariat-ah te pelut a, zo thawkhata Directorate phei chuan an inggaih hnuin municipality a lo awm leh ta a, chu chuan Dan hrante a rawn siam leh ta si a. Chuvang chuan, V/C dan kha siam that a ngai leh ta a ni. Chumi siam that a ngaih leh tak avang chuanin a department lamah thawnkir lehin a awm a, chung atang chuanin a tharin rawn ennawn leh a ngaih tak avangin hemi V/C nih dan phung tur, a dan siamnate leh election rules lampang pawh kha la tih theih lohina awmin tunah hianin House-ah te pawh la rawn thlen theih lohina awm a. Hemi siamtha tura theihpatawpa hmalak zel tum a ni tih kha ka'n tarlang duh a.

Tin, hetah village data record siam chungchang thu, khang thilah pawh khan ni e, khua amite particular hi chiang zawka hriata khatiang record kha fel taka siam hi a tul reng a. Chutah chuan, Finance Commission-in plan-te rawn siamin he Data record siamna tur hi ruahmanna siam min rawn phalsak ta a, chuvang chuan, reiloteah hemi atana sumte pawh lokalin hemi Data record hi chu buatsaih turin department kan inbuatsaih mek a ni tih kha ka`n tarlang duh a. Chutiang ang chuan, V/C dinhmun leh V/C kalphung tur hi chu buatsaih chhoh mekin a awm a ni tih kha ka sawi duh a.

Engpawh nise, LAD-ah hianin Village Council hrang hrang Aizawl District-ah 166 kan nei a, Lungleiah 132, Champhai District-ah 100, Mamit District-ah 72, Kolasib District-ah 44, Serchhip District-ah 42, a vaiin 556. Autonomous District Council tiam lovin V/C kan nei ta a ni. Chung V/C te chuan tunah hian hnathawk mekin an kal ta a. Nichina ka sawi ang khan V/C dan siam chungchang hi buatsaih mekin a awm a, duh angin a la kaltluang hlei thei lova. Engpawh nise, reiloteah tluang zawkin a rawn kal kan beisei a ni.

Tin, tun hunah LAD in kan kalpui pawimawh tak pakhat chu Housing Loan chungchang hi a ni a. Housing Loan hi tunhma chuanin LIC hi Rs. 30,000/-, MIG - Rs. 50,000/- tih thin kha tunah chuan a rate tihsan deuhin LIC - Rs. 50,000/-, MIC-Rs. 80,000/- tiin buatsaih a ni tawh a. Tichuan, Housing Loan pangngai hi mi 10,334 hnenah pek a ni a. Tin, HBA Sorkar hnathawkte pek pawh hi mi 11974 te hnenah pek a ni a, tunah pawh hianin chutiang public hnena Housing Loan pek hi buatsaih mekin reiloteah chutianga hmu thar turte chu tarchhuah theihin a awm dawn a.

Tin, kumthar atan pawh tuna kan budget-ah khan mi engemaw zat tan chuan kan han buatsaih chho ve leh a ni.

Tin, LAD hian District paruk, Aizawl, Lunglei, Champhai, Kolasib, Serchhip, Mamitah a siam a, heng hoah hian DLAO Office siamin chutiang ang chuan hmun an buatsaih a. Office hi run (kal tir) vek a ni tawh a, a tara berah hi chuan Office building pawh neih a ni a. Amaherawhchu, Mamit a la thar hlim deuh avangin chutah erawh chuan office building kan la nei lova, in luah hawh ang deuhin kan la kal a, chutiang ang deuh chuan LAD office hi DLAO hovin District tinah ngeinghet taka buatsaih a ni.

LAD hian tuna a han kalpui veah chuan Recreation Centre an tih hi kan theih ang angin khawpuiah kan nula tlangvalte mai pawh nilovin chhungkuate pawhin hun kan hman theihna tur hmun kan neih loh avangin chu chu kan buatsaih chho a. Aizawlah hian Lawibualah pakhat kan siam a, tin, Airport kawngah khuanin Lengpui thlen dawnah khuan pakhat kan siam bawk a. Chubakah Lunglei District Park kan siam a, tin, Thingdawl, Kolasibah kan nei bawk a, Mamitah pawh City Park lei turin buatsaih mek a ni bawk a, tin, Serchhipah pawh Picnic Spot buatsaih mek a ni bawk a. Chutiang chuan Champhaite leh hmundangah te pawh a theih ang buatsaih turin hma a la mek a ni.

Tin, LAD hian 11th Finance Commission leh 12th Finance Commission sum rawn sanction-na hnuaiah hemi step hrang hrang siamnate retaining wall-te pawh a thenah chuan siam a ni a. A thenah chuan mihring kalna tur pavement with checker tile-te nen, buatsaihna hna hi a thawk a, tichuan Aizawl khawpui leh District Headquarter tam takah heng thil hi buatsaihin vawiinniah pawh hian Aizawl khawpui mihring kalna tiawlsamtu leh timawitu takah a tang a. Tin, tun 12th Financial Commission-ah pheh chuan hak zau zawkin thingtlang lamahte pawh zunin te tuiluanna kawrte leh bawlhhlawh lo buatsaihna leh thil chi hrang hrang kawng tenau deuhthe chu buatsaihna turin sum leh pai hi sanction kan nei a. Chung chu engemaw chen hman tawh a ni a, tunah hian zau zawkin kan sum hmuh ang chin chinah leh keimahni kuta la awm chinah chuan hma la turin kan inbuatsaih chho mek a ni tih ka'n sawi tel duh bawk a.

Aizawlah hian, Aizawl Building Centre Society kan din a, chu chu sawtah Zuangtuiah sawnin buatsaih a ni a, hemi hmunah hian Cement Ballistic siamna hnate thawh a ni a, chutah chuan Cement railing pot-te leh checker tile-te thlengin siam chhuah tan mek a ni a, chutiang ang chuan progress tha tak neiin hma kan la chho mek a ni. Chutiang chuan LAD hi a theih ang ang chuan hmalakna kan buatsaih zel a. Kan portfolio, LAD-in a huam chin hnaah chuan kan theih ang tawk tawka hma la turin kan inbuatsaih a ni tih kha LAD chungchangah chuan ka sawi ni mai sela.

Ka sawi ang khan LAD hian development hi a tawk tlem tial tial a, chuvang chuan village administration buaipuina leh tlem azawnga khami enkawlina mai bak chu thil tih theih a ngah lo viau a. Khawpui hmunah pawh tlema recreation centre leh engemaw han siam belhte hi kan tih theih tawk a niin a lang a. Chutiang chuan LAD hi tunah kan kalpui a ni tih kha ka sawi theih dan ni mai sela.

Tin, a dawtah chuan, Transport lamah han kal leh ta zawk ilangin. Transport hi tunah khan mi 7 velin transport chungchang thu an rawn tarlang a. Motor insurance chungchang hi an sawi pawimawh viau hlawm a.

Tin, Road control leh Traffic Regulation chungchang thu Pu Liansuama rawn sawite, tin, motor khu, pollution control chungchangte leh insurance chungchangte, Directorate building chungchangte kha in rawn sawi hlawm a. Chulaiah chuan pollution test-na hmanrua hi central lam atang pawhin an rawn ngaipawimawh a. Chu chu reiloteah hian kan nei thei dawnin kan hria a. Chumi kan neih theih hunah chuan hemi motor khu lo detect-na hi kan state-ah kan practice nghal turah kan ngai a. Tin, insurance chungchang hi kan buaipui khawp mai a, nikum lamah pawh kan sawi tawh a, he thil hi. Transport department ringawtin a kalpui theih pawh a ni lova. Chuvang chuan, ngun taka ngaihtuahin a pum huapin Finance department-in hei hi chu keng rawh se tiin an kutah a awm a. Amaherawhchu, an kalpui chung pawhin duh angin a la kaltluang thei lo khawp mai. Engpawh nise, kan theih angin hmalak kan tum ang a.

Tin, Pu D. Thangliana, N. Vanlaiphai bialtu khan an bial chhunga MST Bus kaltir a pawimawhna thu a rawn tarlang a. Reiloteah hetah hi chuan kan kaltir theih kan beisei a ni. Tin, Silchar Transport Superintendent Office chungchang Pu K. Lalrinliana, Kolasib bialtuin a rawn sawi kha hemi siamfel tur hian hmalak mek a ni a, reiloteah kan siamfel ran theih kan beisei a ni.

Tin, Directorate building chungchang thu tunah hian a thiattu tur Auction a tihfel a ni tawh a, reiloteah thiatin a thar sa turin kan inbuatsaih dawn a ni tih ka tarlang duh a. Tichuan, Chawngtea Bus regular-a service tir tih thu pawh kha a bialtu khan a rawn sawi a. He thil hi kan theih ang angin a rang lama tihfel tumin hma kan la ang tih ka tarlang duh a.

Awle, Transport chungchang hi District Headquarter tinah District Office an hawng vek tawh a, he District Office tinah hianin Motor Registration emaw, Motor Fee pek emaw, Licence siam emaw, khang zawng zawng kha he District Headquarters tinah hianin computerised hmangin siam theih turin buatsaih chhoh a ni a. Chutiang chuan mahni District Headquarters theuhah hetiang tih theihna turin tunah hian kan buatsaih fel mek a ni tih kha ka'n tarlang duh a.

Tin, MST Bus hi tunah hianin 57 vel kan tlan tir mek a, chu chuan Mizoram hmun hrang hrangte leh Mizoram pawnah chuan Silchar, shillong leh Guwahati thlengin service kan kaltir a ni. Tin, Passenger & Goods Taxes hi kan kuta dah a lo nih tak hnuah tuang taka khawn niin. Enforcement Check Gate-te pawh Vairengteah siamin hemi atang hianin thil tam tak sum leh pai pawh kan lalut thei a ni.

Tin, Railway Agency hi tunhmain Aizawlah chiah a awm thin a, tunah chuan Lungleiah kan hawng tan ve ta a. Reiloteah fel zawka Lungleia fel zawka kaltir theih kan beisei a. Tin, Rel hi Bairabia Rel lian kal theihna rawn siam mai ni lovin, Sairang thlenga Rel kawng siam turin India ram Railway chuanin 2010 velah chuan helaia Rel rawn thlen tir theih turin programme an duang mek niin a lang a ni.

Tin, Lalsawia Bus Terminal Building hi Chaltlanga an siam hi tunah chuan peihfel a ni ta a. A kawng erawh chu la buatsaih mek a ni a, tunah hian hman tan mekin a awm a ni. Tin, Chaltlanga Jt. Director O.P. Building chu sak zawh tawh niin tunah luahin a awm a. Directorate Building pawh sak that turin tunah hian kan inbuatsaih mek a ni. Nikum lam pawha kan sawi angin Driving School hi tunah hian kan run mek a, Light Motor Vehicle leh Medium Motor Vehicle Driving zirtirna kan neiin chu chu hlawhtling takin kan kalpui niin kan hria a, kan lawm hle a ni.

Tin, sum leh pai lakluhna kawngah hian Transport Department hian hmasawna tha tak kan nei zel a, 1998, 1999-ah 403.76 lakhs thinah khan 2007-2008-ah chuan 816.76 lakhs kan lalut a, 2007-2008, tun January thla thleng khan 625.72 lakhs kan hmu a, Financial year a tawp hi chuan nikuma kan hmuh 816.76 lakhs ang kha chu kan hmuh leh ngei kan inring a ni.

Tin, tuna Motor kan service tir hi a detail-in sawi ta ila. Delux Bus hi 12 kan kal tir a, Medium Bus hi 28 kan kal tir a, Mini Bus hi 17 a ni a. Chuvang chuan Bus hming pu chu 57 kan nei a. Heng bakah hian Tanker 3 leh Recovery Van 4, Ambulance 1 leh Pick-up 2, Gypsy 4, Maruti Van 2, chung zawng chu Department-in Motor a neih leh a lo kawl a ni. Chutiang ang chuanin Transport Department hi tunah tluang takin kan kalpui a, tin, he Department hi MV Wing-ah leh MST Wing-ah thenin a thawktute pawh inkalpawh hleihtheih lohin tunhma chuan thenhranin a awm a.

Tin, Transport kalphung tlema kan siam danglam hret hretah mipuite tan eizawna tam zawk siam theihna turin MST Bus hi tittlemin private Bus kha kan tlan tam tir ta a, tunhma Bus 200 tel tlan thinah khan tunah chuan 57 emaw lek kan tlan ta a. Tichuan, MST lampanga thawktu kha strength kha an tam em em a, a chuang tam tak an awm a. Amaherawhchu, MV Wing lam hna lo pung zelah hian thawktu an tlem si a, chu chu a nih avangin khami a inkalpawh a, Directorate khat si chu fel zawka hnathawh a nih theihna turin buatsaih chhoh mek a ni a. Tunah hian re-structuring kan buatsaih mek a, chu chu kan tihfel hunah chuan Cabinet-in min pawmpui theihna turin DP & AR leh Finance-ah te kaltlangin chutiang anga siamrem a, a nih ang angte hian active zawka hna an thawh tlana effective zawka hna an thawh theihna turin tunah hian Transport Department chu kan buatsaih chho mek zel a ni. Chutiang chuan Transport Department hian kan theih ang anga hma lain kawngro suin hma kan la chho thei niin kan hria a, kan lawm a. Tin, a Department hi chuan Administration leh Fee khawnte leh eng engemaw khatiang kha a tam thei ang berkalpui a, a service tak tak hi chu mipuiin private-a public service-a hna an thawhna tura buatsaih chhoh deuh deuh zel hi kan tum dan leh kan ngaihtuahna, inngahna a ni tih kha ka'n tarlang duh leh bawk a ni.

Tin, AH & Vety-ah hian lokal leh ta ila.

PU H. ROHLUNA : Pu Speaker, a kalsan hma lawkin Motor neituten Garrage neih chungchang kha Member tam takin an sawilang a, kei chuan ka sawi hman ta lova. Hei hi tunai hian enforce dan department lam hian an nei thei angem ? tih kha min han sawi tel sak hlek sela, Traffic leh kawng hi a tibuai thei a, a pawimawh khawpin ka hria.

**PU LALRINCHHANA
MINISTER** : Pu Speaker, a dik khawp mai he thil hi, nichina kan Member pakhat Pu Liansuama'n a rawn rawt ang deuh khanin Motor neituin a Motor an enkawl dan tur khan kan buatsaih a, regulation fel zawk kan siamchhuah hi a tul khawp mai. Hemi atan hian hma la tur pawhin kan rawn la zui zel ang e tih kha ka'n tarlan theih dan ni ta sela.

Awle, AH & Vety-ah hianin ngaih pawimawh hrang hrangte in rawn tarlang a, Zokhawthara Vawk 7 man sak chungchangah Zokhawthar lam, Burma atanga ran rawn lut hi Sorkarin phalna pangngai chuan foreign atanga lolut tur dan ang thlapa tih hi a awm ngailo hrim hrim a. Amaherawhchu, Burma-te nen chuan inkalpawh tlang kan ni a, engmah hi kan indang chat tak tak thei lova. Amaherawhchu, ran hrisello a rawn luh lohna turin A.H & Vety chuan dan a duang a, chu chu Assembly-in kan passed sak a, ran hrisello chu lo dan chah theihna tur dan kha siam a ni a. Chumi hmang chuan an lo check thin a, a hrisello chu kal luh an khap a ni. Amaherawhchu, tunah hian Bird Flu-in Burma-te Bangladesh-te a rawn tuam ta si a, chuvangin India Sorkarin Burma leh Bangladesh atanga ran lakluh hi a rawn khap tlat a ni. Chuvang chuan tunah hian kan theih ang tawkin kan dang chat a ni. Amaherawhchu, miin smugling thila thil an lo ti a, kan dang seng lo a nih erawh chuan thudang ni selang, chu chu tuna practice dan hi a ni a.

Tunah pawh hian vawk hrisel chu tam zawk lo lut selangin a pawh hleinem mawle, hetah vawk sa kan duhtawk si lova te pawh kan ti a, lehlamah chuan a dik viau. Amaherawhchu, hetah keinin kan hawng ngawt thei lo, India ram Sorkarin dangchat tura min tih avangin kan dangchat ringawt a ni. Bird Flu hlauhawmna hi a reh an tih chuan nidanga kan kalphung ang khan kan kal leh mai thei ang a.

Tin, Vawkte pasarih mansak tih chungchang pawh hi hetiang case deuh hlek bawh leh dan lo anga thil tih ni pawhin a lang a. Amaherawhchu, he thil titu Doctor hian enge a tih chhan leh a thil tih dan tur kha enzuiin engtianga tih tur nge tih kha chu Department-in a chhui mek lai a ni e.

PU R. LALZIRLIANA

: Pu Speaker, ni 22.1.2008 kha a ni daih tawh a, kha lampang tih hma kha a ni a. Chuvang chuan Bird Flu-te nen hei hi sawipawlh chi pawh

niin a lang lova. Tin, Bird Flu a hlauhawm a, a lo man a nih chuan hmundangah pawh an kaphlum a, Magistrate order-in, a ni chu kaphlum si lovin a tukah a hralh leh a, hei hi a dik lova, Doctor pawh hi C. Lalrinawma a ni a, hei hi chu action min laksak loh chuan Sorkar neitu Police bawkin an man a ngaiin ka ring tlat.

**PU LALRINCHHANA
MINISTER**

: Pu Speaker, he thil hi kei pheih chuan tun Session-a an sawi hi ka hriatchhuahna a ni ve a, chuta tang chuan kan Director-te ka zawtin he thil hi chhui mek a ni e, an ti a. Chak zawka thil ti turin ka'n lo nawr ve ang e.

Hortoki-a ran pul hri leng chungchang kha a bialtuin a rawn sawi kha, he thil hi report a awm a, chumi avang chuan Kolasib atangin Doctor-te kal tir an ni a, a enkawlna hna te pawh thawh a ni a, vaccine-te pawh pek niin, mahse, vawk thi hi an nei zeuh zeuh a, kuminah phei chuan engemaw zat an nei a. Mahse, hei hi vawk pul hri niin a lang, vawk thi chu ngun taka an enchhuahah chuan vawk 24 bawr vel niawmin a lang. Hei hi vawk pul hri pangngai a ni a, Bird Flu a ni lova, chutah chuan a hri danna nena an han tihin tunah chuan control tawhah kan inggai a.

Tin, hemiah hian compensation-te an beisei thin a, kan inpe hleithei lova, ka bialah ngei pawh nikum lamah khan an vawk chawah tur a lo tel palh ni tur a ni, an vawk vulh lai a thi fai vek a, kutbengin an awm a, an mangang hle a, an rawn sawi thin a. Mahse, compensation chu kan nei hlei thei lova. Engpawh nise, Department-ah hmalaknaah intanpui theihna kan neih chuan vawk vulhah chuan kan la intanpui ang chu tih mai loh chu tanpui theihna kan nei si lova, chu chiah chu helai Hortiki incident-ah pawh thil awmdan a ni.

PU SAILOTHANGA SAILO : Doctor-te kan han kova, an lokal a, an han en vel a, hri a lo pai ngei tih hriat a ni. Tin, he vawk thi hi an mahni tum dan takah chuan tam kumte a ni a, kan veng hi kan rethei si a, engemaw ti ti a kan khawsak theih takin tiin vawk hi uar lehzuala vulh an ni a. Hetia chhiat kan tawh takah hian Sorkarah kan han sawi a, mahse, duh angin min bengkhawn lo hle a, action la theitu chu ni i'a chuan, action lak dan tur hi he House-ah hriat a chakawm hle, mahse, la thei kan ni lova.

Engpawh nise, Pu Speaker, kan Minister hnena ka'n ngen duh chu, a hmunah ngei, a thih lai ngei pawhin ka kal a, ka hmu a, Doctor pawh a lokal a, ka sawi a, ka hrih thlap a, waviin niah pawh hian hnamdang tawngin thu ka sawi lo, Mizo tawngin, Mizo pa takin thu ka sawi a, earnestly-in Sorkar hi ka ngen a, tam kum a ni a, khu khua khuan an tuar hle a, an buh hmunah kei ngei pawh ka kal vek a. Helai thil hi engemaw an vawk lei hian engemaw insure em em lo mahse, a humanitarian ground atang tal hian engemaw ti hian tanpui dan a awm lawm ni tiin mizo tawngin ka han sawi a ni. Chuvangin kan Minister zahawm tak hian action min lo laksak turin ka ngen nawn leh e.

PU LALRINLIANA SAILO : Pu Speaker, hemi Burma atanga vawk lo lut chungchang kha hemi ran hrisello chungchanga Sorkar hmalakna tha ka ti a, a lawmawm khawp mai. Mahse, Myanmar-ah Bird Flu a free tawh tihah chuan, kan ti ve thei mai lawm ni ? A chhan chu, khilalah khian kartin vawk 1000 chuang a rawn lut thla a, vawkte hi, chu chu kum l chuang kan hrek ta a, kan tuar ta chiah chiah a ni.

Tin, khimi hnuaiah khian mi 300 chuangin eizawn nan an hmang lehngal a, harsa ve te te an ni a, khilama a free chuan keini pawh hian kan hriat chian chuan kan ti ve thei mai em ? tin, khilama vawk khi kan ei thoin ka hria a, report kan dawn danin, khilama an talhna rate ten a rawn thleng thla thova, tin, khilama kan mizopuite pawhin an ei tho si laiah khian, vawksa hi tui kan ti tlang si a, ngaihdan kan nei thei lawm ni ?

**PU LALRINCHHANA
MINISTER**

: Pu Speaker, sawi angin khimi Burma ram kha chu Burma ramah Bird Flu a clear tih Central Sorkar atanga an rawn tih a, an rawn khapna kha an tihtawp hma kha chuan,

keini lo hawng anga lan kha chu a tih theih chuang lova, chu chu a awmdan zawk a ni a. Burma ramah Bird Flu a la awma ngaih a nih avang zawkin a hawn anga lan kha chu a dik lova. Engpawh nise, kan state-in a en chho anga, keimahni Vety Department tih ringawt pawh a ni lova, state interest zawk a nih avangin heng thil hi hetiang hian a kal a ni tih kha ka'n tarlang duh a.

Tin, Hortoki chungchangah kha chuan ka sawi ang khan a bialtu MLA in a ngenna chu ropui kan ti, kan rilru pawhin a ngaipawimawh. Amaherawhchu, compensation zawng chuan thil kan ti thei lova, department-in chance kan neih, a tih theihna dan kan neih ang angah chuan anmahni hre rengin hmalak dan kawng pawh kan lo zawng turah ngai ilangin a tha ang e.

PU SAILOTHANGA SAILO

: Khumi injection-na damdawi khu kan han tlachham khawp mai bawk a, khalam zawnga harsa a nih chuan Sorkar thu ni sela, keia zuk tihluh theih a ni hauh lova, ka tih

theih chu ngen kha a ni mai a.

A pahnih lehnaah chuan, ran an jecton-na, hri danna tal khu chu sufficient deuh chuan min tihsak thei ula a tha lawm maw ni le, khulaia VFA hnenah pawh ka sawi a, tawngkam dengkhawng tak pawh ka hmang nghe nghe a. Khami ran injection-na tal kha chu min ngaihpawimawh sak thei lawm maw ni le, tih kha ka han ngen nawn leh teh ang.

**PU LALRINCHHANA
MINISTER**

: Tunah chuan a danna kha pek vek a ni tunah khuan. Kan Doctor-ten vaccination an pe vek, vawk la damah chuan. Chu chu tuna a dinhmun chu a ni a. Anmahni khua

ngei an lo kal a, ka hnena an rawn sawiah chuan a chithlahtu tur a pa hi min

ngaihtuahpui thei lo maw, vawk chi tha hi an ti a. A remchang hmasaah kan lo thlir ang chu ka ti nghe nghe a ni. Chutiang ang chuan khulai khu kan kalpui a ni tih kha ka'n tarlang lawk leh a ni.

Tin, nichinah Pu Lalrinliana Sailo khan Piggery Village chungchang thu arawn sawi zawka a, a dik khawp mai a. Piggery Village hi kan theih ang tawkin kan ti ang a, BAFFACOS te pawhin kan umzui ang nikumah khan kan ti a, kan umzui ngei a. Chhungkaw pakhat Rs. 30,000/40,000 tein kan umzui vek a ni BAFFACOS in. Amaherawhchu, duh angin a improve thei tlat lo. Chuvang chuanin keini pawhin hetah hianin a hlawhtling e, kan ti thei miah lo. Engtingge kan tih ang tih tunah pawh hian kan ngaihtuah a, tun kan kalphung ringawt hi chuan kan hlawhtling tha thei dawnin kan inhre lova, chu chu a nih avangin a tihdan kawng dang foreign collaboration-te nena hmalak dan tur hi tunah hian dap mek a ni a. Chu chu kawng tha zawk tuna mi ang ngawt ni lo hian kalpui theih dan a awm beiseiin tunah hian hma kan la mek a ni tih kha kan'n tarlang duh a.

Tin, Animal Feed Plant hi kan Member zahawm tak Pu Andrew Lalherliana'n arawn tih kha a dik khawp mai a. Kan rama kan vaimim thar leh Bekang atanga khu khu chawm tur kan ni a. Chumi chawmna kawngah chuan kumtin hian progress chu kan nei tha thin khawp mai. A tira kan han thar zat leh vawiin nia khumi atanga kan herchhuah zat chu a inthlau tawh khawp mai a, chu chu a nih avangin khu khuan hmasawmna ropui tak chu a nei. Amaherawhchu, duh ang erawh chuanin a la tha taw lo tih chu nichinah amah khan arawn sawi tawh nghe nghe a. Engpawh nise, vaimim leh bekaunte hi kan progress chu a tha, nikum leh kumin chu inthlau tak a ni. Chuvang chuan Agriculture lam pawhin tan an han la mek zel a, a supply, raw materials, tha zawk hmuin kan state tana thil pawimawh takah a tira kan bun chhan ang ngei khan hlawhtlinnaah kan chuang chhuak ang tih kan beisei a, chu beiseina nen chuan kan thlir mek a. Agriculture lamte pawhin vaimim leh bekaung tam zawka tharna tur kawng hi an dap mek zel a, kumin Mautam kumah hian thil tihfuh a har khawp mai a. Vaimim chi pawh kan pechhuak nasa a, amaherawhchu, chi pek chhuah kha a hlawhtling vak lova, chuvangin duh angin a tam taw thei lova, tanrualna tha zawk nen he thil hi chu hlawhtling turin tan kan la mek zel a ni tih kha ka sawi duh a.

Tin, Pu Lalhmingthanga, Member zahawm takin Hill Cattle, tlang bawng lam hi a sa atan ngaihtuah a tha lawm ni a tih kha a dik khawp mai. Hei hi kan rilru pawhin a ngaihtuah nasa thin a, kawng kan zawng a, India Sorkarah pawh hemi kan vulh pun theihna tur hian Australia mite pawh lakluh dan in ngaihtuahpui thei lawm ni te pawh kan ti a. Amaherawhchu, a sa ei tur zawnga bawng vulhna tur buatsaih kha chu India Sorkar hian phalna min pe thei tlat lo mai a. Chu chu a nih avangin keimahnin engtin tin emaw kan dap thiam a, kan tihpun chawp thiam erawh chuan kan tih theih dan tawk tur ni rih maiin a lang.

PU LALHMINGTHANGA : Pu Speaker, Meghalaya-ah khuan an ti a, khutah pawh an phal bik hauhin a rinawm lo a, national context atang chuan. Mahse, private cattle rearer khu Sorkarin a tanpui ta mai a, Meghalaya bawngsa a that bikna chhan pawh kha kha a ni a. Khati zawngte khan a tihdan a awm lawm ni? Govt. Farm ang zawnga a sa englo tur ang zawng lo khan. Ar talh dan chikhat chauh a awm lo tih ang khan a tih theih chuan a tha dawn em a.

PU LALRINCHHANA MINISTER : Pu Speaker, a lawmawm khawp mai. Keini pawhin a tihdan tur kawng hi kan lungkham a, a kawng hi la zawng tlang zel ila, neih dan kawng dap hi a pawimawh khawpin ka hria.

Bawnghnute lampang chungchang thuan hian tan kan la hle a, tunah hian Aizawl leh Kolasib leh Lungleiah Bawnghnute siamna hi kan din a, kan Member ten an sawi ang khan Champhaiah kan bei leh mek a, tichuan, District Headquarter tinah hian bawnghnute siamna hi buatsaih a, kan intodelh theihna turin bawngpui subsidy pawh pe chho zelin kan inbuatsaih chho zel a ni tih kha ka tarlang duh a. Chutianga District tina hmalakna tha zawk a kal theihna turin District tinah Vety District Headquarter hi tunah chuan kan bun fel ta vek a, Mamit leh Lawngtlai lamin District Headquarter tunah chuan havng tawhin hma kan la chho mek a ni.

Bawng vulhtute tan Fodder Bank hmun Champhai, Thingdawl leh Serchhipah te kan buatsaih a, chutah chuan ran chaw chinga thal lai pawha ran chaw an tlan tura dahthatnate buatsaihin hma kan la mek a ni.

Tin, Saiar kan sawi tawh thin a, tunah hian Saiar hi kan vulh pung mek zel a, a tira kan vulh pun theih lohna chhan kha anmahni kan inthlah tir a, anmahni thlahah kha chuan a keu tha thei lo tlat mai a ni.. A keu percentage a chhe lutuk a, mahse, a pa chi jection-na hmangin an la chhuak a, a nuah an jection lut a, khati zawng khan bawng leh vawkte tih ang bawkin an han ti a, chuta tang erawh chuan a keu percentage kha a tha thei ta a. Tichuan, tunah chuan kan tipung chak ve tial tial a, hmasawna tha tak kan nei thei tain kan hria. A tihkeuna khi kan tihthat theih chuan zawiin tunah hianin kan tipung ve tial tial a, hmasawna tha tak kan nei thei tain kan hria a. Khimi a tihkeuna khi kan tihthat theih chuanin mimalina an lo vulh tur pawhin buatsaih ran theih a nih kan beisei a ni.

PU R. LALZIRLIANA : Pu Speaker, lawk, khawngaihin Saiar kha Turkey an tih hi a ni awmin ka hria a, a inthlah kha a pung thei khawp mai a, 100% a keu thei. Khu kan vulh a ni a, a awpna erawhchu Vety-ah awp tir a ngai a, anmahni awp tir kha chuan a pa khan a va tibuai leh a, a va bawh reng tho mai a, a tikeh thin a, chuvang chuan a hlawhtling khawp mai kha kha chu.

**PU LALRINCHHANA
MINISTER** : A nih tak chu. Ni e, department-in a practice-naah anmahni tawka inthlahnaah kha chuanin a keu percentage a chhia an ti a, a kahrai a nih erawh kha chuanin a tha lehzual niin an sawi a, anmahni inthlah kha a keu thei lo tawp phei chu a nilo reng a ni. Tin, chu lovah hemi bawng lian chi Assam leh Meghalaya-ah te kan lalut fo thin hi, hei hi tikhian a nih theih nan heta tanga kan inpek theih nan tiin Selesihah khian helaia bawng no a pa pawh, a nu pawh, a neitu ten an vulh peih loh kha kan lei khawm a, tikhan vawilekhatah 50,60 vel kan vulh a, khitiang ang khianin mi bawng vulh duhte hnena pek chhuah turin kan buatsaih chho mek zel a ni.

Tin, chu lovah feed Animal Feed Testing Laboratory hi Aizawlah kan siam tawh a, ran chaw atan eng eng hi nge tha, hnimhnah leh chi hrang hrangte hi eng eng hi nge tha ti a, khatia test-na tur kha, khawl tunah hian Aizawlah hian kan bun a, chu chu tha takin kan function mek a ni tih kha ka'n tarlang duh bawk a.

Tin, Vawk leh Bawng ilo kahraina, heng hi hmun hrang hrangah buatsaih zelin tunah hian Kolasib, Champhai, Lunglei, Serchhip leh Aizawlah bun a ni tawh a, Saiha leh Mamitah pawh reiloteah chumi chu bun fel kan beisei a ni. Tin, ran natna, khami enna ka ti mai ang chu, natna zawngchhuahna investigatory laboratory hi Aizawlah mai bakah pawh district hrang hrangah Lungleiah te, Champhai, Kolasib leh Saiha, Lawngtlaiah te pawh bun turin kan buatsaih mek a ni. Tin, Ar awpkeuna hi heng district hrang hrangah hianin dah pawh kan tum nghe nghe a, heng bakah hianin farm chi hrang hrang Varak Farm thlengin tunah hian kan buatsaih chho mek a, chutiang ang chuanin kan ti a.

Tin, hemi kan vulh kawngah hianin society thenkhat tu emaw hma la tura buatsaihpuoi kan tumnaah Pig Fed hi theihpatawpin kan buaipui a, chuvang chuan Pig Fed hian kawng tam takah hmasawna tha tak neiin hma an la chho a ni. Engpawh nise, khitiang khan chi hrang hrangin Mizoramah hianin A.H. & Vety hi ran vulhna kawngah kan intodelh theihna turin hma chak zawk kan lak theihna turin infrastructure hi theihpatawpin kan buatsaih a, tunah chuan kan tichhuak lek lek tawhin kan inhria a, kan hmabak a tam vak lovin kan hria a, chumi hnuah chuanin mipui ten nasa zawka ran an vulh theihna turin hma a lak chhoh theih dawnin kan hria a. Tichuan, ran hi a lo pung chho ta viau zelin kan hria a.

Mizoramah hianin tuna census kan neihna hnukung ber 2007-ah ran population chu hetiang hi a ni a. Bawng hi 10713 kan nei a, tin, hemi chi hi Cross breed cattle an ti bik a, indigeneous cattle hi 24244 kan nei a, Sial hi 5832 kan nei a, Lawi hi 1939 kan nei a, Beram hi 974 kan nei a, Kel hi 15710 kan nei a, tin, Sabengtung/Sakawr hi 1373 kan nei a, Vawk hi 267361 kan nei a, Ui hi 35572 kan nei a, Ar hi 1241835 kan nei a. Rabbit hi 873 kan nei a, churang chuan tun hunah chuanin kan ran population hi 16,06,460 kan neiin kan inhria a. Tichuan, hemiah hianin 2003 census leh 2007 census inkara kan punna chu 169652 in ran hi kan nei pung niin kan inhria a. Chutiang ang chuan kan ran neih hi kumtinin a pung chho mek zel a, hmasawna mipuiah pawh (Pu R. Lalziriana : Pu Speaker, khawngaih takin Sabengtung kha Sakawr hi a nilo khan kan hre si a, khawiah hian nge maw Mizoramah hian an vulh le? khawngaihin min hrilh thei em aw ?) Ngawi rawh, a hmun tak, helai a hmun chiah chu, aw, Sabengtung kan tih khanin Horses and Ponies tih a ni a, Sakawr leh Sabengtung a in pawh a ni.

PU H. ROHLUNA : Pu Speaker, khawngaih takin Zawlnghak ramah khan Se vulhna hi an titawp ta nge ni? Sial lampang hi sawirik a awm vak ta lova.

PU LALRINCHHANA MINISTER : Pu Speaker, awm chu a la awm thova, amaherawhchu, khilai Se vulhna khi rinaiin a hautak khawp mai a, duh angin khimi khi kan tipung chak theilo viau a. Engpawh niselangin, kan theih ang tawk tawk chuan

kan la enkawl chho zel e. Awle, Pu Speaker, hun a rei lutuk loh nan chung chu a tlangpui thuin kan han inhrihfiah theih dan ni mai sela, churang chuanin, khatianga tuna kan han awm tak kha, khami chhunzawm zelna atan khanin he House hianin ka demand 19-na Local Administration Department Rs. 20,53,35,000/- leh Demand No. 34 – Animal Husbandry & Veterinary Rs. 21,48,65,000/-, Demand No. 42 – Transport Department, Rs. 21,52,55,000/-, a vaiin Rs. 63,54,55,000/- hi he House hian min pass-pui turin ka rawn ngen a ni e.

SPEAKER : Awle, tikhan Minister zahawm tak Pu Lalrinchhana'n a demand-te wind-up-in pass a rawn dil a, heng demand No. 19, Local Administration Department, Rs. 20,53,35,000/- (cheng vaibelchhe 20 nuai 53 sing 3 leh sang 5), No. 34, AH & Vety Rs. 21,48,65,000/- (cheng vaibelchhe 21 nuai 48 sing 6 leh sang 5) leh No. 42, Transport Department Rs. 21,52,55,000/- (cheng vaibelchhe 21 nuai 52 sing 5 leh sang 5) a vaiin Rs. 63,54,55,000/- (cheng vaibelchhe sawmruk pathum nuai sawmngapali singnga leh sangnga) te hi pass remti apiangin remti ti rawh ule.

Awle, Pu Lalrinchhana Demand No. 19, No. 34 leh No. 42 te, avaiin Rs. 63,54,55,000/- (cheng vaibelchhe sawmruk pathum nuai sawmnga pali singnga leh sangnga) te hi House-in lungrual takin a passed a ni. (Pu Lalrinchhana : Pu Speaker, ka lawm e.)

Le, tunah chuan a demand kan sawihonate han wind-up-a pass rawn dil turin Pu H. Rammawi, Minister i lo sawm ang.

**PU H. RAMMAWI
MINISTER**

: Pu Speaker, discussion-ah khan Member 22-in ka demand chungchang an sawichhuak a, a thuphungin kan sawichhuah dan key hrim hrim hi duhthawhna, thahnemngaihna lam a nih avangin Member zahawm tak takte thurawn tha tak tak rawn sawichhuaktute chungah a hmasain lawmthu ka sawi duh a. Point by-point-a han sawi hi kan sawi vek senglo maithei a, Pu Speaker, point pawimawh zual clarify ngai tlem han clarify ila.

Saitual bialtu zahawm tak Pu R. Lalzirliana khanin Vairengte Cold Storage thalo anga ngaih theih tur khan thlai chhia awm chungchang kha a sawilang a. A hmains chanchinbuah pawh a lo lang tawh a.

Vairengtea kan Cold Storage khu qtl. 35000 dah theihna a ni a, a tha a ni. Amaherawhchu, privatise tum mek a ni a, tunah hian department-in kan thiam si lova, tin, interim/transition period-ah kan awm a, min zirtir a, keinin privatise kan tum bawh a, chutih laiah chuan, keinin 'handle' dan kan thiam bawh si lova, management fuh loh vangin thlai thenkhat kha dah hun period pel lutukin an lo dah a, churang mai chu a ni a. A Cold Storage hrim hrim kha chu a tha tih kha he House zahawm tak hi ka hrih nise.

Tin, Maite khua chungchang a sawi kha, Maite khua fel bik vang emaw a tih ka hlau a, Pathianin a humhalh bik vang a ni. Mautam kuma khati zat zat buh nei kha, kal ka tum a, ka that loh vangin ka kal thei lova, ka tlawh ve hunah min zui ve hram seta, bialtu Pa khan. (Pu R. Lalzirliana : E...Pu Speaker, zinah ka sawm duh a, tin, khulai Vairengte khu chu dan a awm a, dah tur in siam a, dah tur awm in siam a. Amaherawhchu, in zirtir lo tlat chuan a chhe tlat a ni khang ho kha, a chhe vek a ni. Churang chuan, dan a awm a, a hmangtu in awm loh vangin mipuiin an tuar ta a ni).

Ni e, Pu Speaker, hei hi tih loh tur tia department enkawltute hnena an lo ziah kha, keinin kan lo hre si lova, department lam khan kan thiam loh vang a ni. An ni khan heti zat dah lo tur an lo ti thlap thlap a, kha pawh a awm vek a ni. Churang chuan, Nodal in-charge kan dahte khan a nachang an lo hre lova, chulai karte chu a nia. Amaherawhchu, tunah hian privatise turin process mek a ni a.

Tun atanga rei vak lovah hian lease out tum a ni a, privatise han tih hian lease out zawngin nge engti zawngin nge tih chu decision lak a ni rih lo a, tun atanga rei vak lovah hian advertisement pawh chhuah theih kan inring a. Privatise a nih chuan a that kan ring.

PU LALRINLIANA SAILO : Pu Speaker, Lalit Company khuan electric mante leh an enkawl man kha nuai 20/24 chuang kha an rawn dil mek niin kan hria a, tunhmain pek tawh a ni reng em ? Tunah hian nuai 24 chuang chu pek leh tum a ni em ?

PU H. RAMMAWI MINISTER : Pu Speaker, a chiah ka hre lo a, pek tur kan nei ang a, anni pawhin pek tur min nei ve ang. Mizoram atanga kan thil tharchhuahte hi a hmaah te khan kan hman duh tho thin avangin 100% kan hman tir mai lova, a chamber tin kha hire min dil a, kan hire vek ange an ti a, Silchar amite khuan. Mahse, Mizoram kan mamawh takin kan inzirtir lai a ni bawh nen, kan phal lo a, chuti chung chuan chamber thenkhat an luah hawh a, chumi man chu min pe ang a, keinin kan pek tur pawh a awm tho a.

Pu Speaker, Mamit area Serthlum tam hi keipawhin ka mitin ka hmu a, tunhmaa favang chhoa a tlang ena eng pup thin kha tunah chuan Serthlum kung ro Japan hloin a bawh han hmuh chuan a neitu nilo mah ila rilru a na khawp mai. Tah hian thil harsa deuh mai a awm a. A hmaa kan thlen thin pawhin India Sorkar khuan hetiang Serthlum tam hi natural calamity-ah count theih a ni tlat lo an ti a, an danah a awm ta tlat lo a, khalai kha kan harsatna a ni a. Mahse, tunah pawh hian kan buatsaih leh mek a, Disaster Management lam atang hian Mautama khungluh chhoh a, tihchhoh dan kha Disaster Management lamah tichho leh ila kan ti a.

PU ANDREW LALHERLIANA : Pu Speaker, Serthlum kha a hranpaa disaster-a ti lo khan Mautam hi natural disaster-ah puang ta ila, chu chu an pawm mai lo ang maw ?

PU H. RAMMAWI MINISTER : Chutah chuan kan hnawhlut mek a ni Pu Speaker. A chhan chu nikum kumhmasaa a seh leh engnge maw kha chu an rawn verify

tawh a. an pawm tawh a, Govt. of India-in, pawisa pawh minrawn pe tawh a. Tin, nikuma leimin leh engemaw vel kha anrawn verify leh tawh a, an let leh tawh a, pawisa erawh chu hemi atan hian Mizoram Sorkarin a la dawng rih lovin ka hria. Tun Mautam pui hi chu Disaster Management lam khan Central-ah an thawn ang a, phase manner-in thawn belh ngai chu tunah pawh hian a la awm reng tho ang. Tah chuan, hnawhluh ve kha kan tum a ni. Pu Lalrinliana Sailo sawi kha khawiah hian nge ka chhinchhiah aw, Khawhai bialtu zahawm tak Pu Lalrinliana Sailo zawhna, Alu chi thalo kha a ni a, ka zawn chu. Alu chi a thalo tiin min sawisel a. Kan Alu chi sem kha duhthusam chu a ni chiah lo a, Alu chi hi chi hrang hrang a awm a, a tha chi Hill variety, Giriraj Variety an tih hi chu tereuh te te, a vuai sa hi a ni a. Research Centre khan kan hmuh sak ang che u, min ti a. An han tih tak tak chuan kan duh ang kha min hmuh sak thei awzawng lova. Kuminah hian Mautam kum a ni a, pawisa a neih sa kan nei si lova, kumthar atanga rulh atan tal aw kan ti a. Kan han tichhin a, chutah chuan duh ang kha a awm tawh lova, chutiang chuan Technological Mission atang pawh khanin duh ang hi a awm tawh lo min ti a. Mahse, treat theih a ni a, sawngbawl theih a ni a, sawngbawl, a zaina pawh awm ngei, to ngei tura ngaih, kha kha kan ti a. Tam tak chu kan thawn tawh a, mahse, khawhai bialtu ho hian min sawisel ta tlat mai a, min sawisel suh u, ka tih pawh khan kan sawisel lovang an ti thei bik si lova, tun thlenga kan buaina deuh chu a ni a. Farmer-in an tuara a pawh khawp mai. Hei hi keimah ngei pawhin ka en a, a zaina a awm a, damdawia enkawl a ni a. To ngei ngei tura ngaih a ni a, kan thawna pawh an lawm a.

PU LALRINLIANA SAILO : Pu Speaker, kha kha kan Minister ngei pawhin a admit a, a lawmawm a. Ama bialah ngei pawh khan a tiak theilo kha Silpouline-in an khuh ruih a ni a. Tin, treat mah nise, a fuhlo a nih ka ring a. Khing Vaphaite, Serchhip Division amite, Khawhai tlangdung, sawlai ami ho saw a to theilo hlawm a ni. Chumi hnuah Organic Manure kha cheng tam tak sengin an lei teuh mai a, khami a lo to huna enkawl na tur kha. Chung pawh chu a chuang mai mai a ni a. (Pu H. Rammawi, Minister : Pu Speaker, kha kha chu a inzawm lo, Alu-ah organic manure, eng leitha mah kan hmang lova, tin, ka bial chungchang kha chu hman kuma mi tawh a ni a.)

PU ZODINTLUANGA : Pu Speaker, point khat chiah. Khawhai bialtuin a sawisel vanga Farmer-in an tawrhna chhan lai kha min hrihfhiah thei em le? Engatinge? (Pu H. Rammawi, Minister : Khatia in tih chuan kan umzui ang che u, an ti kher a, min umzui lo teh u, kan ti a, kha kha.) A tha a nih chuan umzui pawh ni sela, engtinge in hlauh? a thalo tihna em ni? khalai kha.

**PU H. RAMMAWI
MINISTER**

: A tha reng a, mahse, thunawi hla nawi a tam kan ti a, kan ngawih phah mai a ni. (Pu Lalrinliana Sailo : Pu Speaker, a nilo, tunah khuan company pengah khuan a la awm teuh kan hria.) I duh chuan i bialah

kan pe ang a. (Pu Lalrinliana Sailo : Ngawi rawh ka bial a ni emaw, a chhia kha chu kan dawng thei bik lo, an to dawn chuang si lova) (Pu Zodintluanga : Pu Speaker, helai hi fiamthuna chi niin ka hrelo, kan ram lo neitute eizawna tur a ni a, kha kha diklo ka ti.) (Speaker : Awle, in point a chiangin ka hria, in englo zel chuan thil sawifiah dan hi a ni hi a kual deuh thin a, nakinah rei in ti leh ang e.)

Pu Speaker, a dawt lelah chuan, Champhai MNF Block hotuten pawisaw nuai 17 an la tih kha, Office atang chuan Champhaiah hna kan thawk a, leilet zawlah irrigation pawhin Land Development hna kan thawk nasa a, vaibelchhe tel man hna kan thawk a, pawisa latu chu an awm ang. MNF tan pawisa lakna tur provision a awm lo, tih kha ka sawi duh a, pawisa chu an la teuh teuh ang.

Tin, a dang kha chu ka rawn sawi hunah khung turah ngai ta ila. Pu Zodintluanga sawi leh Pu Andrew-a sawi leh Pu Hminga sawi 59 crore man Farmer Information System atan tih lai a kha Work Order a awm tih kha a dik a ni. Thil hi hna thawh tam chuan tihpalh, tihsual theih a ni. DPR siam tura tihnaah khan, DPR siam tura order pekna turah khan kha order kha khatiang khan kan lo tipalh a, chu chu keipawn ka hre lova. Chanchinbua a chhuah a chhuah pawh ka hre lova, kan han enchiang a, hei hi a nih hi kan ti ta a. A kalphungah reng reng DPR siam tura tihna a ni. Mahse, Work Order kha khatiang zawng khan a kal ta a, chuangin kan cancel nghal a.

PU R. LALZIRLIANA

: Pu Speaker, Mirister hriatloh hian engtingge tiangte kha a awm theih reng reng. A mak a ni, Agriculture Director tihvel ang deuh khan i cancel leh ngawt a, i ti leh thei lo ang e.

PU ANDREW LALHERLIANA :

Hei hi tihsual palh a ni lova, Information Technology-ah hian Firm a tam tawh a, an thik khawp mai. Chutah chuan, Office-a thil inziakte thlengin phawrh a awm tawh a, in cancel leh a nih chuan tlai hma tih a ni mai a, hre renga ti chu a ni chiang a ni.

PU LALRINLIANA SAILO : Hrelo ta ila chu hei hi a kaltlang hrim hrim ang. Tah hian a chiang em mai. A terms & Condition zawng zawng fiah takin a sawi a ni.

SPEAKER : Kha kha chu argument a ni tawh a, Minister khan ka hrelo a ti a, a hreloah i ngai phawt ang. Hriat lohte pawh thil awm thei a ni a.

**PU H. RAMMAWI
MINISTER** : DPR erawh kha chu tunah hian buaipui mek a ni. DPR a buatsaiha pawisa hi awm a ni lo reng reng. Pawisa dilna tura DPR buatsaihna tura hetiang thil kal kha a ni a, a pawl khawp mai, thil kalsual palh awm tih kha chu ka commit, mahse, kan target kha chu DPR siam tura tihna turah kan kal a ni tih erawh kha chu House information atan ka sawi duh a. Thil kalsual thei engmah a awm love, kan cancel nghal a. A nihna tur dik tak DPR process-in a kal a, chu pawh chu a tlang dawn nge dawn lo, la ngaihtua'i tur a ni. Ka hriatna pawh pawlam atangin a ni. Kan han en khan chiang deuhin min hrih lehngal a, chuta tanga kan hriat chhawn chu a ni a. Chuvang chuan kan han en khan thil kalsual chu a awm a ni e tih kha Pu Speaker, kan hretlang khawpin ka hria. Chuvang chuan House information atan kha kha thil kalsual palh a ni e tih kha ka'n sawi duh a ni e.

Pu Speaker, a dawt lehah chuan, Law Department chungchang ka'n sawikai daih ang a. Separation of Judiciary chungchang hi kan duhthawh a, Member tam takin, a lawmawm ka ti a. Separation of Judiciary hi thil thar a nih avangin a lo awlai lo khawp mai a, tunah hian India hmarchhakah chuan Guwahati High Court pawhin a process-ah na na chuan nangni hi in chak ber min ti a. Supreme Court pawhin hei hi an hria an ti a. Civil Court chu kan zo tawh a, High Court-in min pawmpui tawh a, Criminal Court pawh hi keini chuan kan duang tawh a, High Court-ah tunah hian pending-in a la awm a. Pu Speaker, House- a sawi chi a nih leh nih loh ka hre lova, sawi a tha maiin ka hria.

SPEAKER : Kha kha chu nangma ngaihndan ni sela, awm leh awmlo chin a kha chu awm mai rawh se.

**PU H. RAMMAWI
MINISTER**

: Pu Speaker, keimahni chhungah chuan notification engkim kan ti tawh a, Judicial District pawh kan siam tawh a, District tam deuh han ti turin kan capacity-in a tlin lo a, Manpower-in a tlin rih lo a, MJS Office

kan nei tlem a, MJS Officer kan neih tlem avangin kan phak tawkin aw tiin Lunglei leh Aizawlah kan ti a. Aizawl hian undivided Aizawl District a cover ang a, Lunglei hian District Council area an rawn OK theih hunah a cover ang a tih a ni. Aizawl leh Lungleiah Judicial District pahnih keini chuan kan din fel diam tawh a, Pu Speaker, hemi chungchangah hian thil a awlai lohna chu, he House zahawm taka ka'n sawi duh chu, MJS Rules atang khan a har tlat a ni. A Rules-ah khan keini recruitment kan ti ang nge, MPSC in ti rawh se kan ti a, lehlamah High Court tih turin draft a kal a, High Court recruit turin, chumi chhung pawh chu a rei ta a. Chumi hnuah chuan a Rules-ah chuan Mizo language knowledge nei tih hi kan telh ve tur a ni, kan ti a, an guideline-ah an draft-ah a awm si lova. Mizo language knowledge nei MJS Rules-ah kan dah loh chuan a 'safe' lovin kan hria a, kan inchai rei a ni. A hnuah chuan kan duh ang thlapin MPSC ina an recruit turin, Mizo language knowledge nei tihtel bawkin kan tlang ta a, tiang chuan MJS Officer pasarih lai chu lak an ni tawh a, tunah hian 13 lak leh theihna kan Sorkarin min phalsak a, kan han ti dawn a, Supreme Court-in Schedule India ram pumpui tan inang vekin a siam a, February thla atanga notification tan a, December thla tawpa appointment issue thei turin India ram pumpui inang vekin schedule a siam a, chutah chuan keini kan hmanhmawh si a, District pali hi kan cover loh a awm si a, Mamit, Serchhip, Saiha leh Lawngtlai te tunah hian MJS kan nei lova, heti hi chuan kan kal theilo ang kan ti a, Supreme Court-ah kan dil a, affidavit-in, min phalsak ta tunah hian. Chu chu Supreme Court phalsak hnu pawh nise, High Court-in min pawmpui ve leh kha a ngai ta a, chu chu High Court nen kan indawr leh mek a ni tih kha House information atan ka sawi duh a.

Tin, Mizorama kan thil thar tihchhuah pakhat 'The Mizoram Compulsory Registration of Marriage Rule, 2007' kha tun 1st April atanga hman theih tur hian ti ila, tiin kan inbuatsaih a, notification engkim kan ti ve tawh a, tunah hian Register of Marriage tur hi reiloteah ruat fel a ni ang a, Register of Marriage ruat hi a buaithlak khawp a, rinaiin, Date of Birth-a an hman ho hi hman a rem ber kan tih laiin neuh neuh a awm a, a tha ber kan ngaihtuah mek a, tunah hian. The Mizoram Compulsory Registration of Marriage Rules, 2007 hi kumthar Financial Year tharah hi chuan Mizoramah kan hmanng tan thei ang a, hei hian nakin hnu, thubuai tam tak awm tur hi a veng thei tawh dawn a ni tih kha ka'n sawi duh a.

Tin, kan Civil Court zawng zawng hi NIC nen tangkawpin Computerised vek kan tum a, Aizawl District hi chu kan zo tep tawh a, kan zawh veleh hian District dang pawh hi chhunzawm leh kan tum a ni tih he House hi ka hrilh duh a. Tin, tunah hian Court Rule pawh peihfel thawkhat a ni tawh a, Family Court pawh hi New Capital Complex, Khatlaah ruahman fel a ni tawh a, tun atanga rei vak lovah chuan awmze neia kan kal theih kan ring a.

Pu Speaker, kum 20 chuang Mizoram Sorkarin a buaipui tawh, India Sorkar leh MNF inremna thuthlungah pawh lang, kan hnam himna atana constitution provision-ah pawh kan neih, mahse, a taka kan neih si loh, Mizo Customary Law, kum 20 chuang ngawt mai kan buaipui a, kha, tunah chuan Mizoramah peihfelin a awm tawh a, Mizoram hmumtinah NGO hrang hrangte hnenah hei hi a copy siamin pekchhuah a ni a, hei hi nakinah chuan kan hnam tan a pawimawh viau dawn a ni tih kha ka'n sawi duh a. Kum 20 chuang ngawt a ni a, Member hrang hrang an inthlak a, a then pheih chuan kum 15/16 deuhthaw an buaipui a, a buaipui tute zawng zawng chungah lawmthu House hriatin ka'n sawi duh a.

Tin, Pu Speaker, Parliamentary Affairs-ah hian thil pakhat sawilan tulin ka hria a. Thangharte Parliamentary Practice Awareness neih theihna turin Mizoramah Youth Parliament Competition kan neih vawikhatna, nikum April leh May thla khan Higher & Secondary School 8 te telna buatsaih a ni a, hei hi a hlawhtlingin zawngchhang tlakin kan hria. Mamawii Govt. Higher Secondary School, Govt. Republic, Govt. Mizo Higher Secondary School, Synod HSS, Zemabawk HSS leh Chaltlang HSS, J.L. Higher and Secondary School, KM Higher and Secondary School. Heng School 8 te hi an tel a. Pu Speaker, ka tel ve a, a tih chi dawn khawpin ka hria. Tihdan practical-in an ti a, a tha dawn khawpin ka hria. Kuminah pawh hian a theih hram chuan tih leh kan tum a, hemi Parliamentary Practice Awareness hi thalaite zingah ti tura khulam atanga ruahmanna an rawn siam hi a lo that zia a takin Pu Speaker, kan kalpui a, kan hmang a, lawmawm kan ti tak tak a ni tih kha House information atan ka sawi duh a.

Tin, Irrigation Department chungchang ka han sawikai daih ang a. Department thar a ni a, mahse, Agriculture Department demand hnuaiyah a awm a. Agriculture Department atangin lakhran theih a ni tak tak lova. Irrigation Department kalphung hi tlemin kan her rem a, tunlai farmer-te mamawh dan nitin kan her rem ta a. Land development leh approach road, a tuikawng ngau ngau ni lovin, i tikawp ang kan ti a. A rem lai laiah approach road nen kan tikawp ta a. Tunah hian project hi 104 kalpui a ni tawh a. Tah chuan beneficiaries hi 1689 an awm mek a, hemi a land development hi hecter 1304 vel kan siamsak tawh a, hmun thenkhat kalkawng awmlo Link Road kan siam chawp sak hi KM 60 ngawt a ni tawh a. Kumin nen pheih chuan 60 aiin a tam dawn a, Irrigation hian hma kan laa, tui nen lo chuan thlai hi enkawl theih a ni lova. Thlai a awm phawt chuan kan rilruah pheih chuan Land Development, Champhai leh Serchhip engatinge in uar bik tih a ni mai thei a. Hemi irrigation fund bakah MIP atangin kan tuam belh ta a. Tunhmaa bawng leh ran hmanga lei an leh thin kha khawl hmanga leh tir vek a, buhseng zawh velleha winter crop-a chhunzawm a, tunhmaa buh seng zawha ram vah mai mai kha awl miah lova siam tumna rilruin kan kal a. Farmer ho vawihnih/thum kan hrilh chuan Champhai pawhin an ran an phase-out zung zung mai. In ran tiriral rawh u, tih a ngai reng reng lo. Tiang khan awltein farmer hi guide theih a ni a. Chuvang chuan, tui nena kan tan phawt chuan favangah hian winter crop-in kan chhunzawm leh ang a, a buh aia hlawk zawk tharchhuah dan hi kawng a awm bawk chuan tiin theitawpin kan tang a.

Tin, chu chauh a ni lova, tun atang chuan Horticulture Department lamah pawh saptheite pawh hi tui a hmuh chuan kumtluanin sapthei a rah a ni, ti an awm a. Hnahlan lamah mipakhat lokal chuan, tui kan pe a, a rah reng, ti an awm a. Chu chu kan scientist mithiam ten min hrilh loh an ngaihtuah loh ka zawh pawha min chhan theih loh, Mizoramah chuan kan farmer ten a taka keimah ngei min hrilh a ni a. A area ami ten kan hrechiang ang a, khatiang kha thil awm thei a nih avangin kan thlai reng reng hi irrigation-ah hian tan lak vak a, Sapthei, Grape, engthlai a nih pawhin tui nena tanga, Serthlumte pawh hi kan enkawl zui a ngai a ni tih kha Pu Speaker, ka'n sawi duh a. Tui nena kan tan chuan kan ram zimte hi awmzia neia kan kalpui theih kan ring. Nichina Israel kal ta te thusawi kan ngaihthlak ang khan tui nen hi chuan eng thlai pawh hi a enkawl theih a ni tih hi ka sawi duh a.

Tin, Pu Speaker, Horticulture Department hi Department tharlamte a ni a, a bik takin Pangparah chuan hun reilote chungin Anthurium-ah chuan kan lang nalh a ni. North East leh India-ah pawh hian kan lang nalh a ni. Kan tharchhuah chu a tamlo, hma kan lakna a rei loh ngaihtuahin Delhi khuan min hre tlat a ni, hei hi chu thil chiang a ni. Mirethei zawkte tan tihtheih a ni ve lova, a khawsa thei zawkte tan tih a ni si a, tih kha chu, a dik chiah. A tir buatsaihna hi a hautak em a, a technology mission-ah pawh hian a mirethei lam pawh a kawh chuang lo. Mahse, tunah hian Rural Business Hub Programme a awm a, he programme-ah kan luhtir theih erawh chuan, entirnan, Japan ramah chuan one village one crore tite in an kal ta a, hetiang deuh hian Rural Business Hub-ah kan inrinluh a, support kan pek theih chuan hetah hi chuan chance a awm a, tih kha ka sawi duh a. Mahse, Aizawlahte a tha tih vangin Tawngkawlawngah te ching ve ngawt ta ila, khawiahnge kan hralh ang ? Kha kha ngaihtuah tel a ngai a, a transportation-te, a location-te kan en ngun a ngai a. Par singnga atanga singruk vel hi chu a vanglaiin kan thawnchhuak tawh tlat mai a, kumin chhung hi chuan 100,000 atanga 1,20,000 vel hi chu thawnchhuah theih kan inbeisei a ni tih kha House zahawm tak hi ka'n hrilh duh a. Tin, International Flower Expo-ah pawh kan tel ve thin a, national level-ah pawh kum 2006-ah phe chuan best display-ah kan State kha min thlang nghe nghe a ni. A tha a ni ang kan sawi duh em mai, tih tak takah chuan tinkhat hmun nei awm ta sela, Anthurium-ah hian eizawna tling a ni. Tinkhat hmunah hi chuan eizawna tling tak a ni, kumkhata neih tawh chuan a chhonzawm chu a har lo. Helaia kan sawi kan sawi hian kan sawi dan kiah hian a confuse zawngin a kal ang tih ka hlau a, tinkhat hmun miin nei chiah ta sela, a thlatin lakluh chu a tlem lo ang, Officer tenau aiin a tam ang tih kha ka sawi duh a. Awareness a awm hnuah chuan nakinah chuan hetiang atan chuan Bank a awm ang, tun hi ti tir kan ni a, a that zia kan hriat hunah chuan tih kha ka'n sawi duh a.

Tin, Grape chungchangah, Mizoramah Grape leh Hnahlan hian inzawm tlat awmin ka hria. Engvang nge kan tih chuan Hnahlan bialtu pa kha a lu lo lian lo sela. Hnahlan hi a khaw hlanga ching an nih avangin an hming a lang mai a ni. Nichina ka sawi, Rural Business Hob hmanga Japan ramah one crop-one village tia an kal ang deuh khan, Hnahlan hi an hming a lo lang. Hei hi a lo tha riau mai a. Mizoram hmundangah pawh hetiang hi kan intihhmuh a thain ka ring a. A zau lutuk chuang lo, a hlawk tih an hria a, an taima a, a tir

atengin entawn tlak tak a ni tih Hnahlan hming hmerh ka'n sawi duhna chhan hi Grape hi Mizoram tan a tha thei a ni tih tifiaktu te an ni a. Hnahlan area tak ai chuan Champhai area-ah hian a tam phe chu a tam zawk maithei a. Mahse, a khaw hlangah chuan Hnahlan hi Mizoramah Grape promote-tu khuaa ngaih an nilo thei lo a ni. Chutah chuan, Pu Speaker, tuna kan up dan hi chuan a thalo a ni, Sintex-a up hi a tha tlat lo, tih tak takah chuan Farmer Incentive siam nan tiin an ngawi tlang a, YMA te pawh, a tute pawh an ngawi a. Sintex-a up hi a thalo tih kan hre reng. A tha zawnga tihdan kan inkawhmuh hlei thei si lo. Amaherawhchu, mithiamte kan ruai a, mithiamte hmangin tunah hian Hnahlanah hian Grape sawrna a hranga dah a, Champhai a hranga dah a, kuminah a rah tur hi dawn hman hram turin stainless steel tanker-a tih a, process hman hram turin tunah hian hma kan lakpui a. Sorkar ta ni tur a nilo, Hnahlan Farming Society tan leh Champhai Grape Farming Society hma kan lakpui a ni. Tunah hian Champhai chu a hmun pawh an lai zo tawh a, Hnahlan pawh an lai zo tawhin ka ring a. Tichuan a filter-na lai kha a har lai ber tur chu a ni a. Thil dangah chuan Rural Bank-in loan an pe ang a, an loan pek kha lehlahmah Govt. of India-in Food Processing Ministry-in an rawn subsidise ang a, a balance a awm chuan chumi rulhna tur chu Sorkarin kha Society pahnih kha kan pui dawn a ni. Chutiang chuan a tir atanga privatise sain Sorkarin hma kan lakpui hlawm a. A hlawnaw zawng zawng nakinah anmahniin an nei vek mai ang. Tin, khami an neih avanga subsidy hmuh theih awm zawng zawng kha kan dilpui leh ang a, chutiang chuan privatise sain tunah hian hma kan la a ni tih kha Member zahawm tak takte hriatah ka'n sawi duh a.

PU H. ROHLUNA : Pu Speaker, khawngaihin khalai te kha pawimawh ka ti a. A chhan chu a grower-te involve a nih tak avang hian nichina NHB chungchang ka sawi ang deuh khan nikumah pawh kan sawi tawh a. Tunah pawh hian a growers-ah pawh hian doubt a awm deuh hlek a ni. A chhan chu department lamah hian harsatna an lo tawh avang hian tunah hian a grower-te contribute tur kha Self Help Group anga 150,000 group khatin an tum ve tur a awm ta a, chu chu Rural Bank atengin han la ta se, nakinah engngemaw a winery kha duh angin lo hlawhtling lo ta se tih kha rinhlelna a awm ve deuh hlek a. Helai te mai hi Sorkar hian nakinah engngemaw harsatna an lo tawh pawhin kha kha chu kan khaichhuak ang tih hi min tiam thei hram sela. A chhan chu, anmahni hi rinhlelnain an khat ve deuh hlek tawh a, helai hi harsatna an tawh deuh hlek a ni tih kha ka'n hriatir duh deuh a ni.

PU H. LIANSILOVA : Pu Speaker, a dik, kha kha, khami rual khan khatiang thilah khan a department khanin Bank Guaranty tih ang hi lo tihsak theih dan awm hlauh sela a va tha awm ve. A enzui theih angem ? Pakhatna. Pahnihnaah chuan, khilaia kan Grape khi a thur

chi, wine lama tih chi niawmin kan hria a, a thlum tha chi te hian a variety-te hi a thlak theih em? Chutiang chu ni selang chuan, hei, Aizawlah pawh Kg. 1 man hi a sang fu mai a, a wine lama buai buaipui lo khanin kan thlahu zo zung zung ve thei lovang maw tih kha ka'n zawt duh a ni.

**PU H. RAMMAWI
MINISTER** : Pu Speaker, ni e, tuna khilala variety khi table variety a ni lova, wine variety a ni a. Ei chi a nilo ti mai ila, wine variety a ni a. Tin, variety tha tak a ni lova, chuang chuan, a thlak dan turah hian kan dap mek a, Champagne Company hming thang an hotupa pakhat, India a an hotupa hi kan Chief Minister zahawm tak hian a chahchho a, a hmunah a han tir a. a han en vek a, "khitiang a nih chuan Mizoramah hian hlauthawng suh u, eng variety pawh Grape chi khat a that chuan a tha vek ang, eng variety pawh in ching vek thei, hlauthawng reng reng suh u" a ti a. Tunah hian kan try mek a, variety dang zawi zawia kan thlak a ngai dawn a ni. Tin, quarantor-ah tihlala kha, Farmer-te safety-ah chuan Govt. Quarantor-ah kan tang mai ang kan ti.

PU LALHMINGTHANGA : En mai dawn chuan Horticulture leh Agriculture Department atanga huan neitute leh lo neitute tana Silpouline provision siam ve kha kalsan hmain han sawifiah sela, hei hi chu Zoram chuan a chhawr ngawt ang.

**PU H. RAMMAWI
MINISTER** : Pu Speaker, Silpouline niloin Agriculture Firm keini chuan kan nei a.

PU SAIKAPTHIANGA : Pu Speaker, Self Help Group-in an lo contribution ve tur kha initial state-ah hian Sorkar hian a tum sak thei mai lawm ni? Mipui lamin an harsat si chuan. Tin, kha pawisa kha bo tur a ni chuang lova, khami a group hovin an lak tur ang chiah khan Sorkar khan nakinah la ve leh mai sela, mipui puihna nasa tak a va ni mai awm ve?

**PU H. RAMMAWI
MINISTER** : Pu Speaker, ni e, Silpouline chungchang kha chu kan lo enzui ang a. Nichina Pu Saikapthianga rawn sawi kha ni e, uluk takin

kan ngaihtuah a, thil ven ve ngai pakhat hi a awm a. Kan Farmer-te hi spoon feeding ringawta awm tura inggaihna hi an nei palh ang tih hi kan hlau. Anmahniah awareness a thlawna thilpek aain anmahni thawhchhuah hi a hlu zawk ang hian anmahniah burden engemaw kan pek loh chuan incentive a bo palh ang tih kan hlau a. Tunah Sorkarin a puih vang ni hauh lovin, Hnahlan khuate chu anmahni tih tihin an puitlin hnuah Sorkarin a pui chauh a ni. Chutih laiah chuan kan puih luattuk chuan incentive awmsa kha kan tichhe palh ang tih kha a hlauhawm ve a. Chuvang chuan, Pu Saikapthianga sawilai kha a arrangement-a kha kan pui vek a ni, keimahni Sorkarin. Amaherawhchu, anmahni mawh vek tur si khan, Sorkar chu in hnungah a ding reng ang tih kha, anmahni incentive awmsa, mi entawn tlaka awm tawh kha a chhiat kan hlau baw si a, khami dawm chunga hma la kan ni tih kha Pu Speaker, ka'n sawi duh a.

Tin, Thingfanghmaah pawh hma kan la a, variety kha a kal a kal a, Pu Zoramthanga Thingfanghma tih khan a kal leh ta tlat mai a, engtiang anga kal nge ?; Opposition sawichhuah a nih ka ring a. Hawaiian Solo variety kan tih kha Bazar zawng zawngah Pu Zoramthanga Thingfanghma tih kha a ni ta vek mai a. A lehlamah chuan Pu Speaker, a variety kha a lo tha, a taste a tha, kei pheih chuan ka duh a, ka ei pha tawh lo reng reng a. A taste kha a lo tha em a, a lo danglam em a, han tihbelh kan duh viau nain a chi lakluh Jan hi a har khawp a, House-a sawi chi pawh a nilo, nakinah America-a zir turte nen indawrah i ti mai ang. Kan tihtam hi chu a tha khawpin ka hria. A man pawh local-ah khan a lo tha ta em a. Chuvang chuan a tha lamah i kal ang kan titlang a ni. Hun a danglam zel a, Aizawl khawpuih pawh hian Demand a sang zel a, min eizawna tlingah an lo hmang a, thil lawmawm tak a ni.

Tin, Spanish Balhla chi thar an tih, international-a variety tha an tih pawh hi kan han tichhuak ve a, Mizoramah kan han chawlut ve a, kan han tichhova, a that hmel khawp mai a. Khumtung te pawh hi a tha tho mai a, Balhla hi Mizoramah a tam a, a enkawl a awlsam a, tin, rinaiin earning a tha a. Amaherawhchu, Chamdura kan va kalnaah kha chuan eitu an awm lova, tikhan a awm mai mai a. Thil kan chin dawnin a location hi chu enngun a ngai khawp a ni tih kha ka sawi duh a.

Pu Speaker, Serthlum chungchangah hian sawi tur tam tak a awm a. Serthlum hi khawthlang tlandunga a tamnaah khan mithiamte kan zawh chuan, a tamna hmun ngaiyah hi chuan ching leh rih suh u, an ti tlat a ni. A hmun ngaiyah chuan ching leh mai rih suh u, tih kha mithiamte thu minrawn a ni tlat a ni. A leilungah khan engemaw awmah an la ngai tlat mai a, a thi a thi zo tawh a, kan veng thei lova, a lehlamah chuan, Mautam kaihhnawih pawh a ni mai thei a. A tihngaihna a awm lova, a chhawmdawlina dang han tihin a thi tawh kha kan va tinung thei baw silo, rilru hi hrehawm tak a ni a. A lehlamah mi tam tak eizawna hlawk tak kha a lo nih tawh hnuah tiang dinhmunah hian kan ding a. Chuvang chuan tunah chuan khai aw, tunlai thiamna hma igin a chi dangin i kal ang tiin, Israel company-te nen tunah hian hma lain pilot project-in i kal phawt ang kan ti a. Mizoram hmun hrang hrang, tha in tihna lai, nangmahniin tlawh ula, chutah

chuan kuminah chuan compact-in hmunkhatah bul kan tan ang, bul 12000 vel hi chu kan ti a.

Tah chuan, an vakkual ta vak a, Thingdawl lamte Kawnpui lamte pawh an en a, helam khawchhak lam pawh an en a, an enkual an enkual a, a tawpah chuan Rulpuihlim hi tha kan ti e, an ti a. Rulpuihlim ram chhungah hian Lengpui atanga hla lo teah hian hmun an thlang a, chutah chuan kan vah tir a, an kal tawh a, chutah chuan khuta Israel hovin an chin ang kan ching dawn a ni. Heng hi chu tam tawh lo tura ngaih a ni a. Pu Speaker, hetah hian lawmthu sawi tur ka nei a. Kan Subject Committee-V ten engkimah thurawn min pe a, a variety thlan turah pawh kan variety hi i thlang ang an ti a. Amaherawhchu, kan local variety lian zawm tir tur chuan Mizoram Serthlum a thi vek si a, a thi lo pawh a hrisel tawh si lova. Chuvang chuan a alternative a tha bera ngaihah kan kal a, kan local variety kha chu tlemte chauh kha chhin nan an ti a, tam tak an ti ngam lova. Bul 12000 vel chu compact-ah kan tan a, a dang an ti leh ang a, compact-ah kan kal leh ang a, compact area zela kal hi kan zir tawh a ngai a, tui nena tan a ngaih avangin. Chutah keini irrigation lam atangin tui kan la ve ang a.

Serthlumah hi chuan Mizoram hian Chapter thar, bung thar kan keu a ngai a. Chu chu kan hnam tan, thangtharte tan a ni tih ka sawi duh a.

Tin, Pu Speaker, Aieng duh lo chungin min chin tir a tih kha, Kawnpui bialtu niin ka hria. A ti mai a Pu Speaker, Aieng kha a ching tur pawhin kan select miah hlawm lova. An dilna a lo kal a, nikum khan department selection kan siam lo reng reng. An dil a, kan pe a, a thenah phei chuan an lo claim leh duh lawk si lova, monitoring team an vak kual a, minrawn pe rawh u, an ti a. A team-in i thawn ang min ti a, an lo claim leh si lova. Khatiangte kha a awm a. Amaherawhchu, Aieng hi ka sawi duhna chhan chu Sawthing ang a ni lova, thlai tough deuh mai a ni a, Medicinal value ngah deuh mai a lo ni a. A hlutna London chanchinbu pakhat corner atan pawh a tha an tihna Xerox kha ka dahna ka hre ta lova, ka sem ang ka ti a. Khatiangte khan Medicinal value hi a lo ngah a. mahse, ka hmuhchhuah hunah Pu Zira phei chu ka pe ngat ang ka ti a.

PU R. LALZIRLIANA : Pu Speaker, khawngaih takin Aieng sawi chuan nikum tun ang hunah chiah hian tunah a wind-up hun angah hian nakum tun ang hun hi Aieng tak ber hun tur a ni a. Kan tam kum a ni dawn bawk a tih khan kan Minister zahawm tak hian, a tak ber hun turah hian a chingtute chuan an cho tain Sorkar hian a leisak ta em ? Engzatnge a chingtute hian hralh tur an neih tak ?

- PU H. RAMMAWI MINISTER** : Pu Speaker, chu tak chu ka'n sawi dawn a ni. A kumkhatnaah Aieng hi a tak ber ngai lova, a kumhnihnaah a tak zawk a, a argument
- PU LALRINLIANA SAILO** : Pu Speaker, khawngaih takin tuna a sawi ang chiah khan nikumah ka sawi a ni. Kan lo hriat ve danah chuan kumkhatnaah hian a tak ngailo kan ti a, a mah Minister ngei khan keimah hi Khawhai bialtu zahawm tak Pu Rina hian a ching ngailo a niang, a kumkhatnaah a tak a ni a ti chiah a ni. Chuvangin engaingee tunah khatianga a sawi leh tak mai, a ni chu ni lo se kan tibuai nasa dawn e aw.
- PU H. RAMMAWI MINISTER** : Pu Speaker, a sawi dik a, ka sawi dik ve bawk, kan dik ve ve. Chakma ramah chuan kum khata harvest chi a ni a, chuvang chuan a sawi kha a dik a, ka sawi pawh a dik, kan dik ve ve.
- PU LALCHHANDAMA RALTE** : Ka biala experience-ah chuanin qtls. 6½ nikuma chingte khan qtls. 100 kan thar thei ang an ti a, a tak khawp mai, ka bial Sesawng velah khian, a tha dawn khawp mai. Nakum atan pheii chuan a aiin a tak lehzuai mai thei a ni.
- PU LALRINLIANA SAILO** : A nih kha kha chhinchhiah leh ang aw. Aieng hi kumkhatnaah a tak ngai lo reng reng. A nih nih ni mai teh se. Kan insiamtha zo dawn chuang lo.
- PU H. RAMMAWI MINISTER** : Pu Speaker, tunah hian, vawiinah pawh khan Officer, kan District Officer-te kan Committee a, Mizoramah hian kan duh angin a la tam tawh rih lo a ni. Chu chu i chin belh tir leh ang, Farmer-ah hian circulate tir leh ang. Thingtlang hmun hrang hrangah hmuu za leh tihah a leina hmun

kan siam ang a, chuan, kan chin belh tir leh ang kan ti. Engvang nge kan tih chuan, SPV kan siam a, company lian Diamond Shipping leh Sunrise Spice leh National Research Development Corporation, Science & Technology, Govt. of India a mi leh Mizoram Sorkar tangrualin SPV kan form a, chu SPV registration chu Mizo Organic Limited tih a ni a, chu chuan Sairangah Central Processing-ah hma a la ang a.

PU SAIKAPTHIANGA : Pu Speaker, Minister zahawm takin min Chhan atan, a sawi nghal a tan, nikum khan Aieng hi qtls. 104,375 a lei a ni a, tichuan, tunah hian a la hlawk lo deuh a nih pawhin quintal khatah hian quintal 5 chu a chhuak ngei ngei tur a ni. Chuti a nih si chuan, tunah hian State dang atanga lei miah lovin, quintal nuai nga Mizoram hian kan thar dawn a ni. Chu chu a chingtute hian hralh an duh em em si a, State dang ami lei lovin nikuma kan chin Sorkarin a chin tir hi lei tur a ni dawn lawm ni tih kha ka'n lo chhut ve dan a nih chu.

**PU H. RAMMAWI
MINISTER** : Pawn lam ami lei tumna a awm lova, Mizoram chung ami hi chin belh tir tum a ni a. Mizoram pawn ami pakhatmah kan lei lut tawh lovang a, Mizoram chung ami hi a hmunah va lei chilhin a vai vai chuan a ching tawhte reng reng kha pek leh tawh loh tur, a ching duhte, a la chinglo, ching duhte chauh pek tur tih angin restriction kan siam ve ang kan ti. A chinglote khan ching ve sela, a ching tawhte kha chuan anmahniin a chi an neih tawh avangin pek ngailo turah kan ngai. Anmahni an intodelh tur a ni tih kha kan kalpui dan a ni.

Pu Speaker, kan sawi chhonzawm lawk ang a. Nichina SPV kan tih bakah khan District level-ah Grower Society, Grower Company, district tinah, chu chu Grower an ni a, Grower Society Producer Company tiin a hming kan vuah a, Registration kan ti mek a. Company Affairs Ministry khuan tihdan dang an neih avangin, Lalthanliana tihte, hming ringawtte an lo pawm tlat lo a, sure name leh given name a awm loh chuan an ti tlat a. Kha khan hasatna min siam a, tunah hian keimahni vangin tihdan phung pawh an thlak mek a, kan tihfel theih mai kan ring a. Producer Company, district level-ah grower ho an nih chu, kha kha an siam ang a, khami atanah khan a green form ni tawh lovin. tuna Silchar-a Sawhthing, Bagha-a buai buai ni tawh lovin, a dry form a kan neih a, a dry form-a hetah SPV a Central Processing-a an hralh a, Bagha target tawh lova. Lengpui atanga a ngai reng, a value addition a awm a, quintal 5/6 a kha quintal 1-ah a dry form chuan a ni dawn hrim hrim a. Chuan carqument extraction a ni emaw, a oil lakchhuah a ni emaw, a powder a ni emaw, khulai target tawh lova, helam atanga awmze nei a, value addition nei a kalpui tumnain tunah hian kan kal a ni.

PU LALRINLIANA SAILO : Pu Speaker, khawngaih takin a pawimawh riau mai. Nikumah cheng vaibelchhe 15 man lei tawh a ni a, nikum khan Mizoram chhung ami Mizo thar kha Rs. 8/- bawr vela lei a ni a. Tin, vai ta kha Rs. 17/- vela lei a ni bawk a, kuminah hian khulam atanga an lak tawh dawn loh chuan khawi ami nge kan chin tir dawn. Tin, engzat rate chiahin nge kan leisak dawn, a hringin Kg. ah engzatin nge kan leisak ang a, a roin engzatange ni ang tih kha ka'n zawt teh ang.

PU H. RAMMAWI MINISTER : Pu Speaker, a hmunah a hringin chin leh tur atan 1 Kg Rs. 6/- in kan leisak ang, an khuaah kan va lei chilh dawn a, an thenawmte kha an sem ve dawn a ni. Chuvang chuan, Pu Speaker, hemi atanah hian sum hi department hrang hrangah Ministry hrang hrangah kan dil lawr a, tunah hian Agriculture Ministry atangin hemi a humidifier, a tihrona khawl chikhat leina tur hian vaibelchhe hnih vel hi chu clearance an pe tawh a, kan account-ah hetah a rawn lut rih lova, an tifel tawhin ka'n hria a.

Tin, hemi Ministry of Non-Conventional Energy an tih, tunah chuan Ministry of Renewable Energy an ti leh tawh a, hemite atang hian nuai 120 kan beisei laiin nuai 135 kan hmu tawh a, chu chu ZEDA through-in a lokal a, chu erawh chu a dryer a kha Solar Dryer turin an p'an ve thung a, an ni khan khatiang khan chi hrang hrangin Mizoram Sorkar pawisa tel miah lovin Ministry hrang hrang pawisa cheng vaibelchhe 10 vel tlingkhawm thei turah kan ngai a. Chu chu tunah hian kan inkar mek a. Khatiang ang khan a tir atangin privatise sain nichina helaia MIFCO kan tih kha chu Govt. Corporation a ni a. Hnahlan kan sawi ang khan, privatise sa liau liauin a kal ang a. Tin, a man bithliah dan pawh helai producer company-te leh SPV te khan an rel ang a, Internation leh Prevailing Price an en ang a, khami atang khan an chhut leh ang a, chutah thil man sang lo awm a, a hlawk a nih chuan a hlawkna pawh kha helaiah producer company farmer tellet theih tura duan a ni. Chuvang chuan, tuna kan duan dan hi chu theihtawp kan chhuah ang a, a idea hi chu a tha a, privatise chauh a ni ta lova, a quality a kal tumna, world class tak taka kal tumna a ni a. Hemi humidifyer pawh hi khawl a nih avangin organic-a kan kal dawnin hei hi organic certified theih a ni em ? tiin Certified Agency-te pawhin an en vek tawh. An khawla an hmanraw hman zawng zawng an en vek tawh a, certify theih a ni e, an ti tawh a. Chuvang chuan Aieng hi tuna kan neih ai hian tam lehzual se, over produce-a awm dawn lo. Tuna a chingtute tan pawh hianin anmahni ta theihtawpa tihpun kha a tha a. Amaherawhchu changlo an awm avang khan nikum khan dik tak chuan insawithaihna te pawh a tam a, tunah chuan kan prospect tha pakhat a ni. Thlawhbuaah pawh a thi duh lo, Tanhrilah pawh Aieng mual a awm mai, ngaw karah duh duhin an va cho mai, Meikangah pawh a thi duh lo. Chuvang chuan,

maimitchhing chungin kan introduce ve tang tang a ni. Kan process dan pawh hi mithiamrawn a, Science & Technology Ministry hnuai an corporation chhuan, India Govt. Ministry hrang hrangin an rin berte chu, mite nena tang tlanga thil ti kan ni tih hi Pu Speaker, he House zahawm takah hian ka'n sawi duh a.

Tin, Tomato chungchang kan sawi leh lawk ang e. Hitech Green House chungchang kan sawi kan sawi hi Mizoramah hian prospect kan nei a ni. Thlai a ni emaw, vegetable pawh nise, Green House hmangan tih hian a lo hlawk a ni tih hi a chiang a. Pu Speaker, kan Member zahawm tak takte Israel kal ho khanin an Agriculture Technology hmun kha an tlawh nge tlawh lo ka hre lova, kan zawt miah hlawm lova. Keini aia tui harsa zawk, ram chhe zawkah Israel ramah khuan hectre khatah hian Tomato hi 5000 quintals an thar thei a ni. Tin hnih leh a chanve hmuna 5000 qtls. an thar theih chuan keini ramah engah nge kan thar theih lovang, kan leilung a tha zawk daih, kan moisture a tha zawk daih si. Kan tih ve loh vang mai a ni, kan zir ve loh vang mai a ni, i zir ve ang, i ti ve ang.

Tin, tunah hian bul kan tan dawn chauh a, company ten an rawn ti tan a, Champhaiah a thalo ber an tih ka tlawh a, a kalphung a dik tlat. India Sorkar pawh hi India Scientist thiamte pawh Israel hovin PUSA-ah kumhnih an rawn enkawl sak hlawm a, PUSA ah sawn Hitech Green House-in Tomato an zirtir a, tunah chuan kumhnih a liam tawh a, an kutah an dah a, sawtang sawn India company tam takin an la a, tunah chuan chance kan nei tha a ni. Chuvang chuan, Hitech Green House pawh hi Mizoramah hian introduce ve ila, zawi zawiin inzirtir ila, kan tih rualin tunah chuan bul kan tan chauh a ni a. Start stage chauh a nih pawh hian a titu pakhat chuanin Pu Rammawi, Bawngek nen kan tang mai ang, an tui tih hi chu ka ringtaw lo a ti a. Hei hi chu kan trial a nia, a that loh chuan kan thlak ang an ti a, tianganga hmala chu kan ni a.

Tin, Serthlumah pawh hian hectre khatah hian 800 qtls. an thar thei tlat mai a, khatiang mithiamte tihdan kha kan zir chhoh ve hi a ngai a ni. Vawiinnia kan zir loh chuan.....

PU K. LALRINLIANA : Pu Speaker, Green House kha nichina ka sawi ang khanin Steel Structure hmanglo pawhin thingte pawh kha a hman theih a nia, Maute pawh a hman theih a, a tlawm zawk si a, farmer-te hnenah a green line ringawt pek pawh khan hlawk takin a kal theih a ni. Chu chu keipawh a takin ka han hmu a, khatiang zawngte pawh khan kalpui nise a hlawk zawk awm mange tihte ka ngaihtuah a, chutiang zawng chuan kalpui theih a ni angem ?

**PU H. RAMMAWI
MINISTER**

: Pu Speaker, ka wind-up apiangin a rei in ti a, sawi tawi deuh rawh tih zel a ni a, ka duhtawk ka sawi ve ngailo a nia.

Pu Speaker, Sapthei chungchang hi, theihtawp kan chhuah a, a har lai ber chu G.I. Wire a ni a, hetah hian theihtawp kan chhuah a, MIP ah ringawt pawhin G.I. Wire 25,000 qtls. vel kan pui tawh a, technology mission-a kal a ni deuh ber a, an ni lam khu inngahna atan an thusawi hi kan sawichhuak vak ngam lova, kan Chief Minister hian theihtawp a chhuah a, a tanlakna avangin G.I. Wire hi engtin tin emaw kan hmuh belh hram zel a, Saptheiah hi chuan theihtawpin kan Sorkarin tan a la zui zel a.

PU H. ROHLUNA

: Pu Speaker, hei hi kuthnathawktute khawih a nih avangin a pawimawh hle a. G.I. Wire kha nichinah pawh ka sawi tawh a, Pawlrang khi tl:lawhhma mumal pawh la

lovin, buh pawh ching lovin Saptheiah an lo inngat laklawh a, vawiin thlengin hei kum 2 a ni tawh a, G.I. Wire hi an mamawh ang an la dawng lova, Mautam a ni chho lehngal nen hian harsatna an tawk nasa a ni. Chu chu khung Khawhai bial ramte pawh a ni a. Khawbung bial lamahte chuan a kal tha viau maithei a, bialtu sawi ang khan. Mahse, khilai kan han sawilai na na nate hi chu inngah nana hman an nih avangin min ngaihtuah sak ran dan hi an nei lawm ni tih kha ka ngen duh a ni.

**PU H. RAMMAWI
MINISTER**

: Pu Speaker, Pawlrang khua hi nikumah khan an tangruah bawh a, lo pe teh u ka ti a, 1004 qtls. G.I. Wire kan pe a. Pawlrang bikah khan.

PU H. ROHLUNA

: Pu Speaker, chu chu an indaih lo nasa, Buh hmun nei lovin an ti a, an bei nasa a, an dawng lo chu ka ti hauh lova, mahse, a daih lo nasa a ni. An la mamawh belh nasa, chu chauh a nilo, khaw thenawm pawh a ni.

PU H. RAMMAWI

: Pu Speaker, tan kan la a, a lawmawm e.

PU K. LALRINLIANA : Pu Speaker, Sapthei yellow variety kha Kolasib District-ah a tha leh lo an ti a, kan ching nasa tawh si a, kan mangang nasa a nia, hei hi engnge a awmzia le ?

SPEAKER : Kan kalphung hi zawhna leh chhanna hun ang deuhin kan kal a, a dikloin ka hria a.

PU K. LALRINLIANA : Nilo Pu Speaker, he thil hi sawi a tul a nia, mi tam takin tha kan seng thlawn a, a hralhnaah kan buai phah bawk a nia.

SPEAKER : Zawhna leh chhanna hun a tawp a, tikhan Wind-up hun a ni a, clarification chhe te te erawh kha chu thudang nise, zawhbelhna hun hmang ang hrim a kan awm chuan keimahni leh keimahni kan zahawm lo ang e.

**PU H. RAMMAWI
MINISTER** : Pu Speaker, pass chu ka dil phal rih lo ang, ka sawi dawn chauh a ni.

Department thar pakhat, tuna KVK kan tih tak mai chinchang hi ka sawi duh a. Thildang chu sawi kan mai ila.

ICAR Director General khuan North East-ah chuan nangni chiah hi District tina KVK nei in nih hi hre rawh u, min ti a, kan phur em em a. Amaherawhchu, han tih dawn tak takin KVK District tinah min pe tawh a, kan han ti dawn tak taka building sakna neuh neuh a lo ngai a, recruitment-ah guideline a lo awm a, tunhma Mizoram kan kalphung nen a lo inmil leh lova, siamthat ngai a tam ta lutuk a. Chuvang chuan, kan duh angin kan kal chak thei lova, tunah chuan kan inpeihfel thawkhat a, tun April, May thla chhungah hi chuan kan function tan thei vekin kan ring a. Mizoramah hian 5 min pekbelh a, pahnih awmsa a awm a, Hnahthial leh Kolasib hi awmsa a awm a. Tin, anmahniin competition a awm theih nan tiin. Tah hian Agriculture University, Selesih-a mi hi pakhat an pe a, chuan, keinin pasarih kan chang ta a. Tunah hian KVK thar 5 kan neihah hian KVK pakhat hian e.g. N. Vanlaiphaiah te, Khawzawlah te, Saiha, Lawngtlaiah te, Lengpuih te hian KVK pakhat hian Joint Director pakhat a awm ang a, hlawhpui Rs. 8000/- range paruk an awm ang a, chuan, Training Assistant

pathum Rs. 5500/- hlawh chin an awm ang a, Superintendent Rs. 5500/- khatiang ang khan staff 16 KVK pakhatah zel khan an awm dawn a ni. Saiha, Lawngtlai, N. Vanlaiphai, Khawzawl, Lengpuih te khan. Chu chu kan intifel tep tawh a, tunah hian building sak zawh loh P.W.D. hnuai kal Training Hostel tih neuh neuh tlem a la awm a, a dang chu kan zo deuh vek tawh a, chu chu recruitment hi tihlai mek a ni a. Tun atanga rei vak lovah hian kan tifel ang a. Mizoramah hian KVK a pawimawhna hi nichina kan sawi zawng zawng, thlai hrisei leh hrisei lo, a tih dan, Farm Science Centre an ti a, Farmer inzirtirna a ni mai a. Hei hi kan hman tangkai a, hei hi a nihna turahte a taka kan kalpui chuan Zoram kuthnathawktute tan hei hi an inngahna bulpui a ni dawn a ni tih kha Pu Speaker, ka'n sawi duh a ni.

Tin, a tawpna ber dawttu atan chuan. Agriculture lam hi Pu Speaker, ka la sawi hman miah rih lo a nia. Agriculture-ah hian a bik takin heng contract farming hi a taka kan kalpui hi a ngai tan tawh tak tak a, ka hmaa sawitute sawi ang khan Vety ho mamawh bikah hian hma i la hmasa ang aw, tiin Vaimim leh Bekang bikah hian chhungkaw 5000 vel atanga tanin contract farming-in Vety-in an lei nghal ang a, an tharchhuah kha e.g. Vaimim kha Rs. 7/- a ni ang a, Bekang kha Rs. 16.50/- a ni ang a, an leina tur tak kha. Khatiang leina tur awmsa khan contract farming-in tan ve ila, keimahni chhungkuaah hian, Mizoram chhungah hian tiin bul kan tan chho mek a ni tih kha ka'n sawi duh a.

Tin, kan ngaih pawimawh tur pakhat, kan Oil Palm chungchangah hian, Oil Palm hi theihtawp kan chhuah a, company-te nen kan tang tlang a, tin, department pawhin theihtawp kan chhuah a. Pu Speaker, hetah hian survival rate hi a sang thei lova, hei hi House zahawm takah hian chiang takin ka sawi tlang law law duh a. A chhan chu, nakinah kan sawichhuak leh tho tho dawn a. Mautam Sazu hian a lo duh bik a, he seedling hi. Hei vang hian Malaysian company ho pheikha chuan in Mautam a zawh hma chu keini chuan kan rawn miah lo ang che u, Sazu in an duh em mai an ti sa reng reng a. Chuvang chuan, a kung sang tak pawh kha a titlu tawp mai a, nichina an sawi ang khan, tunah hian kan survival rate hi a hniam ta thut a, pawl kan ti khawp mai a. Tuam tha leh turin Advisory Committee-ah pawh kan sawikhawm tawh a, hma kan la a, theihtawp kan chhuah zui ang tih kha ka sawi duh a.

Pu Speaker, thil thar kan tih a awm a, chu chu Mizoram kuthnathawktute area NWDPR (National Watershed Development Programme in Rain fed Area) kan tih leh Watershed Development Programme and Shifting Cultivation Area kan tihah hian tunhma kalphung ang lo takin a tharin kalpui kan tum a. Chutah chuan NWDPR bik hi Project 140 ruahman a ni a. Chutah chuan ram hectre 97000 a zauvah hmalak tum a ni a. Tunhma kalphung ang ni lovin, a area-ah theuh Watershed area-ah theuh PIA ah pawh DAO te awm lo sela kan ti a. A District level-ah D.C te Chairman ni sela, tin, Watershed area theuha hma la turin direction kan inpe vek a, kan guideline kan thlak a, notification kan chhuah vek a. Pu Speaker, mahni area theuhah enpui ni ta sela, chutiang bawkin Watershed Development Programme and Shifting Cultivation Area, Project 61-ah hma lak a ni a, hectre 30,000 target tum a ni a. Hemi atan hian 11th Plan-ah hian

NWDPRA atan khan vaibelchhe 58 pawm a ni tawh a. Tin, ka sawi hnuhnun zawk Shifting Cultivation Area-ah khan vaibelchhe 30, 11th Plan-ah pawm a ni tawh bawk a. Hemi pahnih atang ringawt hian hma kan lak fuh a, thildang nena kan tanrual tir theih chuan a area-ah chuan awmze neiin kan kal thei ang tih kan beisei a. Chutah chuan NWDPRA bikah hian Aizawl District-ah hian project 19, Lungleiah 19, Saihaah 18, Champhaiah 18, Kolasibah 16, Serchhipah 19, Lawngtlaiah 15, Mamitah 16 te tana pawisa target hi tam tham tak a ni a, a vaiin cheng vaibelchhe 6 leh nuai 66 lai mai ruahmanna kallai a awm a. Hetah hian tunah hian pawisa tam tak hi release tan a ni tawh a, hetah hian mahni area theuhah a Watershed area-ah khan awmze neia ke kan pen theihna turin, tin, tunhma chuan, directorate atanga centralise vek a ni a, kha kha a area kan in confine tawh a, kha kha mahni area theuhah tul kher tih chuan a project hming leh a area ka rawn pe vek che u ang a, enpui theuh ila, chu chu kan kuthnathawktute hlawhtlinna tur a ni ang tih kha ka sawi duh a.

Tin, chulovah chuan, crop insurance-ah hian bul tan ve hrim hrim ang kan ti a, kan fet dun tlang khawp a, company hi fet deuh mai a ni a, keimahni hi kan fet ve si a, MOU te siga a ngai a, tunah hian kan indawr ve mek a, crop engemaw bikah tal hi chuan i ti ang kan ti a, tunah hian crop insurance ti turin hma kan la a, kan indawr mek a ni tih kha Pu Speaker, ka sawi duh a.

Tin, a tawpna ber atan Pu Speaker, MIP hi sawi a hlawh khawp mai a. MIP hi kan hmang tangkai a ni, heng Red Oil Palm a ni emaw, Sapthei chak zawka kalpuina tur programme a ni emaw, Aieng process-na tur programme a ni emaw, Kang damdawi a ni emaw, Sawhthing a ni emaw, Kawnpui bialtu pawh kha, Pu Speaker, Hatkora kah dan hmingte kan sak sak kha a bialah khan a hmu em aw, Hortoki-ah khan ka ti a. (Pu Sailothanga : Hauh sak zel teh, khua a tam a nia lei loh) Pu Speaker, lei sak ngai tawh lo turin a thlanga khulai Bairabi thlen hma suarchhia kha kan bomb zawk ang a, chuan lawng kan ngaihtuah sak ang che u ang a, lawngin khuti khuan direct-in a kal zawk ang tiin tunah hian hma kan la mek, khulam suarchhia kha kan bomb ang a, lawngin Bairabi lamah entawn tlakin mai te nen lamin hralh theihna turin tiin Pu Speaker, hma kan la mek a ni tih kha ka'n sawi duh a.

Tin, Pu Speaker, Cold-Storage kha sawi nawi awm mahsela, a tha. Champhaiah kan ti leh dawn. Serchhip erawh kha chu kan tih a ni lo. Spices Board tunhma atanga an lo buaipui, an lo tih tawh a ni a, a mumal lova, kan thum that sak a, Cold Storage kan neih atang chiah hian farmer ten tanchhan an nei ang a, Kolkata dai a Cold-Storage an tan chinah chiah khan West Bengal-in Alu an surplus a, an thawn chhuak a ni. Chuvang chuan a hlutna hi kan hre chawp zel ang tih kha kan rilruah awm se, tih ka duh a. Tin, Pu Speaker, MIP atang ringawt hianin tunah hianin potential area connectivity atan hian KM 241 lai chu kan lai ve tawh a ni. Agriculture Link Road hi KM 241 kan lai, KM khat Rs. 3/- zel a ni a, a rate a chhe lutuk a, kan tal buai deuhhlekk a. tin, Land Development-ah pawh hianin kan han ti tak na a, Kolasib area-te, hmun hrang hrangah vawikhat kha chu kan han bawh deuh nual a, mahse, kan inngaihtuah leh a,

i set right ang, kan bawh bikah hian campact area-ah hian hma la ila, kan zawh hnuah kan chhuahsan ang a, bial dangah i kal zel ang tiin, Champhai zawl leh Serchhip leh Palak zawlah kan in confine deuh a, location tha deuhah kan ti a. Nikumah khan zo tur kan ni a.....interruption..... Champhai chauh nilo opposition bial Serchhip pawh hi, khati zawng khan kan ngaihtuah lo, a potential area kha kan ngaihtuah a. Pu Speaker, tlemin kan han herrem hlek a, tam tak bawh lovin. Nikum kha April atanga Fur a tlak tlat avangin kan thei lova, kuminah February atangin aw kan ti a, kan pawisa draw tur kan draw thei leh tlat lova. Tunah pawh hian kan la tan rih lova. Tunthla chhungah chuan kan tan ang a. Champhai zawl leh Serchhip phaizawl, a land development hrim hrim hi chu zawh vek kan tum ang a tih kha kan inruahman dan a ni a. Palak hi engchen nge kan kal theih ang ? Chuan, hemi 3 kan zawh hunah a dangah kan kal ang a, khatiang khan cluster approach-in kal ila chu, tuna kan ram zawl tha kan neih kan tih hi chu kan zawh vek tawh Ran ngai lova, tractor hmanga kan tih theihna vek turah hian kan kal tawh tur hi a ni a. Mahse, tunah bul kan tan a, kan tlai chuang lova, kan ti a. Kan Chief Minister zahawm takin MIP hi hmun hrang hrangah thil dang dangah pawh, Department hrang hrangah pawh a hman theih e a tih kha. Vety Department-ah pawh hian chhungkaw 440 ngawt mai PIGFED through-in Vawk leina kan pui a ni. Chutiang bawh chuan, Sericulture-ah pawh hian khaw sawm, District pangaah thlan bikah khaw sawmah an Pangang khawinaah hian kan pui bawh a ni. Khatiang khan a hrang hrangah MIP hi kan tang a ni tih kha Pu Speaker, ka'n sawi duh a.

Tin, chubakah Kolasib area tan thil lawmawm deuh mai pakhat, Kolasib area khu mithiamte enkawl tir ila tiin JAICA kan ti a, Japan International Corporation Agency an ti a, JAICA company kan chah a, an lokal a, kan entir a, min pui teh u, kan ti a Technical Cooperation turin. Chuan, an hlim khawp a, kan kal thla a, Delhi-ah DONER Ministry-ah kan lo tang rei lutuk a, DONER Ministry-ah a Minister hriat lohini official thenkhat sual bikte avangin min hreng rei lutuk a, an lo tithi sawn a. Mahse, a hnuah kan hre chhuak leh ta a. Tunah chuan Japan kan ti tlang vek tawh a, India Finance Ministry pawhin an ti tlang tawh a, Japan ramah tunah hian an analyse mek a ni a. Hemi a hlawhtlin hi chuan Kolasib area bik hi JAICA company-ina an thiamna hmang a, Japan company-in a tih chuan vaibelchhe 40 vel thleng hi a thlawnin anmahni company sum an seng dawn a ni. Keini tih hnua ti Himachal Pradesh amite kha chu 2006 a tan chauh an ni a, tunah farmer-in nuai 10 atanga nuai 24 te sum an lalut daih tawh, kan thik khawp mai. Mahse, a la tlai lova. Anmahni Japan ho an lokal a, Serchhip thleng hian i extend ang an ti a, chu pawh chu tunah hian kalpui lai mek a ni tih ka'n sawi duh a.

Pu Speaker, a tawpna ber atan chuan keini Mizoram hi kan lian lo, kan pawisa demand pawh tam lo mahse, kan khawp lo nasa. Chutih laiah chuan tunlai khawvel problem solve-na tur atana UNO-ina fund an dah-khawm, Carbon Credit Fund avail ve dan tur hi kan zawng a, helaiyah khan Assembly Room-ah khan UNO atanga Bangkok atanga lokalte pawh khan kan zawh lai khan country-ah pek a ni an ti a, UNO atangin ramah pek a ni ti khan min chhang a. Kan MLA zahawm tak takte in awm ang a, mahse, a sawi kha a dik hauh lo. Country-ah

bik an pe lo tih kan hria. Chvuang chuan, a tihdan min buaipui turin tunah hian Science & Technology Ministry hian study an neih theihna turin khami a consultancy cost kha min tum sak dawn a, chutiang tur chuan tunah hian bul kan tan a. Hei hi hlawhtling hlauh sela, consultant puitling han nei thei ila, he Carbon Credit Fund kan avail theih vaih chuan kan kumkhat Budget aia tam hi pawisa hi kan lalut thei a ni. Hemi tur hian kan vaia kan tankhawm hi a tul takmeuhin ka hria tih kha Pu Speaker, ka'n sawi duh a.

A tawpna ber atan chuan Member zahawm tak takte, Pu Speaker, vawiina kan rilrua awm se tih ka duh chu, mipui aiawh kan ni a. Zoram mipui tam tak zinga thusawi ai chuan keimahni Member ho hi kan chian chuan Zoram kuthnathawktute dinchhuahna tur atanah chuan tunhmaa shifting cultivation bansan a, compact area cluster approach-a kan kal hi a pawimawh tawh. Chutiang anga Zoram hi ke pen tura kan inzirtir a ngai a ni. Mahse, a awlai lo, engvang nge? Kan traditional practice kha ban tawp tur chuan a har flat. Kan kalphung nen pawh a inmil lo, kan sentiment nen pawh a inmil tawh lo. Mahse, kan zir a ngai a, chumi tur chuan Member zahawm tak tak ten mahni bial theuh hi approach-a, Mizo kuthnathawktute, Zoram kuthnathawktute kalpui tura ke kan pen hi a tul takmeuh a ni tih kha Pu Speaker, ka'n sawi duh a.

Tichuan, a tawpna tak tak atan ka demand No. 4, Law & Judicial, cheng vaibelchhe 6 nuai 73 sing 4 sang 5. Demand No. 12-na, Parliamentary Affairs, cheng nuai 26 sang 5. Demand No. 31-na, Agriculture, vaibelchhe 72 nuai 96 sang 5. Demand No. 32, Horticulture Department, vaibelchhe 15 nuai 20 sing 4. A vaiin cheng vaibelchhe 95 nuai 15 sing 9 leh sang 5 hi he House zahawm takin min pawmsak turin ka rawn ngen a ni.

SPEAKER : Le, Minister zahawm tak Pu H. Rammawia'n a demand-te wir-d-up-in pass a rawn dil a. Heng demand No. 4 - Law & Judiciary, Rs. 6,73,45,000/- (cheng vaibelchhe 6 nuai 73 sing 4 leh sang 5). Demand No. 12 - Parliamentary Affairs, Rs. 26,05,000/- (cheng nuai 26 leh sang 5) Demand No. 31 - Agriculture, Rs. 72,96,50,000/- (cheng vaibelchhe 72 nuai 96 leh sang 5) leh No. 32 - Horticulture, Rs. 15,20,40,000/- (cheng vaibelchhe 15 nuai 20 leh sing 4). A vaiin Rs. 95,15,95,000/- (cheng vaibelchhe 95 nuai 15 sing 3 leh sang 5) hi pass remti apiangin remti ti rawh ule. Remti lo kan awm chuan remti lo ti rawh ule.

Awle, Pu H. Rammawia Demand No 4, 12, 31, 32 - avaiin Rs. 95,15,95,000/- (cheng vaibelchhe sawmkua panga nuai sawmpanga singkua leh sangnga) te hi House-in lungrual takin a pass ta a ni. (Pu H. Rammawia : Pu Speaker, ka lawm e).

Minister zahawm tak Pu K. Sangthuama a Demand-te rawn wind-up-a pass rawn dil nghal turin ka sawm e.

**PU K. SANGTHUAMA
MINISTER**

: Pu Speaker, ka lawm e. Rei lutuk loah kan zo thei mai ang chu maw. Kimchang lutuk lova sawite pawh a tul mai thei a. Engpawh nise, Cooperation kha han ti hmasa ila. Cooperation lam kha sawi kan tam vak lo a, mahse, department sawi tur hi a tam deuh a, a zawng a zaa sawi vek sen a nilo a, ngaimawh loh vang pawh a ni hran lo a, hunin a daih lo hrim hrim a. Subject tin sawi zo vek tur chuan minute 1 den den a ngai ang a, chuvangin sawi loh lamahte a tang a nih pawhin a pawimawhna chu a nep chuangin ka hre lo a.

Cooperation hi Mizoram mai ni lovin India ram leh khawvel pumpuiin an ngaihpawimawh a ni a. Chuvangin, kan ramah hian duh ang tawkin kan ngaihpawimawh zo lo niin a lang thin a. Hei hi kan rilruah awm se ka duh chu, Cooperation hi a pawimawh a, heta tang hian miin ram an siam thin a, miin eizawna tam tak an hmu thin a, ramin a than phah thin tih kan hria. India ramte pawh tunhma atangin hetiang avanga ram thang chho kan ni a. Khawvel ram changkang zawkte pawh Cooperative movement avangin hetiang hian an thang thin. Chuvangin hei hi a pawimawh a, hei hi kan hriat reng atan a tha a ni.

Keini pawh hian Cooperation hnuaiiah hian society chi hrang hrang kan awm a. hengah hian hlawhtling takin kan kal chho ve mek a. Profit neihte hi a har viau rualin tunah chuan Apex Bank-ah te hlawkna kan hmu chho tan mek zel a. Sorkarin a pui chungin tunah chuan kan Apex Bank-te pawh profit neiin kan kal chho zel ta a, a lawmawm hle a ni. MIZOFED-ah pawh hian hlawkna kan hmu chho zel a, MIZOFED-in certificate tha tak tunhnai lawk khan March 12 khan kan dawng nghe nghe a. Hei hi Oil lampanga kan tih thatna vang a ni a, Pu Speaker, a lawmawm em mai a, i phalnain ka'n sawi lawk teh ang. 'This certificate of excellent is awarded to MIZOFED, Aizawl Mizoram a distinguish member of Indian Oil..... circle for outstanding performance during 2007 – 2008' tih a ni a. Hei hi MIZOFED tena Oil lama an enkawl thatna leh a hralhte pawh a ni zel ang chu, chung avanga he certificate tha tak hi hmu kan ni a. Ngaihpawimawhna thui tak nei thei tur kan ni hi a lawmawm kan ti a, kan hriatpui a thain ka ring. Tiang chuan Cooperation hnuaiiah hian society chi hrang hrang kan nei a, kan state-ah hian primary society kan tih, village-ah hian 2000 bav'r dawn lai kan nei a. Amaherawhchu, chung zawng zawngah chuan nung tha lo deuh te, nung tha deuh te an awm a, a vaiin a nung tha vek lova, a maherawhchu, vawiin chuan kan society-ah hian hma lam kan la pan ve zel niin kan hria a. Theihtawp chhuahin kan hnathawktuten an thawk a, chuvangin cooperation hnuaiia kan society reng rengte hma lam panin zawi zawiin kan kal ve a ni tih vawiin hian min hriatpui ka duh a ni.

Tin, Apex Bank han sawi leh ila. Kohhran lamte pawh loan kan pe tam khawp a, crore 25 vel Biak In 310 sak nan kan pe a. Hengte hi kan Kohhran hrang hrangten hlawkpui nan an hmang a, keinin hlawkpui nan kan hmang bawk a, Kohhrana kan pek hi chuan a repayment-te duhthu a sam deuh hlek a, mimal ang pawhin hma kan sawn viau a. Repayment-ah hian a return pawh hi tunhma ang ni tawh lovin, kan ziaawm viau tawh nghe nghein kan hria a ni. Tin, deposit-ah pawh 2006 – 2007 khan lakh 16255 zet deposit pawh kan hmu nghe nghe a ni, a lawmawm chho zel a ni tih kha ka sawi duh bawk a. Hemiah hi chuan thui tak sawi lo mai ila a thain ka hria a. chuvangin Department 4 lai sawi tur kan nei si a, duhtawk dawn mai ila.

A dang lehah chuan, Sericulture Department hi sawi an thahnem khawp a, a lawmawm ka ti a, mi 8 in an sawi a. Sericulture hi kan ram tana a thatna an hrechiang hlein ka hria a. Kan ram tihmel danglamna leh eizawna atana thil hmantlak ber niin ka ngai a. chuvangin Sericulture-a kan thanharh zual hunah kan eizawna pawh hi helamah hian awlsam takin hma kan sawn dawn niin ka hria a. Mimal mala an rawn sawi kha thahnemngaihna leh heti laia kan kalpui dan hi duhthawha, tun aia tha zawka kalpui nise, tih kha an rawn sawina tlangpui a ni a. Chuvangin a mimal mal sawina kha rawn point-out hranpa lovin a tlangpui hian sawi ta mai ila a thain ka ring a. Thahnemngaihnaa budget-ahte pawh leh sorkarin a ngaihsak danah pawh tun aia ngaihsak zawk deuh ni sela, hetah hian hma kan sawn thei ang, hma kan sawn chuan kan tan a tha ang tih ngaihtuahna kan MLA zahawm tak takte khan rawn sawi an ni deuh vek a, a lawmawm ka ti a. Tichuan, hetah hian hmasawna chikhat kan neih chu, nikum khan Director puitling siam a ni ta a, a hmaa Jt. Director kan neih kha Director charge lak tir mai a ni a, kum rei tak chung khatianga awm kha, Director puitling neiin tunah hian Jt. Director promotion kan siam chho bawk a. Tiang chuan hma kan sawn chho hret hret bawk a ni.

Tin, hetah hian chhungkaw engemaw zatin eizawn nan hman a ni tawh a, Sericulture hi long term policy leh short term policy inkawp a ni deuh ber a, kumkhat chungka puitling thei, kumkhat chungka thara pawisa tel theihna a ni a. Tin, hemi Mulbery phei chu kum 25 atanga 30 thleng dam thei a ni a. Kumtin cut mah ila, chutianga dam thei a ni a. Chuvangin Sericulture-ah chuan Mulbery hi a tha pawl ber niin a lang a, a dang pawh a that tho rualin a then chu a puitlin nan a rei ve thin a. Tiang chuan eizawn nan vawiiinah mi tam takin an hmang tawh a, tin, a phun ngawt phei hi chu helama tui mite hmalakna chu kan tam tawh viau a, kumina kan target hi 2008 leh 2009-ah hian chhungkaw 2000 hi kan han target leh deuh a, 2007 – 2008-ah khan chhungkaw 2000 kan phun tir bawk a, 2006 – 2007-ah khan 1750, 2005 – 2006-ah 1330, 2004 – 2005-ah 2998, tin, 2003 – 2004-ah chhungkaw 1630, tichuan, 2003 – 2009 thlengah chhungkaw 12008 hi pangang khawi tura Mulbery phunte an ni a. Hetah hian vawikhatah kan hlawhtling vek mai bik lo a, tin, mi engemaw zat chuan eizawn nan hmang tawhin a tlangpui thuin Rs. 20,000/- atanga Rs. 1,00,000/- inkar vel, a tam ber chuan Rs. 1,50,000/- a lei a. Chutianga Sericulture-ah hian hma la kan lo ni a. Hun a kal zel ang a, Sericulture lamah hian thanna duhawm tak nei thei turah kan inngai a. Tunah hian

Lunglei lamah, Zobawkah pawh sawn pangang chi a awpkeuna hmun kan buatsaih bawk a, a chang pheih chuan helamahte kan la pheih a, tunah hian a inte pawh tha zawkin sa ila tih ruahmannate kan nei a. Tiang chuan theihtawpin hnathawktute indaih lo mahse, kan bei a. Hemi a technician-te a ngaih avang hian indaih a har khawp a, training neihte a ngai a, a nazawng tan chuanin tih mai mai theih pawh a nilo a, training neihte a ngaih avangin a hautak angreng viau a. Laymen maiin a tih theih loh tam tak a awm thin a, chuti chung chuan tunah hian hmasawna thui tak kan nei chho zel a. Tin, Silk-te pawh kan tah a, Shawl-ah te kan tah a, tin, rizaiah te kan siam a, hetiangin chi hrang hrangah kan buatsaih chho zel a ni.

Tin, Champhaiah khian pangang chi siam kan tum bawk a, hei hi kan buatsaih mek a. Tin, farmer 200 hi training pe turin ruahmanna kan siam a, tin, pangang chi hi nuai thum leh singnga 2008 - 2009 hian siam tum a ni bawk a, tin, Cocoon 60,000 Kgs. leh Silk 4000 Kgs. kumtharah siamchhuah tum bawk a ni. tiang chuan keimahni, kan thawktuten an theih ang tawk tawk zel kan kal chho a, tam tak tithei kan la ni rih lo a. A chhan chu technical lampang, technician ti mai ila, pangang khawidan leh thil reng rengah ngai deuh a ni a, pawng a taka tih bawrh bawrh theih a nih loh avangin vawikhata tam tak chu heti laiah hian a tih theih loh a ni.

Tichuan, BAFFACOS atangin hmasawna tam tak kan nei a. Mihring, mimal, chhungkua anga tanpui nante kan hmang a, tin, Cocoon lei nan te kan hmang a, Theihmu tang leh equipment lei nante kan hmang bawk a, kan hmang tangkai hle a ni. A zat chu chipchiar takin kan sawi hman lova, keini chuan kan hmang tangkai hle a ni tih kha vawinah min hriatpui turin ka duh a. Tin, Khamrang leh Keifangah hian a huho deuh hleka cluster development siama hmalakna kha kan nei bawk a. Mizoram pumpuiah hian kan inzar pharh a, khaw khata in 1-2 lek hi chu a harsa a, a theih chuan in 4-5, 20-21 tal nise tia ngaihdan deuhhlekan nei a. Chuvangin kan MLA zahawm tak takten in constituency theuhah pawh hian hmasawna Mizo zingah ei leh bar zawna kawngah kan neih theih nan theihtawp lo chhuah theuh turin ka ngen che u a ni.

PU S. HIATO : Pu Speaker, khawngaih takin ka tibuai ve ngai lova, ka'n ding ve lawk teh ang. Tuna Sericulture-a in semah khan District 6-ah in sem a, Saiha leh Lawngtlai sem loh kan ni a, kha kha engnge a chhan le ?

PU K. SANGTHUAMA MINISTER : Sericulture-ah maw. Nikum hmasa lam thil tawh a ni a, sawlama kan sem loh nachhan pakhat chu, sawmi District 2/3 sawn Central lam atang hian a bik deuh hlekin project

hran deuh hlek siam a ni a. Tiang chuan committee-te kan siam a, a hranpain enkawlina in kan siam a, amaherawhchu, duhthu kan sam lo deuh hlek a. Sawlamah pawh an rawn endik hian a tlangpuiin Central atang pawh hian duhthu in sam lo deuh hlek a ni an ti a. Tunah pawh hian pawisa min release tur ang kha a lo thleng tawh a, kan RD lampangah hian an kawl a, chu chu min release mai teh u kan ti a, mahse min release thei si lova, keini ngaihnanah chuan pawisa kha nodal department an nihna, a hma pawn an lo ti tho a, sawlamah te kan pephei a, tunah pawh in sak tur tam tak a awm a, R.D. in min release duh loh avangin tunah hian kan rawn pephei theilo a ni. Min release sela a pawisa tunah hian helam atanga khawihpui lo a, sawlama committee nen, District Council-te nena lo ti vek tura tih kha tunah pawh file a lo kal mek a, kan duh a ni. Mahse, RD hian min release duh si lova, min release duh loh chuan a kir leh mai ang ka ti a, chuvang chuan, tlema ngaihnathiamna sawlam pawh kan neih loh chuan. A dik chiah chuan Chakma District-te, sawmi District pathum reng rengah chuan pangang khawi chungchang leh a chin chungchangah pawh helam ang thlap tura kan ngai dawn a nih chuan a fuh lo deuh dawn a. Chuvang chuan, tlema ngaihnathiam deuhna kan neihte pawh a thain ka hria. RD ho hian min release se chuan thil dik ber niin ka hria. Chuvangin kumhni kan semah khan kan lo telh lo a, kha kha kan lo telh loh chhan niin ka ring deuh. Kha kha duhtawk leh mai ila.

Disaster Management & Rehabilitation

Department hi, Department thar ang deuh hlek, hming thlakna te pawh a la rei lova. Chuvangin hei hi a pawimawh em em a, a pawimawh zia hi kan hre deuh deuh a, kan la hre zel dawn a, tunah hian Plan Sector-ah hian kan nei lova, pawisa dah ve a la ni lova. Disaster Management & Rehabilitation Department-in sum provision a neih hi Non-Plan Sector vek a ni a, chuvangin development work atan sum engmah a nei ve lova, tanpui ngaite tanpui nan Central Finance Commission & Recommendation angin pawisa, sum thahnem tak hmuh thin a ni a, chu chu CRF Fund vuah a ni a, 11th Finance Commission-in a recommend angin CRF hi 75% hi Central Sorkarin an rawn pe thin a, State Sorkarin 25% a tum thin a, 2007-2008 ah CRF ah hian nuai 523 Central share a ni a, tin, State share kha nuai 697 a ni a, 2007-2008 kal lai mekah ruahsur avanga tuilian leh leiminin thlai/In te a tihchhiat avangin tanpui ngaite tanpui nan nuai 812 lai sen a ni a, nuai 697 aia a tam nachhan chu hei hi kan neih zawng zawng 697-ah khan 812 kan seng a, hemi hi kan neih aia tam kan senna chhan hi chu a hma ami hman zawh loh nen khan kan la neih avanga hei hi seng thei kan ni a. Tin, 2008-2009 ah hian nuai 719 vel kan beisei a ni. 2007-2008 chhungah hian CRF District Commissioner-te hnenah hetah hian pek an ni. Aizawl D.C hnenah nuai 85, Lunglei D.C-ah nuai 43, Saiha D.C-ah nuai 38, Champhai D.C-ah nuai 48, Kolasib D.C-ah nuai 50, Mamit D.C-ah nuai 50 Serchhip D.C-ah nuai 43, Lawngtlai D.C-ah nuai 43, a vaiin nuai 400 CRF kan pekte chu a ni a.

Mizoramah hian Mautam tam lokal turah hian nikum kha a seh kum tur a ni a. Nikum hmasa pawh khan engemaw zat Sazuin a lo seh a, kan thlai neihte kan buh neihte, chuta tan chuan Central Sorkarah hian kan report thla a, chumi kan report atang chuan Central Sorkarin a rawn endik a, a rawn endik kha Central Sorkar chuan engemaw zat min rawn pe a, Rs. 881 lakhs min

rawn pe a, chuan, 1 lakh chu State Sorkarin in tum ve a ngai ang, an ti a, 882 lakhs hi G.R. angin min rawn pe a, Aizawl District-ah 265.27 lakhs kan pe a, Lungleiah 132.21 lakhs, Saihaah 61.05 lakhs, Champhaiah 102 lakhs, Kolasibah 73.47 lakhs, Mamitah 92 lakhs, Serchhipah 73 lakhs, Lawngtlaiah 83 lakhs kan pe a, kha kha D.C ten an sem tura pek a ni a. Hei hi tunlaiin harsate hnenah an sem mek a ni tih kha kan hriat atan ka han sawilang duh bawk a.

Tin, hei lo hi Agriculture input subsidy hi nuai 367, hei hi CRF atanga pek a ni bawk a, chu chu Aizawl 100.51, Lunglei 60.67, Champhai 49.76, Saiha 30.21, Kolasib 32.24, Mamit 30.93, Serchhip 27.28, Lawngtlai 35.4, khatiang khan D.C. hnenah pek vek bawk a ni a.

Tin, cash component-ah hian SGRY-ah hian 44 lakhs hi kan nei bawk a, hei hi CRF atanga pek a ni a. Chuan, NREGS awm lohna District 4-ah khan hei hi pek ve thung an ni a, Aizawl District-ah 17.47 lakhs a ni a, Kolasib-ah Rs. 8.70 lakhs a ni a, Mamitah 10.34 lakhs a ni a, Serchhipah 7.49 lakhs a ni a. Hei hi District tina kan pek dan a ni. Hengie hi keini hian D.C-te kuta pek vek a ni a, heng hian ei neilo harsa tam zualte leh tam zual lo pawh inhlawhna atan siam a ni a. Kan House-a kan Member zahawm tak tak ten kan zavaia hriat a tha a, chuvangin, hei hi ka'n sawilang a ni a.

Tin, nikum lama harsatna nasa tak kan tawh avangin leimin leh ruahsur nasate avangin Mizoram harsatna tam tak kan tawh a, chutah chuan Central Sorkarah min han endik sak turin kan ti a, report kan pethla a. Chuan, Central Sorkar chu nikum Kristmas hma lawkah an lo kal a, team an rawn intir a, chu chuan tunah hian eng angin nge pawisa min pek theih dawn chu kan hre chiah lo nain, engemaw zat hi chu kan hmu thei turah kan ngai a. Tin, nikuma Buh leh Thlai tam tak Sazuin a seh a, a seh zawng zawng kha report turin kan ti a, Agriculture hotute hnenah report an rawn pe vek a, tichuan, khawtina kha report kha D.C. te nen khaikhawmin an rawn theh lut a, chutah chuan Central Sorkarah tunah hian kan thehthla leh tawh bawk a, vaibelchhe 591 leh 63640 chu tunah hian kan thehthla a, hei pawh hi Central team lokal a endik turin ngen an ni a. Eng hunah nge an lokal dawn chiah chu kan hre lova, an lokal dawn hnai turah pawh ngai ila a tha awm e. Hetah hian Sazuin Buh a seh mai ni lovin, thlai chi hrang hrang a seh report atanga kan lakkhawm a ni a. Serthlum erawhchu CRF kan tihah hian a tel thei tlat lo mai a, chuvangin, nichina Serthlum tam chungchang an sawiah khan erawh chu hemi an guideline-ah hian a tel ve thei tlat lo tih kha hre bawk ila a tha awm e.

Engpawh nise, Disaster Management Department hian nasa takin a thawk chho ve mek a, tin, a hautak angreng khawp mai a, tih tur tam tak a awm a, heng chhiatna, tuilian, thli, leimin, thihna, lungrem chim, in chhia, khatiang zawng zawng kha a hma vek a ni a. Chuvangin kan staff-te pawh hi an la tlem a, an indaih lo khawp mai a, harsatna tam takte kan tawh a. Tunah hian hnathawktu lakbelhna tur pawh Sorkarin min phalsak a, Jt. Director pakhat, Dy. Director pakhat, A.E pakht, FAO pakhat, Inspector pakhat, LDC pakhat, Data Entry post pahnih, Peon paruk, Sweeper/Chowkider pakhat, J.E. pakhat,

Steno Gr-III pakhat, chutiang chuan 17 lai hi post hi min phalsak a. Tin, tunkum thar chhoah hian Sorkarin min pek belh theih chuan hnathawhte pawh ziaawm chho thei turah kan ngai a. Engpawh nise, kan Department hi Department thar hret pawh ni mahselangin, a hautak khawp a, tunhmain hetiang hna thawh kha a la awm tehchiam lova, tunkum engemaw lai atang khan ngawrh takin hnathawh a ni chho ta a. Chuvangin Department pawh changtlung deuh hleka enkawl chhoh zel ngai tur niin kan hria a ni.

Tin, Silpouline chungchang hi, ni e, kan MLA zahawm tak takte khan in ngaipawimawh khawp mai a, kei pawh in ngaihpawimawh ang chiah khan ka ngaipawimawh ve a. Engpawh nise, hei, kan la Session dawn a, a tihdan kawngte pawh a awm turah ngai ila. An rawn dil thin a, an mamawh khawp hian ka hre mai a, ka rilru tak phei chuan thingtlanga harsa tak tak, in chung lo chhiate, an bang han pin nante hmang duh awm tak tak te, khatiang kha chu a pawimawh awm hian ka hre khawp mai a. Mahse, kan Rule neihte hi siamthat mai tur em maw ni chu aw ? te ka ti a. Kan Rule neih hi chuan a phal chiah lova. Mahse, an hmanna kha a tangkai si a, pakhat chauh pawh khan an in pawp kha a lo khuh thei a, a hmanna kha a tangkai ropui mai si a. Chuvangin tihdan hi engtingge kan zawn ang aw tihte chu ka rilruah chuan a awm reng a. Engpawh ni sela, thingtlang harsa zawkten pakhat chauh an han hmuh pawha lawm em ema an hawpui thin avang hian erawh chu a tihdan te pawh hi kan la danglam theih chuan a tha khawpin ka ring a. Tichuan Session zawh dawn lamahte pawh Silpouline -te chu kan la pe turah ngai ta ila. A tam nge tam lo chu thudang ni sela. Engpawh ni sela, kumtina kan tihdan alawm le, kha kha a tlangpuiin duhtawk ila.

Buhfai lam chungchang hi kan rilrua awm ber pakhat a ni a, tah hian sawi tur tam tak a awm a. Amaherawhchu, a chinchhuakin kan sawi seng lovang a, a rawn sawite pawh khan mi 20 dawn laiin buhfai chungchang in rawn sawi a, a lawmawm ka ti a. Kan vei tlanga, kan vei vang leh chaw puar lovin kan awm ang tih kan hlauh vang a ni a. A dik chiah chuan hemi kawngah hian kan zavaia kan tanruah a pawimawh takzet a, tampui mitthi upa chuan an lo ti ngai a, Mautam tam hi Tampui Mitthi a ni ber ang a. Tunhma nen chuan a inang tawh lo deuh hlek a, Mautam hmasa khan kum 19 kan ni a, Tam kum khan kum 20 kan nihna a ni ve tawh a, kan tlangval ve tawh a. Chuvangin Mautam hmasa kha kan hrechiang khawp a, tun angin kan ramah hian kawngte a la tha lova, Saihate phei saw chu a thleng lova, a thlennate phei chu hman deuh lawk 1972 hnulam 1974, 1975 chho vel khan Motor lian chu a thleng chauh a. Tin, Saitualte pawh khi Mautam hmasa hi chuan Jeep kha kawii sarutin a kal a, Champhai pawh kawii surutin a thleng deuh chauh a ni. Chuvangin harsatna tam tak, Mautam hmasa chuan kan nei a, tunah erawh chuan kawng engkim a lo tha ta a, kan harsatna pawh a ziaawm chho viauin a lang a. Buhfai hi tunah hian a ram pumpuih hian keimahniin thar kan nei loh avang erawh chuan, harsatna kan tawk lo thei lova. A chhan chu, Central Sorkara kan Buhfai lak thin hi buh engemaw zat kan thar thin kha chuan lak tam loh deuh pawhin kan khawsa thei deuh mai a. Tunah erawh chuan, nikumah lo nei kan awm meuh si lova, 70% - 75% hi lo nei kan ni a, chuta tanga lo nei (nikuma lo nei kha) chu 30% pawh hian lo an nei ta lo a ni si a.

Chuvangin a lo nei chhun pawh a lo seh leh bawk si a, chuvang chuan harsatna namen lo kan lo tawk ta chu a ni mai a. Engtingge kan tih ang tih ngaihtuahna nasa takin a kal lo thei lova, hemiah hian a hmasa a kan ngen duh che u chu, kan zavaia kan tanrual a ngai a, opposition kan ni emaw, rulling kan ni lo emaw tanpui tawhah hi chuan kan zavaia kan tan ho a ngai a ni tih kha a hmasain rilru puitling tak kan siam a tha hlein ka ring a.

PU R. LALZIRLIANA : Pu Speaker, nia, tanrual a ngai a, tumah hleih neih lova tih a ngaih lai khan, ka bial Rulchawm khuaah chuan kar kalta deuh khan MNF tan Kg I ah Rs. 10/- in Retailer-ah Buhfai lak tur a awm tih kha V/C tlanguin an au a, hei hi engnge ni a chhan le?

**PU K. SANGTHUAMA
MINISTER** : Pu Speaker, chutiang chu a awm a nih chuan a dik lovang, chutiang ang thil chu a awm a nih chuan kan lo enfiah ang a, Ration Buhfai kan pek atanga chutiang an lo ti a nih chuan a diklo hulhual ang a.

Amaherawhchu, Bazara Buhfai lei an nih chuan kha kha chu duh chuan an sem thei a ni mai a, keini supply atang chuan chutiang ang chi chu engnge an lo ti a nih leh nih loh kan lo enfiah phawt ang a, chung chu tih loh tur a ni. Tumah thliar bik kan nei lova, tunah hian kan zavaia a inangkhat tlang theuh a Buhfai hi kan dawn theihna turin Sorkar pawhin theihtawp a chhuah a ni tih kha hria ila.

PU ZODINTLUANGA : Pu Speaker, point khat chauh, khalai point a rawn sai lai khan, kan bial Thenhlumah chuan MNF Lunglei District President chuan lehkha a ziah sak a, MNF ho bik tan quintal 5-te khami party mite tan khan, khang te kha a hriat a tan ka sawilang tel nghal a ni, a remchan laiin.

**PU K. SANGTHUAMA
MINISTER** : Pu Speaker, a tha e. Kei pawhin Buhfai ngawr ngawr hi chu ka strict khawp a, a rawn dil thinte pawh hi mimal chuan kan pe dawn lo che u, kan Governor leh kan Chief Minister pawh hian rawn dil ta se, fiamthuon tunah chuan mimal ang chuan kan issue theilo a ni ka ti thin a.

Amaherawhchu, pawl leh khawmpui ang chi te a an lo mamawh a nih chuan, quintal 10, quintal 20 te, tin, a quintal 300 thleng pawhin KTP/TKP khawmpuina a chhim lam leh hmar lamah special-in additional-in kan pe mai a, tunah rih chuan khatiang anga lo tih kha chu thianga lo kan ti vek a. Chuvang chuan, fimkhur takin Buhfaiah hi chuan, mipakhat kan pek chuan mipakhat dang pek leh a ngai a, Thanga pek a ngai a, Liana pek a ngai a. Chuvang chuan, special hi chuan i pe lo hram ang u tih kha ka tan chhan a ni ber a.

Tin, a pek pawh kan pe lova kan Directorate leh hemi kan District Office atang chuan, khatianga lo ti an awm a nih chuan, tunhnuah chuan lo titawh lo turin information tha tak kan pe ang a, kha kha chu thil dik a ni lova, thil mawi pawh a ni lo a ni. Kan House hian hretlang ila a tha ang e.

Tichuan, Buhfai hi kan tla lo a ni e, tiin nimin lamah te zawhnaah pawh kan sawi tawh a. Engpawh nise, kan Buhfai hmuh dan hi hmannah khan chiang takin kan sawi tawh a, tunah hian han sawi nawn leh ka'n duh deuh hlek a. Kan quota tuna kan thlakhat lak hi chu 116400 qtls. a ni a, APL ah hian 42600 qtls. a ni a, BPL ah 14700 qtls. a ni a, AAY ah hian 9100 qtls. a ni a. Tichuan, economic course kan ti a, 50,000 qtls. hi tunah Rs. 1,444.89 in quintal khat hi kan lei a, tichuan, a vaiin quintal 116,400 hi thlatina kan lak a ni a. Tichuan, hetah hian a manto hian quintal 50,000 thlatina kan lei hian Sorkar hian tunah hian thlakhat Buhfai lei nan vaibelchhe 11 leh nuai 1195 leh sing 5 leh 500 tunah hian thlakhat atan Buhfai lei nan kan hman ta a. Tichuan, quintal 50,000 hi a to kan lei Kg khat 14.50 aia tam hreta kan lei avang hian tunah hian thlatin Rs. 25 crore dawn hi Sorkar hian mipuia a subsidy-in Sorkarin a pe a, thlatin nuai 250 hi Buhfai Retailer-a kan sem hian mipui eiah State Sorkarin a thlawnin a pe tih hi vawin hian lo hre tlang ila a thain ka hria a. Tichuan, tuna kan ruahman ang hi chuan a manto a quintal 50,000 thlatin kan lei nen hi chuan kumkhatah hian vaibelchhe 150-200 inkar vel hi a ngai ang a. Mahse, tuna a manto a quintal 50,000 kan lei pawh hi a la tawh lo deuh a kan hriat avangin tunah hian kan la dil belh leh ta a, quintal 30,000 vel kan dil belh a. Hengte hi kan la lei leh a nih phei chuan Buhfai man hrim hrimah hian kumkhatah vaibelchhe 150-200 inkar vel hi kan mamawh dawn a ni tih kha House hi ka hrih duh a.

Engpawh nise, Buhfai man hi chu kan Sorkarin ngaihtuah thei zel turah ngai ta ila a thain ka ring a. Buhfai hi awm phawt mai se kan tih hi a dik a. A leina chu engemaw tiin Sorkarin inhlawnate siamin a bei zel ang a, chungah chuan harsatna a lo awm deuh a nih pawhin a tih dan Sorkar a awm a, a ngaihtuah zel turah ngai ila a thain a rinawm a.

Tunah pawh hian kan vei ber fur chhung hian ei tur kan chhek khawl lo ang e tih kan hlau tlangpui ber a. Keini pawhin kan hlau tho a, kan MLA zahawm tak tak ten in hlauh ang tho khan Pu Speaker, keini a fawng vuantu, a enkawltu department pawh hian kan hlau tak zet a. Chuvangin theihtawp kan chhuah a, Motor kal theih lohna lai turahte fur chhunga a kal theih

lohna lai turah pawh theihtawp chhuah a, dah kan tum hram hram a. Tichuan, tunah hian January - March ni 15 thleng khan quintal 393200 kan lachhuak tawh a, heti pawh hian a dik chiah chuan, Buhfai hi Kg. 3 a kan sem hi chuan rinaiin a hek khawp mai a, khawpuiah hi chuan Kg 2 chauh a la ni a, zokhuaah te Kg 3-a sem hi chuan a lo hek khawp mai a. Chuvangin, rinaiin chhek tam a har rih a, theihtawp kan chhuah ang a, fur chhunga kan ei tur chu chhek ngah hram hram turah ngai ila. Phullen lam chho Suangpuilawn lam hi furah a kal dawn miah lo tih kan chiang a, kan kawng neih hi a diak hle ang a, chuvangin helai tlangdung chho, hmarchhak tlangdung chhote hi ngawrh bik deuh tur a ni a. Tin, chhimlam District 2/3 saw ngawrh deuh a ngai bawk a. A kawng tlangpui dung chu kan MLA zahawm tak tak ten in sawi ang khan furah pawh kal theihna deuh vek a ni a, a harsa lova. Tin, Kawrthah tlangdung lampangte khatiang khan helaiah a chart kan nei vek a. Theihtawp kan chhuah ang a, harsatna neilo turah inggai ila.

Mahse, harsatna Buhfai tunarawn sawi thin ang hi kan ngen duh che u chu, tunah hian khaw khatin harsatna a lo tawh emaw, kan biala harsatnate an lo tawh emaw hian kan MLA te pawhin hriatpui deuh hlek ila, ngaihven pui ila ka duh khawp mai a. Mahni bial theuhah khan lo bengvar ula, tin. Tam committee kan din a, emergency tam committee headquarter-a kan din angin District-ah kan ti a, District-ah village-ah kan ti vek a. Chuvangin hetiang tamte hi an lo awm a, harsa tak tak lehzuale an lo awm a, an khaw dinhmunte, khatiang hre tur khan committee kan din vek a ni a. Chuvangin heti laiah hian kan MLA te pawhin mahni constituency theuh kha tun aia active lehzuale ngaihtuahna leh rilru lo pe turin kan chah nghal duh bawk che u a. Heng kan committee-te pawh hi nakinah chuan MLA te pawh a District-ah khan telh vek a ni a. Chungte nen chuan nakin Session zawhah phei chuan kan tam dante en a ngaihtuahna siam kha a tha khawpin ka ring a. An lo ko lo a nih chuan hemi Aizawl District-ah hi chuan a hranpain an la ko hman lo a ni mai thei a, a dangah pawh.

Tin, District-ah Fian a inang lo a, District hi an active hleih em em a, District thenkhat chu a bu ang thlapa hnathawkte an awm a, a lawmawm ka ti a. Harsatna a awm dawn chuan vir vat vat te, vir vat vat manglo te a awm theih a. Chuvang chuanin mimal kan fak vak chuan a then kha kan relte a ni ang a. A tlangpuiin active leh active lo deuh te a awm theih a. A active deuh hlekin an thawh ang hian thawk vek sela chuan, mahni District theuh hi chu tun ai hian harsatna kan tawk tlemin ka ring a. D.C fel tak tak te kan nei a, a lawmawm ka ti a. Harsatnaah pawh kan in phone zung zung a. Nimina kan Opposition Leader zahawm tak Pu Hawla'n a bial neih loh harsa deuh hleka a sawi pawh kha kan phone pawp vat a, D.C in hetiang hian minrawn chhang a. An harsa hran love, Ration hi ni 4.3.2008 khan pek an ni a, tin, ni 5.3.2008 khan MZI hian Buhfai engemaw zat an lo pe bawk a. Tin, ni 12.3.2008 ah khan Ration hi an pe leh a, G.R ah hian Rs. 6,000/- an pe bawk a, tin, BAFFACOS ah hian Rs. 15,000/- an pe bawk a. tunhnai maiah khan tiang chuan harsatna awm hranpa loin khilalah chuan an kal thei e, tiin D.C in minrawn phone a. (Pu. R. Lalziriana : Kha kha zawng Pu Speaker, a dik, tunah chuan tih ni sela, kha an harsa a, midang pawn an tanpui a,

tunah tak chuan an harsa ta rih love rawn ti sela, chutiang ang zawk tur chu niawm tak a ni.) Chu chu a ni tho ang chu, engpawh ni sela, hei hi an dawn dante rawn sawi a, tunah chuan ngaihtuah awm an awmlo tihna a ni a. Engpawh nise, harsat lai chu a awm thei ang a, an harsat lai khan chu tunah ni lovin, tunah chuan hei hi an dinhmun a ni e, harsatna an tawk love, a rawn ti a. Chuvang chuan a lawmawm hlein ka hria. Hetiang harsatna tawhnaah hian nichina ka sawi ang chiah khan direct-a Aizawl rawn approach tawp mai khan hlawkna a nei lova, kan sawi fo a, hetah committee pui kan siam a, heta committee pui kan siam khan district tinah D.C. hoin committee kan siam leh a, chu chuan a aia hniam leh deuhah an siam a, Zonal Officer-te engkim enkawltu an siam vek a, chuti chuan khuaah an siam leh ta a. Khuua harsatna namen lo an tawk a nih pawn a dik chiah chuan, khuua committee kan siamah te V/C ah te khan chutiang khatieng chu hei kan dinhmun a ni a, hei hi ti sela, an ni chuan an ngaihtuah vat vat zel a ni.

Tin, Buhfai pek mai tur a awmlo a nih pawhin BDO te SDO te tikhan an hrilh a, an ni chuan an ngaihtuah mai a ni, hetah D.C. te chu kan rilruah awm sela, kan inchhan hmana bul a niin ka ring. Chuti nilo a, khawchhak tawp emaw, khawthlang tawp ina a harsatna Aizawl a rawn ti a, chanchinbua a rawn chhuah te te a tih dawn chuanin chanchinbu hi a dik em? hei hi zu ngaihven rawh u, zuk tih a, keinin kan tih chhung khan a tlai thin a. Chuvangin a sam zawng a ni a, ka sawi kha, tin, tanpui awlsam zawng a ni tih ka sawi kha. Serchhip District-ah te phei chuan Pu Zika khi a viak a tha a, a lo fel bawk a, a zuan a zang bawk a, a ti vat vat mai a, ti hian harsatna an nei mang lo a nia, a tlangpuiin. Chuvang chuan, a lawmawm ka ti khawp a, khatieng Khan a inkahpupchaw deuh hlek a kal turin kan MLA zahawm takte pawhin in bialte lo hrilh darh ula, tin, khatieng atang khan hma la tlang ila, in bialah khan harsa zual bikte kan awm em? harsa ngawih ngawih an awm em? chaw nghei mai tur an awm em? tihte. Tihah chuan, khaw 10 te, khaw 15 te chauh a ni a, a har lem hranpa lo a ni. Chuvangin bial kan nei theuh a, khatianga kan tih phawt chuan kan zavaiin kan tang tlang ang a, harsatna kha chu a ziaawm em em ang tih kha a rinawm tlat a ni. Chuta tan chuan kan ngen nawn leh che u a ni. Awle, engpawh ni sela, thuilo deuh emaw tih pawhin a lo rei leh mai thin a, engpawh nise, sawi duah lo mai ila a that ka ring tawh a, ka'n duh ber chu tam lo ila kan duh ber a, tam loh nan theihtawp kan han chhuah ang a, in bialte theuh riltam lova siam kan han tum phawt mai a ni a. Buhfai hi tam tawk chhekkhawl kan han tum phawt mai ang a. Engpawh ni selangin, kan zavaia kan tan tlan a ngai a. Nichina kan sawi ang khan Buhfai hi a tam tawk phawt chuan a leinate chu engemaw inhlawnate pawh la awm chho zel turah ngai ila. Kan Rail lokaloh leh phai lam atanga a lokal hian harsatna kan tawk leh hret thin a, hei hi erawh chu a buaithlak khawp mai a. Chuvangin Central Sorkar pawh hetilaiah hian Railway Minister pawh lehkha zu thawn vang vang ila a that ka ring a. Hemiah hian theihtawp an han chhuah hi a ngaiin ka ring a. Rail-ah hian kan buai loh phawt chuan a Buhfai a kha chu kan buai lo tur a ni a. Nikhata Wagon 20 atanga 30 inkar kal zat zat se 10,000 quintals hi nitin a lo thlen chuan kan buai lo ang a. Amaherawhchu, karkhata vawihnih khat chauh a lo thlen chuan kan rilru a kan hriat tur chu buaina chu kan tawk thei viau ang tih kan rilruah hria ila.

Tunah hian Mizoramah 1,41,879 quintals kan nei a, kan thlakhat tla emaw chu kan nei a ni. Engpawh nise, chumi chhung chuan a lo thleng chho zel ang a, kan tihbelh zel ang a, a lungngai zawng ringawta tam pawh hi ngaihtuahna siam lovin, mipuite thlamuan zawnga MLA te phei chuan ngaihtuahna kan siam a thain ka hria. Zankhat mut tuiloa awm pawh hi a nuam lo khawp mai a. Chuvangin hemi kawngah hian fimkhur deuh turin ka chah duh che u a ni.

Hmannia Buhfai chhia chungchang kan Member zahawm tak Pu Zira zawhna kha. V/C te leh a endiktute leh a neituten an sawi dan chuan, bag hnih vel kha tha vak lo a lo awm a, chu chu an han thianfai a. khatih lai lai khan nu pakhatin a lo tham a, khati khan a lo kalkual chho ta a, helai kha a lo thleng ta niin an sawi a.

Pu Speaker, Buhfai hrim hrim hi BPL Buhfai a awm chuang lova, hei hi kan hre lova, BPL Buhfai a hrana la emaw min ti thin a. Vawiin atang chuan House-a kan MLA zahawm tak takte hian hria ila ka duh chu, Buhfai hi kan lei a, kan lakhran a, BPL kha kan lakchhuah atang khan an la ve mai a ni. BPL Buhfai emaw APL Buhfai emaw a awm chuang lo.

PU R. LALZIRLIANA : Pu Speaker, BPL in an lak kha BPL Buhfai a ni mai alawm, khalai ho mai mai clarify tum kha.

PU LALRINLIANA SAILO : Pu Speaker, V/C tinin khatiang khan BPL Buhfai tiin an ziak.

**PU K. SANGTHUAMA
MINISTER** : Mi thenkhat ten Buhfai a awm hrang bik, chuvang chuan a chhia min pe bik thin tihte a awm a, chu chu a awm love tih ka hrihfhahna mai a ni.

Hei hi chu ni e, Bag 2 chu lung lo pawlh deuh a nih an pha lo. Hmanni pawh khan 'a awmlo' ka ti lova, hetiang hian a chhia chu a awm thei a ni ka ti a, tunah pawh bag 2 chu tha vak lo a awm a, chu chu Retailer ten kan thap fai vek e, an ti a. Tiang chuan a vaiin an la a, tunlaia kan Buhfai hrim hrim hi a chhe hrampa lova, mahse, phai atanga lokal thin hi engemaw ti a hengte pawlh a lo nih thin hi chu, a tlangpuiin tunhma atangin a awm fo a ni.

Vawiinah 100% chu a thianghlim lovang, khuta tanga min lo pek an ni a kan Pu ten. Chuvang chuan min lo pek chhiat leh kan ei chhe deuh a ni mai a. Tunlai chu min pe tha a, an dem awm love tih kha hria ila a tha ang e.

Tichuan, Pu Speaker, ka demand No. 17 – Foods, Civil Suply & Consumers Affairs, Rs. 103,54,55,000/-, Demand No. 30 – Disaster Management & Rehabilitation, Rs. 7,71,60,000/-, No. 37 – Cooperation, Rs. 8,97,40,000/-, No. 41 – Sericulture, Rs. 7,08,65,000/-, Total 127,32,30,000/- hi he House zahawm tak hian min pass-pui turin ka ngen e.

SPEAKER : Le, tikhan Minister zahawm tak Pu K. Sangthuama'n a Demand kan sawihonate rawn sawifiahin pass a rawn dil a. Heng Demand No. 17 – Food, Civil Supplies & Consumer Affairs Rs. 103,54,65,000/- No. 30 – Disaster Management & Rehabilitation Rs. 7,71,60,000/-, No. 37 – Cooperation Rs.8,97,40,000/-, No. 41 – Sericulture Rs. 7,08,65,000/-, Total – Rs. 127,32,30,000/- te hi pass remti apiangin 'remti' ti rawh ule. Remti lo kan awm chuan 'remti lo' ti rawh ule.

Awle, tikhan Pu K. Sangthuama, Minister zahawm tak Demand No. 17, 30, 37 leh 41, a vaiin Rs 127,32,30,000/- te hi House-in lungrual takin a passed a ni. (Pu K. Sangthuama, Minister : Pu Speaker, ka lawm e) Tikhan, vawiina kan business kan lo zo ta a, kan chawl ang a, naktuk ni 20.3.2008 zing dar 10:30 ah kan thukhawm leh dawn nia.

Sitting adjourned at 8:30 P.M.